

ناريسا

(ملحمة عشق ودماء)

ميرفت البلتاجي

ناريسا

ميرفت البلتاجي

الطبعة الأولى (أغسطس ٢٠١٦)

تصميم الغلاف: محمد مجدي يوسف

المراجعة اللغوية والتنسيق الداخلي: إسلام علي

مدير النشر: هند عبد الله (نور مانجا)

إشراف عام: رباب فؤاد

رقم الإيداع: 2016/16775

الترقيم الدولي: 978-977-6534-19-3

جميع الحقوق محفوظة

للكاتبة ودار الفؤاد للنشر والتوزيع، وأي اقتباس أو تقليد أو إعادة طبع أو نشر أي جزء من هذا العمل، سواء إلكترونياً أو فوتوغرافياً أو أي شكل آخر دون تصريح كتابي موثق من الناشر، يعرض مرتكبه للمساءلة القانونية.

هذا الكتاب يحمل رأي ورؤية الكاتبة وحدها، ولا يمثل الدار أو العاملين بها. جميع أحداث وشخصيات الرواية من وحي خيال الكاتبة، وأي تشابه بينها وبين الواقع هو من الصدفة لا أكثر.


**دار
الفؤاد**
للنشر والتوزيع

Alfouad_publishing@hotmail.com

facebook.com/fouadpublishing



ناريسا

(ملحمة عشق ودماء)

(رواية)

ميرفت البلتاجي

دار
الغؤاد
للنشر والتوزيع

♥ إهداء ♥

لك عزيزي القارئ وعزيزتي القارئة

أهدي روايتي بكل حرف فيها

وكل إحساس سيترك أثراً ما في قلوبكم

ناريسا ليست مجرد كلمات على ورق

من فضلك لا تقرأ بعينيك

افتح قلبك؛ فكل كلمة دفع أبطاها دماءهم ثمنا لها

(ناريسا) مهداة لك أنت .

ميرفت البلتاجي



جلبه الصعيدي عاشج للبارود والفبي
جطعت طريقه صبية
دجت لعيونها الربابة والني
جالت له في جلك عشج لي ياخي
جالها داري عني رموشك
لتجرح جلبي المصنوع من الطين والمي
من جلك كنت ميجبول على عشج التار والدم
ما تعشجي مني سوادي
ولا أعشج من بين عيونك نار وضي





«ثمة وقت في حياة الإنسان إذا انتفع به نال
فوراً ومجداً، وإذا لم ينتهز الفرصة أصبحت
حياته عديمة الفائدة وبائسة»
- وليام شكسبير

.....

تحركت الأقدام بسرعة بين ردهات طويلة بيضاء، يدفعون أمامهم بقوة وسرعة
ترولي مخصص لنقل المرضى... رقد جسده الضخم خائر القوى وأيدٍ كثيرة تمتد في
محاولات مضنية لوقف نزيف الدماء الذي لا يعرفون مصدره بعد... صرخة
شقت الهمهمات الصاخبة:

«النبض بطيء جداً!»

«اعمله تدليك لعضلة القلب بسرعة... نيرس جهزي لي (١ ملجم) أدريالين بسرعة
مع حقنة ليدوكاين!»

قفز أحد الأطباء فوق المريض بدون أن يتوقف الترولي.. وبكلتا يديه بدأ الضغط
على عضلة القلب بالتناوب مع ضخ الأكسجين من خلال القناع الطبي فوق أنفه
وفمه.... وباقي الفريق في سباق محموم مع الموت.

تركض جوار الترولي المسرع، عيناها متجمدتان على قسماته الجامدة الخالية من
معالم الحياة... بقلب مخلوع ووجه حاكى الموق شحوباً نفذت من حنجرتها كل
الصرخات... حتى أنفاسها عجزت عن التوقف لتقرر عنه الموت لو كان الاختيار
بيدها... بكاء ونواح الفتاتين بجوارها لم يؤثر بها... فجأة وبدون إنذار اقتحم

الترولي باباً أبيض مصمتاً إلا من نافذة زجاجية صغيرة ملطخة زادت من صعوبة الرؤيا من خلالها، لتقف عاجزة قليلة الحيلة لا تدري ما تفعل.

تمسكت الفتاتان بثيابها وصوت نشيجهما يمزق نياط القلوب... يَنشُدُن الاطمئنان بأخبار لا تعرف لها سبيلاً.

أعادت النظر كالمجذوبة للباب الذي اختفى خلفه، ثم استدارت بقوة لدى سماعها ذلك الصوت الخشن القاسي:

«اخرسي وسدي خاشمك انتِ وهي... ضبي ساكنة لأفرغ فيكم البارودة!»
أحاطت صدرها اللاهث بذراعيها تحديق به بعينين أبّت دموعهما أن تخفف احتراقهما...

ضاقت عيناه وهو يحدها ببرود شديد.. ثم اندلعت شرارات الغضب بحدقته عندما وقعت نظراته على ذراعيها المكشوفين.... أخرج زفرة حارقة يغض البصر ويستغفر.. ثم خلع عباءته ووضعا على كتفيها:

«استري نفسك يا مرت أخوي»...

أمسكت العباءة تهم بدفعها عنها، فأحكم أطرافها حولها وعيناه تحذرانها من التصرف بتهور... ثم أشار للفتاتين تحاولان كتم نشيجهما بصعوبة: «اجعدي چار البنّته... وخودي بخاطرهم ولو صوت واحدة فيهم طلع هطلع روحها من حلجها»...

أمسكت إحدهما بيدها متوسلة:

«الله يخليكي... تعالي چارنا»...

أطاعت توسلها البريء وجلست، تحديق بالباب الأبيض الكالچ تكاد تتوسله أن يعيده إليها سالمًا...

حتى قتمتات الفتاتين بجوارها لم تسمع منها حرفاً؛ فقد سافرت في أحلامها، غائبة الوعي عن ما حولها فلم تسمع همساتهما.

«هنا... يا ترى إحنا السبب في اللي بيحصل ده؟؟»

«ليه بتقولي كده يا نجلا!؟»
«يعني لو مكانش عملنا الي عملناه يمكن مكانش حوصل الي حوصل»
«كله مقدّر ومكتوب... ادعي ربنا بس ياخد بيده»
«فأكرة يا هنا؟»
«أيوه فأكرة»
«وندمانة؟»
«وإيه يفيد الندم!؟»
«طب هم هيعملوا فينا إيه!؟»
رفعت رأسها خلصة فهاالتها نظرة الشر التي يرمقها بها قرييها الغاضب....
أمسكت بيدي رفيقتها ترتجف:
«مش عارفة... بس شكله ناوي على نية سودا»
«هو ميجدرش يعملنا حاجة... أهلنا هيجفوا له»
«وهم فين أهلنا!؟ بصي حواليلي وشوفي»
«طب هنعملوا إيه!؟؟»
«لو نقدر نرجع بالزمن لورا... نقدر يا نجلا!؟؟»



منذ ثلاث سنوات

.....

بيت خشبي مهجور... يحوم داخله صمت مريب... دارت عينها حولها بتقرب تحاول تهدئة ضربات قلبها... فجأة يتحرك الباب بصرير مزعج من مفصلاته القديمة الصدئة... ارتفع صدى نبضاتها حتى وصل لحلقها. وظل يقترب... ثم صرخة مرتعبة لتصيح بعدها بشعور عارم بالراحة:

« يا الله عليكي! انتي مش هتبطلي خصلتك دي؟! دائماً تتسحبي زي أم سحلول؟! »
«ومين أم سحلول دي؟! شوفتيها قبل كده؟!»
«لأ.. بس هم بيقولوا كده... ما علينا خلينا في الي إحنا فيه... جبتي الأسماء؟!»
مدت لها يدها بالورقة:

«أيوه كل الأسماء الي حطوها كتبتها هنا... وانتي جبتي أسمائك؟»
مدت لها يدها بورقة مماثلة:

«أهه شوفيها كده على ما أشوف ورقتك»
وانهمكت الفتاتان في قراءة الأسماء ثم نظرتا لبعضهما وهتفت نجلا:
«إيه رأيك؟؟»

أومأت هنا: «أعتقد إننا نعتمد الخطة الي اتفقنا عليها (يا بخت من وفق راسين في الحلال)»

ضمت نجلا شفتيها: «امممم.. فكرك إكده؟»
«أومال يعني هنسيبهم يخبطوا في بعض؟! أنا وانتي عارفين كل الأسماء الي في الورقتين ونقدر نقول مين هينفع مع مين؟؟»

«امممم عندك حق.. بس انتي لاحظتي إن اسم أختك مش مكتوب؟!»
هتفت هنا: «ولا أخوكي رافع كمان!»

«متنسيش أن رافع جاري فتحته على معالي من زمان»

«وكمان زينة أختي مخطوبة لدكتور من فرنسا»

تنهدت نجلا: «الحكاية كده مش هتنفع... الاتنين دول بالذات أصل المشكل ولازم يكونوا فيها»

«إزاي يا فالحة... لا أهلك ولا أهلي حطوا أسمائهم»

تألفت عينا نجلا بشيطانية: «وهو أحنا لازمنا إيه في البلد دي... إحنا نحطوا أسمائهم وأنا شايفة أن زينة مناسبة أكثر من معالي لرافع... رافع طول عمره بيحلم بواحدة تخدمه وتخدم أهله، وتكون تحت طوعه يجولها يمين تجوله له حاضري... يجولها شمال تجول له أمرك»..

وقفت هنا مصدومة: «انتي بتتكلمي عن واحدة تانية خالص... انتي فهمتي زينة غلط... زينة مولودة هنا في الصعيد آه بس قضت معظم فترات دراستها في فرنسا وبقالها سنتين منزلتش الصعيد.. يعني مش هتنفع رافع خالص... دي مش بتعرف تسلق بيضة»

«وهو دا المطلوب يا مخبلة... انتي مش أخدتي في الفيزيا الأقطاب المتنافرة تتجاذب، والأقطاب المتشابهة تتنافر»
أومأت هنا بمحاولة لاستيعاب فكر صديقتها، فأردفت:

«خلاص... يوبجي كل واحد هيتجوز المضاد له... رافع يتجوز زينة»..

أومأت هنا مرة أخرى قائلة ببريق متألق من عينيها العسليتين: «وسيف ياخد...
اممممممم معالي»

صفقت نجلا بيديها قائلة: «وچاسر ياخد مين؟؟؟»

هتفت هنا: «سمحة طبعاً... لازم جاسر بالذات يتجوز واحدة تطلع منه القديم والجديد ومافيش غير سمحة»

ثم أردفت حائقة: «بس سمحة بتحب جاسر»

«أيوه وچاسر بيحب كل البننة... أكيد سمحة هي الوحيدة اللي هتعرف تلمه»..

«كدة يبقى باقي اتنين... رجل من عندكم وبنت من عندنا»

فكرت نجلا لبرهة ثم تألقت عينها الشيطانيتان: «رشاد وفريدة»
«بس رشاد كاره الجواز، ومش عاوز يتجوز خالص، واللي بيحب له سيرة الجواز
بيهب فيه زي البتاع دا الخربان اسمه إيه؟»
«اسمه وابور يا معدلة... بس على فكرة فريدة طبعها هادي وهتعرف تطوي
رشاد تحت جناحاتها كيه الفروج لما يحاجي على فراخه».
بنبرة قلق سألتها صديقتها: «فكرك الحكاية دي هتنجح؟»
«طبعاً يا بنتي إحنا بنلعب هنا ولا إيه؟! وزي ما انتي خابرة.. الـچوازي دي
لازم تنجح... وإلا الدم هيو بجي للركب يا خيتي»
«على رأيك وإحنا ما صدقنا... أخيراً حال الولاد دول هيتصلح... بدل ما هم
نازلين طحن في بعض بسبب ومن غير سبب... بس على فكرة لو زينة عرفت اللي
هنعمله، الطاحونة الجديدة اللي في البلد مش هتدور إلا بدمي»
أومأت نجلا تزدد لعابها بصعوبة: «وفكرك رافع لو عرف هكون فين يعني؟! أكيد
في خبر كان معاك»
«يلا يا بنتي ربنا يقدرنا على فعل الخير»
رفعت صديقتها يديها بالدعاء وهي تغمز بشيطنة: «ياااااااااااااااا رب»



(قبل ثمان وأربعين ساعة)

تقود سيارتها على الطريق السريع... تأففت بضيق... من بعد خروجها من مطار الأقصر حتى بلديها قبل إسنا بعدة كيلومترات... لم تتذكر أن الطريق طويل بهذا الشكل... زادت من ضغطها على دواسة الوقود لعل سرعة الرياح تبرد الحر الثقيل الذي يجثم على أنفاسها... هزت رأسها بحرية ليتأرجح شعرها الأحمر الناري بعشوائية في الهواء وتسمح للنسمات المتسللة تبرد نحرها المحتر من كثافته... شتان الفارق بين طقس باريس المثلج وهذا الحر القاطن في بلدها... ابتسمت بخجل لنفسها باعتراف صعب المنال في الظروف الاعتيادية... مع الفارق فهي كالسمكة التي عادت أخيراً لبحرها بعد غربة طويلة... أخرجت تنهيدة طويلة تتذكر وجودها بين أهلها... لم تظن أبداً أنها قد تشتاق لهم بهذا الشكل.. ضغطت على زر يفتح سقف السيارة المتحرك ويُطير شعرها الأحمر الطويل خلفها، ضحكت متخيلة منظر والدها رضوان البداري لو رآها بهذا الشكل... وزاد سرورها متخيلة وجه أخيها سيف الشديد العصبية... هزت كتفها بقلّة اكتراث مرددة بصوت عال وكأنها تعانق الهواء: «وحشتوني وحشتوني، وحشتووووني، ووحشتوا عيوني وفكرتوني بالي غاب»

لافتات جديدة على الطريق لم تكن موجودة من قبل نهبتها إلى اقترابها من بلديها... لم يتبق إلا خمسة كيلو مترات فقط... تألقت عينها على الخاتم ذي الفص الماسي الذي يضوي بين أصابعها المشدودة على المقود... داعب ذاكرتها ملامح ضياء المصرة وهو يضعه في إصبعها بنفسه، هامساً بلكنته الفرنسية الغالب عليها لهجته المغربية: «حبييتي... تذكّرني كلما توهج فص الماس ببريق عينيك» تنهدت بقلب مثقل بالحنين... ولماذا لا توافق على عرضه بالزواج؟! هو استجابة القدر لكل أمنياتها في زوج المستقبل... فضلاً عن وسامته فهو غني، ورومانسي كما أبطل الروايات، بالإضافة لابتعاده عن بلاده بزمان كاف يجعل أخلاقه أقرب للرجل الأوروبي أكثر منها الشرقي... فلن تعاني أبداً من عصبية وتسلسل رجل لمجرد

أنه يرى المرأة كمخلوق أدنى، كما يحدث بدوام كلي في هذه البقعة الشديدة القدم من أرض مصر... تحديداً في قرية الصوالحة، وهي قرية صغيرة ربما لم يسمع بها أحد من قبل، تقبع في أحضان مدينة (إسنا) العريقة...

ألقت نظرة خاطفة أخرى على الخاتم وتخيلت رداً فعل كل واحد من أهلها... أمها الغالية (فاليريا) ستضمها بقوة وشوق وستبارك لها... وأختها (هنا)... لا شك أنها أصبحت صبية فاتنة الآن بعمر الثالثة عشر... منذ سنتين كانت مجرد طفلة صغيرة... لا شك أن عقلها سيظهر وعينيها ستوهجان ببريق الماسة بحجم الخمسة قيراط... والدها الحاج رضوان البداري... اعتصرت شفيتها بأسنانها تعضهما بقوة... وعجزت تماماً عن تخمين ردة فعله... فرغم حنانه المتدفق بدون حساب بالنسبة لرجل صعيدي فخور... لو لم يحظ بزواجه (فاليريا) هدية القدر له، لأضحى مثل أي رجل صعيدي آخر... تغلبه فطرته الذكورية وعصبيته في أغلب المواقف حتى الجور... أما سيف... فهو الوحيد الذي سيعب عليها أموراً كما يفعل دائماً...

اتسعت عينها بذعر عندما نبت في نهر الطريق فجأة فرع شجرة ملقى بالعرض... برعب مسيطر ضغطت بكل قوتها على الفرامل، وجذبت المكابح اليدوية لتدور السيارة حول نفسها عدة دورات قبل أن تتوقف تماماً... تلفتت حولها بذهول رافضة تصديق أنها بخير ظلت متمسكة بالمقود بأظفارها لاهثة وقلبها ينتفض برعشة صاحبها ألم حاد في صدرها أخذ ينخر أضلاعها... وضعت يدها على موضع الألم محاولة تهدئته... تطلعت بدهشة لمجموعة من الشباب تدور حولها على صهوة أحصنتهم يتضحكون ويتندرون... حاولت السيطرة على أعصابها وهي تصيح فيهم ملوحة بذراعها متجاهلة النغزة المتزايدة في صدرها:

«لو سمحتوا ممكن أمر؟»

هتف أحدهم مازحاً: «يا صلاة الزين! دي الباربي بتتكلم... يا وجعة مربربة وكيه لهطة الجشطة»..

ضح الشباب بالقهقهة الساخرة... ثم ألكل نفسها مرة أخرى وهي تغادر السيارة
تجبل نظراتها الساخطة فيهم بلا مبالاة: «ما فيش فايذة فيكم... جاسر الرحابمي...
كالعادة.. بتمارس هوايتك في مضايقة بنات البداري... خد نصيحتي... لم شوية
العيال الي معاك قبل ما حد من البداري يشم خبر إنكم قاطعين عليا الطريق»
صرخ المدعو جاسر بحماس وعيناه تتألقان ببريق الإعجاب: «يا وجعة زي
الجشطة بالعسل الأبيض... دي السنيورة خابرة اسمي... بس المشكل يا حلوة إني
مشوفتكيش جبل سابج في نواحيننا... رغم إني خابر كل بنات البداري.. بت..
بت»..

ضح بقهقهة وقحة وشاركه أصدقاؤه المزاح فهتفت باحتقار: «أيوه أنا من
البداري.. سبت البلد وانت يا دوب، أرك تجري ورا عربيات الرش».
اشتدت عروق الرجل بالغضب الأسود الموروث من أسلاف أسلافه عندما ينتابه
إحساس أن رجولته مهددة: «متخلجش لسة... الي يتناول على راجل من
الراحمة»

عقدت الفتاة ذراعيها على صدرها قائلة بنبرة محتقرة: «يا ربي! هو انتم لسة
عايشين في زمن أهل الكهف... وخايف شنباتك تنهز فيقع الصقر من عليها؟
اسمع يا شاطر... لو الوضع زي ما هو من سنتين... يبقى اشترى روحك وروح الي
معاك... والحق استخبي في ديل جلابيتك قبل ما الدم يبقى للركب»..
صرخ الشاب بعنفوان من أهدرت كرامته، وهو يلكر جواده ليزداد اقتراباً منها:
«انتي بتهديني يا بت البداري؟! هو حوصل إيه... الانصاص جامت والجوالب
نامت؟!»

ندت عنها صرخة خوف عندما ظننته سيصدمها بجواده الأرعن كفارسه...
سخر أصدقاؤه من ذعرها الواضح، وبدؤوا يقلدونه... تخلت عن خوفها سريعاً
وبدأت بمجابتهم الند بالند... فوجئ جاسر بجراتها وهي تحاول جذبه من
جلبابه ليسقط من فوق صهوة حصانه... استمرت بالمحاولة حتى نجحت

بإسقاطه... رمقته بشماتة يتمرغ في التراب كالثور الحرون... قفز واقفًا برشاقة يحسد عليها، ينفض عنه ما علق بجلبابه الثمين، ونيران غضبه الأعمر تتأجج بظلام حدقتيه الفاحم... شمخت بأنفها تتحداه الاقتراب.

لم يبال بقفاز التحدي الذي ألقته بوجهه، وبرعونة شديدة قبض على شعرها يلوي عنقها الجميل، امتدت أظافرها الطويلة المطلية تنسبها في عنقه رافضة الخضوع، وقبل أن تتمكن منه... صوت غاشم اقتحم المعركة غير متعادلة الأطراف:

«جاسر... بعد عنيها حالًا!!»

وبفعل السحر... تراجع جاسر خطوة للخلف بعد أن تحررت أصابعه من شلالات شعرها الأحمر على غير رضى... حدج صاحب الصوت الذي تعلقت به كل العيون بنظرة حاقدة... سهل جواده ليرتفع عاليًا بقوامه الطويلة، فحبست أنفاسها... كفارس أسود من العصور المظلمة... مهيب، مخيف... اختفت نصف ملامحه في الظل... كان يتصدر قرص شمس الظهيرة، فظهر تتخلله ألسنة من لهيبها وكأنه جزء ينفصل عنها، ويزداد اقترابًا...

هتف جاسر بنبرة راعدة: «رافع... مكنتش خابر إنك إهنة...»

شعرت بذبذبات خطيرة تصدر من هذا الفارس الأسمر، وأقل ما يقال عنه في هذه اللحظة أن بارومتر مزاجه يشير إلى درجة عاصف... وبدون أن يترجل عن جواده الأكثر نزقًا من صاحبه: «أنا حذرتك جبل سابج يا جاسر إنك تتعرض لأي حد من العيلة دي»

هتف جاسر بنبرة أقل حدية، كأنه شخص مختلف تمامًا عن الأرعن الذي قطع طريقها منذ لحظات: «أنا مكنتش خابر أنها من البداري»

وضع راحة يده في صديري جلبابه المفتوح مكملًا بنبرة ساخرة: «إلا صحيح يا سنيرة انتي منيهم؟؟ وأنا الي فكرتك من دوكهم»

وضح بالضحك وشاركه رفاقه بينما هتفت الفتاة باستياء:

«impossible!.. انت كذاب... وقاحتك زادت لما قلت لك إني من البداري،

ونصحتك تبعد عني بدل المشاكل وانت صممت تكمل في مضايقتي»

هتف رافع متجاهلاً كلامها مخاطباً ابن عمه وصُحبته: «بعد دجيجة واحدة مش تنين... مش عاوز أشوف خلجة ولا واحد فيكم... لا إهنيأ، ولا في أي مكان في البلد كلاتها... لحد ما أنسى عمايلكم الخايبة دي»

سيطرت على أعصابها بقدرة برود هائلة تعلمتها من مخالطة الباريسيين لسنوات طويلة... راقبت بنظرات شامته الشباب يجرون أذيالهم منكسين، جارّين أحصنتهم خلفهم فلم يجرؤوا على امتطائها في حضرة كبيرهم.

التفت بحدة تخترق أذنيه ذبذبات ضحكاتها الشجية... وفجأة فقد إدراكه، لم يعد يدري إن كان الوقت نهراً أم ليلاً... أو كان صيفاً أو شتاء... وتلك المغوية تتراقص خصلاتها النارية مع الهواء وكأنهما يهمسان بحديث خاص للعشاق... ونغمات ضحكاتها وكأنها آلاف الآلات الموسيقية مع تغريد البلابل تتدافع متزاحمة لتخترق أذنيه وحواسه... انتفض وكأن صدمة كهربائية صعقته على حين غفلة.. وتمتم بدون أن تسمعه: «ناريسا!»

لم تستطع منع نفسها من الضحك... حتى انتبهت لنظراته المحتقنة التي كان يرمقها بها من علو صهوته... أباحت لنفسها الحرية بعد اقترابه لتأمل منقذها بعمامته البيضاء الكبيرة التي تزين رأسه وملامحه شديدة الحدية ونظراته الثاقبة... يزينه ذلك الشارب الجميل الذي يزيد من قسوة ملامحه وقد أضفت ذقنه غير الحليقة شراسة بدائية لمظهره... وميّزته تلك الوحمة السوداء التي لم تغيرها السنوات لتظهر دائرية مميزة بين شعيرات لحيته الخفيفة... جذب لجام جواده فسهل لتفريق من شرودها على صوته الذي ما يزال فاقداً لهدوئه: «بتضحكي؟! كنتي هتضحكي أكثر بكثير لو كان حد غيري خاصةً من أهلك هو الي وصل... يظهر إن بعاذك نساي الي ممكن يحصل بين أهلي وأهلك نتيجة لموقف سخيف زي دا!»

اعتدلت في وقفتهما عندما لم ترق لها نبرته المتعالية:

«بتهاجمني زي ما أكون أنا اللي قطعت الطريق على ابن عمك وحاولت أعندي عليه... بدل ما تشكرني لأني مضربتوش على وشه قلم على قلة أدبه ووقاحته!؟»

رفع أحد حاجبيه متكهماً بوجه بارد مسيطر على انفعالاته: «اشكري ربك إني وصلت في الوقت المناسب وأنقذت حياتك قبل ما تتهوري وتعمليلها... وقتها مكنتش هقدر أخرجك من تحت إيديه حته واحدة»

كانت واعية تماماً لحضوره الذي طغى على كل إحساساتها وجعلها متبلدة... كيف أخرستها نظراته! كيف تجمد الوقت والهواء من حولها! مشدودة بادلته التحديق المسعور.. وحمته تنبض بشراسة ملامحه، وكأنه يخفي أكثر بكثير مما يبدي، في محاولة ناجحة تماماً للتحكم بعضلات وجهه.

لم يهلها الرد فلكر جواده، وهو ما يزال يقهقه ساخراً من سذاجتها..

تهدل ذراعها بإحباط لتخرج أنفاسها المحتبسة، وكأنها ظلت أسيرة صدرها من لحظة ظهور الفارس الأسمر... أمسكت باب سيارتها عائدة خلف عجلة القيادة... توقفت فجأة تعيد النظر لعاصفة الغبار التي خلفتها أرجل جواده الأبيض ذو العرف الأسود... رفعت حاجبها باندهاش لتنتبه الآن فقط أن رافع تحدث معها بلهجة أهل المدن... بينما حديثه مع أولاد عمه دار باللهجة الصعيدية... يبدو مختلفاً، وكأن همجيته التي عُرِف بها دجنت تماماً... علت ابتسامة نقية ثغرها الرقيق متممة بلكنة صعيدية: «يا ترى مين اللي هتجدر عليك يا ويلد الرحامة، وهتكسر خاشمك؟»

هزت رأسها بابتسامة غامضة عائدة لسيارتها تستأنف رحلتها، وفكرة مرعبة تدور برأسها «رافع كان على حق في أمر واحد... لو عرف أي رجل من عائلتها اعتراض جاسر الرحامي ورفاقه طريقها ستحدث مذبحة مؤكدة... وهي الأدرى ببحور الدماء التي يمكن أن تفيض لسبب أقل بكثير».

لاح لها من بعيد قصر عائلتها الشامخ (قصر البداري).. كان تقريباً في الطريق المعاكس لقصر الرحامة... وكأن بينهما اتفاقاً غير مكتوب على اقتسام القرية... فلا أحد من أي من العائلتين يتواجد بطريق العائلة الأخرى... وما تزال الأوضاع متوترة كما كانت منذ الأزل.

تجمع الخفراء أمام البوابة الضخمة يتدافعون لفتحها أمام السيارة الحمراء الصغيرة، والتي دخلت تطلق أبواقها بإعلان مدوي عن وصولها أخيراً. خرجت من السيارة لتجد أمها الحبيبة بانتظارها بلهفة، وشوق، ودموع فرحة محتبسة، وبجوارها تقف أختها الصغيرة... والتي بالمناسبة لم تعد صغيرة أبداً... قفزت بحماس على الدرجات القليلة تصل لأمها تحتضنها بقوة... ثم أبعدت رأسها تتأمل ملامحها الحبيبة تتحدى بشموخ سنوات عمرها الخمسين، شعرها الأحمر القصير المختبئ أسفل وشاح حريري أزرق شاحب... بينما حافظت ملابسها على الطابع الصعيدي، وللحاج رضوان الفضل الأكبر في إقناعها بالتخلي عن ملابسها المفضلة، عندما انتقلت من وطنها الأم (فرنسا) ولم تظن أنها ندمت يوماً على وجودها في هذا المكان، طالما أنها جوار حبيبها «mon petit ami» كما كان يحلو لها دائماً أن تطلق عليه بلغتها وعيناها تذوبان عشقاً... لطالما حسدت أمها على حبها لرجل مختلف تماماً عن كل مقاييس الرجولة المعتمدة في بلادها:

« زينة.. زينة... mon amour »

« Oui Mama ... وحشتيني كثير.. كثير ماما»، واحتضنتها تدور بها وأمها تضحك

بسعادة

« زينة.. بس يا بنت.. أنا أدوك...»

قهقهت زينة: «اسمها أدوخ يا ماما»

ضربتها أمها على يدها بتوبيخ ناعم: «أنا أكلو الي أنا آوز... Chut»

«والله عال، وأنا ماليش نصيب في الحب دا كله!؟»

أمالت رأسها تنظر لأختها الصغيرة بحب، والتي قارب طولها الوصول لكتفها... أمسكت يدها تديرها حول نفسها تصفر بحماس: «واو... انتي بقيتي مودموزيل كبيرة أوي... كل دا يحصل في سنتين بس؟!»

انحنت هنا برقة قائلة بالفرنسية: «Merci mademoiselle Zina... بعض ما عندكم.. يعني خلاص مبقتش البطة القبيحة بالمقارنة ببجعة بحيرة البجع» رمشت زينة بنظرة متسائلة: «بحيرة البجع!! يعني إيه؟! مكنتش أعرف إن قلبك أسود أوي من ناحيتي كده... لينا قعدة مع بعض نشوف إيه حكاية بحيرة البجع دي... بس بجد انتي وحشتيني مووووووووت» قفزت الصغيرة بشهقة حماسية تضمها أختها بقوة... حتى هتفت فاليريا: «كفاية كده... بابا جوة... مشتاك لك كثير»

هتفت زينة مازحة: «يا وجعة مربربة! كبير البداري بذات نفساويته في انتظاري... وأنا لسة واجفة موطرحي... لا دي غلطة واعرة جوي، ولزمن ولا بد نصلحوها فوري»

قهقهت هنا: «كويس إن باريس منستكيش لغوتنا» نفضت شعر أختها الحريري الأسود وهي تدفع خصلاته بأصابعها: «وهو أنا أقدر؟! كل ليلة كنت بقعد أراجع مع نفسي، أسمع جدول اللهجة الصعيدي، علشان لما أرجع ميحصلش اللي بالك فيه» تنهدت أمها بتحذير: «زينة.. كفاية ثثرة... لوك لوك لوك، وروهي لباباكي بسرعة»

«أخ.. Désolé Mama... آسفة جدًا بس أنا فرحانة كثير»... ضمتها بذراعيها... أمها وأختها... ثم اتجهوا للدخل... كان الخدم بانتظارها متلهفين لمصافحتها... كادت تذوب بين أحضانهم الربيعية... لم يتغيروا أبدًا... هي نفسها الوجوه السمرء الطيبة، التي تحملت كل شقاوة طفولتها، وطيش مراهقتها... أسرع لغرفة والدها الذي لا تتذكره إلا بجلسته المهيبه في هذا

المكان المدبوغ باسمه وهيئته، على الأريكة الاستانبولي من خشب الزان... تحيطه
وسائد من القطن المحشو، يرتكن عليها وقد تربعت ساقاه ملتفة بعباءته من
الجوخ الأصلي.

وقفت تنأمله بعينين مغرورتين بالدموع... لم يكن الزمن رقيقاً به كما مع أمها...
فقد حل الشعر الأبيض الشاهق ضيقاً دائماً غير مدعوٍ على رأسه العارية من
عمامتها الأصلية. أشار لها بيده لتقترب وضاحت حدقتها: «انت هتوجفي
تنضريني من بعيد إكده!!؟ جربي يا بت... جربي يا زينة عمري خليني أضمك في
حضني... جربي يا بتي»

لم تكن عيناها قد ارتوتا بعد منه، ولكن نبرة صوته الحنونة الآمرة اخترقت قلبها
كوميض برق في ليلة حالكة، فألقت بنفسها كطلقة رصاص تدفنها مع غربتها
بأحضان وطنها... أبوها الحبيب... رفعت عينيها المغرورتين إليه:
«كيفك يا حاج؟ اتوحشتك جوي.. جوي»

ضربها على كتفها: «يا بت البكاشة... بجى لو كت اتوحشتك كتي هتغيبى المدة
دي كلاتها؟! إش الحال لو مكتش اتوحشتك... مكتيش هتعاودي البلد واصل»
«وأنا أقدر يا حاج؟! لا عشت ولا كنت لو فكرت في يوم إني مرجعش»
أمسك وجهها بين يديه الكبيرتين يتأمل ملامحها، وكأنه يحصيها، ما نقص منها وما
زاد في فترة غيبتها الطويلة... هتفت بشقاوة: «كل حاجة في موطرحها يا حاج..
العيون والخاشم وال...»

ضربها مرة أخرى على كتفها:
«هو انتي لسانك دا تملي زالف إكده؟! طوالي ممدود ولا كنه جُضبان سكة
حديد»

مسدت كتفها بتوجع: «يدك تجيلة جوي يا حاج»
«طب هاتي الثاني علشان ميزعلش»
«لا وعلى إيه... الطيب أحسن»..

تنهد يجلي صوته بصعوبة: «وأخبار صحتك إيه يا بتي؟ خبرتني أمك إنك معملتيش العملية... ليه يا زينة يا بتي!؟»

خطفت نظرة لأمها التي أومأت لها بابتسامة حزينة وعيون دامعة... ضمت شفيتها بقوة كأنها تحاول تجاوز مشهد تدربت عليه كثيراً، وفي النهاية ما تزال عاجزة عن تخطيه:

«بصراحة يا بابا... فيه دكتور كبير نصحني إني أحاول أجرب علاج جديد ظهر لحالي... وأنا فعلاً قطعت شوط كبير في العلاج وفي تحسن... بطيء... بس موجود»

زفر بتنهيذة طويلة:

«يعني هتسافري من تاني؟! يكون في معلومك يا زينة... لازم تشوفي لك صرفة في سفرياتك دي... انتي معتيش صغار يا بتي... ما شاء الله كبرتي وبجيتي عروسة كيه الجمر... ما يصحش إنك تسافري وحديكي... وإن كنت العوبارة في العلاج... تاهت ولجيناها، تكلميه إهنة وسطينا... بكفياها غربة وشحطة يا بتي»

ألقت نظرة على أمها وهي تهتف بخوف:

«جري إيه يا حجوج؟! ما إحنا كنا متفقين من الأول... وأنا مش عايشة لوحدي... انت عارف إني عايشة مع خالتو... وأنا كمان مش قاعدة عوالة عليها... أنا بساعدها في الشغل»

تنهد بضيق وصاح ينادي زوجته:

«اجعدي يا فاليريا... وجولي لبتك تعجل... معادش ينفع سفرها وحديها... الناس كلت وشنا»

هتفت الأم متأثرة بصدمة ابنتها:

«شويا شويا ردوان... انت واهد البنت على مشمتها... كده مش ينفا»

وهنا لم يستطع الرجل وابنته تمالك أنفسهما فضجا بالضحك حتى دمعت
عيونهما... أمسكت زينة بيد أمها قائلة من بين الضحك: «مشمته إيه بس يا
حاجة فاليريا؟! سمعتي عن اللي جت تكحلها!؟»
ضربت ابنتها على يدها بفم مزمووم: «تكهلها إيه أبيطة انت؟! انت أأرف زينة...
أنا غلطان إني بتكلم مأك أصلًا... أنا كنت نسيت مشاكسات بتأك دي... هكوم
أشرف ألى تهدير غدا... وانتي هرة مع أبوكي»
أومات زينة تحاول التحكم بصعوبة لتمتنع عن الضحك: «أيوه... قومي يا فال...
قومي وخليني هرة مع أبويا»
نظرت لوالدها بعد خروج أمها وأخذت نفسًا عميقًا:
«خلاص يعني كانوا النسوان خلصوا من الصوالحة علشان تروح آخر الدنيا
وتتجوز خواجية تجولك (أنا هرة)... و.. إيه!؟»
أكمل ضاحكًا: «مشمته...»
ادعت الجدية وهي تصيح:
«خلاص بقى... انت هتتريق على الست الحاجة فاليريا ولا إيه!؟ عيب يا حاج
ميصحش»
أمسك يدها بخشونة:
«سيبك من الشويتين بتوعك دول وخطي كلامي حلجة في ودانك... ولينا جاعدة
تانية نتحددتوا فيها على رواج»
«ماشي يا حاج... زي ما تؤمر.. إلا هو سيف فين!؟»
«سيف في...»
«فيه حد بيحب في سيرتي!؟»
«أهه... كيه البسة بياجي على السيرة والوكل»

دخل سيف بجسده الضخم المهيب يسيطر على المكان وشواربه التي يقف عليها
الصقر كما يقولون... يرفل في جلبابه الأسود الطويل متلفحاً باللاسة الحرير حول
عنقه وعمامته البيضاء تزيد من هيئته.

ركضت زينة تلقي بنفسها بين أحضانه... ضمها بحنان أخوي... ثم أبعداها يتطلع
لها بنظرة ناقمة: «انتي دخلتي البلد بخلجاتك دي؟؟»

نظرت لبلوزتها الضيقة، وبنطلونها الجينز وسألته بضيق:

«أمال عاوزني آجي من فرنسا بإيه... بالملس!؟»

نفذ يدها عنها وأمسك أطراف اللاسة حول عنقه يجذبها بعصبية وهو يجلس
جوار والده زافراً دخان احتراقه: «اللهم طولك يا روح!»

ربت والده على ركبته:

«اتهادى يا ولدي... شم نفسك وخلي خيتك تشم نفسها من تراب السفر»

«إن شالله عنها ما شمتة!»

هب رضوان يلوح بيديه متسائلاً: «هو كان حوصل إيه لدخلتك المزعبة دي!؟»

«اسأل السنيورة... فين السواج اللي بعته بالعربية عشان يجيها من المطار!؟»

التفت رضوان لابنته التي ظهر الارتباك واضحاً عليها:

«بصراحة يا بابا... أنا مشيئة»

زفر سيف بسخرية:

«شوفت يابوي... المحروسة دخلت البلد سايجة العربية بنفسها... يا سواد وشنا

جدام الخلع! خلاص بجينا مسخرة ومعيرة البلد كلاتها اللي يسوا واللي ميسواش»

حدج رضوان ابنته بنظرة عاتبة: «ودا يصوح برديكى يا زينة!؟»

«ماهو يا بابا...»

صرخ سيف بوجه سوده الغضب:

«يعني أشج خلاجاتي منيكم انتم الجوز؟! عاوزين تچلطوني؟! بدل ما تجوم تسفخها جلمين لحد ما تطاطي تحب على رچلك وتطلب منك السماح على عملتها المهبية!!»

أطرفت زينة رأسها لتمدص غضب والدها... رمق سيف بنظرة مهددة، وبهزة من رأسه قال بهدوء:

«ملاكش صالح... أنا أربي بتي بكيفي... مش بكيفك انت»
بانفعال زائد هب مرة أخرى ملوحاً بإصبعه في وجهها: «حاضر يابوي... بكيفك... بس يكون في معلوم الچميع... وبعد إذنك يابوي طبعاً... سفر بعد اليوم مافيش... بزידاها صرمحة وجلة حيا... خلاص تجعدي زي بجيت البنته تستني عدلك... وكلام كثير وحديث ماصخ مالهش عازة مش عاوز أسمع»
ضربت بقدميها في الأرض باعتراض:

«بابا... قول حاجة لو سمحت!»
رفع عينيه بدون أن يحرك رأسه قائلاً بلهجة لا تقبل النقاش: «روحي غيّر خلجاتك... وكل وجت وله أذان»
«حاضر يا حاج... أوامرك»

وانصرفت تزرع لسيف بضيق، ثم أخرجت لسانها بحركة طفولية.
كتم رضوان قهقهته ولكن سيف لمحه فثار بعصبية: «انت بتضحك يا حاج؟ البت بتتمألت علينا وانت بتضحك يابوي؟!»

«يا واد يا غشيم... كم مرة أجولك وانت البعيد مرگب بولغة جدیمة في راسك الناشفة دي... رفجاً بالجوارير لتتكسر في يدك»
زفر نافخاً نيران:

«اكسر للبت ضلع يطلع لها أربع وعشرين»

«يا شيخ دك أربع وعشرين بولغة في نافوخك... انت إيه!! چنس چيلتك إيه!!
محراج شر مبتفصلش واصل... ياما نفسي أشوف البهيمه دي الي هتتچوزها،
وهتمشيك على العجين متلخبطوش»

انتفض سيف منفوخ الأوداج:

«لسه متخلجتش الي في بالك... دنا سيف البداري على سن ورمح»

«طرززرززرز!»

«يا بويا بلاش جلة الجيمه دي... أنا كبرت على عمايلك دي»

«الكبير كبير بعجله يا ولدي... وانت لسه جدامك المشوار طويل... إلا حتى ما

سألت أختك عن صحتها ولا عملت إيه في علاجها»

«ما زمانك انت والحاجة جمتموا بالواجب»

«وانت واجبك تزعط وتنطح وبس زي الطور الي محلول لجامه!!؟ والله انت

خسارة فيك الحديث من أساسه... كيه الي بينطح راسه بالحيط... رح.. رح

شوف أخبار الوكل إيه الواحد معدته نعرت»





«البعض ترفعه الخطيئة، والبعض تُسقطه
الفضيلة»

— وليام شكسبير

.....

معفر متجهم تكاد خطواته تزلزل الأرض أسفلها... ابتعد الخفراء عن طريقه
مستغربين، رافع الرحامي آخر من يفقد أعصابه بهذا الشكل العاصف.
كان والده يجلس في شرفة سراي الرحامة يراقبه بصمت من لحظة نزوله عن
جواده حتى اقتربه مثيراً التراب تحت قدميه.

«السلام عليكم يا بوي»

أخرج مبسم الشيشة من فمه متلذذاً برؤية حلقات الدخان تتشكل سابحة في
الهواء: «وعليكم السلام ورحمة الله وبركاته، مالك معفر إكده ليه زي ما يكون
والعياذو بالله حنش لافف على رجبتك»

أخذ عدة أنفاس متلاحقة حتى استطاع تمالك نفسه: «مشوفتش الزفت الي ما
يتسماش ده!»

رفع والده مبسم الشيشة متسائلاً بتعجب: «تجصد مين.. چاسر؟»

«ومين غيره سبة كل البلاوي الي بتحصل والي هتحصل؟!»

«صلي على البني يا رافع.. واتهادى بالله وفهمني هبّ إيه المدعوج ده النوبة
دي..»

«عملة سودا ومهبة على دماغه... جطع طريج بت من البداري هو والمجايطع
بتوعه»

نفث والده الدخان بغضب:

«أستغفر الله العظيم... إحنا كنا اصطبحننا بوش مين فجرني على الصبح!؟»..

تابع رافع بانفعال:

«مش إكده وبس... دا كمان حاول يتهجم عليها ولولا ستر ربنا وإني وصلت في

الوجت المناسب، كانت الجيامة جامت ومجعدتش من ثاني»

«هو الواد دا مش ناوي يچيبها البر ولا إيه؟»

«ليه يا عمي وانت كت شايفني ماشي في البلد بجطع في خلجاتي!؟»

قفز رافع من مكانه عند سماعه لصوت جاسر... واقترب منه ملوحاً بيده:

«انت البعيد جبلة ما بتحسش!!؟ ما فهمش والله!»

وضع يده في صديرية جلبابه قائلاً بنبرة مستفزة:

«اسمع يا رافع... أنا خليتك تجول كل اللي عندك جدام الرچالة، ومرديتش

أصغرك وأرد عليك»

«وانت بتسمي المجاطيع اللي انت رايح چاي وياهم دول رچالة!؟»

رفع جاسر صوته:

«إيوه يا رافع... رچالة... وانت صغرتني جدامهم... وأنا احترمتك ومرديتش أرد

عليك»

«انت مرديتش عليا لأنك غلطان والغلط راكبك من ساسك لراسك»

قلب جاسر شفثيه باستهانة: «وهو كان حوصل إيه يعني!؟ بت من البداري دايرة

على حل شعرها... جلت ألمه لها غلطان يعني!؟... هي لو كانت كائة في بيتها كيه

باجي الحريم المتصانين مكانش حد اتعرض ليها»

«وانت مالك!؟ دخلك إيه!؟ كت بوها ولا خوها... اللي لو كانوا شموا خبر

مكناش جدرنا فنعو بحور الدم اللي هتتهدم سدودها على روسنا كلاتنا»

«وانت خايف يا رافع.. يا كبير الرحامة للسدود دي تتهد على نافوخك إياك!؟»

حدجه بنظرة ساخرة ثم أهدى لعمه نظرة مماثلة: «سمعت يا عمي... ولدك كبير

الرحامة خايف»

بإصبعه نقر رافع على جبين جاسر بقوة:
«انت البعيد مفاهمش... نجول طور يجوله احلبوه!؟»
أبعد رأسه عن ابن عمه وجلس جوار عمه:
«لع يا ويلد عمي... انت الي مخابرش... من اليوم ورايح معنخافوش من
البداري واصل»

التقط رافع أنفاسه الساخنة بصعوبة:
«لو انت مخايفش على روحك، فيه رچالة كتير بيعولوا نسوان وعيال وأرواحهم
مش لعبة عشان تدخل بيهم عركة ملهاش عازة يا... يا چاسر بيه... ولا أنا غلطان
يا بوي؟»

هم جاسر بالرد، فأخرج عمه دفعة أخرى من الدخان من أنفه رافعاً يده ليمتنع
الجميع عن الكلام... وبعد لحظات من الصمت المرتقب أجلى الخشونة في
حجرتة قائلاً: «چاسر يا ولدي... مش من أخلاطنا إننا نجطعوا الطريق على
حريم»
«بس يا عمي»...

رفع يده بزغرة محذرة فابتلع لسانه ليسمع عمه صاغراً:
«وانت غلطان زي ما رافع جالك... عركة زي الي كانت هتحصل دي ملهاش
عازة واصل... مش وإحنا غلطانين وجاطعين الطريق على حريمهم... عيبة جوي في
حجنا يا ولدي... خرينا لما نضطروا ندخلوا في عركة نكونوا فيها على حج... ماشي يا
چاسر؟ وملهاش عازة كلمة (كبير الرحاية) دي... انت ورافع كبرات الرحاية
ومافيش حد أحسن من حد... فهمت يا چاسر؟»
أطلق زفرة ضيق:

«الجول جولك يا عمي»
«وانت يا رافع... متصغرش ويلد عمك جدام رچالته مرة تانية حتى لو كان
غلطان... الرسول عليه الصلاة والسلام جال إيه.. انصر أخاك ظالماً أو مظلوماً»

بنبرة أهدي رد رافع: «عليه الصلاة والسلام... دا الي أنا عملته يابوي... بس حاضر... على عيني أوامرك»

«الله يرضى عنيك يا ولدى... ادخل شوف أمك كانت بتنادم عليك من عشية»
وقف رافع باحترام:

«على عيني يابوي... بالإذن»

راقبه أبوه حتى اختفي خلف الأبواب ثم التفت لابن أخيه... ضربه بمبسم الشيشة على عمامته البيضاء موبخاً: «انت يا واد انت مافيش فايدة فيك!!؟ على طول زمجان وروحك مش طايفة خلجاتك!!؟»

أخرج عامود دخان من منخاريه وارتن برأسه جوار رأس جاسر قائلاً بابتسامة وغمزة خبيثة: «إلا جولي... البت كانت زينة صوح... ولا انت كت بترمرم زي عوايدك؟»

بنظرات متلعبة وكأنه يتذكرها بشعرها الأحمر المتطاير وعينيها السماويتين الغائمتين وهي تحاول نشب أظافرها المطلية في عنقه بتهور... دفع جاسر العمامة عن رأسه لتظهر رأسه الصلعاء وهو يصيح: «يا بووووووي! كنها جالت للجمر جوم فز من مكانك وأنا أجعد موطرحك»

«لدرجة دي البت زينة!؟»

«زينة وهي زينة يا عمي»

«مين دي?... فكرني بيها يا جاسر.. بت مين من البداري؟»

تلفت جاسر حوله ليتأكد أنهما بعيدان عن أي أذان قد تسمعهما:

«البت زينة... بت الحاج رضوان الي كت مسافرة بلاد برة، ويبجولوا جاعدة مع خالتها الفرنسية... بس كنها يا عمي خدت كل حلات أمها الخوجاية... ومش أي حلا... حلاوة طحينية جاطعة»

تلاعب عمه بشواربه ببريق خافت في عينيه ومض بالذكرى:

«كني فاكِر يوم ما عاود رضوان البلد وهي متشعلجة في دراعه... يومها البلد
كلاتها منامتش... مكانش في الزمام كلاته حرمة بحلاتها»
وضع جاسر يده على ذراع عمه متنهداً: «كنها زينة يا عمي... يا خسارتها في
العيلة الهم دي... مش الغفر الي حدانا، ومحسويين علينا نسوان»
«وطي صوتك يا مخبل لواحدة من حريم الدار تسمعك!»
تراجع مستنداً بظهره واضعاً يده في صديرية جلبابه قائلاً بأنفة:
«وأنا يهمني؟! أنا جاسر الرحامي»، متخلجتش الي تخليني أخط لساني جوا
خاشمي»

قهقهه عمه قائلاً فاتلاً شواربه:

«ولا حتى نواره النورية؟»

اعتدل جاسر في مكانه متوسلاً بصوت خافت: «وطي صوتك يا عمي، الله يستر
عرضك، الحيطان لها ودان... بس انت إش عرفك بنواره؟!»
دفعه مرة أخرى بمبسم الشيشة:

«يا واد... دنا عاجنك وخابرك من يوم ما بوك الله يرحمه مات وچيت تحت
طوعي... غير إن مطرح ما بتعك عيوني بتچيب لي جرارك... من أول مولد سيدي
عبد الرحيم الجناوي لحد مولد ال...»
قاطععه جاسر:

«خلاص يا عمي... أحب على يدك... الله يستر عرضك... انت إيه... متخفاش
عليك خافية!؟»

«عيب يا ويلد... دنا وهدان الرحامي»



«خير يا أما... نادمتي عليا؟»
بعباءتها السوداء المزركشة وأكمامها الطويلة المحلاة بخيوط فضية براقّة... وقد
لفت طرحتها حول وجهها من نفس قماش العباءة... احتدت ملامحها السمراء
وقد التمع بريق عينيها المكحلتين الشديدي السواد كابنها وهي تقترب منه:
«خير يا ولدي... كنت عاوزاك في موضوع إكده... بس جبله جولي... انت وبوك
أصواتكم كانت چايبة آخر ديار الرحامة... خير يا رافع؟؟»
«خير يا أم رافع... خير... حدوتة إكده خيانة ملهاش عازة نعيدو ونزيدو فيها»
«يعني بالمختصر مش عاوز تحكي لي... ولد أبوك صوح... المهم خيلنا في الموضوع
التاني... مش ناوي تفرحنا بيك انت ومعالى؟! بدي أشيل عيالكم جبل ما أموت يا
ولدي»

«بعيد الشر عنك يا أما... خبر إيه الكلام الي ملهش عازة ده؟!»
هبت باحتداد:
«خبر إيه دا الي ملهش عازة يا رافع؟!»
«خبر الموت يا أمي، كل شوية تجيبي سيرته زي ما تكوني بتلوي دراغي علشان
أتچوز بت عمي»
«أنا بلوي دراغك يا رافع؟! إش حال مكنتش انت الي چيت حدي وطلبت مني
أخطب لك بت عمك؟! دي أخرتها يا ويلد وهدان؟!»
تهالك جالساً على أحد مقاعد غرفة المعيشة الفاخر بقوائمه الذهبية، وقماشه
الأحمر القاني بلون الدم... ثم زفر متنفساً بعمق ورمق أمه بنظرة مستكينة:
«عاوزاني أتچوز معالي؟ حاضر يما... عاوزة تحددني معاد الفرح؟ تحت أمرك
يما... عاوزة إيه كمان؟ تحبي أخلف لك العيال وأرميهم في حچرك دلوك؟»
ارتسمت ابتسامة رضا على فمها العاصي قائلة وهي تعيد ضبط طرحتها حول
وجهها، وتجلس في المقعد المقابل له قائلة بدلال:
«اختشي يا رافع... انت مبتستحيش؟!»

قهقهه ضاحكًا:

«يعني خلاص... ست الكل رضيت عني؟»

«أنا عاوزة إيه من ديتي غير إني أشوفك متجاوز ومتهنّي، وأنا على وش الدنيا وأفرح بعيالك بيتنططوا حواليا»

اقترب منها ينحني ممسكًا بيدها وقبلها بقوة:

«ربنا يخليكي لي يا أم رافع وما يحرمينش منيكي واصل... ديتنا حلاها بيكي»
وضعت يدها على رأسه تمسّد شعره الأسود الغزير بحنان:

«وانت ديتي وأخرتي وكل حالي ومحتالي يا رافع... لو مكانتش معالي هتهدي
سرك وتصونك مكتش جوزتها لك واصل... ومع إكده... آني مش هفوت لها الهوا...
اليوم الي ألاجيك متكدر، هيو بجي يوم مطلعتلوش شمش... هكدر الي خلفوها
في تربتهم»

«يا حبيبي انت يا ست الدار يا جامدة!»

تأرجحت عيناها وهي تشمخ بأنفها: «أمال انت كت فاكر إيه؟! دنا هبجي حما
واعرة جوي... هو سبوع مافيش غيره هخليها تبغدد وتعمل حالها عروسة..
وبعدها... همشيها جدامي بإيد المجشة»

«جولتي لي... بجي هي العوبارة كده... بعد ما حسنت اتچوزت وسافرت
السعودية مع چوزها مش لاجية حد تنفشني فيه... بالخصوص وفريدة لا بتهش
ولا بتنش ونچلا لساها صغار... جمتي جولتي تچوزي رافع... آخ منك انت يا
ست الدار! لو مكتيش أمني...»

هبت بانزعاج: «كت عملت إيه يا وله؟!»

قبل يدها من جديد قائلاً:

«كت جدمت لك في المخبرات ولا حتى في الجيش»

«وهم الي في الجيش ولا المخبرات دول ي زيدوا عني في إيه؟!»

«على جولتك... دا حتى دماغك يوزن بلد بزيها... بجولك إيه يمّا... الكلام معاكي
چوّعني... فيه وكل جاهز ولا...»

«حالا يا نضري ستيتة هتضرر الوكل، على ما تتسبح يكون كل ما تشتهييه نفسك
موجود... ومتنشاش جول لجاسر هيتغدى عندينا النهاردة... معالي خرجت
مشوار ومحضرتش الغدا»

قبل يدها مرة أخرى:

«تسلمي لي يا غالية، ويخليكي لينا كلنا... جواز إيه وبتاع إيه بس وأنا عندي أم
الدنيا كلاتها»

ضحكت بتنهيذة قوية وهي تشيعه بنظراتها حتى غاب عنها وقتمت له بالدعاء:
«ربي يرضى عنيك يا رافع يا ابن بطني دنيا وآخرة، ويسعدك مع بت عمك
وأشوف عيالك عن جريب جادر يا كريم، ويهدي شرك يا معالي يا بت نفوسة خد
من جلبني وسر»

جلسوا على المائدة العامرة بكل خيرات الله ونعمه من طيور ولحوم وفواكه...
على صدر المائدة كبير الرحامة وقد جلس ابنه وابن أخيه عن يمينه ويساره...
وبجوار رافع جلست ست الدار تملأ طبقه بالتتابع قبل أن يفرغ... وأمامها
جلست فريدة... بانكسار حانية الرأس على طبقها لا تحيد عنه... ملابسها بسيطة،
قميص كاروهات قاتم، وتنورة سوداء طويلة رحبة كالخيمة، وطرحة سوداء
ملفوفة بإحكام حول عنقها... رمقتها ست الدار بنظرات مبهمة، ثم زغرت لجاسر
الذي يكتسح الطعام وكأنه جرار الحصاد... تنحنحت ونادته:

«وانت مش ناوي تهدي يا چاسر وتبطل صرمحة وتلاجي بت الحلال اللي تهدي
شرك؟!»

ألقى جاسر الملعة من يده مستغفراً: «أستغفر الله العظيم... وليه السيرة
العفشة دي يا مرت عمي وإحنا بناكلوا؟!»

هبت فيه كالعاصفة الهوجاء التي تهب بدون إنذار: «هو الجواز سيرة عفشة يا وله؟! ما تجعد عوج وتكلم عدل!»

«عمي... أحب على يدك... سايج عليك كل الأوليا خلي مرت عمي تطلعني من نافوخها»

ابتلع وهدان طعامه المحشور في حلقه وأجلاه ضاحكًا: «لحد اهنة... ومعتلكش... ست الدار مئن تحط حد براسها مبيطلعش منها ولا بالطبل البلدي... وانت خابر مرت عمك زين... نصيحتي... اسمع كلامها واتجوز خير الضررين»

«ياوووووي!! أتجوز مين بس هي العرايس واجفين على حيلهم طوابير جدام السراية»

هبت باندفاع: «ايوه... وأولهم بت عمتك فريدة أهه... منتظرة إشارة من يدك» رمق فريدة باحتداد، والتي استحال وجهها كحبة الطماطم الحمراء... وفجأة غصت بدموع القهر وقد أبل الطعام المرور من حلقها... وضعت يدها على فمها وركضت هاربة ولم تجب نداءات زوجة خالها: «مالك يا بت!!؟ بت يا فريدة مالك ردي عليا يا بت!»

«انتي غلطانة يما... مكتيش خزيتها جدامنا إكده... انتي خابرة فريدة زين بتخزي من خيالها»

زغرت لجاسر الذي عاد يكتسح الطعام بانتصار: «هو السبة في المشكل ده... لو مكانش ناحرنى واتجأر جصادي مكانش حوصل الي حوصل... طيب يا جاسر ورحمة أمك نفوسة ما هيعدي سبوع إلا وأنا مجوزاك»

«هع... سبوع بس يا مرت عمي؟! طب بحبحتها هبابة... خليها سبوعين»

«انت بتتحدى ست الدار يا جاسر؟! وشايفني مش كدها!؟»

تهكم ضاحكًا: «لا العفو... كدها وكدود... سلام يا مرت عمي... أشوفك بعد سبوع... هع.. هع»

راقبته بغيظ حتى غادر المكان يلوح لها وقد تعالت ضحكاته بسخرية.
«أما... يما... اتهادي بالله، مالك بس مشعشة معاي حكاية الجواز اليامين
دول... بجولك إيه.. خليكي في فريدة وشيلي چاسر من راسك نوهائي... حرام
عليكي فريدة مش حملة هي الغلبانة ناجصة بلاوي لما تبليها بچاسر؟!»
«دا بس بيستهيا لك... هي فريدة لچاسر وچاسر لفريدة... وبكرة چاسر
ياچي ويحب على يدي على الجميلة اللي عملتها له»

تنهد رافع: «يعني مافيش فايدة؟!»

جاء صوت والده من جواره: «ريح راسك يا رافع أمك خلاص... مش هتنام إلا لما
تعمل اللي براسها... انت بس ادعي لچاسر ربنا يصبره على ما بلاه.. أمك و..
هع هع... فريدة هع»
هبت بعتاب:

«انت بتمألت عليا يا حاج!!؟ ربنا يسامحك... وأنا اللي بفكر في الموصلة... وأنا
كان چايني إيه من وچع الراس دي؟!»
«وهو أنا أجدر يا أم الغالي!!؟ بس كلمة بيني وبينك... انتي چيتي على البت...
فريدة متستاهلش منيكي إنك تخزيها جدامنا»
زفرت بضيق وكأنها تشعر بغلظتها بدون أن يسمح لها غرورها بالاعتراف: «إيوه...
انت عندك حج في دي يا حاج... أنا هروح وأراضيها»



انفجرت في البكاء الذي كتمته طويلاً حتى اختنقت به أنفاسها... أحكمت إغلاق باب غرفتها بالمفتاح وبدأ نشيجها يعلو حتى كاد يشق صدرها من الألم... ألم اليتيم والقهر أكثر وجعاً... ماذا يفعل اليتيم في غابة من أشباه البشر؟! بداية بوالدها الذي تخلي عنها بعد وفاة أمها، وتزوج فتاة في مثل عمرها، لتجد نفسها فجأة وحيدة، عرضة لكل ذي ناب ومخالب طامع في قطعة لحم سائغة بدون حماية. وجدت نفسها مجبرة على قبول استضافة خالها.

خمس سنوات منذ هجرها والدها لم تسمع منه خبراً، لم يسأل عنها، وكأنه أسقطها من حساباته، انشغل في حياته مع دنيا جديدة تخلو من همها، وكأنها لم تكن... لم تجد يوماً سبباً للشكوى من معاملة خالها وزوجته... ولكن إحساس اليتيم القاحط في كل يوم يزداد توغلاً في ذاتها، يذيبها، يعتصر روحها من الداخل، يحولها لقوقعة فارغة... مجرد هيكل مزخرف من الخارج وخواء مرعب من داخلها تصفر فيه الريح وتعوي... عاشت أوجاعها حتى دجنتها، ولكن في بعض الأحيان يفوق الألم قدرتها على التحمل... كما حدث هذه الليلة، عندما عرضتها زوجة خالها على جاسر، وكأنها كائن طفيلي يعيش على كرمهم وإحسانهم، محروم من حق الاعتراض، أو حتى القبول. تصدرت صرخات الاعتراض حلقها ككتلة من الحجارة، وهي تشهق وتلطم خديها بحرقّة:

«رِخْصَتِي... رِخْصَتِي يا فريدة خلاص... بجوا يحدفوكي على بعض كيه الخرجة الدائية... محدش عاد طايجك... محدش عاوز يطلع بخلجتك... كبرتي وهمك تجل وياكي... الله يسامحك يابويا.. الله يسامحك»

اعتدلت أمام المرأة تتحسر على جمالها المطمور... شعرها الأسود الغزير المعقود جديلتين... جبهتها العريضة... عينيها الواسعتين المكسورتين بأغلال اليتيم الثقيلة... ملابسها التي لم تكن أبداً لها، تخفي بمهارة قدها الممشوق... أشاحت عن المرأة وقفزت على فراشها المحشو بدموع ليالٍ طويلة من الهموم، لتجهش في نوبة جديدة من الأوجاع.



«هه... خير يا مرت عمي؟ الأخبار زينة ولا عفشة؟»
«بسم الله الرحمن الرحيم! هم بيطلعوا الساعة كام؟! چعزتيني يا بت
المزغودة!»

جلست معالي جوارها تسألها بلهفة:
«متأخذنيش يا مرت عمي... دخلت عليكي من غير إحم ولا دستور... بس
اعذريني... ريحي جلبني الله يريح جلك... كلمتي رافع... هه؟؟»
أمالت ست الدار عنقها بتعالي: «وإن مكتش..؟»
هبت معالي برجاء:

«سايح عليكي كل الأوليا ما توجعي جلبني... كلمتيه... ولا مكلمتهش؟»
بعد لحظات صمت وإمعان في الضغط على أعصاب الفتاة المتلهفة:
«إيوه... اتحددت معاه... و...»

قاطعتها الفتاة بلهفة وشوق لم تكلف نفسها عناء مداراتها:
«وايه يا ست الدار، انطجيتها بجى أحب على يدك وراسك»
ربتت على ركبتيها بشموخ:

«خلاص يا بت يا معالي... زغردي»
شهقت الفتاة من السعادة:
«بالله عليكي صحيح؟! طب احلفي»
هبت فيها ست الدار تداري ضحكتها بغضب زائف:
«انتي اتخبطني يا بت!!! كلمة ست الدار بعشر رجال... وأنا جولت ومافيش
جول بعد جولي»

صرخت الفتاة بجنون وهي تحتضن زوجة عمها:
«ربنا يخليكي يا غالية يا أم الغالي... ربنا ميحرمنيش منيكي ولا من أخبارك
الزينة»

حذرتها تلوح بسبابتها في وجهها بتهديد أكثر منه تحذير:

«بس خدي بالك يا بت يا معالي... رافع الحيلة... مافيش لا جليليه ولا بعديه...
تحطيه في حباية عينك اليمين... وأمه في الحباية الشمال... وإلا والي خلج
الخلج... اخزلك عيونك الچوز»
أحاطت معالي جسدها بذراعيها بتنهيذة قوية وأخذت تدور حول نفسها، وكأنها
لا تصدق السعادة التي تتجمع أطرافها أمامها، وتنعقد خيوطها لتغزل فستانها
الأبيض في خيالها، ولم يتبق غير خطوة واحدة فقط... لتجد نفسها تنهل من نبع
السعادة الصافي، تمد راحتيها وتعب منه حتى سكرات اللذة... أخيراً.. رافع سيكون
حلالها بلالها...



«ما تاكلي يا زينة! مبتاكليش ليه يا بتي الوكل مش على هواي؟! أنادم على مسعدة تعمل لك وكل غيره؟»

وضعت يدها على بطنها بتأوه:

«لا يا بابا... أنا أكلت كتير جدًا، مش قادرة آكل ولا لقمة زيادة»

«فين الكثير دا؟! انتي الوكل جدامك ولا نبش الزرور»

شهقت بتأكيد: «الأكل دسم جدًا يا حاج... شوية على ما أعود تاني... انت سيد العارفين، الأكل في فرنسا عامل إزاي»

رمق زوجته بضيق:

«انتى هتجوليلى؟! الله يمسىها بالخير أمك، والكلام على سماعها... نشفت معدتي في الكام سنة اللي جعدناهم هناك في أول چوازنا، لما معدتي نسييت الزفر والدهن... فاكرة يا فال؟؟»

ضحكت برقة وقد احمرت وجنتاها شديدا البياض: «مون ديو... وبأدين مأك يا ردوان؟! انت مش هتنسى هالص؟!»

قهقه ضاحكًا: «يا بوووووووي! انتى لسة بتخزي يا ولية؟!»

زمت شفتيها بانزعاج وصرت على أسنانها: «ردوان!»

ضحك مرة أخرى: «خلاص متترزريش.. مش هجولك يا ولية تاني»

تجاهلته وهي تنادي سيف:

«سيف حبيبي... انت ليه مش بتاكل؟!»

«لا يما... أنا أكلت، ولو المحروسة زينة خلصت ممكن نتحددتوا في الموضوع»

زغر له والده:

«اتهادى بالله يا سيف... اصبر يا ولدي الدنيا مطارتش، متبجاش محراج شر على طول إكده... أهدي وشم نفسك»

هب بعصبية يكاد يلقي بالمائدة بعيداً من شدة غضبه: «لع طارت يابوي... ولازم المحروسة تعرف إنها معادتش تخطي برجليها برات البلد واصل إلا على الجرافة، أو لبيت جوزها»

هلعت زينة فنظرت لأُمها تطلب العون... أومأت لها كي لا ترد على أخوها، ثم نادى زوجها متجاهلة سيف:

«تحب أكدم لكم الشاي هنا، ولا في البراندا؟»

وقف رضوان يللم عباءته حول عنقه:

«لا.. في البرندا يا فال... الجو كتمة إهنة... وچاي على بالي أشم هوا نضيف»

وزغر لابنه بضيق قبل أن يشير لزينة كي تلحق به، ولكنهم توقفوا عندما سمعوا ذلك الصوت الصغير:

«وأنا حاجي معاكم؟؟..»

مد رضوان يده بابتسامة كبيرة ليمسك بيدها:

«طبعاً هي الجعدة تحلى من غير زينة البنته كلاتهم؟! تعالي يا هنايا وافتحى نفسي الي خوي سدهالي..»

أمسكت بيد والدها ثم التفتت برأسها وأخرجت لسانها لسيف بحركة طفولية... ضحكت زينة ثم قلقتها وهي تمسك بيد والدها الثانية... ضرب سيف بقدميه في الأرض حتى كاد أن يخرقها وهو يتبعهم بصحبة عواصفه المدججة، حاجباه متحدان بعقدة، وكأنهما على وشك شحن معركة ضروس.

أخذ آخر رشفة من كوب الشاي الصعيدي الثقيل... أخرج تنهيدة طويلة، ثم نظر لابنه المنتظر على أحر من الجمر، فرأى عينيه تكاد تنهجم من بين زفراته... ألقى نظرة خاطفة على زوجته... أدرك قلقها مما هو آت، طمأنها بنظرة من عينيه، كما يفعل معها دائماً، فاستكانت محتضنة ابنتها الصغيرة، بينما صوته يعلو فوق الأنفاس المترتبة: «خير يا سيف... اتفضل احكي؟»

كأنه فوجئ بالطلب رغم كل استعدادة، أشاعت نظرات والده النافذة الفوضى في كيانه، وكأنه أفرغ خزنة رشاش آلي في صدره دفعة واحدة... بعد لحظات استجمع فيها نفسه... زغر لأخته المنتشية بحالة الارتباك التي يمر بها... فاحتدت نظراته وبدأ بالهجوم: «يابوي لازم تكون عارف...»
قاطععه رضوان بهدوء شديد:

«ولما أنا لازم أكون عارف... چنابك مكلف خاطرك بتجولي ليه؟؟!»
اشرأب برأسه يفكر بسؤال والده... ضم شفثيه بقوة وتابع: «يابوي الله يخليك... أنا وانت جبل سابج اتحدثنا في الموضوع ده بالخصوصي؟؟ وزينة معادتش صغار... ولا آني غلطان؟ اللي في سنها عيالهم بجوا في الإعدادية دلوك... ومش دي العوبارة...»

قاطععه والده مرة أخرى بنفس الهدوء:
«أمال إيه العوبارة يا سيف بيه؟ اشچيني»
زفر منتفصًا متجاهلاً سخرية والده: «العوبارة يابوي وانت سيد العارفين إنه معادش ينفع إنها تروح وتاچي بروحها إكده... زي ما يكون... زي ما يكون... عيارها قالت»

شهقت زينة تنتفض من مكانها، بينما اعتدل والده في مكانه يكاد يخترقه بسهام عينيه المهددة:

«انت واعى لحديثك الماصخ ده؟؟! لسة متخلجش اللي يجول على زينة البداري كلمة بطالة»

«يابوي... يابوي... إحنا لسة هنستنوا لما حد يجول؟! أهه... شوفت عينك، شوف داخله البلد لابسة إيه؟؟... وسايجة العربية بنفسيتها، وشعرها سايح ونايح... لو كان حد من الرحاية شافها واتراذل عليها، كان الدم هيوبجي للركب وبسبة السنيورة بتك»

ارتكن رضوان على عصاه الخيزرانية يرمقهما، سيف بوجهه الأحمر المتعصب، وعروقه النافرة؛ وزينة بوجهها الشاحب، وعينيها الزائغتين، وكأن مصيرها سيتحقق في هذه اللحظة... أخرج تنهيدة كبيرة وهو ينظر لابنته:

«جولتي إيه يا زينة؟؟ عندك رد ترديه على خوكي؟؟»

تجاهلت وجيب قلبها وهي ترمق أخوها بتحد، بعكس النظرة التي أولتها لوالدها وهي تعاود الجلوس جواره: «بابا... هو مش حضرتك واثق فيا؟؟»
زم فمه بامتعاض:

«مكنتش خيلتك تخطي عتبة الدار من أساسه»

هتفت بحماس:

«أهه زي ما حضرتك بتقول... وانت خيلتني أسافر فرنسا، وأعيش مع خالتو هناك علشان أتعالج... فين المشكلة؟؟!»

هب سيف بصوت مرتفع:

«دي لسة بتسأل!! وهي حجة العلاج دي ملهاش آخر؟؟!!»

زمجر والده بتهديد:

«سيف... اجفل خاشمك لما خيلتك تخلص حديثها»

ازدردت لعابها ممتنة للفرصة التي أتاحها والدها، والتي يرجع معظمها طبعاً لأمرها الغالية التي كانت ترفع لها إبهامها خلصة لتشجعها:

«دلوقت يا بابا إيه الجديد؟! إحنا زي ما إحنا، وأنا لسة مخلصتش علاجي»

أوقف اندفاع سيف بحركة من يده فابتلع لسانه، حتى كاد أن يغص به، احمرت عيناه وتسارعت أنفاسه وهو يستمع لوالده يحدثها باللين: «إلي اتغير يا زينة إنك كبرتِي يا بتي... وزِي ما أخوكي جال... چه أوان تعاودي بلدك وتكملي علاجك اهنية... وخيوبِ عليا أحسنها دكاترة في البلد كلاتها معبخلش عليكي بحاجة واصل، من چنيه لمليون لو لزم الأمر»

زمت فمها بغیظ وهي تلمح ابتسامة أخيها الشامتة... فهبت باندفاع غاشم:

«بابا حضرتك عارف إني مش هينفع اتجوز وأنا بتعالج... مش أي حد هيقدر
حالتي، خاصة لما يكون راجل من المجتمع بتاعنا دا... وأنا... أنا اتعرفت على واحد
في فرنسا... عارف بحالتي وموافق إنه يستناني لما أخلص علاجي، ومتفهم تمامًا
لحالتي... وهو عاوز يخطبني من حضرتك، وبالمناسبة هو كمان الدكتور اللي
متابع حالتي»

أعقبت كلماتها لحظات من الصمت الذي يخفي خلفه ألف سؤال... هربت
شجاعتها وهي تشيح بعينها عن ردة فعل والدها... أما سيف، كما توقعت كل
حركة سيقوم بها.

انتفض مهتاجاً ليطيح بأكواب الشاي التي وضعها أمه منذ دقائق، ولم يبال
بتحطيم كل شيء عليها وهو يصرخ:

«انتي بتخترفي بتجولي إيه؟!؟»

تهدج صوت والده بنبرة أعلى:

«اهمد يا سيف خلينا نسمع لختك!»

«نسمعوا؟!... نسمعوا إيه يا بوي؟!؟ إحنا سمعنا واللي كان كان، وكل اللي يسوا

واللي معيسواش هيتفرجوا علينا... بتك هتخط راسنا في الطين يا حاج رضوان!»

صرخت زينة بانفعال:

«ما عاش ولا كان اللي يوطي راسك يا بابا... أرجوك اسمعني... أنا لسة مكملتش

كلامي»

اعتصر رضوان مقبض العصا بيده وهو يرمق زوجته بنظرة مختلصة يستمد منها
الصبر والتفهم... أمدته بما يحتاج بنظرها المطمئنة، وكأنها وبعد كل هذه
السنوات، ما تزال تحتوي بفطرتها الناعمة همجيته البدائية التي جبل عليها،
والتي دجنتها من يوم سارت بأوردهته مسرى الدماء.

«كملي يا زينة... كُتّي بتجولي إيه يا بتي جبل ما يجاطعنا وابور الزلط اللي

ملهش فرامل؟»

وضعت يدها على صدرها لتهدئ من ضربات قلبها المهتاجة... رمقها والدها بنظرات قلقة، هبت أمها نحوها بهلع... هدأتها بحركة من يدها أنها على ما يرام... تجاهلت نظرات سيف وركزت على والدها وهي تكمل:

«الحكاية يا بابا أن ضياء هو الدكتور الي بيعالجني في باريس... وخالتو بتثق فيه تمامًا، وهو حد محترم جدًّا، وقبل ما أنزل طلب مني إنه ييجي ويقابل حضرتك علشان يطلبني منك... بس هي دي كل الحكاية»
ضرب سيف كفيه ببعضهما صارخًا: «والله عال! هي حصلت كمان؟! المرة الجاية ارجعيلنا بعيل على كتفك»

صرخ رضوان:

«سبييف! أنا لسة بصحتي على وش الدنيا... لما أبجي أغور من وشك، ابجي علي صوتك وبيع واشتري في خواتك بكيفك»
«بس يا بوي...»

«ما مبسش... الكلام خولص. وانتي يا زينة... جفلي على الموضوع»

«بس يا بابا...»

«هو إيه الي بيحصل في البيت دا؟! لا كبير ولا صغير بيسمع الكلام واصل؟! ولا أنا الي معادش ليا عازة في المخروبة دي؟!»
هبت فاليريا تمسك بيده:

«هسك في الدونيا يا ردوان»

شعر وكأن ناره خمدت بفعل الثلوج المنصهرة من زرقعة عيني حبيبته... تنحنح ليجلي صوته نافضًا عن رأسه ذلك الضعف الوشيك: «خلصنا حديث في الموضوع ده... ويكون في معلومك يا زينة... بنات البداري مبيتچوزوش من براة العيلة واصل»

بهتت زرقة عينيها الشبيهتين بعيني أمها... وهددتا بتحطيم حصون أهدابها الطويلة وإغراقهم بدموعها... ولكنها تماسكت وهي تعتصر عينيها كي لا تمنح سيف الشعور بالشماتة:

«داكور بابا... أنا مش هعارضك... بس علاجي في باريس لسة مخلصش والدكتور ي...»

قاطعها: «انتي مش يوم ما طلبتي مني إني أسمح لك تروحي وتتعالجي في بلاد برة، سمحت لك ومعارضتش، وبجالك سنتين بحالهم؟! هي الحكاية دي ملهاش آخر؟! ولا هو العلاج مليح مع حضرة الدكتور ده بالعنية؟؟؟ أنا عند كلمتي... العلاج الي هتحتاجيه، لو طلبت هجيب لك دكاترة بلاد برة لحديكي اهنية... ولو عاوزة المستشفى كلاتها هجييها... وأنا حدايا كام زينة!؟»

في محاولة التحكم في دموعها التي على وشك إعلان هزيمتها: «أيوه يا بابا بس...» رفع يده فابتلعت كلماتها وهو يحدها بتلك النظرة التي تُخرج كل ما في أعماقها فشعرت كأنها مكشوفة أمامه تمامًا: «خليص... الكلام خلص... أنا كد جولي، عملي اتصالاتك، وشوفي هتحتاجي إيه وبلغيني، وخيوبي عليا لو احتجتني حاجة ومچتش يوجبى عملي الي انتي عاوزاه... أظن عداني العيب... ولا إيه يا فال؟؟»

هزت فاليريا رأسها بحذر: «داكور ردوان... بس لازم زينة ياخذ فرصة... وكمان سيفيل أختي آمل حسابه إن زينة هيرجا أند»

تنهد عاقداً يديه متقاطعتين على رأس عصاه الغليظة: «والمطلوب؟؟»

هتفت زينة: «وقت... وقت صغير مش كتير لحد ما أرجع، وأخلص ارتباطاتي»
سخر سيف بتهكم:

«تجصد ارتباطها مع الباشمهندز»

اضطرت زينة لتدافع عن نفسها، التصرف الذي لم تضطر له أبدًا في حياتها:

«أولا هو دكتور مش مهندس.. ثانيًا... بابا أؤكد لك إن...»

قاطعها والدها:

«أنا واثج فيكي يا زينة... وهعطيك الفرصة... هو شهر واحد مافيش غيره، تعاودي تخلصي ارتباطاتك، وتجيبي أورايجك وإحنا نستجضوا لك من حدانا داكطور زين وابن ناس»

وهنا لم تستطع كتم ضحكتها أكثر:

«داكتور زين إيه وابن ناس إيه بس يا حاج؟! هو أنا هخلله!؟»

لوح بيده: «اسمه اللي اسمه، انتي هتعدلي عليا يا بت امبارح انتي!! مش هو اسمه داكطور يا فاليرية!؟»

أجابته ضاحكة: «داكور يا ردوان... صه يا زينة!؟»

أومأت ضاحكة: «داكتور داكطور... إيش أكون أنا علشان أعدل على حجوجي حبيبي!؟»

تأملهم سيف بغيظ شديد وهب باندفاع: «يا سلام! وخليص... الحكيرة خلصت وكنك يابو زيد ما غزيت!!؟»

رفع رضوان رأسه يتأمل ابنه والضحكة لم تفارق شفثيه: «زيد إيه وعبيد إيه!؟ هو البعيد مبيفهمش!؟ ما جلنا خليف، اللي انت رايدة هيوحصل... عاوز إيه ثاني يا وش البومة انت!؟»

«يابوي ماهو مينفعش إنها تعاود ثاني لحالها لبلاد الخواجات دي!!»

هتفت فاليريا: «آه سيف هبيبي... مش كنت تكول كده من أول!؟ انت آاوز تروه باغي (باريس)؟»

أومأت زينة بتفهم:

«كنت قول كده من الأول يا أخي بدل ما انت قاعد تنخور لنا فيها!»

قهقه رضوان:

«تجولي إيه... خوي وانتي خابراه زين... محراج شر، أعود بالله»

لوح بيده مدافعاً بارتباك:

«لا.. انتم فهمتوني غلط... أنا مجصديش..»

قاطعته فاليريا بابتسامتها الجميلة: «موش فيها حاجة يا سيف... انت رهت لباغي مرة واهد بس وانت صغير... انت رجل ولازم تلف وتشوف الدنيا... مش كده يا ردوان؟»

زفر رضوان بتعب:

«ما ينفعش يا فاليرية... سيف دراعي اليمين... وزى ما انتي خابرة... كل يوم والتاني تجوم عركة مع ولاد الرفضي (الرحامة).. سعادة البيه يلف الدنيا ويخليني لحالي... وهو أنا كت خلفته ليه؟؟»

«ماهو يابوي... لا الرحامة هيبتلوا عراك، ولا البدراي هيبتلوا نجار... وأنا مش عاوز ألف الدنيا ولا حاجة... يكفيني الشهر اللي زينة هتعاود فيه... أشم نفسي شوية... وأشوف خلع غير الخلع... بيحولوا الحريم هناك بالألوان الطبيعية... ولا مؤاخذه يا أم سيف... انتي بجيتي مننا وعلينا»

أومأت فاليريا:

«ياني إيه!!! مش فاهم!!»

تنحنح رضوان وهو يزغر لابنه بحنق:

«متاخديش في بالك يا فال... الواد ده أصله ناجص رباية، ولسانه متبري منيه»

تنهدت تتجاوز الموضوع وتابعت:

«وافك يا ردوان... سيف أول مرة يطلب طلب... اممم... بس فيه مشكل

واهد!!»

صاح سيف: «ربنا ما يچيب مشاكل»

«لأ يا سيف فيه مشكل واهد... فاكّر لما كنت بدرّس انت لغة فرنسي؟ زينة وهنا بيتكلموا فرنسي، وانت كنت تهرب مني وروه مع إيال في الشاري... إزاي روه فرنسا وانت مش بتتكلم لغة فرنسي!!»

قهقهت زينة بشماتة:

«مش مشكلة ماما... أنا هبقى أترجم له»

ضم أصابعه في قبضة متشنجة مهددًا، عندما صاحت هَنا: «انتم شكلكو نسيتونى!
ولا علشان قاعدة ساكتة ومش بتكلم... وأنا كمان عاوزة أسافر معاهم... ممكن
سيف يعينى مترجمة خاصة ومش هاخذ كتير... خمسة يورو بس في الساعة»
قهقه رضوان:

«والله عشنا وشفنا الحريم بيبيعوا ويشترؤا فيك يا سيف، وانت واجف كيه
الصنم لا بتصد ولا بتزد»





«الزمن بطيء جدًا لمن ينتظر.. سريع جدًا لمن
يخشى... طويل جدًا لمن يتألم... قصير جدًا لمن
يحتفل... لكنه الأبدية لمن يحب.»
- وليام شكسبير

.....

«السلام عليكم يا أهل الدار»
التفتوا جميعاً ناحية الصوت، وكانت زينة أول المرحبين:
«أهلاً أهلاً بهراً عمي وسمحة كمان... انتم سمعتم إني وصلت ولا إيه؟؟»
أخذتها زوجة عمها بين أحضانها ترحب بها بالطريقة الصعيدية، خمس قبلات
طويلة ذات صوت كصفير متواصل على كل وجنة... وهي تتطلع لها بين القبلة
والثانية.

«يا مشا الله يا مشا الله... اسم النبي حارسك وصاينك يا بنت سلفي، ألف حمد
الله على السلامة... جيت أنا وسمحة ورشاد علشان نسلم عليكي... يا ألف مليون
مرحب، البلد كلها نورت»

كانت تعانق سمحة ابنة عمها، وصديقتها منذ الطفولة عندما سمعت اسم رشاد
فسألته باندھاش:

«وهو فين مش شايفاه!؟»

رد أخوها بزغرة قاسية:

«انتي اتخبلتي؟! عاوزاه يدخل إكده من غير إحم ولا دستور!؟»

ضحكت زوجة عمه بغنج، وطرحتها السوداء المطرزة بالخيوط الذهبية، والخرز
الملون تتمايل حول غرتها الصفراء المصبوغة بماء الأكسجين: «ما تأخذهاش يا

سيف يا بني... يظهر إن عشرة الخواجات نَسَّتها عوايدنا... معلوم ماهو البعيد
عن العين بعيد عن القلب. اسم النبي حارسه وصاينه رشاد ابني عمره ما بينسى
الواجب والأصول أبداً.. دا حتى...»

قاطعها رضوان وهو يجذب ذراع ابنه:

«منورة البيت يا حاجة زينات خطوة عزيزة... أنا وسيف هنروحوا نرحبوا برشاد،
وانتي خدي راحتك مع الحريم... كيفك يا سمحة يا بتي؟»
أمسكت يد عمها وقبلتها بحبور:

«نحمدوا ربنا يا عمي... بخير طول ما انت بخير»

ربت على رأسها المغطى بطرحة سوداء:

«الله يرضى عليك يا بتي... وبوكي فين أراضيه اليامين دول؟»

هبت زينات تجيب سؤاله بالتواء في فمها:

«أهه موجود يا حاج... قاعد في البيت مستني فرج ربنا»

أجلى رضوان حنجرته وهو يحدها بعدم ارتياح، ثم التففت لزوجته:

«فاليرية.. رحبي بضيوفاك»

راقبته زينات حتى غاب مع سيف عن عينيها، ثم حركت شفيتها المذمومتين يمينا
ويساراً وهي تنحني جوار أذن فاليريا:

«هو جوزك دا مافيش فايذة فيه؟! دايماً كده قَتَم ومش بياخد ويدي معايا في
الكلام؟! طايقاه إزاي دا يا فال يختي!؟»

أشارت لها فاليريا بضحكة قائلة بعتاب لطيف:

«وبادين مآكي يا زينات؟! كلت لك مش بهب هد يتكلم ألى ردوان وهش... هو

بس مش بهب يتكلم مع هريم... وانت بترغي كتير... اتفضلي... تشربي إيه؟»

رمقت زينة، التي أخذت جانباً مع سمحة وهنا، وبدؤوا في ثرثرة البنات الخافتة،
ثم التففت لفاليريا:

«والله يا فال يختي كان نفسي أقولك نشرب شربات زينة ورشاد... بس أعمل إيه؟! حكم القوي، نستنوا لما الرجالة يفتحوا الموضوع مع بعض...»
وعندما لاحظت وجه فاليريا الذي تخطت ألوانه ألوان الطيف، قمتت بشفاه ممطوطة:

«هو دا اسمه إيه؟! هي المحروسة بنتك هتلاقي زي ابني رشاد فين!!؟»
«آه... أكيد يا زينات... رشاد رجل مهترم... وانت كلت بنفسك... لما الرجال يتكلموا... بلاش نسبك هوادث»
أمسكت زينات بصدر ثوبها وبصقت به قائلة:

«تف تف تف.. الشر برة وبعيد... حوادث إيه يا حبيبتي الملافظ سعد؟! بقولك إيه أنا مش بفهم نص كلامك... هاتي لي أشرب حاجة ساقعة أحسن»
«أخبارك إيه يا سمحة؟؟ ماشاء الله احلويتي وعلى رأي مامتك خراط الصبايا شكله عدى عليك... سنتين يعملوا فيكي كل دا؟؟؟»
«وانتي كمان يا زينة... عيني عليك باردة يا خيتي... الله أكبر في عيني... لو كانت أمك تعرف تبخر كت جولتلها تبخر»
ضحكت زينة:

«هو انتي يا بنتي اللغوة الصعيدي هتفضل معشقة في لسانك!!؟ مامتك إسكندرانة ليه مش بتتكلمي زيه!!؟»

تراجعت سمحة في مقعدها بعينين سارحتين: «لأني بحبها... بحب لغوتنا يا زينة... أنا بت صعيدية بوي وخوي وچدودي صعايدة... هتنكر لأصلي ليه؟؟»
أدركت زينة أن ابنة عمها تخفي أسفل التماع عينيها الراققين غموض مريب:
«شكلك مخبية عني حاجة يا سموحة... يا ترى إيه؟؟؟»

أشارت بعينيها خلفها، فالتفتت زينة لتجد أختها متابعة بصمت كالعادة...
فأمسكت بيد ابنة عمها: «تعالى نطلع أوضتي نتكلم على راحتنا... هنا... خليكي هنا حبيبتي»

زمت هنا فمها حانقة: «من أولها كده؟!»
«هنا... اعملي لمستقبلك... أو للهدية الي مستنياكي في شنطتي»
صفقت بكلتا يديها بحماس مهللة:
«جبتيلي إيه يا زينة؟؟ هه.. جبتيلي إيه؟؟»
«أول ما أفتح الشنطة هتطلع لك هديتك... ممكن أنا وسمحة نكون على راحتنا؟»
أومأت هنا بنظرة ماكرة:
«أبوه طبعا... براحتكم»
ثم أردفت بهمس لم يصل لأذانهما:
«وكأني معرفش انتم هتتكلموا في إيه! دنا هنا البداري... مساكين! لسة مش مقدرين مواهبي... بكرة تعرفوا قيمتي»



«يا مُرحب يا مُرحب... كيفك يا رشاد يا ولدي؟»

«نحمدوا ربنا يا عمي... متآخذنيش طيبنا عليكم من غير إحم ولا دستور»..
«لّع يا ولدي متجولش إكده كُنّا أغراب إياك! الدار داركم... ولا انت حاسب نفسك غريب؟»..

قهقه سيف بسخرية: «والله يابوي أنا ماخبرش الواد دي چراله إيه! يابني ما تفكها شوية ربنا يفكها عليك... بجالك مدة كده كانن في نفسك، ومعتش بتسهر ويانا زي زمان... لتكونش عجلت وأنا مش واخذ بالي! هع هع هع»
هتف رضوان:

«يمكن ربنا كرمه، وبعد عن شلة المجاطيع الي بتتصرمحو وياهم كل ليلة، ولا فاكرني ماخبرش انت بتعمل إيه من ورايا؟؟؟»

«يابوي... انت خابر الشباب... لازم ناخدوها بالطول والعرض جبل ما نتجيد إيدين ورچلين.. ولا إيه يا رشاد؟؟ معاوزش تتشاجى شوية جبل ما...»
حاول التماسك كي لا يلاحظ أحد تفصد العرق على جبينه، و معدته التي تقلبت بالغثيان... أخذ عدة أنفاس عميقة، وقاطع سيف بحدة مبالغة: «مش هيوحصل!»

تبادل سيف ووالده نظرات مستغربة، وسأله رضوان بهدوء: «إيه دا الي مش هيوحصل يا رشاد؟؟؟»

أخفض وتيرة نبرته، وأردف بهدوء متحكم فيه بصعوبة: «الچواز يا عمي... أنا بفكرش فيه واصل...»

ضحك سيف ضارباً على ركبته: «ليه يا چدع؟! دا الچواز نص الدين.. مش عاوز تكمل دينك؟! عينك موجعتش على بت بنت حلال ومزيونة خطفت جلبك وعجلك؟»

تراقص طرف جفنه بتوتر، وهو يبعد يد سيف عن ساقه بخشونة: «لّع يا سيف معاوزش، حد شريكي ياخوي!؟»

استغرب سيف تصرفه، وتبادل مع والده نظرات مرتابة: «لع يا ولد عمي...
محدث شريكك... انت حر... بس يظهر والله أعلم إن أمك الحاجة زينات لها
رأي ثاني»

«لا ثاني ولا ثالث... أنا مش هفكر في الجواز جبل ما سمحة خيتي تتجوز،
وبعدها يحلها الحلال»
هتف سيف:

«أهو على الحالة دي يابوي من يوم ما چت له الحمى إياها وجعد في
المستشفى سبعين... من ياميها معاودتش رشاد اللي نعرفه»
تنهد رشاد وكأنه يستدعي ملكات الصبر:

«أنا زين يا سيف بس ماليش مزاج أخرچ ولا أشوف حد... أنا حر يا ولد عمي
حد شريك!؟»

تبرم رضوان بضيق:
«بكيفك يا ولدي... كل شي بالخناج إلا الجواز بالاتفاج... جولي... تشرب إيه ولا
بعد الغدا؟؟»



«يعني مش هنتكلمي يا سمحة؟»

«أجول إيه بس يا زينة... انتي جاعدة تجري فيا ولا مأمور المُرُكز... خليكي مني، أنا أخباري كلاتها بايتة وماصخة... احكي لي انتي عن بلاد الخواجات... جولي يختي جولي خليني أتنفس شوي وأنا بتخيل العيشة هناك... النسوان شكلهم إيه... والرجال عاملين كيه؟؟ زي ما بنشوفهم في الأفلام إكده؟؟ يعني الواحد منهم بيعبط في الحرمة وسط الشارع جدام الخلايج وينزل بوس فيها ومحدث يجوله جرعة أبوك منين؟؟»

تراجعت زينة بنظرة استغراب:

«لأ طبعاً... الوضع هناك مش كده خالص... يمكن الأفلام بتبالغ شوية... بس فعلاً الناس هناك في حالهم محدش له دعوة بحد... الحب بحرية والعيشة بحرية... الست هناك واحدة وضعها، محدش بيتحكم فيها، وكل واحدة لها حرية تقرير مصيرها... لا أبوها ولا أخوها ليه الحق إنه يحكم عليها، خاصة في موضوع الجواز»

ضاقت عينا سمحة فائلة بمسحة توبيخ:

«جوليها بالمفتشر... تجصدي رشاد أخوي... صوح؟»

«متزعليش مني يا سمحة... بس رشاد زي أخويا.. ومش بحس ناحيته بأي مشاعر تانية... يعني لو اتجوزنا هتبقى كارثة... أنا مش فاهمة إزاي بابا وعمي يقرروا مصيرنا وإحنا صغيرين بالشكل دا!!»

ضربت سمحة بكلتا يديها فوق رأسها تولول:

«يا سنة سوخة يا ولاد! يا ميلة بختك العفش يا رشاد يا خوي... تكونيش عشجانة حد من بلاد الخواجات؟؟»

تلاعبت زينة بأصابعها تحاول ألا تلتقي بعيني ابنة عمها: «والله... تقدرني تقولي... هو مش عشق زي ما انتي فاهمة... بس هي راحة نفسية أكثر... ضياء

رجل چانتي خالص... أي بنت تتمناه زوج ليها... تفكيره عميق، مؤمن بحرية المرأة... وكمان بحقها في التدليل والحب والحرية»
اعوجت شفتا سمحة باستغراب:
«في إيه؟!؟ تدليل... معاناتو إيه الحديث ده؟؟»
أخرجت زينة تنهيدة طويلة:
«يعني... حتى لو قلت لك... مش هتفهمني»
استنفرت سمحة بعصبية:
«ليه؟! شايقاني بهيمة جدامك؟!»
«لا لا سمح الله... البهيمة تزعل»
«جصدك إيه يا زينة يا بت عمي؟! حاسبي على حديثك عاد»
تلاعبت زينة بعينيهما بشقاوة:
«سيبك من قصدي يا سموحة يا حبيبتني دلوقت، وخلينا في المهم... تيجي نزوغ أنا وانت في رحلة بالفلوكة؟ اوعي تقولي لأ»
عقدت سمحة ذراعيها على صدرها قائلة بعناد بعد تفكير دام ثواني: «لع.. لع..»
تراجعت زينة وتمددت على فراشها، قائلة بابتسامة مأكرة تشبه لحد بعيد ابتسامة هنا:
«حتى لو قلت لك مين اللي قابلني النهاردة من الرحاية وأنا جاية على الطريق؟»
لطمت سمحة مولولة:
«يا خراي! يا خراي! مافيش غيره... هو عملها المنكوب على شبابه جاسر»
اعتدلت زينة متسائلة باستغراب:
«وانتي عرفتي منين؟!؟»

ارتبكت سمحة ودارت عينيها بارتباك عن ابنة عمها: «هعرف منين يعني؟! هو مافيش غيره سبة البلاوي كلاتها»

أمسكتها زينة من كتفها، لتعيدها مجبرة إياها على النظر في وجهها: «طب عيني في عينك كده!»

لوحث بيدها لتبعدها عنها باستياء:

«واه يا زينة! ما تبجيش زانة وحشيرة كيه الدبانة الرزيلة! جلت لك مافيش حاجة... انتي اللي بتوهي في الكلام، ومش عاوزه تجري عن اللي حوصل... وظني إن لا سيف ولا عمي يعرفوا حاجة... صوح الحديث؟؟»

«أيوه طبعاً... انتي هبلة؟! كان زمان دم بقى للركب.. ما انتي عارفة المخ الصعيدي ييفكر إزاي»

تمهدت سمحة:

«إيوه خابرة... ربنا يهديهم... وبعد ما جلاب النصاب جطع عليكي الطريق... حوصل إيه؟؟»

استمرت زينة بسرد ما حصل، متجاهلة الانفعالات المتباينة على وجه ابنة عمها، والتي لونتته بجميع الألوان، بالإضافة إلى أن فمها لم يغلق مرة واحدة، حتى صرخت فجأة وهي تخبط على صدرها: «يا حومي يا حومي!! يا خراي يا خراي!! رفعتي يدك على چاسر الرحامي!!؟ يا حومي يا حومي!! وجدرتي تعملها يا بت البداري!!؟»

ترفعت زينة وهي تحلق بعينيها بكبرياء للسقف:

«أعملها معملهاش ليه؟! مش هو اللي بدأ؟! بس للأسف... قبل ما إيدي تسلم على وشه وصل اللي أنقذه مني...»

استمتعت بحماس سمحة المتربح وهي بانتظار تكلمة الحكاية، ونطقت بالاسم الذي زاد من رعبها: «رافع... الرحامي»

شهقت سمحة:

«رافع الرحامي بذات نفسه!!؟ يا حومي يا حومي!! لو سيف ولا رشاد شمو خبر
الدم هيوبجى بحور... يا لهوووووي!! وبعدين يا خيتي إيه الي حوصل؟؟؟»
«ولا حاجة... زي ما كان بيعمل واحنا صغيرين... عامل نفسه الفارس الي
مجابتوش ولادة... شخط فيهم وهشهم قدامه زي الخرفان... وضحك عليا لما
قلت له إني كنت هضرب ابن عمه...»

«وخولصت الحكوة على إكده؟ الحمد لله... انتي انكتب لك عمر جديد يا
خيتي»

«وليه الفزع دا كله!؟ بس قولي لي.. هو جاسر متعود يعمل مشاكل كتير كده؟؟؟»
التوى طرف فمها وهي تحركه يمينا ويساراً مثل أمها: «مش بجولك چلاب
النصايب! وغير إكده... بيتمصخر كل ليلة مع الغوازي في الموالد... عياره فالت
من يومه»

سألته زينة سارحة في ملامح الفارس الأسمر التي بدأت تزور خيالها وتفرض
نفسها على أفكارها، وترجمه جسدها بقشعريرة غريبة للذكرى: «إلا هو بيشتغل
إيه؟؟؟»

«ولا حاجة... عواطلي ودابير على حل شعره... وبيشج على أرضهم كل حين
ومين... چبران خواطر يعني.. هو هيفوج للأرض ولا للغوازي»
أفاقت زينة من شرودها متسائلة بقرف:

«إيه دا... هو كمان بيجري ورا الغوازي!!؟»
انتبهت سمحة متسائلة:

«هو كمان!؟ هو انتي بتتحدثي عن مين؟»
«عن رافع طبعاً... آمال انتي فاكراني بتكلم عن مين!؟ آه... جاسر!!»
ثم غمزت لها بمكر: «مش قلت لك فيه إن..»
اندفعت سمحة بعصبية:

«لا إنَّ ولا ما إنَّاشي... رافع بيدير تجارة الخيول تبع عيلته... بيسافر بلاد برة
وبيشترى ويبيع الخيول الأصيلة... فوج ده وده... هو العاجل الي فيهم... خلاص
يا ست زينة... ارتحتي؟ هروح أشوف أُمي زمانها كلت دماغ أمك»
أوقفنها قبل أن تغادر:

«سمحة... متنسيش... بكرة الزهر... الفلوكة»

أومأت برأسها بدون أن تترك لها الفرصة للمزيد من النظرات التي تكاد تفضحها.
راقبتها زينة تهرول مغادرة غرفتها ثم صفقت الباب خلفها... ضحكت معيدة
رأسها على وسادتها، متلعبة بخصلات شعرها الأحمر، تستعيد تلك اللحظات وهو
يحدثها من فوق صهوة جواده الأبيض، وعرفه الأسود يتطاير في الهواء... تحيط
بهما مهابة غريبة، يكاد الهواء حولهما يركع لسطوتهما، والأرض تلين تحت حوافر
الجواد الدابكة... حتى عيناه... رغم لا مبالاته التي يحاول تصنعها... ولكن عينيه
السوداوين استعمرت زرقه شواطئها في لحظة... لحظة واحدة فقط... اخترقت كل
دفاعاتها وأفقدتها السيطرة على تلك اللحظة اليتيمة... ولكن آثارها الجانبية
عاثت بها فوضى... ملأت صدرها بالهواء مستعيدة تلك اللحظة مراراً وتكراراً
وكأنها اسطوانة مشروخة تعيد نفسها بدول كلل.

غلبها النعاس وذراعاها تحتضان جسدها، مستمتعة بتلك الرجة اللذيذة وهي
تنزلق في عمق سواد عينيه اللانهائي... ربما هي رائحة المكان... غرفتها، الوسادة،
الأرض، الوطن... ولكنها نامت كما لم يغمض لها جفن منذ عامين كاملين.

فتحت عينها تشعر بشفتيها مفترقتين بابتسامة اتسعت عندما رأت أمها تجلس
جوارها، تداعب شعرها كما كانت تفعل وهي صغيرة، وعلى الجانب الآخر تمددت
أختها الصغيرة تحيط خصرها بذراعيها، كأنها تخشى إن أفلتتها تتبخر كأنها حلم
تبدد... قمت بكسل: «بونچور ماما»

أطلقت فاليريا ضحكة ناعمة:

«كصدك بونسوار بيبي»

هبت من مكانها فتململت هنا تنوح بصوت ناعس: «انتى هتروحي فين؟؟ خليكي معايا»

أمسكت زينة يدها مطمئنة:

«أنا مش هروح أي مكان حبييتي»

ثم التفتت لأمها متسائلة بفكر مشوش:

«إحنا الساعة كام دلوقت؟؟»

«الأشأ أذن من... وكت كصير»..

«ياااااااه يا ماما... وليه سبتيني نائمة كل الوقت دا؟! وإيه الأصوات دي؟؟»

هزت أمها برأسها وكأنها مستغربة السؤال، فهتفت هنا ضاحكة: «شكلك نسييتي بلد صوالحة»

ركزت أفكارها للحظة ثم هتفت: «آه... طبعاً إزاي أكون في الصعيد وأنسى كونشرتو الليل العادي؟! زي ما يكونوا بيتنافسوا مين عنده بارود أكثر من الثاني! الدنيا عدت القرن الواحد وعشرين وإحنا لسة واقفين عند القرن التمنتاشر... بذمتك يا فاليريا حد يسيب باغي ويجي الصعيد!؟»

تنهدت فاليريا وعيناها تهيمان بالعشق، فتأوهت هنا: «يعني كان لازم تيجي على الجرح!؟ أهى عملت زي الحاج رضوان وسرحت في الذي مضى»
زمت الأم شفيتها بتوبيخ:

«إيب بنت... انت ناكص تربية»

توسدت زينة صدر أمها بتنهيذة راحة:

«إلا قولى لي مونشيري... حبيتي الراجل دا إزاي؟؟»

«أنا هكيت لك الهكاية دي كتير زينة»

«ولسة عاوزه أسمعها ماما... عاوزه أصدق إن ممكن في زمانا دا اللي الصوت فيه مش بيتسمع إلا بالبارود والرصاص... ممكن الحب يغلب... ممكن العشق يدخل قلب رجل صعيدي، ويتحدى بيه الدنيا كلها... زي ما بابا عمل معاكي»

هامت عيناها مرة أخرى بدموع الذكريات الجميلة:
« أبوك راجل أظيم... يوم شفته مكدرتش أنزل إيني... وأكدت إنه راجل لي أنا
وبس... هو كان مشكل شوية... بس مش أصلج كثير»
شهقت الفتاتان بالضحك وهتفت زينة:
«أصلج يا فاليريا؟! فيه حاجة في الحب اسمها أصلج»
احمرت وجنتا أمها بشدة بخجل:
«يووووه زينة انت أأرف كصدي... أنا بهب ردوان وهو كمان... وهوب زي دا
أتمنى تلاقيه انتي وهنا... بس مش كثير ممكن نلاقي ردوان ثاني»
تراقصت حواجب زينة:
«أيوه يا حاجة فاليريا... ومين يشهد للحاج رضوان!»
قرصت أنفها موبخة وهي تسألها:
«انتتي بنت شقية هتاخذ أنا في دوكة ومش تقولي.. إيه حكاية دياء دي؟ سيفيل
تعرف موضوع دا؟»
قرضت زينة شفتها السفلى متنهدة باستياء:
«أيوه ماما... هو شخص ممتاز كثير»
«بس هو مش فرنسي»..
«لا ماما... هو من المغرب عاش طول عمره في فرنسا... وكان الدكتور المشرف
على علاجي... وعدني بيني لي فيلا في أي مكان أنا أختاره... وتقريباً سيف فكرني...
كنت نسيت تقريباً المخ الصعيدي بيشتغل إزاي... مش عارفة أعمل إيه!»
ربتت على يد ابنتها مطمئنة بابتسامة افتقدتها زينة كثيراً، كانت بلسماً لأيام
الغربة التي شققت أحاسيسها وجففتها:
«اطمئن هبيبي... بس واهد واهد... وشوفي مامي هتأمل إيه»
قفزت زينة من مكانها لتقف فوق الفراش، غير عابئة بأختها التي انتفضت فزعة
على صرخات أختها تتراقص بصيحات مهللة:

«يا حلاوتك يا فاليريا يا جامدة أوي!»
اتسعت عينا فاليريا متسائلة بصدمة:
«زينة انت كنت فين طول سنتين؟! في باغي مش بيئملوا كده..»
جلست تحتضن أمها وهنا ضاحكة:
«مش عاوزه أصدملك يا فال، بس باغي الي انتي تعرفيها تقريباً مسحوها من
على الخريطة»
هتفت هنا بإحباط:
«يعني كل الأماكن الي ماما بتحكي عنها وشوقتنا ليها مش هنلاقيها؟! يادي
الحظ!»
«انتي خلاص، حجزتي وقطعتي التذكرة وسافرتي؟! يا بنتي اصبري على رزقك لما
نشوف أخوكي هيعمل فينا إيه.. إلا هي طنط زينات مشيت إمتى؟؟»
أمسكت فاليريا رأسها قائلة بعينين تدوران:
«دي أمل دوشة رهيب في دماغى... رغي رغي.. الست دي هيهصل لها جنون،
لو انت مش اتجوزت رشاد»
قهقهت زينة بضحكة رقيقة وهي تحتضن هنا:
«رأيك إيه يا هنون؟»
«رأبي إن طنط زينات تجهز شنطتها... في مستشفى المجانين بيحتاجوا لبس
كثير»



تقلّب رافع على فراشه على كل اتجاهاته... ثم استسلم أخيراً ونهض مستغفراً... صورتها لا تفارق خياله.. بشعرها الأحمر الثائر، وملامحها المتمردة وكلماتها كطلقات الرصاص، وجراتها! بدلاً من مشاعر الاستياء التي توقع أن تغلق كل مشاعره تجاه فتاة مثلها، تدور على حل شعرها في بلاد الخواجات، وقد أعطاها أهلها الحرية الكاملة لتسافر بدون محرم، المفروض أن ينفر منها كما قد يفعل أي رجل يضخ في أورده الدم الصعيدي الحار؛ ولكنها بكل أريحية متربعة داخل عقله ترفض مبارحته.

لم تتغير كثيراً منذ كانت في المدرسة. اعتاد أن يقف أمام المدرسة ليمنع أي مشاكل يمكن أن تشعل فتيل الحرب، الذي لا يلبث أن تهدأ شراراته حتى تشتعل من جديد... كما اعتاد أن يراها... متمائلة مختالة بشعرها وقوامها وزرقة عينيها... وكل ما ورثته عن أمها الخوجاية... كانت كياسمينه بيضاء برية نبتت في حقل برسيم... ولكن وصفها بالياسمينه أجحفها كثيراً... فهي كشعلة النار المهددة بإحراق أعصاب كل وأي رجل يراها ويتمناها... ولكنها كانت أبعد من السماء عن الأرض لأي شارب فكر باحتواء تلك النارية... ولكنه لم يفقد عقله كغيره ليعذب أحلامه بتلك المشعوذة الحمراء... ما الذي حدث له الآن؟! كيف حدث وأحرقت كل دروعه الآن!!!؟ ما الذي زاد عليها منذ أن كانت بهريول المدرسة!؟

لماذا تغتال عالمه وتقص مضجعه؟! يتخيلها على وسادته كما في فيلم الوسادة الخالية... كان يسخر من رواية إحسان عبد القدوس، لم يتخيل رجلاً بكامل قواه العقلية يعشق امرأة لدرجة أن تسكن وسادته... استرق نظرة خلفية على وسادته، فطالعت ملامحها المريدة، وزرقة عينيها المهددين بإعصار ثلجي لم تذيبه خصلاتها النارية. أمسك بالوسادة يشبعها ضرباً بقبضاته حتى اختفت صورتها... هز رأسه بابتسامة ساخرة: «أبشر يا رافع اتجننت خلاص!»



سألتهما سمحة بتشكك وهما تتسللان خفية بدون أن يراها أحد:
«زينة.. ما بلاها الحكيوة دي.. لو رشاد ولا الألعن لو سيف شم خبر هنروحوا
فطيس يا خيتي»

جذبتها زينة من يدها موبخة دون أن تتوقف:
«انتي بقيتي جبانة كده امتي؟! ما أنا وانتي ياما خرجنا بالفلوكة... إيه الي جد
النهاردة؟! وكمان البلد وحشتني أوي... نفسي أحضن النيل وأشم هواه... مدي
بأة بلاش لكاعة»
«يا مَرَّك يا سمحة! والله شكلك هتودرينا يا بت الخوجاية!»
ضجت زينة بالضحك:

«آه لو سمعتك! مش بتكره حاجة في دينتها أد إن حد يقول عليها خوجاية!»
أثار انتباهها سيدة عجوز تفتش الأرض في الطريق جالسة، أمامها قفص قديم
من أقفاص الفاكهة رصت عليه مجموعة من الحلويات الرخيصة الثمن. جذبت
ذراع ابنة عمها هامسة: «سمحة.. مين الست دي؟؟»
رمقتها سمحة ثم مصمصت شفيتها بشفقة:
«إيه مفكراهاش؟! دي الولية أم شندويلي... والبت الي جاعدة على حچرها
دي توبجى بت ابنها»
أومأت زينة بتفهم:

«آه مش دي الست الي جوزها مات باين بعد ما اتجوزها بأسبوع؟»
«إيوه.. اسم الله عليكي.. هي دي... ولجت نفسها حامل بعديها وخلفت
شندويلي، وجعدت عليه زي ما انتي خابرة ومدخلتش عليه راجل واصل لحد ما
چوزته... وزى ما يكون الفرح مش مكتوب لها.. أول الواد ما خلّف البت دي
مات بعديها بسنة واحدة... وحصلته مرته حسرة عليه... وجعدت البت مع ستها
تنصرها وتتحسر على شباب ابنها وشبابها الي متهنتش بيه»
طفرت الدموع في عيون زينة:

«لا حول ولا قوة إلا بالله! مسكينة! إحنا لازم نساعدها يا سمحة»
«رچالة البداري مجصروش معاها، بس هي راسها كيه الحجر، مبدهاش
مساعدة من حد واصل... ومش عاوزة حسنة من حد، والجلول جولها إنها
هتصرف على بت ابنها لحد ما تچوزها، لو ربنا كتب لها عمر»
«الست دي المفروض يتعمل لها تمثال... لو كانت في فرنسا كانت الدولة اتكفلت
بيها»...

«الله يستر عرضك خيلنا في مشكلتنا، وادعي ربنا اليوم يعدي على خير»
«بس ما تترزريش كده أهه! وصلنا... تعالي ساعديني نجر الفلوكة للمية»
«يا وجعتك المطينة يا سمحة! چري يختي چري لما نشوف هيچرانا إيه من
چرايرك.. زينة.. زينة...»
«إيه؟! مالك؟! انتي مش هتبطلي نق؟!»
«لع.. بس... مخبراش.. الفلوكة دي منزلتش المية من زمان الزمان... متوكدة إننا
مش هنخرجوا؟»..

كانت الفلوكة قد وصلت للمياه، ووقفنا لاهتتين تراقبها تتمايل بترقب... ثم
قفزت زينة مهللة بفرحة: «دلوقتي أنا متأكدة... اتفضلي يا خوافة هانم... اركبي..
مش عارفة ملبستيش بنطلون ليه.. إيه الكركبة الي انتي فيها دي؟! ملس وطرحه
وبلاوي من تحت كمان؟!»
زغرتها سمحة بحدة:

«بجولك إيه يا زينة... بكفياي انتي يختي بزعلونك الي انتي شامطاه ده...
والله لو رشاد خد خبر إني لابسة زعلون ليشنجنى بيه.. بكفاية النصيبة الي
چراني وراي فيها.. اتفضلي يختي... اركبي..»

راقبتها زينة ضاحكة ترفع طرف جلبابها وتخوض في المياه حتى استقرت في
القارب بصعوبة، بينما لحقت بها زينة بخفة تسترجع أيام الشقاوة، عندما كانت
هي وسمحة تخوضان هذه المغامرة كل شهر تقريباً... ولم تدر ما الذي أصاب

ابنة عمها لتصاب بهذا الخوف فجأة لمجرد نزهة في النيل، بدون أن يشعر بهم أحد!

أمسكت زينة أحد المجدفين، بينما أمسكت سمحة بالمجداف الآخر. بدأت تتخلى عن قلقها، وتستعيد روحها المرحية، وإن كان بصعوبة بالغة، والمجداف يتلوى بين طيات الماء الأزرق... ويرتفع في الهواء ناثرًا رذاذًا منعشًا على وجهيهما... سرت عدوى الضحك والانطلاق في الفتاتين، واستمرت بالتجديف حتى وصلت لبقيتهما المنعزلة، التي اعتادت الوقوف فيها لتأمل جمال المكان. استرخت زينة وهي تتمدد على حافة الفلوكة العريضة نسيبًا وتنهدت:

«تصدقي يا سمحة... مش أنا سافرت فرنسا... ولفيتها مدينة مدينة؟ وبينني وبينك رحت بلاد ثانية كثير، بس ما تقوليش لحد أحسن سيف يجيله سكتة قلبية»

ضحكت سمحة وتوردت سمرة وجنتيها بفعل الشمس والماء، بينما أكملت زينة:

«رغم جمال كل البلاد دي.. بس محستش براحة زي اللي حساها دلوقت... يااااااااه يا سمحة! شوفي السما حلوة ازاى!»

تطلعت سمحة لأعلى واطعة يدها فوق حاجبيها لتمنع أشعة الشمس من مضايقة عينيها، وهتفت بشفاه مقلوبة: «مالها السما؟! عادية يعني.. هي السما عنديكم لونها إيه؟؟»

«زرقا طبعًا... بس مختلفة»..

سخرت سمحة:

«يعني الشمس عندينا مدورة وعنديكم مربعة؟! والله انتي بتجولي كلام عجيب يا خيتي»

«انتى مش هتفهمني... بقولك إيه.. هو متجوز؟؟»

«هو مين ده؟؟»

«هكون بسأل على مين يعني؟! رافع طبعًا»

«رافع الرحامي.. ويتسألني ليه؟؟»

«يووووه يا سمحة... ماتردي وخلص!»

«لع.. مچوزش... بس بيجولوا جاري فاتحة بت عمه معالي... البت السو دي...
تجوليش ماچابتهاش ولادة»...

سألها بمكر ونبرة ملاوعة: «طب وجاسر.. خاطب ولا قاري فاتحة؟»

تعصبت سمحة وانقلبت ملامحها وهتفت بعصبية: «لا دي ولا دي... البيه مش
بتاع چواز.. بتاع غوازي ومصاخر وبس...»

«مش البت فريدة السهتانة دي... فakraها؟ اللي كانت معانا في المدرسة... مش
هي بنت عمته؟»

ضربت سمحة يديها فوق بعضهما على صدرها بزفرة متحدية:

«إيوه يا زينة... هي بت عمته... بس معيتچوزهاش... عارفة ليه؟ عشان
مملياش عينه الفارغة... والبت انكسرت بعد ما ماتت أمها، وأبوها راح اتچوز
ورماها حدا خالها... حاجة تانية يا زينة؟؟»

أغمضت عينيها مستمتعة بنسمات الهواء الناعمة، قائلة بابتسامة:

«لو افكرت حاجة تانية هسألك... آه بالمناسبة.. أخبارك انتي وسيف إيه؟؟»
بنظرات أكثر مكرًا، استغلت سمحة عيني ابنة عمها المغمضتين، وانحنت على
طرف المركب لتملأ كفها بالماء، ثم نثرته على وجهها، لتقفز زينة صارخة من
المفاجأة، بينما ضحكات سمحة تعلو في الصمت المقدس حولهم، إلا من حفيف
أوراق أشجار الكافور التي تدلي أغصانها باستحياء تغسلها في النهر.



«على فين العزم إن شا الله يا فريدة؟؟»
وقفت مطرقة بارتباك... ثم تطلعت لزوجة خالها الجالسة في مكانها المعتاد في الشرفة الكبيرة: «بعد إذنك يا مرت خالي... الخرز خلص من عندي... هروح لحمدون السروجي أجيّب غيره»
«لهو انتي يا بت مش هتبطلي تمجيج عينيكي في المخروبة المفارش دي؟! دا انتي يا حبة عيني جاطمة رجبتك عليها ليل نهار!»
أجابتها فريدة بتنهيذة طويلة:
«وأنا كت لجيت شغلة ومشتغلتهاش؟! أديني بسلي وجتي يا مرت خالي بدل مانا لا شغلة ولا عملة...»
«طيب يا نظري.. بس متعوجيش. بت يا فريدة! ماتنسيس تجري غفير من الغفرا الي متلجحين برة دول معاكي».
تأوهت من تحت ضروسها:
«ولزومه إيه بس يا مرت خالي؟!»
«الأمر ما يسلمش يا بتي... يمكن حدا من عيال البداري يتعرض لك إكده ولا إكده الأمر ميسلمش... انتي أمانة عندينا يا فريدة ولازمن نحافظوا عليها»..
أمالت فمها لأحد جانبيه ممتعة، وهزت رأسها بدون اقتناع:
«أوامرك يا مرت خالي... حاجة تانية؟»
«ميؤمرش عليكي عدو يا ست البنتة... يا رب أفرح بيكي عروسة عن جريب إن شالله. فريدة.. متعوجيش لخالك يعمل لنا نصيبة»

أخيراً! الهواء يدخل ويخرج من رثتها بشكل طبيعي! له مذاق الحرية. تجاهلت طلب زوجة خالها، وانطلقت بدون أن تصطحب أحد الخفراء كما أمرتها؛ فهذه اللحظات اليتيمة تستجديها بصعوبة من بين أيامها المماثلة في ألوانها الكالحة... وعليها استغلال كل لحظة فيها. لم تبال بالنظرات الفضولية التي لاحقتها في

طريقها، انشغلت بالتطلع بفرح للسماء الزرقاء، لا تشعر بالاكْتفاء أبداً وهي تعب من الهواء المتناح بقدر ما تستطيع. تنهيدة يأس تخللت انطلاقتها، تفكر لو تستطيع اختزان بعض من هذه الحرية».

كما كل شيء جميل ينتهي بسرعة، كذلك تلك اللحظات الضئيلة أبت أن تمتد لأمد أطول، بتمرد اتخذت طريقاً مغايراً لطريق عودتها، فلم تكن على استعداد بعد للتسليم ولو بحفنة من هواء.

قبضة مؤلمة اعتصرت قلبها... وذكرى وجه جاسر يرمقها بسخرية، عندما عرضت عليه زوجة خالها الزواج بها... وكأنه لم يتخيل أبداً أن تكون هذه السندريلا المنكسرة زوجة له. واشتدت القبضة المؤلمة عندما تذكرت عاداتهم... بين يوم وليلة قد يستطيع خالها أن يغصب على ابن أخيه، وتجد نفسها زوجة مهملة في دار جاسر الرحامي... حتى شرف الاختيار أو الاعتراض لن تناله؛ فاليتم موت حقوقه بالتدريج، حتى حق الحياة بكرامة يعتبر ترقاً المطالبة به. يكفيه نفساً يعبئ صدره بالهواء حين يستطيع، ولقمة مغمسة بالهوان إن وجدها، وكسوة عار تستر جسده، ولكنها تكشف كل عوراته على المتفضلين عليه.

بحدة مسحت دمعها الذليلة الوحيدة بكم قميصها، وعيناها ترقان بإصرار... لن تصبح للإهمال وجبة هنيئة أبداً... كل ما عانت في حياتها من بعد وفاة أمها سيكون مجرد ماضٍ... ولن يعود... ستتحكم بكل خيوط مستقبلها، لن تأخذ من حياة السندريلا إلا نهايتها السعيدة، نعم هذا ما سيحدث... وقفت فجأة تتلفت حولها مذعورة. وجدت نفسها خارج حدود البلد، وحدود الرحامة.

جفت الدماء في عروقها وهي توبخ نفسها عائدة للخلف، عندما ظهر من العدم ملثم يرتدي السواد، شاهراً سلاحه الآلي في وجهها! تراجعت مرتبكة:

«انت مين انت؟! خلني أمر... أنا من الرحامة... الله يستر عرضك خلني أمر بلاش تودر نفسك يا ولد عمي»





«من خلال أشواك الخطر نحصل على زهور السلام»
- وليام شكسبير

.....

«زينة... يا زينة.. انتي فمتي ولا إيه؟! مش هنعاود جبل خوي وأخوي ما
يرجعوا»

هبت زينة من مكانها تتساءل بتوهان:

«هي الساعة كام؟»

ثم نظرت في تليفونها المحمول لتصرخ:

«دي هنا وماما... بيتصلوا بينا من الصبح!!»

شهقت سمحة برعب:

«بس أنا مسمعتش صوته!»

أجابتها زينة بخجل وهي تضع التليفون على أذنها: «كنت عامله سيلانسيو

"silencieux"

«عامله إيه يختي!؟»

«ششش.. ماما بتزد... وي ماما... داكور... حالاً هنكون عندك»

كانت سمحة تولول، عندما وبختها زينة:

«بطلي الي انت بتعمله دا ويلا بينا... جدي معايا... إيه دا؟! هي المية دي

دخلت منين!؟»..

حدقت الفتاتان بالمياه التي تراكمت في قاع الفلوكة، لتصرخ سمحة من جديد

بصوت مجلجل.



«انت مسمعتنيش؟! بجولك أنا من الرحامة... وسع لي طريق أحسن لك»

ولأول مرة يتنازل بالرد عليها:

«ولو موسعتش، هتعملي إيه يا فريدة الرحامي؟»

شهقت عندما ميزت نبرة ذلك الصوت... كان الغريب زائر أحلامها لفترة كبيرة...

ثم انقطع عنها كما انقطع عن رؤيتها. أزاح اللثام عن وجهه لتتألق عيناها بفرح

لم تستطع مداراته وهي تهتف:

«حمادي الدهشان؟!»

ارتفع أحد حاجبيه الكثرين، بينما مسح شاربه بطرف إصبعه مدرّجاً فرحتها الخفية

برؤيته، وقد لانت ملامحه المدموغة بختم القسوة، التي تبدو لأول وهلة وكأنها

منحوتة من منحوتات الجبل:

«إيوه... أنا حمادي.. شكلك منستينيش.. لساكي فاكراني»

سيطرت بصعوبة على أسباب سعادتها، لتجبر ملامحها على العبوس وهي تتقدم

بخطواتها:

«ومن ميتى بتقطع عليا الطريق يا حمادي؟!»

«ما عشت ولا كت لما أقطع طريقك... بس يظهر إنك كتي سارحة مشايفاش

على فين رايحة... لو مكتش نضرتك من بعيد سارحة معرفاش بتخطي فين، كان

زمان ديابة الجبل خدوكي تسلايتهم، ولا همهم رحامة ولا بداري... ولا انتي

مخبراش إن دا طريق ديابة الجبل؟»

تلفتت حولها بخوف، ثم رفعت رأسها بثبات:

«أنا فريدة الرحامي، لازم انت وكل ديب من ديابتك يعرفوا زين إن لحمي

مُر... مش آني اللي أكون نهيبة لأي كلب مسعور فاكر حاله ديب صوح»

رمقها بإعجاب:

«وهو دا اللي مشعلجني بحبال هواكي الدايبة يا بت الرحامة»

ارتبكت تداري عينيها بحياء:

«تجصد إيه يا حمادي؟»

«كلامي واضح.. وانتي خابراي زين.. ورغم شچاعتك ووجفتك كيه السبع جدامي... رغم إن أكبرها شنبات في البلد دي يعمل لحماي الدهشان ألف حساب... بس انتي مهمكيش... خابرة ليه يا فريدة؟؟ أجولك... علشان عشجي معشش في جلبك، كيه ما عشجك سارج النوم من عيني».

اتسعت عيناها مصدومة، وضاعت الكلمات من لسانها. حاولت الاعتراض أو الابتعاد عنه، أو حتى صفعه كما تتوق لتمسح تلك الابتسامة عن وجهه الأسمر المليح، وثقته بنيل رضاها عن عرضه الفج. وفجأة تذكرت انكسارها، وحلم السندريلا، وحياتها التي قررت أن تخرج بها من عتمة المعاناة... أعادت نفسها التي فقدتها بين كلمات حمادي، التي سيطرت على حواسها العطشى للحظات فقط.

عقدت ذراعيها على صدرها، ورمقته بتلك النظرة التي اعتادت أن تنظر بها لحياتها المهيضة:

«انت بتتحدث معايا آني يا حمادي؟! عاوزني آني فريدة الرحامي... أبص ليك انت... حمادي الدهشان ديب من مطايرد الجبل... حراج أراضي وسراج محاصيل، ويمكن جتال جتلة»
أوقفها صارخًا باحتجاج:

«وجفي عندك! أنا عمر يدي ما اتغمست بالدم!»

«والحرج والسرجة دا يوجبى اسمه إيه؟! هو مش دم الغلابة دا اللي انت بتمصه انت ومجاطيعك؟! البيوت اللي بتخربوها دي مش بيوت ناس عمراة؟! خلني معاك للآخر... وجلنا إن كل اللي بتعمله حلال... هتشد طولك وعرضك دا وهتاچي تطلبني من أبو... من خالي؟! هتدفع مهري وتبني لي دار تليج بمجامي؟! ولا هتسكّني كهف من كهوف الجبل أعيش معاك كيه الوطاويط... فتّح عيونك زين يا حمادي وشوف انت بتتحدث مع مين، وبعدين احلم، بس

النوبة الحياية استغطى زين عشان تحلم على كدك ومن توبك... ودلوك ممكن توسع لي طريق، ولا لسة حداك كلام ماصخ تاني كيفك چايبك تسمعھولي؟»
تنحى عن نھر الطريق مطرقاً بغيمة غطت بريق عينيه، وأشار لها بيده:
«اتفضلي يا... فريدة هانم... ومتأخذينيش لو كت جليت مزاج چنابك»
شمخت بأنفھا تتجاوزھ باستعلاء، وعندما أصبح ظھرھا له، هتف فاستمعت له بدون أن تلتفت:

«محدش يجدر يتعرض لك وأنا حي على وش الدنيا يا فريدة... هانم... أي مكان رچليكي تخطيه لازم تعرفي إن محرم على أي مطرود أو ديب سعران إنه بس ينضرك»..

لم تجد ما ترد به عليه، فاستمرت بطريقھا... تغطى عينھا سحابة من الدموع حبستها طويلاً... لم تكن ترى طريقھا عندما اصطدمت بجبل آخر ظهر فجأة في نھر الطريق... صرخت بفزع وهي تمسح عينھا بقوة، تتطلع للرجل الذي يرمقھا بنظرة ساخرة... هتفت باسمه رغم أنها لم تره منذ سنوات: «رشاد!!!؟»
تطلع خلفھا وهو يعيد رملھا بتلك النظرة المحتقرة: «خلص مشوارك يا بت الرحامة!؟»

بارتباك شديد: «تجصد إيه؟! انت بتراجبني يا ويلد البداري!؟»
«عاودي في طريقك يا بت الناس... وبلاش اللعب مع الديابة... سكتھ واعرة...»
تسارعت أنفاسھا تتخيل ما يقصده رشاد، والمصيبة الأكبر أن يخبر أهلھا بما رآه. وضعت يدها على فمھا تكتم نشيجھا، عائدة بخطوات شبه راكضة، وكأن ذنبھا يلحق بها. عاتبت نفسها على الخطأ الذي جرھا لطريق الديابة، وانتهى مشوارھا بشعور متراكم من الخوف والندم.



«يا وجعة مهببة... يا يوم مطلعتلوش شمش!! شوفتي... شوفتي أخرة الي يمشي وراكي يا ست زينة هانم!!»

«دلوقت بقيت زينة هانم؟! ما انتي كنتي مبسوفة من شوية! اهدي وفكري بس هنخرج من هنا إزاي»

«ودي فيها فكر دي؟! امسكي المخروب الي في يدك دا، وجولي لمّرت عمي تلحجنا جبل ما نخرجوا!»

هزت زينة رأسها بتفكير عميق:

«مش هينفع... ماما ممكن من خوفها هتقول لبابا، أو المصيبة الأكبر تقول لسيف!»

صرخت سمحة بولولة:

«لا وانت السادجة، النصيبة الأكبر إننا نخرجوا في مكانا... لا وحضرتك مبتعرفيش تعومي كمان... الحل إيه بجى دلوكيت يا ست زينة؟؟ كات شورتك طين»

تلقت حولها تمعن التفكير في مخرج. الوقت يدهمها بسرعة رهيبة وقد وصل مستوى الماء لركبتيهما! بدأت بالارتعاش والمياه ترتفع بسرعة كبيرة... أخذت سمحة نفساً عميقاً وهتفت بثبات:

«اسمعيني مجدمناش حل تاني... أنا هعوم لحد الشط»..

قاطعتها زينة صارخة:

«لأ.. مش هينفع تسيبيني لوحدي... سمحة أنا بفكر وهلاقي حل... بس اصبري»...

وأثناء استغراقهما في التفكير، وعيونهما تجول حولهم لعل الإنقاذ ينزل من السماء، أو من تحت الماء، تهللت أسارير زينة وهي تسمع من بعيد هدير موتور: «سمحة اسمعي... في لنش جاي من بعيد... أنا هشاورله»

حاولت إثناءها متأخرة؛ فقد أخذت ابنة عمها تهلل وترفع يديها لأعلى ليراهما سائق اللنش... وعلى ما يبدو أن الحظ حليفهما؛ فقد بدأ اللنش يغير اتجاهه

ناحيتهما... وعندما ازداد اقتراباً صرخت سمحة مولولة: «يا وجعتنا المطينة!! يا خراب بيتنا المستعجل!! يا خسارة شبابنا!!»
«فيه إيه يا بومة!!!؟ الإنقاذ وصل أهه... هنروح البيت من غير ما حد يحس»
«انتى خابرة مين الي چاي بريحنا ده يا بت عمي؟»
«هيكون مين يعني؟! صياد من الصيادين»
«لا يا فالحة.. دا رافع الرحامي»

بهتت زينة، وهي تعيد التحديق بوجه سائق اللنش الذي يزداد اقتراباً... ازدردت لعبها بصعوبة في محاولة المحافظة على رباطة جأشها: «طب وإيه يعني؟!»
«وإيه يعني دي توبجي تحاولي تفهميها لخوي... إنما رشاد أخوي معندوش غير تفاهم واحد بس... وأنا لساتني صغيرة ومدخلتش دنيا... أنا رايحة أموت غرجانة أحسن ما موت مجتولة»

فوجئت زينة بابنة عمها تقفز للماء وتسبح مبتعدة مع اقتراب اللنش.
حاولت مناداتها لتراجع، وتعيد تفكيرها في منطقتها الأعوج، خاصة وقد أصبح الإنقاذ قاب قوسين من الموت غرقاً، أو قتلاً. بدأ هدير محركه ينخفض مع اقترابه المطرد الذي أثار موجات متوترة على صفحة المياه أدت لتأرجح الفلوكة... لم تكد تهلل لوجوده عندما وجدت نفسها تسعى للمحافظة على اتزانها على سطحها المتزنج. اتسعت عيناها هلعاً، لتتحقق في ثوان أسوأ مخاوفها... كان يراقب ما يحدث بعدم تصديق، ابتداء من هوية صاحبة الفلوكة الغارقة، وحتى سقوطها المدوي في الماء، وذراعاها تخبطان في الماء بعشوائية هستيرية.

في أقل من لحظات، أدرك أنه لا يملك الكثير من الوقت قبل أن تغرق تلك المجنونة الحمراء، وقبل أن يفكر بصواب تصرفه، خلع جلبابه وقفز خلفها يحاول تقييد ذراعيها لحملها ودفعها لسطح اللنش، ثم قفز عائداً برشاقة خلفها يراقب صدرها اللاهث، وأنفاسها التي تتردد بحسرة عالية، وكأنها تعاني صعوبة في

التنفس. مسح وجهه بيديه معتصراً عقله عن سبب واحد فقط دعاه لهذا الطيش، أمام آلاف الأسباب المنطقية التي كانت تدعوه للعكس.

ثوان وبدأ الهدوء يعود إليها. فتحت عينيها على نظراته الغريبة.. تلفتت حولها لتستعيد إدراكها في ما حدث... حاولت الجلوس باعتدال متجاهلة الألم الذي ينغز صدرها بقوة.

بحياء مثير أدركت التصاق ثيابها المبتلة، نكست رأسها كي لا يلاحظ توردها، كتفت ذراعيها على صدرها متممة بنبرة متحشجة:
«انت... انت.... أنقذت حياتي... شك»..

قاطعها بحدة: «ويا ريتني خليتك تغرقى!»
بهتت تسأله، وقد زاد ارتعاش شفاهها المزرقرة رغم الجو المائل للحرارة: «يعني إيه؟؟»

انحنى فوقها مدمماً بنبرة بالكاد متحكمة في قوتها:
«لو واحدة زيك ماتت فطيس، أهلها هيزعلوا عليها، وهيدفنوها والحكاية هتخلص؛ بس بعد اللي أنا عملته وندمان عليه فعلاً... إيه مستغربة!؟...
مفكرتيش في المصايب اللي ممكن تحصل نتيجة إنقاذي لحياة حضرتك؟؟»
احتدت زرقة عينيها متممة بشفاه مرتعشة رغم حرارة الجو: «انت فاهم غلط...
لما أهلي يعرفوا إنك أنقذتني هيشكروك... ويمكن الخصومة اللي بين العيلتين...
قاطعتها ضحكته الساخرة الرنانة... اشتدت عروقها من الغضب، وهو ينحني بقربها مرة أخرى ليزداد ارتجافها، ولكن هذه المرة لأسباب بعيدة عن البرد:
«انتي عارفة التصرف الصحيح إيه دلوقتي؟؟ إني أرميكي في المية وأكمل طريقي...
وبالطريقة دي أجنب نفسي مشاكل ملهاش أي داعي»

ارتعشت تتخيله يرفعها وكأنها ورقة شجر لا وزن لها بين ذراعيه المعضلة، ويعيد إلقاءها في النهر وكأنها لا تشكل له أي أهمية. أدركت بذعر أن هذه هي الحقيقة

فعلاً... اختلست النظر لمياه النهر شديدة الزرقة... شتان الفارق بين نظرتها لها منذ ساعتين فقط، والآن!

تخيلت نفسها كإحدى عرائس النيل العذارى، اللواتي كانوا يضحون بهن كقربان في عهد الفراعنة. شهقت عندما نطق بما يجول بأفكارها:

«تنفعي قربان مناسب (ناريسا)... هتدفعي حياتك تمن للسلام بين العائلتين.. هتكوني آخر عروسة نيل... ولأسباب نبيلة بحتة»

توجست رعباً، والعزيمة والشر يسكنان عمق سواد عينيه الحادتين، كعيني ذئب مفترس، يعبران عما يجول داخله من أفكار سوداء. صرخت توقف اقترابه منها لتنفيذ ما عزم عليه:

«استنى عندك.. انت مش هتقدر ترميني!»

وقف معتدلاً بتساؤل متفكه، وكأنه يتعجب من قدرة هذه الفتاة، التي تبدو من أول نظرة كأنها أنثى مهيضة الجناح... ولكن أشواكاً حادة مؤذية تظهر عند حاجتها... سألتها باستهانة: «وليه إن شاء الله؟؟»

أجابته بأسنان مصطكة، وذراعيها تحاولان بث بعض الدفء في برودة جسدها: «علشان... علشان.. سمحة بنت عمي كانت معايا.. وشافتك جاي على هنا؟؟»

بحركة حادة التفت ناحية الشاطئ، وضافت عيناه بتفكير عميق... ثم زفر عدة أنفاس مدمدماً ببعض الشتائم، معيداً تصفيف شعره الأسود للخلف بأصابعه، أثارت هذه الحركة انتباهها، لتدرك أنه هذه المرة لا يرتدي عمامته.

ضافت عيناه بقلق عندما لاحظ ذراعيها تضغطان على صدرها، وتصدر صوتاً كأنه أنين مكتوم، عندما اعتقدت أنه غافل عنها، مد يده يقترب منها، فصرخت تدفعه بذراعيها الملوحيتين... زم فمه بعبوس ويده تكمل طريقها جوارها لتفاجأ ببطانية خشنة ولكن نظيفة يلقيها عليها، هادراً بصوته الغاضب:

«على عكس أهلك.. أنا مش بقتل الناس للمتعة... اتفضلي دفي نفسك... أنا عارف إني هدفع تمن كل اللي بعمله دا غالي أوي»

بصعوبة بدأت تستعيد هدوءها، بعد أن وصلت للحافة باعتقادها أنه قادر على قتلها بدم بارد. بأصابع متجمدة لفت أطراف البطانية حولها، عندما بدأ يقود اللنش باتجاه الشاطئ... وجدت نفسها مضطرة للدفاع عن أهلها، فتمتمت بأسنانها المصطكة:

«على فكرة... لما يعرفوا الي انت عملته... هيشكروك... إحنا مش ناس همج»
التوى جانب فمه بابتسامة مقبلة: «لو كانت الحكاية كده... كانت بنت عمك استنتت معاكى لما أنقذكم سوا... بس هي طلعت أعقل منك»
أشاحت بعينيهما عنه قائلة بصوت باهت:
«أنا مش بعرف أعوم»

حدجها بنظرة مستعرة، ثم هز رأسه بأسف: «متستاهليش نقطة دم واحدة من اللي هتسيل النهاردة»

تظاهرت أنها لم تسمع قتماته الغاضبة.. وعقدت العزم على تحقيق فكرتها؛ فلا يمكن أن يجازى العمل الخير بالأذية... حتى لو كان في كفر الصوالحة. مجرد أن تخبر أبوها عن ما حدث... ربما سيلومها على مغامرتها المتهورة، ولكنه لن يلقي اللوم على رافع الرحامي أكيد... نعم... هي متأكدة... وسيجازي رافع، ووقتها ستنظر بعينيه في لحظة انتصارها المذهل، ولن تتركه حتى يعترف بخطأ اعتقاده!
زاد ارتعاشها، وثقتها بنفسها تهتز كلما اقترب اللنش من الشاطئ... كما زاد امتقاعها عندما سمعته يطلق المزيد من الشتائم، وعيناه المستعرتان تفقدان تألقهما بقتامة مخيفة... ثم صرخ بها:

«اتفضلي قومي الحقي أهلك الي مش همج... لو واحد فيهم لمسني بس، الدم هيبقى بحور النهاردة...»

استدعت كل شجاعته محاولة الوقوف بركبتين مرتعشتين، وليس من البرد... وما لبثتا أن تحولتا لقالبين من الهلام، عندما تطلعت لمنظر رجال عائلتها المنتظرين

على الشاطئ وكل منهم يحمل شومة في يده بطول رجل. استرقت نظرة لرافع
فهتف:

«هحاول أوقف اللنش بعيد عنهم، يمكن حضرتك تقدرني تقنعهم إني معتديتش
على عفافك المصون»

أومات متجاهلة رنة السخرية في صوته بدون أن تستطيع الكلام؛ فقد التصق
لسانها في سقف حلقها وهي تسمع هدير الجموع الغاضبة... أوقف اللنش بجوار
رصيف خشبي قديم... ترنحت وهي تحاول الخروج بدون مساعدته... سمعت
زفرته المتأففة وهو يمد يده ليساعدها، وكأن آخر ما يفكر فيه في هذه اللحظة
هو الاقتراب منها. صرخ بها:

«اتحركي بسرعة.. قربوا يوصلوا!»

قفزت من الرصيف الخشبي، تلتحف بالبطانية حولها كأنها تحتمي بها من شر
تستشعره قادم لا محالة سيجتاح كل أخضر ويابس... كانت خطواتها ما تزال
مترنحة، قوّت عزميتها وهدير الجموع الغاضبة يقترب. رفعت عينها ترصد
شوارب تهاب الصقور الوقوف على أعشاشها، وعيون حمراء تتفجر منها حمم،
وكأنها تغلي في مراجلهم منذ ولدوا بانتظار هذه اللحظة، يلوحون بعصيتهم
المرعبة التواقة لشج الرؤوس وزهق الأرواح.... استرقت نظرة للخلف، كان ما يزال
واقفاً مرتكنا على اللنش يرمقها بنظرة مستخفة سرت الرعدة في أوصالها... كان
بإمكانه العودة باللنش ولن يصلوا إليه... ولكنه وقف بانتظارهم بشجاعة نادرة
وكانه لا يهاب التحدي، وعلى استعداد للمواجهة ولو كان وحيداً لا يملك سلاحاً إلا
تصرفه النبيل، الذي قد يدفع ثمنه حياته. ازداد وجيب قلبها المذموم... نظرت
أمامها ليقل يقينها بقدرتها على درء الكارثة القادمة كلما اقتربت... استفحل
شعورها بالمسؤولية؛ فدماء الأبرياء التي على وشك أن تهدر تستحق شرف
المحاولة.

كان أخوها يتصدر موكب الرجال... لم تتغير ملامحه المسعورة لدى رؤيتها، وإن ازدادت ظلاماً وهو يلمح البطانية التي تلتحف بها... هل خاب أملها فعلاً؟! هل ظنته سيأخذها بين أحضانه مهنتاً لها بسلامة العودة؟! تشبثت بكوفيته الحرير وبصوت متقطع:

«سيف... استنى... الوضع مش زي ما انت فاهم... رافع...»
قبض بيده الشبيهة بجرافة آلية على ذراعها حتى شعرت وكأنه سينخلع من مكانه، دمدم بهدير كاسح: «أما انتي حسابك بعدين.. لما أشرب من دم ويلد الحرام الي مسح بكرامتنا التراب ودس روسنا في الوحل!»
صرخت بأعلى نبرة في صوتها المبحوح ليسمعها من هدير الأصوات المنددة:
«اسمعني يا سيف... رافع معملش حاجة... أرجوك افهم»
دون أن يترك يدها أخذ يلوك الكلام بين أسنانه كمن يعضه: «بعدي من طريجي!»

وبيده الحرة، لم ترها ولكنها شعرت وكأن حمولة عربية نقل تهوي على وجهها. دارت بها الأرض، والنجوم تطايرت فوق رأسها، قبل أن تفقد الوعي.
احتار سيف في جسد أخته المتراخي بين ذراعيه، فزاد إحكام البطانية حولها حتى غطى رأسها، ولم يهتم بترك متنفس للهواء، وهو يدفعها لابن عمه:
«رچعها السراية يا رشاد، جولهم يجفلوا عليها السرداب لحد ما أعاود وأدفعها بيدي.. دلوك حسابنا هنصفوه مع ويلد المحروح ده»
حملها رشاد بين ذراعيه حائراً:

«اسمع بس يا سيف... مسمعتهاش جالت لك ما حصولش حاجة؟»
«جراك إيه يا رشاد؟! انت مشوفتهاش نازلة من المخروبة وكان معاها؟! عاوز إيه أكثر من إكده؟! رچعها البيت وتعالى حصلنا!»
وحث الخطى، وخلفه الرجال يهتممون، ويدكون الأرض التي اعتادت زلزلات أقدامهم، وزلات عقولهم، ودماهم التي تروي شقوقها.



يقف على مدخل السراية يدق الأرض بعصاه، وكأن اتفاقاً مبرماً بينهما بدون عقد مكتوب، ولغة خاصة لا يفهمها إلا من عركها وتمرغ في طينها، أن تستشعر منه دبيب الحياة كلما التقت منسأته بترابها، مقابل أن تروي له ما يحدث بعيداً عن عينيه... أفاق من شروده على صوت زوجته وسمحة تهبان من مكانيهما، عندما التقط رادارهما القوي (الكارتة) تنهب الأرض بعجلاتها، والسوط بيد رشاد يلهب ظهر الجواد يحثه على السرعة.

«بنتي! زينة!»

وسمحة تضرب رأسها بكفيها:

«يا لهو بالي!! دا رشاد! لحاله!!»

حدجهما رضوان بنظرة محذرة:

«سدي خاشمك منك ليها! معاوش أسمع نفس واصل، ولّا هحبسكم مع هنا فوج!»

وضعت سمحة يديها فوق فمها، بينما انسابت دمعات فاليريا... انكسر البريق الحازم بعيني رضوان، ثم زفر وهو يشيح بوجهه عنها ليري (الكارتة) وقد تخطت البوابات الحديدية وتوقفت أمام القصر... ترجل ابن أخيه يحمل تلك اللفافة التي لا يظهر منها غير قدميها، وعندها لم تستطع فاليريا أن تكتم نحيبها:

«مون ديو.. زينة.. بنتي!!»

ولولت سمحة تلطم خديها:

«غراب الشوم ونعج على ديارنا!! يا خسارة شبابك ياخيتي!! يا شماتة العدوين

فيكي!!»

صرخ رشاد ينهرها بحدة:

«طبي ساكتة، لاجصف عمرك!»

وقف أمام عمه بحمولته، رأى ظهره الذي يكاد ينحني، فهتف بلهفة:

«اطمن يا عمي.. زينة بخير... دي بس غميانة.. خليني أدخلها.. اطمني يا مرت عمي»

واخترق الواقفين المسمرين في مكانهم تتملكهم الحيرة، هل يهللون فرحاً أم ينزفون دموعهم حزناً؟!

أسرعت سمحة برفع الغطاء عن وجهها وصرخت:

«حد يغيتنا يا ناس!! هاتي بصلة ودشيها يا مسعدة... البت مسورجة»
صاحت فاليريا باستياء:

«بصل!! بصل إيه!!؟ روهي سمهة... أنا هفوك زينة.. روهي!»

جر رضوان ابن أخيه على جانب وسأله بقلق:

«إيه اللي بيحصل يا رشاد!؟»

«مش خير أبداً يا عمي... زينة جبل ما تسورج جالت لسيف محوصلش حاجة... بس سيف مسمعش... وضربها وخلاني أرجع بيها... لازم أحصلهم دلوك... النصيبة وأعره جوي المرة دي يا عمي... ربنا يلطف بينا! بالإذن هروح يمكن ألحجهم جبل ما يوجع المحظور»

التفت رضوان لزوجته التي ما تزال تحاول إفاقة ابنتها بصوت فاقد الصبر:

«خلصوني وخلوها تفوج، جبل ما يفيض بي وأدخل أجييب البارودة، وأطخها عيارين وأخلص»

عاد رشاد من فوره بعد أن غادر لاهثاً:

«عمي... أخبار عفشة... مأمور المركز جبض على كل رجالتنا، ورجالة الرحاية اللي كانوا بيتعاركوا... الوليد فضل لسة متحدث معايا على المحمول دلوك... بس هو جدر يهرب ومتمسكش»



«بتجول إيه يا وش النصايب؟؟»

«زي ما سمعت حضرتك يا چناب البيه... سي رافع بيه وسي چاسر بيه وكل رچالة الرحامة مع رچالة البداري، الحكومة كمشتهم كلاتهم... والإسعاف شال الباجي على المشتشفى...»

جحظت عينا وهدان، وزوجته ومعالي وفريدة يولولون ويلطمون خلفه... التفت لهم صارخًا بأمر زلزل الأرض من تحت أقدامهم:

«اخرسووووووا!! طبي خاشمك انتي وهي وهي... أحسن جسمًا بالله العظيم لودركم واحدة ورا الثانية وملاكمش عندي دية... ست الدار.. خديهم وغوروا من خلجتي الساعة الغبرة دي... لحد ما نشوفوا حل في النصيبة اللي وجعت على روسنا من غير مناسبة»

ثم التفت للغفير:

«جولي يا چلاب النصايب... سبب العركة مين؟؟»

ارتعشت فصائل الغفير وهو يردد بصوت مرتعش:

«والله مانا يا سيد الناس... ورب المعبود أنا كت...»

قاطعته وهدان بصوت جلل:

«الله يجطعك ويجطع اليوم الاسود اللي نضرتك فيه... وانت يا هباب البرك انت هتكون سبب عاركة بين الرحامة والبداري ليه!!؟ انطج وجولي يا غراب البين... مين اللي بدا اللول؟؟»

«الله أعلم... بيجولوا إن سيدي رافع بيه خطف بت من البداري في اللنش بتاع حضرة چنابه... جام البداري سمعوا بالخبر راحوا أخذوا البت ملفوفة في بطانية من لنش البيه رافع... ومن وجتها الجيامة جامت ومهمدتش، إلا لما الحكومة وصلت وكمشتهم كلاتهم»

أطرق وهدان مفكرًا بصوت عال:

«بس مين اللي بلغ الحكومة؟؟ مش معجول يكونوا البداري... وأكيد مش واحد

من الرحامة»

ثم رمق الغفير الذي انهار على ركبتيه باكياً متوسلاً: «ورحمة سيدي عبد الرحيم

الجنابي مانا!»



وقفت الكارثة الخاصة برضوان البداري، بنفس الوقت الذي نزل فيها وهدان الرحامي من الكارثة التي تنافس البداري عظمة وهيبة بجواديهما الأصيلين.

رمى الرجلان بعضهما بعداء غير مستتر، عندما دخلا سوياً المركز يرجان الأرض تحت أقدامهما هيبة وجلالاً.. ولكن ما شاهداه أوقفهما مذهولين مصدومين. رجال الرحامة، ورجال البداري، يقفون محشورين في قفصين متقابلين أمام مكتب المأمور... وجلس خلف المكتب رجل أشيب مهيب... وقد وقف جواره مأمور المركز يرمق عميدي الرحامة والبداري بأسف:

«اتفضلوا يا بهوات... طبعاً حضراتكم تعرفوا حضرة نائب الدائرة بتاعتنا... سيادة المستشار زيدان البرهامي...»

نهض المستشار وصافح الوجوه الواجمة، ثم طلب منهم أن يتفضلا بالجلوس... انتفض وهدان الرحامي: «أنا مش هرتاح إلا لما رچالتي يخرجوا من الحبس... إيه جلة الجيمة دي؟! دي طريقة تعاملوا بيها الأعيان؟! تحبسوهم في الزنازين كيه جطاع الطرج والمجاطيع?!»

وافقه رضوان: «وكمان رچالة البداري... دي عمرها ما حوصلت المعاملة دي! زي ما يكونوا جتالين جتلة..»

صفق المستشار بسخرية: «أول مرة الرحامة والبداري يتفجوا على موجف واحد... إيه رأيك يا حضرة المأمور؟»

«فعلاً يا فندم... حاجة غريبة»

تبادلا النظرات المواربة... فلم يطق سيف من محبسه... صرخ موجهاً اتهامه لرافع في القفص المقابل: «المفروض يتعلج على حبل المشنجة هو وكل وولد الرحامة... ومش إكده وبس دا كل سلساله لازم ينخسف بيه الأرض»

وافقه أقاربه، فهب جاسر من القفص الآخر:

«بس نطلعوا من إهنة يا وولد البداري، وأتخن تخين فيكم يوبجى يوريني شنباته دي على حرمة ولا على راجل»

وبدأت المباراة بين رجال العائلتين بالكلمات والشتائم والتهديدات، حتى خرسوا جميعاً بعد سماعهم لطلقات رصاص أصمت آذانهم، وأقفلت سيول الشتائم المتبادلة من أفواههم، وشخصت كل العيون نحو المستشار الذي أشار لمسدسه المبري.

«لسة حداكم حديث تاني عاوزين تكللكوا فيه؟ على راحتكم.. حداي في المسدس خزنة محشية تكفي تخرس الكل... الي شايف حاله زمجان من الدنيا وبلاويها يجرب حنكه، ويتحدث مرة ثانية بدون إذن»
هم وهدان بالاعتراض، فقاطعه المستشار وهو يشير لكلا الرجلين:

«اتفضلوا واشربوا جهوتكم... الجعدة لسة هتطول يا بهوات والكلام هيحلوا... وريحوا حالكم أنا مش هخرّج أي واحد من هنا، إلا لما أجول كل الي عندي...»
تبادل رضوان ووهدان النظرات الحاقدة، ثم تنهدا وجلسا متقابلين... دخل عسكري الدرك يحمل صينية قد رصت عليها فناجين القهوة وكوب من الماء... أشار له المستشار فوضع الصينية أمامهم على المكتب، وانصرف بإشارة أخرى من يده..

امتنع الرجلان عن مد أيديهما لفناجين القهوة... ولكن نظرة المستشار الصارمة أجبرتهما على الإسراع لأخذ المبادرة لتناول فنجانيهما... ارتشفا أول رشفة، قبل أن يصدح صوت المستشار بين جدران الحجرة الصامتة إلا من زفرات الوعيد، والعيون تتبادل إطلاق قذائف الموت...

«خابر يا حاج رضوان، ويا حاج وهدان حصيلة النهاردة من المجرّوحين كام؟ أربعين واحد بإصابات مختلفة... وكل واحد من المحجّوزين جدامه عقوبة ما بين سنة، وخمس سنين، مع استعمال الرأفة طبعاً... أظن لو نفذت الجانون بحذافيره البلد هتحتاج من العراك والخناج فترة طويلة»
هم سيف بالحديث، فرفع المستشار يده القاطعة بحدة ليخرسه فوراً:

«جسماً بالله لو عملتها ثاني لألبسك چناية وانت جاعد موطرحك... والإنداز
للجميع... من الساعة دي محدش فوق الجانون»

ارتشف رضوان من فنجانه، وزغر لابنه قائلاً بهدوء منافي لحالة الغضب المستعر
التي تكوي جنبه:

«ضب خاشمك الساعة الغبرة دي، لما نشوف آخرتها إيه يا ولدي! اتفضل يا
سيادة المستشار كمل حديثك»

تجاهله زيدان وأكمل:

«أجولكم على حاجة كمان؟ أنا معايش أعرف السبب... ساوت بعضها... واحد
من العيلة دي حمارته وجعت في غيط العيلة دي... ولا واحد من العيلة الثانية
بهيمته شربت من چناية بهائم التانيين... حاجة تجرف.. وعجول ناجصة... الدنيا
اتنورت، الأمريكان طلّعوا الجمر وانتم زي ما انتم مبتشغلوش روسكم الغفيانة
دي... ولا يمكن بتشغلوها بس بعد فوات الأوان. طبعاً المطلوب مني إني أعمل
جعدة صلح... ونشربوا الشرابات وندبحوا لنا عجل ولا عجلين، ونروحو بيوتنا
واللي مات مات، واللي عاش عاش، ويوم ولا يامين ترجع ربما لعادتها الجديدة»
سرت همهمة بين الجميع، ضرب بيده على مكتبه ليصاب الجميع بالخرس مرة
أخرى، وتتعلق العيون بنجم العرض ويحول دون أن يردعه رادع. كان يزغر
لكل واحد منهم على حدة وهو يكمل:

«تعبت منكم خلاص... ومبجاش جدامي حل ثاني.. يا أسچنكم وأخلص من
بلاويكم.. يا أمتاً... تجبلوا بحكمي على الجميع، وطبعاً مش هيكون حكم
هين... هيكون جاسي وصارم. وغير جابل لأي تفاوض»

وضع رضوان ووهدان فنجاني القهوة الفارغين بعد أن تبادلا نظرة أخرى، وبدأ
وهدان الهجوم بهدوء يحسد عليه: «مع احترامي لحضرتك يا چناب المستشار...
بس حضرتك مافيش في يدك حاجة تعملها... أصغرها محامي بجرشين، يجدر
يخرچ الولاد في ساعة زمن»

تنهد المستشار بابتسامة هزت ثقة الرحامي:

«لساتك بتتكلم بنعرة كدابة، وولدك وابن أخوك تحت يدي.. رغم إني مش مصدج... ابنك رافع الي كت معول عليه يعجل ولد عمه وباجي مخابيل العيلة، ألاجيه وسطيههم اليوم.. دلوك... مستعدين تسمعوا حكمي؟ ولا نخلوها في المحكمة، وكل واحد ياخذ نصيبه؟ وخلي المحامي أبو جرشين بتاعك يا وهدان لو جدر يجيب لهم سجن مخفف... أجّلها ثلاث أربع سنين... لأني متأكد إن كام واحد من المتلجحين في المستشفى عنده عاهة مستديمة... وانت سيد العارفين العاهة المستديمة بتاخذ لها مش أجل من ثلاث سنين...»

شحب الرجلان، يتبادلان النظرات الصامتة، صاح المستشار مرة أخرى:

«عاوز أسمع رأيكم دلوك... هتسمعوا حكمي وتنفذوه ولا نروح المحكمة، وكل واحد ونصيبه؟»

دق الرجلان بعصيهما على الأرض بتوتر... نظراتهما تتلاقى تارة، وتارة تسافر للأقفاس الممتلئة بعصاب رجالهم. هدر صوت جاسر من خلال القضبان، وقد ابيضت مفاصله عليها وكأن بإمكانه خلعه من مكانها:

«متوافجش يا عمي... مي جدرش يعمل حاجة... ديتها الليلة دي، ومن بكرة الصبح المحامي هيطلعنا ومن غير ولا مليم كفالة» وافقه سيف من القفص الآخر:

«وانت كمان يا بوي... المرة دي زي غيرها محدش يجدر يسجنّا، ولا حتى المستشار ده... وانت خابر زين الأمور بتمشي كيه»

قهقه المستشار: «قصّدك بالرشاوي.. مش كده يا سيف؟ والله أنا مستغرب لأمرك.. انتم المرة دي الي بدأتو بالتعدي على الرحامة... ورغم دا متأكد إنك هتخرّج»

«إيوه يا سيادة المشتشار... هنخرج.. لأننا كنا بندافعوا عن شرفنا اللي وولد
الرحايمه مرغه في الطين... ومش راح ننساه واصل... دا شرفنا يا حضرة المشتشار..
ولا كرسي البرلمان نساك كيه تكون صعيدي بيغير على شرفه من الهوا الطاير!؟
وعلشان تكون بس معنا في الصورة... المحروس وولد الرحايمه... الجبان خطف
أختي و...»

صوت غريب غير متوقع هز المكان من رفته:

«لأ.. لأ.. كفاية كده بأة!! انتم إيه مش بتشبعوا دم!!؟»

انحسرت الدماء عن الوجوه وجحظت العيون، وصرخ سيف بهستيريا وهو يضرب
القضبان بقبضتيه: «انتي چاية تهبيي إيه إهنة وسط الرجال!!؟ انتِ البعيدة
معنديش خشا ولا حيا!!؟ والله لأشرب من دمك!»





«لا تلعب بمشاعر الآخرين؛ لأنك قد تربح اللعبة،
لكن الخطر أن تخسر هذا الشخص مدى الحياة»
- وليام شكسبير

.....

ركضت زينة تلقي نفسها بين أحضان والدها، الذي وقف يتلقاها بنظرة حائرة
ومشاعر متضاربة، يجد صعوبة شديدة بين ما جُبِلَ عليه، وبين الفهم الآخذ
طريقه لعقله الصلد رغم الطريق الوعر... خلع عباءته يلفها حولها بحماية،
وهمس في أذنها:

«مكانش لازم تاچي إهنة يا بتي..»

تمتت بعيون غاربة بالدموع:

«حضرتك عارف إني مش ممكن أسكت عن الحق»

ثم التفتت للمستشار وهي ما تزال بأحضان والدها وبين ذارعيه الحاميتين:

«أنا هقول لحضرتك على كل حاجة»

صوت سيف المتحشرج من الصراخ:

«يا بوي!! ناولني البت دي أخرجها وأخلص من عارها...»

حدجه والده بنظرة صارمة:

«اخرس يا ويلد... بتي في حمايا!»

ابتلعت لعابها بنظرة ممتنة... ومن بين الوجوه الكثيرة المشحونة في الغرفة
الضيقة، شعرت بعينيه، يرمقها باستغراب مغمس بإعجاب حاول جهده أن
يخفيه، ما لبث أن توهج بشذرات حادة غاضبة رشقتها كالزجاج المكسور،
لتسبب لها آلاماً لا تدري سببها، ولكنها تعي جيداً مصدرها، وكأنه فجأة اتفق مع

أخيها على رغبته بقتلها لتواجهها بين الرجال، عيونهم تسلخها بالنظرات الجائعة. ثم أنهى الاتصال الوجيز معها قبل أن يتراجع في محبسه ببريق ساخر... أغمضت عينيها تختزن هذه اللحظة في مكان ما من عقلها، ثم التفت للمستشار قائلة بشفتين جافتين مرتجفتين:

«أنا هقول لحضرتك عن اللي حصل»

وبعد أن أنهت روايتها صفق المستشار بجذل:

«رائع! دليل كمان على غباء كل الموحودين... أنا مجدّر شجاعتك يا بتي، وأنا عارف هتكلفك كد إيه... خاصة مع أخ زي أخوكي دا، معندوش وسيلة للتفاهم إلا بسلاحه... علشان موصلحتك وموصلحة الجميع... أنا هستمر في حكمي الي نويت عليه، حديتك دلوك زاد من إصراري على حكمي... أنا تلفنت لباجي الأعيان من العيلتين، وأول ما يوصلوا كلاتهم هيصموا على الحكم»
هب وهدان بزعايبه:

«إيه الي انت بتجوله ده يا حضرة المستشار؟! انت مسمعتش ولا كلمة من الي البت جالتها!؟»

شهقت زينة باعتراض: «لو سمحت حسن ملافظك! بت إيه دي الي بتتكلم عنها!؟ أنا اسمي زينة.. زينة البداري»

اتسعت ابتسامة رضوان بفخر، بينما احتقن وجه وهدان: «لم بتك يا رضوان! الحرمة بتتطاول على الرجال!»

هب رضوان بغضب مكبوت من بين أضراسه المتطاحنة: «بتي حرمة بمليون راجل من عينتك وعينة ولدك»

وضع وهدان يده على سلاحه ليسحبه، فهب المستشار: «انتم اتچننتوا ولا إيه!!؟ عاوزين تشرفوا مع أولادكم في الجفص!؟ اتفضلوا معنديش مانع... كل واحد يضب خاشمه ساكت لحد ما أخلص حديتي كلاته... شكرًا يا آنسة زينة، وممكن تتفضلي دلوك غفير الدرك هيوصلك بالكارتة الخصومي بتاعتي»

نظرت لوالدها ثم هزت رأسها بالرفض:

«شكرًا، أنا جيت مع السواق بتاعي، وهروح معاه»

لم يبعد والدها ذراعه المحيطة بها، وكأنه يزود عنها نظرات الرجال التي تكاد تجرفها، ونظرات أخوها التي قتلتها ودفنتها مرارًا... قبل رأسها بحنان قبل أن يساعدوا بصعود الكارثة:

«بابا.. حضرتك زعلان مني؟»

تنهد بصعوبة: «مش وجته الحديث دا يا زينة؟»
أمسكت يده لتمنعه من الابتعاد:

«بابا... كان لازم أعمل اللي عملته... أنا كنت السبب، وكان لازم الكل يعرف إني بريئة، وإن رافع معملش حاجة»
أخرج زفيرًا آخر من صدره لعله يبرد من أجيج نيرانه التي كادت تحيل أحشاءه لرماد:

«عملتي اللي فيه الكفاية يا بت فاليرية!! بس أجول إيه وأعيد إيه؟! الغلطة غلطتي من اللول... ارجعي الدار متخرجيش منها واصل، إلا لما نعاودوا وسيف خوكي معايا إن شاء الله... لما نشوف المشتشار دا خبره إيه على المسا.. اللهم طولك يا روح!»

بعينين مغرورقتين بالدموع: «بس يا بابا...!!»

بصوت غاضب لم يسبق أن حدثها به من قبل:

«غوري الساعة دي يا زينة من خلجتي! بدل ما أعمل عملة تخليكي تكرهيني طول عمرك! الله يسامحها أمك ويسامحني أنا كمان! اطلع يا سعدون... من غير لكاعة طوالي على السراية، متوجفش حتى لو أبوك طلع من جبره ولجيته جدامك»
أومأ الغفير: «تحت أمر ساعاتك»

راقبها حتى غابت عن الأنظار تتبعها عاصفة من الغبار... بحثت يده لتلملم أطراف عباءته يلتحف بها، ثم تذكر أنه لم يستعدها من ابنته بعد أن سترها بها عن عيون الرجال التي أشاطت عقله... دق بعصاه في الأرض معلناً عودته.

كصمت القبور تنعق فوقها الغربان المحلقة... ولو كانت النظرات تسن لها الحروب، لكانت حروب عالمية نشبت وأبادت الأرض ومن عليها مرات.... جلس مكانه أمام قرينه وهدان يتبادلان النظرات المتحدية، والتي زادت شفراتها حدة بعد اقتحام زينة المكان وإلقائها القنبلة غير المتوقعة.

بعد طول انتظار على أسنة الحراب، أخيراً وصل الأعيان... وبعد المشاورات اتفقوا جميعاً على الخضوع لحكم المستشار الداهية... والذي لم يترك الاتفاق مهوراً بكلمتهم فقط، بل أجبرهم جميعاً على التوقيع بالموافقة على حكمه قبل الإعلان عنه... وهو التصرف الذي لم يندموا في حياتهم قدر ندمهم على التوقيع على تفاصيل لم يدرسوها مسبقاً... فلم يتوقعوا ولو في أحلك أحلامهم أنهم قد يفضلون السجن المؤبد على الموافقة على هذا الحكم!

أمسك المستشار الورقة يدقق في التوقيعات والأختام، ثم أوماً برضا تام، وناولها للأمور:

«اتفضل يا هشام بيه... ده توقيع كل أعيان الرحاية والبداري... وشرط جزائي لو حد منهم موافجش على الحكم اللي هجوله دلوك على مسامعهم، هيدفع نص أملاكه للمركز المحلي للبلد، ويطلع من الاتفاج»

أمسك الرائد هشام الورقة بتقدير:

«تمام يا سيادة المستشار... أنا هتحفظ على الورقة عندي»

«شكرا يا حضرة الأمور... ودلوك يا حضرات چينا للمهم والمفيد... في اليوم ده... والساعة دي... كل الخلافات بين الرحاية والبداري هتختفي كلها ما كانت...»

سرت همهمة بين الجميع، فأخرسهم بنظرة صارمة من عينيه المتبلفتين، ثم أكمل بعد أن عم الصمت من جديد: «والسلام هيعم على البلد... بس طبعاً زي ما انتم

خابرين، الكلام ده مش ممكن يوحصل... ياما عملنا مجالس مصالحة وفرضنا غرامات ونرجعوا من أول وچديد وكنك يابو زيد ما غزيت... أنا مش هستنى لما لا سمح الله حد يصور له جتيل، والحكاية تكبر لتار... لع... مش هيوحصل في الدائرة بتاعتي... ولا وأنا على وش الدنيا... يوبجى لازم نربط بين العيلتين بالدم»
انتظر لحظة حتى استوعب الجميع كلماته... ويبدو أنهم حفظوا الدرس، فلم يعلق أحد، ربما لشعورهم بهول ما سيلي... ودارت مباراة غير معلنة لحبس الأنفاس، عندما دوت أصداء كلمة «الدم» في الأذان.. وترقبوا.
أكمل بنبرة حازمة، ونظرات جامدة، وملامح أقل ما يقال عنها ملامح جبل صخري لن يلين:

«كل عيلة هتكتب أسماء الشباب والبنات الي على وش چواز في ورجة، وبكرة بعد صلاة الجمعة هنتجابلوا في ملعب البلد... هنعملوا جرعة... من كل عيلة رجلين وبتين، هنچوزوهم لبعض... العيال الي هيخلفوهم هيكونوا رحامة على بداري... أو بداري على رحامة... وبعدها السلام هيعم البلد ومعادش حد هيرفع السلاح على ولد عمه، علشان ظنه الخيان إنه خطف أخته يا سيف بيه»
ضرب سيف رأسه بحديد القضبان صارخاً عندما بدأ يستوعب ما يقال:
«انت لازم انچنيت!! انت واعى لختاريك دي!!! چواز إيه ونسب إيه!!!»
انت عاوز بناتنا يتچوزوا من الرحامة!!! دي توبجى على چثتي»
صرخ جاسر من القفص الآخر:

«وعلى چثتي أنا كمان... انت لازم انچنيت ولا شارب منجوع البراطيش وچاي تنسلى على حسابنا»

لم يبال المستشار بالرد عليهم، وحجج كبراءهم بنظرة ذات معنى:
«وانتم كمان معترضين على الحكم؟؟ يا صلاة الزين! خزينة المركز المحلي هتدعي لكم الليلة باينها... هه.. مين أول واحد هيتبرع بنص أملاكه؟؟ المعترض يرفع

يدّه.... يا حضرة المأمور.. جهز لو سمحت وصولات التبرع.. يظهر إن الخزنة
هتتعمر الليلة»

ضرب وهدان على طرف المكتب بقبضته حتى شعر كل الموجودين أن خشبه
الزان تشقق:

«انت بتتمهزج بينا يا زيدان!؟»

رفع المستشار حاجبيه لأعلى:

«عيب يا وهدان.. متخليش غضبك يعميك... أنا كنت بتفج مع رچالة مش مع
عيال صغار... ولا إيه يا رضوان؟»

صمت رضوان لحظات ليزن الكلمات:

«بس انت فاجئتنا.. نسب... صعبة جوي يا حضرة ال... مشتشار... وانت
صعيدي وعارف؟»

«وعلشان أنا صعيدي هو دا حكمي... انتم بيدكم حتخطوا أسماء كل رچالتكم
الي مش متجوزين... والبنات الي مسجلهمش الجواز...»
زمر وهدان: «انت عارف دا معناتو إيه!؟»
أجابه المستشار ببساطة:

«معناتو انت حر... ترفض توافق... أنا مش هچبرك... بس اتشاور مع كبرات
عيلتك... زي ما انت عارف، أراضيكم كلها مع بعضها... محدش فيكم يجدر
يتبرع بنص ثروته من غير رأي الباجي... وانت كمان يا رضوان... اتشاور مع
رچالتك»

صرخ سيف: «الحكاية مش عاوزة مشاورة... ارفض يا بوي.. محدش يجدر
يچبرنا»

قهقه المستشار محدجاً سيف بنظرة انتصار:

«جهز الوصولات يا هشام بيه... سيف البداري هيكون أول المتبرعين»
هب سيف مرة أخرى:

«شبر واحد من أرض البداري أبعد عن شنباتك يا زيدان بيه»

وجه المستشار حديثه للكبراء:

«هخليكم تتشاوروا ربع ساعة وهعاود... ويا ريت أسمع رأي واحد... يا

موافجين... يا خزينة المركز هتزغرد الليلة»

تحولت الألسنة المشفرة مرة أخرى لحوارات خرساء، تتبادل فيها العيون

الاتهامات... ولكنهم مدركون جيدًا أنهم في سفينة واحدة... ربما الشجاع المغامر

فقط من سيغنم النهاية السعيدة... ولكن المخاطرة صعبة.

اقترب وهدان من ابنه الحبيس:

«رأيك إيه يا رافع؟؟»

زفر رافع وهو يقضم شفاهه بغيظ: «حاجة واحدة بس لازم تعرفها بابوي...

أرضنا هي عرضنا... ومحدث يفطر في عرضه واصل»

«وبناتنا يا ولدي... مش عرضنا كمان؟؟»

أطرق رافع رأسه متممًا: «فضل طول عمري ندمان على اللي عملته... يا ريتني

خليتها تخرج»

هتف جاسر ساخرًا:

«دلوك ندمان؟! بعد إيه؟! بعد خراب مالطة؟! أنا من يوم ما شفت البت دي و...

قاطع رافع محتقن الأوداج:

«اخرس يا جاسر! مش وجته حديثك الماخذ خيلنا في المصيبة دي! وبعدين لينا

حديث»

أطرق وهدان قائلًا:

«النصيبة دي ملهاش إلا مخرج واحد... هو اللي اتفجنا عليه مع كبرات الرحامة»

ضرب جاسر القضبان بيديه بهدير غاضب:

«لع يا عمي... لع... أكيد فيها تصريفة تانية... المشتشار بيتمسخر بينا... رد عليا

يا عمي»

تطلعت العيون بأجيجها المشتعل نحو الباب، عندما دخل المستشار يتبعه المأمور... جلس مكانه وجال بنظراته بينهم: «خبركم إيه يا رجالة؟؟ هنشربوا الشربات.. ولا الخزنة هتاكل الليلة؟؟»

رأى أيديهم تعتصر مقابض عصيهم، وقد شحبت الوجوه وزاغت العيون... ثم رفع وهدان رأسه:

«خليك فاكركه المغرز دا يا زيدان بيه... خليك فاكركه زين عشان مش هيعدي بالساهل إكده»

قلب شفتيه: «مفهمش حاجة... جصداك إيه يا وهدان؟؟»

أطلق وهدان زفيراً مشبعاً بنيرانه المتفجرة:

«من نواحيننا.. إحنا موافجين... بس لو البداري عنديهم اعتراض»

هب رضوان بغيط:

«وأنا كمان يا وهدان... اتشاورت مع رجالة البداري... ومعنهدمش مانع... إلا

إذا كان انتم عنديكم مانع؟!!»

تناطح الرجلان بنظرات التحدي، وسادت المكان رائحة احتراق شديدة... صفق

المستشار بارتياح: «ألف ألف مبروك يا رجالة... بالرفاه والبنين إن شاء الله...

هشام، هات لي ورجتين فاضيين بسرعة»

وكان هشام بانتظار الطلب، فمد يده بما طلب.. وبدوره قدمهما المستشار

للرجلين:

«اكتبوا أسماء الرجالة والبنات في سن الجواز... وأولهم طبعاً اللي في الجفص»

اعترض وهدان: «بس رافع جاري فاتحته على معالي بت أخوي»

«خلاص يا وهدان... بلاش رافع... وانت عندك اعتراض يا رضوان؟»

لم يرد، وأمسك الورقة بغيط، وبدأ بكتابة الأسماء... عندما قاطعهما المستشار:

«على فكرة... أنا عندي مصادري، وهراجع على كل الأسماء اسم... اسم...»



«زينة هبيبي.. انت كدا كتير أَيْطُ أَيْطُ؟!»
«خليها تعيط يا مرت عمي... ما هو الي حوصل مش جليل... دي الدنيا
اطرجت فوج روسنا بسبتها»
رفعت زينة رأسها لتحقق في ابنة عمها بغيط مستشيط: «بسببي أنا!!! ما هو
انتي لو كنتي وقفتي معايا مكانش حد قدر يتكلم!»
«والله؟! كانت النصيبة بجت تنين... لو كان عمي رضوان يجدر يحميكي من
سيف، أنا مكانش حد هيصدر يحميني من رشاد وأبوي»
تنهدت فاليريا بانزعاج:
«سمحة... انت مش شايف انك أتأهت كتير على ماما... زمانو كلكان أليك..»
لوت سمحة فمها يمينا ويساراً:
«والله؟! دا طرد بالحداجة ده ولا اسمه إيه؟!»
هبت زينة: «اسمه الي اسمه يا سمحة... روجي بيتك دلوقتي»
«طيب... فتكوا بعافية، جال خيراً تعمل.. شراً تلجى»
لوحث فاليريا بيديها بصبر نافذ:
«الله يآفيك... مآ السلامة»
شيعاها بنظراتهما حتى تأكدا من خروجها... شعرت فاليريا بحمل ابنتها الثقيل،
فضمتها بقوة لصدرها:
«مش تهاف زينة... بابا رجل مهترم ومش ممكن يزأل زينة أبداً»
رفعت رأسها عن صدرها لتهمس بانتحاب:
«هي دي المشكلة ماما.. بابا زعلان مني أوي المرة دي... وأنا مش عارفة
هصالحه إزاي؟»
قاطعتها هنا، تثبت وجودها بفكرة براءة:

«أنا حقولك... بابا له طريقة واحدة بس بيتصالح بيها». التقت نظرات الأم والابنة الصغيرة بلحظة تفاهم، ثم نظرنا لزينة المتابعة الموقف بحيرة، وقالتا في وقت واحد: «صينية الكنافة بالجشطة!»

تجمدت ملامح زينة للحظات، ثم هتفت وأثار الدموع لا تزال عالقة بأهدابها:

«انتم بتهزروا صح؟ أنا مموتة نفسي قدامكم، وانتم بتهزروا!!!»

هزت فاليريا رأسها بابتسامة رقيقة:

«هنا هيببي... اكعد مع أهتك، وأنا هروه آمل الكنافة بنفسي... انت آارف بابا

بيهبها من إيدي أنا بس»

«داكور ماما»

نظرت زينة بذهول لأختها: «انتم بتتكلموا جد!!!؟؟»

قهقهت هنا: «أيوه يا بنتي.. مش بيقولوا مفتاح أي رجل هو معدته... مفتاح

الحاج رضوان البداري هي صينية الكنافة بالجشطة من إيدين الحاجة فاليرية..

دلوقتي تشوفي»

مسحت دموعها هاتفية: «هنا... أنا سامعة صوت برة... شوفي كده!»

غابت هنا للحظات، ثم عادت تهتف بحماس:

«رجعوا... بس مش بابا وسيف بس... دي رجالة البداري كلهم... يظهر والله

أعلم في مصيبة جامدة؛ لأن بابا دخلهم على المندرة على طول، وسيف وشه زي

قفاه»

«بنت.. اهتشي... إيب قول ألى أهوك كده»

أطرقت هنا باعتذار: «باردون ماما»

أشارت لها فاليريا: «روح مطبك هضري هاجات كنافة، وأنا جاي وراكي»

تهدلت ذراعي هنا بإحباط وهي تنفذ الأمر:

«داكور ماما» جلست فاليريا جوار زينة تضمها:

«انت لسة زالان زينة هيببي؟؟»

«خايفة يا ماما.. الاجتماع دا معناه إيه؟»
«هبر بفلوس... اممممم.. مش فاكّر باقى»
ضحكت زينة وهي تقبلها:
«بكّرة يبقى ببلاش يا حاجة فاليريا... آه لو آلان ديّلون شافك دلوقتي!»
«آلان ديّلون مين يا أبيض؟! ردوان مية راجل زي ديّلون»
«سيدي يا سيدي.. يا رب اوعدنا»
«انت لازم يتجوز عن هب زينة، زي ما اتجوز أنا وبابا... الهب حاجة جميلة كثير»..
«والله يا ماما حكايتك انت وبابا دي، لو كتبت بالإبر على آفاق البشر لأصّبت عبرة لمن يعتبر»
ضاقت عينا فاليريا: «انت بتقول إيه بنت؟؟»
«متاخدش في بالك يا فال»
«انتي بتهبي الي اسمه...؟»
«قصّدك ضياء»
«وي.. ديا»..
«يعني... هو مش حب أوي... تقدري تقولي ارتياح... اقتناع... أكيد الحب هيبجي في وقته»..
انفتح الباب فجأة لتقفز الممرّتان جزعتين. وضعت فاليريا يدها على صدرها تهدئ من ضربات قلبها السريعة، عندما رأت المقتحم المتجههم:
«بسم الله الرحمن الرحيم! في هد يدهل كدا من غير ما يامل إهم وداستور!؟»
ارتبك لحظة قبل أن يعود لتجهمه وهو يشير لزينة:
«لا مؤاخذه يّا... انچري جدامي يا جلابة النصاب!»
أمسكتها فاليريا من يدها باعتراض:

«أولاً أنا مش اسمي يمّا... ماما يا سيف.. اتنين... زينة مش هيره أي مكان إلا مآيا»

من بين أسنانه بصيرها المسموع، مد يده محاولاً التحكم بأعصابه: «يمّا... يا ماما... لو سمحتي... بكفاية اللي حوصل النهاردة بسبتها»
لوحث زينة بذراعيها من خلف أمها الواقفة حاجز بينهما: «أنا معملتش حاجة... لو كنت بتستعمل مخك زي ما بتستعمل إيديك مكناش وصلنا لبي إحنا فيه»
حاول الوصول لها بيده ليضربها صارخاً وقد انفعلت أعصابه: «انتبي كمان ليكي عين تفتحي خاشمك!!؟ البعيدة معندهاش دم!»
«سيف!»

صوت والده أوقفه عن محاولته، فأسرعت تحتتمي به: «بابا.. أنا معملتش حاجة... هو اللي اتهجم علينا»
«أنا يابوي»..

أسرع وأمسك بذراع ابنه بخشونة لم تؤثر بجسده الضخم، ولكنه خضع لوالده بإطراق:

«إياك تنهجم على أختك وأمك، وأنا النفس لساه بصدري... لما أبجي أموت أبجي بيع واشتري فيهم»

«يابوي... چلعلك ليها ده هو اللي وصلنا للبلوة اللي كلنا متعاصين فيها»
«مش هي بس يا سيف... تسرعك... ولا مخك اللي عاوز مخ ثاني جطع غيار... لو كت سمعت لأختك وحت ما جالت لك محصولش حاجة، مكناش واجفين الوجفة دي»

«كت عاوزني أعمل إيه يعني وكل الرجالة شايفينها خارجة من لنش الزفت ويلد المحاريج، وهي متلفحة بالبطانية وحالها ما يسر عدو ولا حبيب!!؟»
«وأخرة تفكيرك الواطي باختك إيه يا سبع الرجال!!؟ عرفت مين السبب في الفضيحة؟؟»

«ماهي لو مكانتش...»

«خلاص يا سيف... خلاص... زينة..»

«نعم بابا...»

«الواد ده اللي جلتني إنه عاوز يخطبك... كلميه وجويله ياچي يطلب يدك

مني»

اتسعت عيناها وتبادلت مع أمها النظرات المذهولة، ثم سألته غير مصدقة:

«انت قصدك... أكلم ضياء!!؟»

أجابها بزهق: «أيوه يا زينة... بس جويله بسرعة... لازم يكون حدانا بكرة

بالكتير»

ارتبكت وضاعت الكلمات من رأسها... ثم فوجئت بالسرعة المطلوبة لحضوره..

«بابا... بس بكرة مش هيلحق... يمكن يقدر يبجي في fin de semaine.. قصدى

آخر الأسبوع»..

ضرب بعصاه الأرض فانخلعت قلوبهم: «أنا جُلت بكرة يعني بكرة... يتشجلب

ولا يتعدل... يطول ولا يجصر مش شغلتي... لو مچاش بكرة مافيش حدايا بنات

للچواز»

ابتلعت ريقها بصعوبة وسألت:

«بابا.. هو المستشار حكم عليكم بإيه؟؟»

خطوات بالكاد تلامس الأرض، تسلفت بقدميها الصغيرتين بعد أن تصنتت على

الباب، وسمعت بأذنيها ما سيقلب خريطة بلدها الصغيرة للأبد... دخلت غرفتها

وأحكمت إيراد الباب تتطلع حولها خوفًا من أي عيون تكون قد رصدتها بدون

أن تشعر... زفرت بارتياح عندما اطمأنت أن الوضع على ما يرام... أخرجت

تليفونها المحمول من جيب بنطالها الجينز، وطلبت الرقم... ثم انتظرت حتى

جاءها الرد في الجهة المقابلة: «ألو... نجلا... عندي أخبار فظيعة... وانتي كمان!؟

طيب نتقابل في نفس المكان... أوك... نص ساعة وأكون عندك... محدش هياخذ

باله الدنيا مقلوبة هنا فوقاني تحتاني... وأكيد عندكم كمان... بقولك إيه... جهزي
قائمة بأسماء كل شباب عيلتكم وأنا هعمل زيك.... هقولك لما نتقابل... سلام»



في قلب عتمة الليل الساكن، إلا من هسهسات حشرات الظلام، تتقافز مستترة بغطائه الثقيل الآمن بين عيدان القصب المتمايل مع نسيمات طقس الصعيد الشحيحة... ولكن أمنها المؤقت تبدد تمامًا وهي تتخبط مع بعضها، فزعة باحثة عن مخبأ يقيها الموت القادم مسرعاً على عجلات خشبية، يمتطيها فارس قد ألهب ظهر الجواد المسكين بلسعات سوط من لم تعرف الرحمة طريقها لقلبه، ولا لانت عيناه يوماً بإحساس بشري... تدفعه قوى ظلامه الطاغية بتعذيب جواده وحته على الطيران بالكارثة، حتى انشق الطريق عن ساحة كبيرة من الخيم البالية من الخيش، وقد استطاع ساكنوها قهر الظلام بعشرات المشاعل البدائية الصنع.

داخل إحدى الخيمات... دقات طبلة ونغمات ناي... اقترب مختلساً النظرات، ليراها تتمايل بجسدها المغناج على دقاتها، وكأن جسدها اللدن هجرته العظام، وتركته لتعيث فساداً بعقول السكارى حولها... أسرع نحو عجز كانت تصفق للراقصة بحماس، رحبت به بعينيها الملطختين بالكحل بوقاحة وجراءة:

«يا مُرحب يا مُرحب بسيد الناس... اتفضل الموطرح موطرحك يا حبة عيني...»
رمق الراقصة بنظرات لو تحولت لشفرات لقسمتها نصفين... تجاهل المرحبة به وهو يتجاوزها مغادراً الخيش: «جولي لها تاجي في التو واللحظة... أنا معستناش حد...»

ضحكت العجوز بمياعة لا تناسب سنواتها الخمسين: «وإن مكتش تتلوع في انتظار نواره يا نضري... هتتلوع على مين أمال؟!»

تأمل باحتقار جسدها المستور بقماش أسود، لم يستر الكثير من لحمها المكتنز، ثم جذب طرحتها حتى كاد أن يخلعها عن رأسها مدممًا:

«اسمعي يا ولية يا خرفانة انتي... دجيعة واحدة... لو نواره محصلتنيش في كوم الزبالة الي انتم متخابين فيه ده... في ساعة زمن هيوجي كوم تراب بعد ما أولع فيه!»

لطمت صدغيها السمينين مولولة:

«سالخير يا سيد الناس كلاتهم، وسيد جلبى وعجلي»

نفث دخان الجوزة في الهواء، ورمقها من بين سحب الدخان ولم يرد... مطت شفيتها باستغراب وهي تقترب. أمسكت بمبسم الجوزة ووضعتها بين شفيتها الغنيتين... أخذت نفساً عميقاً ثم أطلقت دخانها في وجهه. تلقى نفحة الدخان كالمسطول، فبادرته ضاحكة بتلك النغمة الشعواء التي تحرق أحشاءه:

«خير يابو عمه... مزاحك معفر ليه؟! ماعاش ولا كان الي يعفر مزاحك»

استولى على مبسمه مرة أخرى، ليضعه بين شفتيه رامقاً عينها الناعستين بنظرة مبهمة... ثم أخرج نفساً آخر وخلع عمامته ليظهر رأسه الأصلع. هتف بصوت أجش: «عاوزك تنسيني كل الي حوصل يا نواره... الليلة دي معاوشش أتفكر في أي حاجة اصل»

جلست جواره تسأله بدهشة؛ فلم تر جاسر كبير الرحامة بهذه الحالة من قبل:

«وايه الي حوصل؟؟»

دفع بعضا الجوزة فانقلبت مريقة ما فيها من ماء: «بجولك عاوز أنسى، تسأليني إيه الي حوصل!!»

«خلاص... خلاص... روج دمك..»

ثم نادى بصوت عال:

«بت يا حميدة... بت يا حميدة!»

دخلت الفتاة تتلوى: «خير يا نواره؟»

زغرت للفتاة بحدة:

«اوجفي عوج واتحدقي عدل يا بت، يا أجوم أجيبيك من شعرك... بتتجصعي كده ليه زي عود الجصص الممصوص!!»

وضعت حميدة يدها على صدرها هازة رأسها لتصدر صوتاً بالقروش الذهبية التي تزين منديل رأسها: «مليح إكده يا أبله نواره؟ عزنا في مدرسة... خير كتي عاوزة حاجة؟»

«عازك عزرائيل يا بعيدة... هاتي چوزة ثانية وعمرها تعميرة البشوات... مش
التعميرة الي بالك... الغالي عاوز يسلطن مزاجه الليلة»
تمايلت حميدة بدلال وهي تطالع جاسر الغائب في أفكاره عما يجري حوله، وقد
اتكأ على مسند المجلس العربي متربعا: «بس لاجل عيون سي جاسر... أحلى
چوزة بأحلى تعميرة هتكون حداه هوا»
تضارست أسنانها وهي تشيع الفتاة بنظراتها وتتوعدها سراً... تمايلت على جاسر
تربت على صدره: «خير يا سيد الناس... مين استچرا يكعر مزاجك؟!»
زغرها بنظرة شاردة:

«حاجة مكانتش على البال ولا على خاطر يا نواره... يا بووووي! مغرز طالع
من نافوخي... والأكادة.. إني معرفش أعمل فيه حاجة... ومالوش مخرج»
«مغرز إيه ده الي بيرچلك ويخلي حالك حال؟؟ خير يا سيد الناس؟؟ لأ... دا
انت شكلك والعياد بالله واخد عين موكن... ولازم أرجيك اسم الله عليك يا خويا
من عين شافتك ومصلتش على النبي... هي مافيش غيرها عين حميدة بت ناعسة
الهبلة... أجولك، هعملك زار»
بصوت ملول: «نواره»

«عيون نواره.. وجلب نواره.. وعجل نواره»
«تعرفني تجفلي خاشمك وترجصي لي وحدي؟»
«بس إكده؟ غالي والطلب رخيص يا سيد الناس... وأجدعها رجصة لجاسر بيه
الرحامي»

ضغطت على زر مشغل الموسيقى المعد دائماً لمثل هذه السهرات الخاصة، وبدأت
تتلوى بجسدها المتمايل الماجن.

تابع خصرها المتمايل بدلال ولم تتخل عنه همومه... وفجأة تلاعبت تعميرة
الجوزة بعقله، فتخيل زينة البداري مكانها... وشعرها الأحمر يتراقص حولها،

وعيونها الزرقاء السماوية تغمز له... تتوسله الوصال بابتسامة مغناج توقف الموتى
من قبورهم.

ضرب رأسه بيده متممًا:

«يا بووووي... لو حوصل اللي في بالي.. كنها هتبيض لك في الجفص يا چاسر،
وزينة هتكون من حدك ومن نصيبك! بس أعملها كيه دي؟؟ وزفت الطين ده اللي
اسمه زيدان.... بيجول هيعمل جرعة... هدبرها كيه دي؟؟»
كانت نؤارة قد توقفت عن الرقص لتجده شاردًا عنها، تسمرت تراقبه ثم سأله
بغيط:

«سلامتك يا سيد الناس... سلامتك... انت بتتحدث مع روحك!!؟»



هتفت زينة بانزعاج شديد:

«ولكن دا مستحيل!! مش ممكن الناس تتجوز بالطريقة دي!! إحنا فين بالظبط!!! وانتم إزاي توافقوا على حاجة زي دي!!؟»

اعتصر سيف قبضته بغلٍ شديد، ضاغطًا على أسنانه لدرجة الألم:

«الملعون زيدان الزفت... كنه حية من تحت تبن... مسك عليهم ورج لو رجعوا في كلامهم وموافجوش على حكمه هيدفعوا نص أملاكهم... وهو صعيدي عُجْر وخابر زين... الأرض عرض منفرطوش فيها واصل»
أومأت زينة بتفهم:

«علشان كده انتم وافقتم على ضياء!»

بانفعال شديد صاح سيف مرة أخرى:

«أنا أچوزك للچن اللزج، ومچوزكيش بيدي لنفر ملهش عازة من الرحامة!»
رمقت فاليريا زوجها المكثفي بمراقبتهم شاردًا في أفكاره... ربتت على يده بنعومة:
«مالك ردوان.. انت كويس؟؟»

ربت على يدها بدون أن ينظر إليها:

«أنا بخير... بس الي حوصل اليوم مكانش سهل... وكله بسبة ابنك... بس نجول إيه... جدر الله وما شاء فعل»

انبرى سيف مدافعًا عن نفسه بتحويل دفاعه لهجوم:

«وبتك الي عيارها قالت!؟ أخذت بت عمها وراحت تتفسحوا في الفلوكة... فاكرة نفسها في بلاد الخواچات... فضحتنا وچرستنا وختل سيرتنا على كل لسان... يا ريتك كتي غرجتي ولا ورطتين الورطة دي!»

وقفت زينة تلوح بيدها في وجهه:

«انت كمان ليك عين تتكلم!؟ أنا كنت هبوس إيدك وأنا بقولك رافع معملش حاجة... بس الحشرات الي بتمشي في دماغك هي الي مسيطرة عليك... مش ممكن تكون بني آدم طبيعي!»

وقف أمامها تلوح علامات التوحش والهمجية على ملامحه: «انتى واعية
لختاريف الي بتخترفيها!!!؟ والله لو مكانش أبويا جاعد لكت شربت من دمك!»
«لا يا راجل! على أساس إنك عامل اعتبار لوچودي!»
«يا بوووووي!!!...»

«بلا أبوك بلا بطيخ... بزياداك بجى انت خليت فيها بوك ولا خوك؟! انت سبة
كل البلاوي ولساك بتكابر؟! ربنا ستر وهنجدروا نشيلوا اسم أختك من الكشوف
الي طالبها سي زيدان الزفت بحجة إنها مخطوبة... الدور والباچي على حضرتك
شوف مين هتطلع في جرعتك!»

شهق سيف وكأنه لم يتوقع أن يكون اسمه من ضمن الأسماء: «أنا يابوي؟!؟»
«إيوه يا سبع البرمة... وانت فاكر إيه؟! زيدان ده عيل صغار وبيلعب معانا؟!
الراچل دا دماغه واعرة جوي... ولسة الي مخبيه أوعر من الي حوصل»
لوح سيف بيده بعنجهية:

«والله أكتله وأتاويه... ويلد صريخ ابن يومين معرفش طريقه»
تنهد رضوان معلقاً عينيه بالسقف:
«صبرني يا رب على ما بليتني!! ما هو يا تصبرني يا تاخذني أغور من خلجته!»
حدجته فاليريا بنظرة عاتبة:

« سيف هبيبي... إيه كلام فارغ بتكوله دا!!!؟ كول باردون لبابا فوراً! »
ارتفعت الحواجب حتى اصدمت بالعمم، ثم تنهد سيف مطرقاً، ولم يستطع
رضوان منع نفسه من الضحك، وهو يضم زوجته من كتفيها قائلاً بتنيهدة راحة
شقت الهموم المكومة في صدره أخيراً:
«والله انتى يا فاليرية أجدع حرمة في البلد دي كلاتها... وكل يوم بحمد ربنا إنه
رزجني بيكي»

حدجتهما بنظرات مستغربة.. ثم نظرت لزينة المستمتعة بمنظر والديها بكل هذا
الحب العامر بعيونهم: «زينة... أنا كُلت هاجة غلط؟»

«لا يا ماما... الدنيا هي اللي غلط يا حبييتي... لو الناس كلها تفكر زيك كده ببساطة وحب... مكانش كل اللي بيحصل دا هيحصل... يلا بينا ننام، ونخلي بابا مع سيف يفكروا في اللي هيحصل بكرة»
رمقت زوجها بنظرة أخرى:
«ردوان هبيبي... إيه يآني لما سيف يتجوز بنت رهايم؟! وإيه يآني لما نأيش مبسوطين!؟؟ أهمل راهة لدماغ انت هبيبي... مافيش حاجة هتهصل غير كل هير.. بس توكل على الرب»
هز رضوان رأسه ثم نظر لسيف: «سمعت بودانك حديث أمك العاجلة الراسية!؟ بتجولك: توكل على الله.. يسلم فمك يا فاليرية»



«النبلاء: هم الأشخاص الذين يفعلون أشياء جيدة
دون أن يعرف أحد بذلك»
- وليام شكسبير

.....

«يا نهار اسود! يا نهار مطلقتلوش شمش! يا خراي! يا خراي! مكانش يومك يا
رحاية! الحديد الي بتجوله دا... صوح يا وهدان... ولا أنا اتخبلت على كبر!؟
جولي يا ولد عمي يستر عرضك يا خوي... جولي إني مكوبسة وفوجني بسرعة الله
يخليك!»

هب وهدان وافقًا ملوحًا بيده:

«بزياداي بجى يا وليه! اليوم عشش في الدار من نواحك الي مبيخلصش ده...
هي نافورة مجاري وطفحت!؟ وعلشان ترتاحي... لع كل الي رافع جاله حوصل
يا ست الدار... ومن بكرة رجالتنا هيتچوزا بناتهم، وبناتنا هيتچوزا من
خيالات المجاتة الي حداهم»

وعادت تصرخ وهي تشد طرحتها السوداء حول عنقها: «يا خراب ديارك يا
رحاية!! يا ريتك ما جولتها في وشي!»

أمسك وهدان أطراف عباءته ولفها حول عنقه هادرًا بعصبية: «رافع يا ولدي أنا
مطايحش خلجاتي... هروح أشم شوية هوا وأغور من وش أمك... تاجي معايا يا
ولدي؟»

«لا يا بوي... أنا جاعد... ههدي أمي»...

نظرت له أمه بذهول:

«تهديني من إيه ولا إيه يا ولدي!!؟ كيه توافجوا على المسخرة دي!!؟ وهم
البداري وافجوا!!؟»

«مكانش حد يجدر يرفض يماً... اللي يرفض يدفع نص أملاكه للمركز»
«يادي الخراب المستعجل! كان مستخبي لنا فين داكلاته!!؟ استرها معنا يا رب»
«وبكرة كمان اللي يرفض الجوازة منينا، ولا منيهم هيدفع نص أملاكه»
«يعني ملهاش مخرج الوجعة المهبية دي يا ولدي!!؟»
«لا يماً... أتاري زيدان ده رچل عَجْر صوح... لعب بينا كلاتنا وعمل اللي براسه
لما وجعنا في الخية... ومحدث جدر يجوله تلت التلاتة كام»
«رافع يا ولدي.. إوعاه بوك يكون كتب اسمك في كشوف الغبرة دي!»
«لا يماً اطمني... بوي جالهم ولدي رافع جاري فاتحة معالي».

تبرمت ست الدار:

«منها لله زينة الخراب والشوم! يجطعها ويجطع سيرتها! هي سبة كل النصايب
اللي بتتحدف علينا دي! يا ريتك كت خليتها تغرج ولا تغور في عشروميت نصيبة
تاخذها، هي وكل البداري في ساعة واحدة»
«خلاص يماً... اللي حوصل حوصل... ما تندميش على الخير يا ست الدار.. انتي
خلفتي راجل مش... ولا مؤاخدة»
«راجل وسيد الرجالة كمان... ربي يحميك يا ولدي ويهنيك، ويسعدك دنيا
وأخرة»

«الله عليكي وعلى دعوتك يا ست الحبايب.. أنا بجى أروح أحط راسي وأنام وأنا
مرتاح... وانت كمان يا ست الدار... ارتاحي.. بكرة يوم طويل... سي زيدان بيه
طالب كل الرحامة والبداري من أكبر راجل فيهم لأصغر عيل لازم يكونوا
متجمعين في الملعب بكرة من صباحة ربنا»
«والحریم كمان يا رافع؟»

«إيوه يّا والحريم كمان... والعيال... بيجول العيال هم اللي هيختاروا ورج
الجرعة... زغرقي يا ست الدار الرحاية هيتجوزا من البداري بالجرعة... دحنا
هنشوف أيام أسود من جرن الخروب.. يلا تصبحي على خير»



أخذت تقلب الوسادة تارة، وتلكمها بقبضاتها تارة أخرى... ولكن النتيجة تظل
واحدة في كل مرة... ما إن تضع رأسها عليها وتغمض عينيها يترأى لها، بنظراته
المفعمة بكل المشاعر المتناقضة؛ حب وكره، أمان، وخوف... الغريب أنها خبرت
معه كل هذه المشاعر داخل إحساس مخدر من الاحتواء اللذيذ... كلما تلاعبت
بهم الظروف في لقاء غير مخطط... قامته الطويلة، نظراته الباردة، وشخصيته
القوية تفرض نفسها في كل مرة... عندما تلاعب بأعصابها، وهددها أن يلقي بها
في النيل... رغم رعبها من كل لحظة صدقت فيها ادعاءه، ولكن من داخلها لفها
إحساس الاحتواء بغلالة رقيقة قوّت عزيمتها باستقبال نتائج ما سيحدث بثقة...
كان معها... لفت ذراعيها حول جسدها تتخيلها ذراعيه... تتمت باسمه بخفوت
وغياهب النوم تعتلي عرش وعيها «رافع».



شلالات من الشعر الأحمر عابق برائحة النيل، مع عيون حاملة تنافس السماء في
زرققتها... ولسان متمرد في مزيج سحري لخنوع أنثى.
خلطة مذهلة أسالت الغضب في عروقه... فكر بغیظ شديد: «ترى من سيستطيع
الإمساك بلجامك أيتها المهرة الحمراء؟؟ من سيروض تلك النظرة الشيطانية في
عينيك؟؟ من سيحكم الطوق على عنقك ويسمك باسمه؟؟ أي رجل هذا
سيستطيع احتواء كل هذه النار الحارقة في أجيجها، وكالبركان الخامد في
هدوءها.. (ناريسا)».

ضرب وسادته يلعن أفكاره التي سكنتها، ثم ألقاها على طول ذراعه وأمسك
بواحدة أخرى... ولم تكن أفضل من سابقتها.



تطلعت للقادم بذهول، ثم ألقت بنفسها على صدره بشهقات باكية. ربت عليها
بحنان هامساً:

«اطمني... رافع راجل جوي هيجوم منيها»
«يا رب يا سيف.... يا رب... أنا مش عارفة الدكتور اتأخر ليه!! بقالهم كتير أوي
جوة...»

«خير يا بت أبوي.... كل تأخيرة وفيها خيرة».
نظرت خلفه متسائلة:

«هي معالي جاية معاك ولا إيه؟؟»
التفت بحدة ليرمقها بمزيج من الاحتقار والغضب، ثم سلخ عينيه عنها وكأنها لا
تهمه بشيء.

«كيفك يا زينة؟؟ ورافع أخباره إيه؟؟»
كانت تحدث زينة ولكن عينيها لم تفارقاه، وكأنها تتوسله نظرة... نفذ ثوبه
وكانه لم يسمعها:

«زينة... أنا رايح أجيّب لك عصير ووكل... شكلك هتوجعي من طولك».
شيّعته بنظراتهما حتى غاب في آخر الردهة... التفتت لها مجهدة، تربت على
ذراعها:

«أنا متشكرة أوي يا معالي»
لم تسمعها... كانت ما تزال عيناها معلقين حيث اختفى طيفه: «هو خوي دا
جلبه إيه؟! حجر صوان؟! دا حتى متطلّعش بوشي»
«الزمن بيداي الجراح يا معالي... اصبري»

بلهفة وقفت تستقبل الطبيب الذي أزاح اللثام عن وجهه، وقد تراقصت حبات العرق على جبينه، وتجددت ملامحه بالإجهاد... لم يستطع رسم الابتسامة المطمئنة للوجوه المتربة أي انفعال منه يطمئنهم قبل أن ينطق... أزاح الصعيدي الفتيات عن طريقه، وعندما امتدت يده يدفعها هي الأخرى، أوقفته بتحدية ثابتة، باردة أعادت ذراعه مكانها. تصلبت ملامحه عبوساً، وتضارست أسنانه في معركة غير معلنة، لم تلتن ولم تتراجع قدر بوصة، دفعته وتجاهلت كل مراجله التي تغلي، وفي غمرة انشغاله بكبريائه المجروح، اغتصبت منه المبادرة:

«دكتور أرجوك طمنا.. أخبره إيه؟؟»

تنهيدة الطبيب كانت كالوقود الذي زادها اشتعالاً... لو كانت في أي موقف آخر لاستسلمت لتلك الإغماءة التي تهدد وعيها برغبة دفينة للتخلص من هذا الموقف المستحيل احتماله... هب الرجل الغاضب خلفها يحث الطبيب على الكلام: «ما ترد علينا يا دكتور... هو جرائه حاجة لا سمح الله؟؟»

«لأ.. اطمنوا... بس للأسف هو نزف كثير أوي... حاولنا إسعافه بس...»

صراخ من الخلف وانهيأ من الفتاتين:

«لاااااااا يا حبيبي يا خوي... يا نضري!! مكانش يومك يا زينة الشباب!!»

«إيه الي حوصل يا ولاد؟؟ بتصرخوا ليه؟؟»

التفتوا مشدوهين للقادمين، وقد اكتسى الهلع وجوههم... رجال ونساء. هب الرجل الأكبر سنًا:

«إيه الي حوصل؟؟ الأخبار الي سمعناها صوح؟؟؟»

وعندما طال الصمت ولم ينطق، صرخت السيدة الأكبر سنًا تلطم خديها:

«يا حبيبي يا ضنايا!! مكانش يومك يا نضري!!»

التفت لها الرجل المهيب:

«اسكتي يا حاجة لما نسألوا الدكتور... متجدريش البلا جبل وجوعه»

«ماهو باين أهه يا حاج... مش شايفهم السواد مالي وشوشهم، وعيونهم مبتطلعش في عيوننا؟! باجي نسمعوا إيه ثاني؟؟»
ثم التفتت للفتاتين الصغيرتين:
«كل النصايب دي بسباتكم انتم يا مجصوفة الرجة منك ليها... الي يطولني على رجايبكم دلوك أجطعها بسناني»
ولم تنتظر، وهجمت على الفتاتين بوحشية... وقف الرجلان حائلاً بينها وبينهما...
فركضتا تختبئان خلف الطبيب.
صرخت بكل قوتها الخائرة:
«خلاص!! كفاية!! الي بتعمله دا مش هيرجع الي راح... مش هيرجعه.... مش هيرجع.... يا ريت كل الي حصل مكانش حصل... يا ريت»
التقت كل العيون الدامعة ببعضها، ليعودوا بذكرياتهم لذلك اليوم الذي بدأت فيه كل الأحداث الحقيقية.



كان ملعب البلد مكتظاً رغم عدم وجود مباراة كرة القدم اليوم... المشهد كان يستحق مُعلّقاً يتابع الأحداث ويذيعها على الهواء؛ فما يحدث اليوم حدث تاريخي، ولن يتكرر خلال المائة سنة المقبلة على الأقل. اتخذ البداري الجانب الأيمن من الملعب، بينما اتخذ الرحاية الجانب الأيسر... وبباقي الجهات جلس مشاهدون لا يقربون بصلة للعائلتين... يدفعهم فضولهم لمشاهدة الحدث غير المسبوق.

في وسط الملعب امتدت مائدة مستطيلة مغطاة بمفرش أبيض... فوقه تراصت أربع حاويات زجاجية شفافة، وقد امتلئت كل منها للنصف تقريباً ورقاً مطوياً... على كل جانب من المائدة حاويتان لكل عائلة... وفي منتصف المائدة دفتر مميز الشكل، وقد جلس أمامه شيخ الجامع بعمامته البيضاء المميزة، وقفطانه الأسود اللامع... سرت همهمات فضولية فور جلوس الشيخ ومجاذبته لأطراف الحديث

مع المستشار زيدان، الذي أوماً برأسه ثم رفعها ليراقب الجميع بعين يطل منها الحزم وعدم التهاون... ثم نادى كبراء العائلتين ودعاهم للوقوف أمامهم عبر الميكرفون الذي تم تجهيزه خاصة للمناسبة.

أمسكت زينة بيد أمها... فالتفتت لها فاليريا مدهوشة من يدها المثلجة تنتفض بين يديها:

«زينة هبيبي... انت كويس؟؟ مش كان لازم يهضر وانت تأبان»
« متقلقيش ماما... أنا بقيت كويسة.. ومينفعش مجيش... هي هنا فين؟»
قلبت فاليريا شفتيها:

«مش آرف... كالت هتروح تكابل نجلا... أكيد بيرغي سوا سوا... شوفي... بابا وسيف بيتكلموا... وشكلهم زألان كثير»
أوماًت زينة وهي تزدد ريقها بصعوبة لرؤيتها وجه والدها مكفهرًا... ولم تكن بحاجة لاستفسار عن السبب؛ فوجود شيخ الجامع بدفتره يعني أن المستشار لا يترك لهم منفذًا واحدًا للهروب من الاتفاق... وهذا طبعًا لن يروق لأي من العائلتين... وها هو رافع وجاسر أيضًا يلوحان بأيديهما باعتراض... سرحت أفكارها في تلك الملامح العابسة بمزيجها المذهل بين القوة والحنان الغامض.

سرًا حسدت معالي عليه، ارتعشت تفكر... لابد أنه يلوم نفسه آلاف المرات على إنقاذه لها... لو لم يفعل لما كان لهذا اليوم وجود... على الأقل بدون أن يكون ذنبها... جذبتها سمحة من يدها:

«زينة يا بت عمي... إيه اللي بيحصل ده؟؟ حلم ولا علم ده ياخواتي!؟»
تراقص حاجبا أمها قائلة بصوتها الجهوري:

«أنا مش عارفة هم إزاي يوافقوا على الحكاية دي!! هو الجواز لعب عيال، ولا كان لعب عيال!!؟ قال بطلوا دا واسمعوا دا... حكم.... انتي شايقة أخوي يا بت يا سمحة؟؟»

«إيوه يما... أهه واجف فريح عمي كانن زي عوايده»

«أمال ليه يا بت مش عامل هيصه زي رافع وجاسر وسيف؟!»
«ابنك ولا هتشتره؟! أهه واجف يزغر وبس، وسايب الخناج لاصحابه»
«عيب يا بت متقوليش كده على أخوكي... دا زين الشباب... بس تقولي إيه هو البخت... منورة يا بنت سلفي»
مالت شفتا زينة بتهكم، متعجبة من تلميحات زوجة عمها، ثم تجاهلتها وعادت تتابع ما يحدث رغم أن أصواتهم لا تصل إليها.
وفي الجانب الآخر، لم تكن درجة الغليان أقل:
«بت يا معالي... هم بيحولوا إيه يا بت؟!»
«والله مخبراش يا مرت عمي... أهم جاعدين يشوحوا بدراعاتهم»
«وچبتي إيه من عندك يا فصيحة؟! ما هو دا اللي أنا شايفاه كمان... مش يعملوا أصواتهم شوية؟! سامعة حاجة يا بت يا فريدة؟!»
أجابتها فريدة متململة بقلّة اهتمام:
«حالي حالكم يا مرت خالي»
التفتت لها ست الدار باندھاش:
«انتني مالك يا بت؟! وشك ميتفسرش وشايلة طاجن ستك على راسك ليه؟!»
زغرت لها معالي بتكبر، وشبح ابتسامة ملتوية يداعب شفتيها المكتنزتين:
«خليكي منها دي بت وش فجر... يمكن خيفة لجرعتها تطلع في غفير من حداهم»
«عيب يا معالي... بلاش حديثك الماصخ ده... يا ريت چاسر كان وافج... كان زمانه هو وفريدة برات لعب الصغار ده»
أشاحت فريدة بوجهها كي لا تلمحاً دموعها. عقدت ذراعيها على صدرها بقوة لتمدن ارتجافها، ورغبتها المسيطرة عليها لتركض هاربة عائدة لغرفتها كما تفعل دائماً... أغمضت عينيها تتوسل للوقت ينقضي بسرعة.

وضع وهدان كلتا يديه على أطراف المائدة المعدة وسط الملعب، أدنى رأسه من رأس زيدان متمماً بحروف كالرصاص: «جصدك إيه بعمايلك دي يا زيدان بيه؟!؟»
ما إحنا وافجنا وخلصنا... لزومه إيه تتعب شيخ الجامع معنا؟!؟»
بابتسامة هادئة وواقفة أجابه المستشار:

«وإيه اللي مزعلك يا وهدان؟! أنا مهمشيش الليلة إلا لما يكون الاتفاق على يد حضرة الشيخ... ميزعلكش فحاجة... وخلصنا منه الحديث ده.. اللي عنده اعتراض يجول من دلوك جبل ما نبذوا الجرعة... وحضرة المأمور چاي بنفسه علشان يستلم التبرع من أي حد معاجبوش الوضع... ودي آخر فرصة... متى ما اتهدت يدنا واخترنا مافيش تراجع... واللي مش عاجبه كمان هيدفع نص أملاكه... مش انتم راضيين على كل الأسماء الموجودة، و كاتبينها بخط يديكم؟؟»
أوما الجميع، فعاد يسأل:

«فيه أي اعتراض جبل ما نبتدي؟؟ بعدين مافيش تراجع دا آخر تحذير... أي تراجع ولّا اعتراض... زي ما انتم خابرين... خلاص... بسم الله نبتدي. يا ريت أطفال يجولي من العيلتين علشان يختاروا العرايس والعمرسان»
سرت همهمات كثيرة لم تخل من نبرات الاعتراض العالية... وأمام العيون المحدقة اقتربت فتاتان تقتربان في الطول والعمر.... صافحهما زيدان وسألهما عن أسمائهما... ردت الأولى:

«(هنا رضوان البداري)»... «(نچلا وهدان الرحامي)»

سألهما زيدان بابتسامته المعهودة:

«خابرين هتعملوا إيه؟؟»

أومات الفتاتان بنعم... فأشار لهما لتشرعا في وضع أيديهما في الحاويات الزجاجة... وفي كل مرة تسلمان له الورقة بدون أن تفتحها، حتى تمت كل الاختيارات وأصبحت بين يدي زيدان... صافحهما شاكراً وطلب منهما العودة

لمكانيهما... عادت كل فتاة لعائلتها تصحبها نظرات محتقنة من كل الاتجاهات...

انتبهوا لصوت زيدان يصدح في الميكروفون:

«أسماء الزوج الأول... رشاد البداري...»

صمت رهيب حاكي صمت القبور، ووجه رشاد المتصلب تكاد الدماء تنفجر من عينيه المحتنقتين.

تابع زيدان وهو يفض الورقة الثانية:

«فريدة محمود الرحامي.... فريدة ووكيلها ورشاد يتفضلوا جدامي»

لم تصدق فريدة أنها سمعت اسمها... نظرت حولها فلم تجد غير نظرات الشفقة والشفاه الممصوصة تطلق بانفعال مشفق... عاد زيدان ينادي في الميكروفون على اسمها. صاح وهذان يناديها:

«همي يا فريدة خلي اليوم دا يعدي على خير... همي يا بتي»

ارتسمت ابتسامة مريرة على شفتيها، وفكرة واحدة تدور في رأسها كحجر الطاحون.. «أخيرا چاتكم على الطبطاب الفرصة لتخلصوا مني» دفعتها معالي بابتسامة ساخرة:

«همي يا حلوة... حظك من السما... رشاد البداري... والله وباضت لك في الجفص يا فريدة!»

تجاهلتها فريدة وهي تنزل مسرعة قبل أن تخونها دموعها... وقفت بجوار خالها.. يرمقها جاسر بنظرة غريبة... ورافع يومئ لها بإحراج وكأنه يعتذر لها عن ذنب لم يقتطفه.

في الجانب الآخر كان رشاد يكاد يشد شعره لاهثًا، يحاول إفهام أبوه وعمه بشتى الطرق:

«مين جالكم تحطوا اسمي!!؟ أنا مأكد عليكم إني مش بتاع چواز ومعايزش أتجندل وأتچوز!»

ضرب رضوان بعصاه في الأرض مخاطبًا أخاه:

«جـرى إيه يا محمود؟! هو كان حديث عيال صغار؟! لما الراجل يدبـب في الأرض ويعمل كيه العيال، الحريم يعملوا إيه؟! مستعدين تدفعوا من أملاـگکم؟؟ رد يا محمود!»

زغر محمود لابنه بضيق وهتف بصوت حازم:

«اعمل الي انت شايـفه ياخوي... رشاد ابنك ما هيعصاش لك أمر واصل»
رفع رضوان رأسه لرشاد:

«جـولت إيه يا رشاد؟؟ سمعني صوتك»

بعد لحظات من الصمت المطبق، رفض أن يرفع عينيه المنهكتين بعيني عمه:

«الي تشوفه يا عمي... الي تشوفه»

جاء الصوت الساخر من خلفهم:

«خبر إيه يا رضوان؟ معايزنش الجـوازة؟ العريس حرنان ولا إيه!؟»

التفت رضوان لوهـدان قائلاً بصوت حازم:

«مين جال الكلام ده؟! رشاد أهـه مستعد لكتب الكتاب... إلا إذا كانت المحروسة بت أختك معايزاش»

ألقي وهـدان نظرة مطمئنة على فريـدة المطرقة برأسها وتابع: «واحنا كمان... چاهزين»

هتف زيدان: «على بركة الله... اكتب يا سيدنا الشيخ»

رفعت فريـدة عينـيها لأول مرة تتطلع لعريسها، فجمـدتها عيناه شديدا الاحمرار وقد احتقنتا بغضب أعمى... نكست رأسها بحداد، ترى باقي أحلامها تتساقط أسفل قدميها... تدوسها النعال الفاخرة بدون أن يأبه أحد لها، أو لأحلامها المدهوسة»

تم كتب الكتاب، وأصبحت على ذمة رجل لا تعرفه ولا يعرفها... دفعها رافع لتعود مكانها يتبعها صوت زيدان: «في آخر اليوم هنحددوا معاد الدخلة»

وعاد صوته يصدح في الميكروفون لاختيار الزوج الثاني، فض الورقة، علت شفثيه ابتسامة مأكرة؁ ثم جال بعينيه في الوجوه المتربة حوله؁ أجلي صوته وأعلن بصوت مجلجل: «سيف رضوان البداري»

احتدت ملامح سيف؁ وأسانه تتخط في بعضها باحتقان مكبوت.. أوماً له أبوه ليهدا؁ علا صوت زيدان مرة أخرى بالقنبلة التي فجرت صرخات الاعتراض: «معالي الرأهي»

اندفعت الدماء تغلي في مراحل عروق رجال الرأهي؁ يتدافعون كل واحد بجمله كلمات صأبة معترضة... انتظر زيدان عشر دقائق كاملة حتى هدا الصخب ثم رفع رأسه مخاطباً وهدان:

«تصدج بأيه... أنا مسمعتش ولا كلمة... ومأبرش انتم معترضين على إيه»
التقط وهدان أنفاسه وهتف بأنفاس باحتداد:

«يا أناب البيه... معالي بت أخوي مخطوبة لولدي رافع»
مط زيدان شفثيه: «يعني معترض على الاختيار... انت عارف معناتو إيه اعتراضك ده؟»

هب رافع ضارباً بيديه على المائدة:
«بيجول لأنابك إن بت عمي مخطوبة... ولا أنا مش مالي عينيك يا زيدان بيه؟»

ضرب زيدان بدوره على طرف المائدة بقوة أكبر؁ وتعمد أن يرفع صوته ليعلو على كل الهمهمات في الملعب؁ حتى أصبح صوته هو الوحيد المسموع:
«وأنا كلامي واتفأنا كان واضح... لو كانت المحروسة بت عمك مخطوبة لحضرتك؁ اسمها موجد في الورجة ليه؟؟»

رفعوا أكتأفهم جميعاً بعدم المعرفة؁ فتأبع زيدان:
«يوجبى مش غلطتي.. حضراتكم معترضين؟ ادفعوا الغرامة؁ ونعيدوا الجرعة...»

حملقوا ببعضهم، ثم ارتفعت أنظارهم لعائلة البداري، ابتساماتهم تعلوها شواربهم... هتف سيف برعونة: «واحنا متمسكين بالاتفاج... المعترض يدفع الغرامة»

كانت معالي تصرخ وتولول وهي تضرب على صدرها: «يا لهوي!! يا خراي!! مكانش يومك يا معالي!! الحجيني يا مرت عمي! الحجيني! دي كانت نصيبة إيه دي اللي حطت على راسي!! أنا.. أنا أتجوز واحد تاني غير رافع!!؟ يا دي النهار اللي مطلعتلوش شمش!»

«اتهدي يا معالي... الرچالة بيتحدثوا... ورافع يا حبة عيني شوفي عامل إزاي كيه الفروج الداخة..»

«لا يا مرت عمي... لا... المشتشار الزفت ده ناوي على نية سودة... شوفي كيه بينضر لهم ولا كنهم بيتحدثوا معاه... يا وجعتك السودا يا معالي!!»
التفتت لتجد الابتسامة المرسومة على وجه فريدة بتشف واضح:
«انتي شمتانة فيا يا فريدة!!؟»
أجابتها فريدة بتأكيد:

«إيوه... عشان لو منفذوش الجرعة، يا أمتاً يعيدوها ويدفعوا نص أملاك الرحاية... يا أمتاً تتجوزي سيف البداري يا معالي... ومظنيش إنك عند رافع أهم من أرضه... ولا إيه يا مرت خالي؟»

أشاحت ست الدار بوجهها تتابع ما يحدث قائلة بوجوم: «بلاش نجدروا البلا جبل وجوعه... شوفي هيوحصل إيه اللول... كملها علينا بالستر يا رب»
«هيببيع.... جولتوا إيه يا كبرات الرحاية؟؟ هتدفعوا الغرامة ولا نتمموا الجواز؟؟»

تمتم رافع في أذن والده: «جولت إيه يابوي؟؟ هنعملوا إيه في المصيبة دي؟؟»
«العمل عمل ربنا يا رافع... مسمعتش كلام رچالة العيلة؟؟ محدش مستغني عن شبر واحد من أرضه... وزيدان الزفت راسه وألف بولغة جدمة... وكلاتنا

باصمين على اتفاج الغبرة... مكانتش إيدنا انجطعت جبل ما نوافجوا على الورطة
السودا دي... مافيش جدامنا غير حل واحد... وانت خابره زين... وما تنساش إن
دورهم چاي وبناتهم في الجرعة الجاية، وكله سلف ودين يا ولدي»
التفت الرجلان لزيدان وتمتم وهدان:

«خلاص يا زيدان بيه... هنتمموا الجوازة»

نزلت معالي منكسة تغسلها دموع حسرتها، اختلست نظرة مقهورة لرافع... أشاح
بوجهه عنها يحتقر عجزه وقلة حيلته... مشاعر لم يختبرهما في حياته... تم كتب
الكتاب وعاد زيدان يقرأ الأسماء مرة أخرى... عم الصمت الرهيب، قد تلقى إبرة
في وسط الملعب فيسمع صوت رنينها، يكاد الفضول يلتهمهم أحياء، واحتبست
الأنفاس، وصوت زيدان يصدح من جديد:

«چاسر الرحامي»

رمقه جاسر بنظرة متهمكة وعينين متراقصتان بتفكه... ثم سرح بعينه تجاه
مدرج البداري، وتهدد بعرق منتظراً بشوق اسم العروس تسبقه أمنيائه الدفينة.
تابع زيدان منادياً على عروس البداري:

«سمحة محمود البداري»

تصلبت سمحة مكانها لا تصدق ما تسمعه بأذنيها... أشرقت عيناها بتوهج لم
تستطع مداراته، وأمها تخط على صدرها مولولة:

«يا سوادك يا زينات!! البت والواد الاتنين يروحوا في غمضة عين!! يا شماتة
العدوين فيكي يا زينات!! حتى البت وقعت من طولها! بت يا سمحة... انطقي يا
حببتي... بت يا سمحة... يا لهوي ياني البت هتروح مني يا ناس!!»

أمسكتها زينة من يدها: «سمحة.. انتي كويسة؟؟»

هزت رأسها بدون أن تنطق وهمست:

«هم ندهوا على اسمي... اللي سمعته صوح يا زينة؟؟»

«أيوه يا سمحة... انزلي قبل ما عمي يزقق»

وقفت بسرعة وأسرعت بالنزول تسابق ساقها الريح للوصول.

تابعتها أمها بعينها مذهولة:

«البت مخها اتلحس... يا حبيبة أمك يا بنتي... منه لله اللي في بالي!!»

أشاحت زينة بوجهها تتابع ما يحدث.

رمقها جاسر غير مصدق حظه الخائن... ضاع حلمه قبل أن يمسك به.... تسرب من بين أصابعه بعد أن أوشك على امتلاكه... أشاح بوجهه، وقد أدرك أن الاعتراض لن ينجم عنه أي تغيير.

للمرة الأخيرة... أمسك زيدان بآخر ورقتين ورفعهما لأعلى: «آخر چوازة... بصراحة انتم خيبتم أملي... كت متعشم أروح داري وخزينة المجلس المحلي مليانة شيكات... يمكن حظي يضحك المرة دي... مين عارف... چاهزين تسمعوا؟؟»

أشاحوا بوجوههم بامتعاض، فضحك ساخراً وأمسك الميكرفون يفيض الورقة المطوية ليقرأ الاسم:

«رافع وهدان الرحامي»

عقد رافع ذراعيه حول صدره بنظرة متهكمة، وهو يومئ برأسه قائلاً:

«مش هتطول مني ميلم واحد... اللي تجول عليه يا حضرة المستشار»

حياه زيدان باحترام، وتابع قراءة الورقة الأخيرة:

«زينة رضوان البداري»

بزاوية حادة لف رأسه يطالع وجهها، وقد ظهر جلياً امتقاعه رغم بعد المسافة. ظنت أن شهقتها قد طرقت كل آذان الناس المجتمعين في الملعب... وأمها تمسك بيدها تهدئها، بينما الألم بصدرها يشتد... هتفت أمها: «زينة هبيبي.. انت كويس؟؟»

تمتت بشفاه تعتصر الكلمات:

«ماما... ما ينفعش... مش هينفع»

«اهدي زينة.. بابا آارف... وهو هيتصرف»

سأله زيدان ببرود:

«يعني إيه مينفعش يا كبير البداري؟!»

«يعني مينفعش يا زيدان بيه... زينة بتي مخطوبة»

«نفس الكلام جالوه الرحاية عن معالي... وهسألك نفس السؤال.. اسمها

موجود ليه?!»

«مخابرش...»

«وأنا كمان يا رضوان، واللي رسي على معالي هيرسي على زينة... ادفعوا الغرامة

ونعيد الجرعة أو نكتبوا الكتاب فوري...»

«مافيش غرامة هتندفع يا بابا... أنا موافقة»

التفت رضوان وسيف مذهولين، وأسرع سيف يمسك بذراعها يهزها بقوة:

«انتي مافيش فايذة فيكي!! كل البنته چروههم چر من مكانهم، وانتي جاية

تجدمي روحك... انتي چنس چبلتك إيه!!»

ضاقت عينا رافع لشعور بدائي غريب يحتله، يدفعه ليهاجم ذلك الجلف وينتزع

ذراعها من يده. استيقظ شعوره نحوها بالحماية وهو يراها كزهرة صغيرة تواجه

عاصفة عمياء... وقبل أن يبدأ التحرك نحوهما، انتبه رضوان فدفع سيف عنها

وحماها تحت عباءته. كم بدت خاملة ضعيفة وهي تحت حماية والدها، مما

دفع تساؤلاً غيوراً بداخله: هل ستكون بهذا الخنوع تحت جناحه؟

مسح شعرها يبعد العرق عن منابته وهمس:

«بتعملي إيه يا زينة؟؟ وليه يا بتي!!؟ أنا كت هدفع كل اللي حيلتي

ومتتچوزيش چوازة مش على كيفك»

«أنا السبب يا بابا في كل اللي بيحصل.. ومش عدل إني الوحيدة اللي تهرب... أنا

كنت عارفة إنك هتدفع الغرامة؛ علشان كده جيت ألحقك... أنا هبقى كويسة...»

صدقني»

قَبْلَ قِمةِ رَأْسِها ثُمَّ أَحاطَ كَتِفِها وَالتَفَتَ لِزَيدانِ قائِلًا بِنِبرةٍ وَجَدتْها غَريبةً عَلى أذُنِها، وَكانتْ أَصابِعُه تَعْتَصِرُ كَتِفَها بِتَشبِثٍ، وَكَأنَها يَرفضُ التَخلي عَنها رَغمَ اسْتِسلامِها: «هَنتَمَموا الجَوازَةَ... لو الرَحايمَةُ عَندَهم اِعْتِراضٌ...»

هَدَرَ رَافِعٌ بِشُمُوخٍ:

«واَحنا كَمان.. هَنتَمَموا الجَوازَةَ»

طَحَنَ جاسِرٌ ضَروسَه بِبَعضِهما وَهو يَراقِبُ أَحلامَه الوردِيَّةَ تَتسَرَّبُ مِن أَسفلِ عِمامَتِه، تَتساقَطُ حَجَرًا حَجَرًا، مِن قِصَورِها الوَهَمِيَّةِ الَّتِي اجْتَهدَ في بَنائِها طَوالَ اللَّيلِ، إلَى... ابنِ عَمَهِ!!! زَفَرَ بِغِلٍ وَهو يَراقِبُ ما يَحدُثُ صامِتًا.

وَبَعدَ عَقْدِ القِرانِ، عادَ صَوتُ زَيدانِ يَجلِجُلُ في المِيكِروفونِ: «أَلِفُ مَبرُوكٍ لِلرَحايمَةِ وَالبَداري... الفِرحُ الأَوَّلاني هِياكونَ عَشيَّةً بِكَرَّةٍ إِنْ شاءَ اللهُ... وَبَعدَه في اللَّيلَةِ التَّانِيَةِ الفِرحُ التَّانِي... وَكلَ لَيلَةٍ فِرح... المَهرُ وَالشَبَكَةُ آني هَتَكفُلُ بِبَهم»

هَبَّ الرِجالُ مِن كَلا العائِلَتينِ بِاِعْتِراضٍ، فَضَحَكَ زَيدانُ: «خَلاص... هاتُوا الذَهابَ وَأَنا عَليا الخَواتِمَ هَديَّةً مِني... بِسِ الأَفراحِ عَلَيكُم... أَنَا خابِرُ ائِتمَ مَبْتَجِصَروش... بِسِ يا رَيتُ نَخفِفُ مِنَ البَارود... مَرَّةً تَانيَّةً أَلِفُ مَبرُوكٍ وَإِنْ شاءَ اللهُ الأَحوالُ تَتَحسَنُ مِنَ اليَومِ وَرَايح»

هَمَّ بِالنَّهَوضِ عَندَما أَوَقَفَهُ جاسِرٌ:

«حَاجَةٌ واحِدَةٌ باجِيَّةٌ يا چَنابِ المِشْتِشار»

«خَيرُ يا چاسِر؟»

وَضَعَ يَدَه في صَدِيرِيتِه وَعَيناهُ تَجولُ حَولَه بِبِلاَدَةٍ... ثُمَّ تَوَقَّفتُ عَندَ زِينَةٍ لَدَرجَةٍ أَقلَّقتُ رَافِعًا... وَهَمَّ بِدَفْعِها عَنها وَكَأَنَّ نَظراتِه هَذهِ اخْتَرَقَتِ كُلَّ ذَرَّةٍ عَقلِ بَرائِئِها... تابِعَ جاسِرٌ عَندَما طالَ الِانْتِظارُ:

«لَازِمُنِ نَتَأَكِّدُوا إِننا مَنتَلَطَخُوشُ عَلى جَفاانا... بَناتِنا زَيِ الجَنيهِ الذَهابِ مَعمَرِهمشُ هَوَبُوا نَواحي عَتبَةِ الدار... وَكلُ النَاسِ خابِرَةٌ»

رمشت عينا رضوان بقلق، بينما استنفر سيف باستعداد ليقفز عند أول بادرة
يمسك بخناقه، عندما أكمل بوقاحة: «بس الدور والباجي على الي بتهم دايرة
على حل شعرها، وميعرفوش هي باتت فين ولا...»
قاطعها زيدان وقد شعر أن الموقف سيتفجر في أي لحظة: «جصدك إيه يا
چاسر!؟؟»

بنظرة أكثر وقاحة من سابقاتها رمق زينة باستخفاف مردفًا:
«المنديل يا چناب المشتشار... لازم كل عروسة نتوكدوا من طهارتها، وترفع
راس عيلتها بالمنديل»
هب سيف يحاول النيل منه، ولكن الرجال حالوا بينهم، لتنتلق الشتائم من فمه
كدانات المدافع:
«والله لأشرب من دمك!! انت ميت الليلة يا چاسر الكلب!!! هي حصلت تخوض
في شرفنا!?!»

قهقه جاسر بشماته:
«زعلان جوي يا سيف!؟ إيه مش متوكد من شرف المحروسة!؟»
صرخ رضوان:
«وهدان! يا تخلي ويلد أخوك يخرس، يا هنخرسوه بطريجتنا... هي حصلت
يخوض في أعراضنا!?!»
عاد جاسر يصيح ضاحكًا:
«وانتم زعلانين ليه!؟ بناتنا مستعدين للمنديل... وانتم... أخباركم إيه!?! ولا انتم
شبات وبس!?!»

عدة أعيرة نارية انطلقت في الهواء لتعلو فوق أصوات الهرج والمرج. التفتوا نحوه
ليصيح في الجميع: «خلاص... المنديل هو الي هيجمع كل الألسنة علشان محدش
يخوض في أعراض حد بدون بينة... حد عنده اعتراض!؟»

هـب رضوان باحتقان ونظرات الغل تكاد تقسم جاسر اللامبالي لقطع مغمسة
بدمائه:

«إحنا محدناش اعتراض»

رفع جاسر يده:

«ولا احنا كمان.. صوح يا عمي؟»

أوماً وهدان وتبعه رافع بحذر، يحاول التحكم في نفسه بكل ضبط نفس ممكن
كي لا يقتل جاسر بيديه العاريتين.

رفع زيدان يده:

«يوجبى اتفجنا... كل ليلة محدش يروح بيته إلا بخروج المنديل... الله يعينكم
على عجولكم»





«لا توجد مبادئ.. يوجد كلام عن المبادئ»
- وليام شكسبير

.....

«ولدي راح خلاص... ولدي راح مني يا ناس... حد يرد عليا... حد يجولي ولدي
بخير وغفیان شوي وهيصحى ثاني...»
نكست الرؤوس، وانهمرت دموع الفراق.
اقترب الطبيب وربت على كتفها: «ادعيله يا حاجة... دلوقتي هو محتاج دعواتك
أكثر من أي وقت ثاني... ادعيله ربنا ياخذ بيده ويفوق من الغيبوبة على خير»
اتسعت عيناها بذهول، وتعثرت الكلمات على لسانها، فهتف الرجل الذي جاء
بصحبتها:

«جصدك إيه يا دكتور!!! ولدي لساته عايش!!! ممتاش!!!»
عدة شهقات ملتاعة في الخلف... رمقهم الطبيب باعتذار: «أنا آسف... بس انتم
اتسرعتم... المريض لسة عايش... بس في غيبوبة»
صرخت السيدة بلوعة:

«غوبة دي يعني إيه!!! يعني ولدي عايش ولا ميت؟؟»
تنهد الطبيب بأسف:

«عايش يا حاجة، بس مش هيفوق إلا لما ربنا يأذن»
شيخته بعينيهما الغاربتين بالدموع حتى اختفى خلف أحد الأبواب، ثم التفتت
للعيون الدامعة حولها تصيح بتوهان: «يعني إيه!!! ولدي فين؟؟ فهموني يا ناس
حرام عليكم»

ثم التفتت إليها تشير لها بأصابع الاتهام:

«انتى... انتى بتعملى إيه إهه!!؟ وليكى عين!!؟ يا چبايرك!! كل اللى حوصل بسبتك انتى يا چلابة النصاب.. غورى من وشى معاواش أشوفك، غورى وعاودي من النصيبة اللى اتحدفتي علينا منيها»

وقفت تجابه هجومها بتحدى:

«أنا مكاني هنا... أنا مراته ومن حقي أكون هنا أكثر من أي واحد فيكم... واللى مش عاجبه يتفضل يمشي»

وقفت أمام النافذة الزجاجية تراقبه من بعيد... لا تكاد تصدق كل هذا العنفوان والقوة ممدد على فراش تحوطه الأجهزة من كل جانب... وهو لا حول له ولا قوة... أغمضت عينيها بقوة تتوسل دموعها ألا تستسلم الآن، ما تزال بحاجة لقوتها، وكل ذرة تملكها من التحمل، ولو تركت لها العنان لغرقت في بحور أحزانها... ربتت يد على كتفها، وانحنى أخوها بجوار رأسها يطبع قبلة حانية على شعرها بحنان:

«هيكون بخير... إن شاء الله هيكون بخير»

تمتم بدون أن تلتفت نحوه: «بابا... وماما؟؟؟»

«ميعرفوش... لما يعاودوا هيعرفوا.. ملهش عازة نجلجوههم وهم على سفر»
أومأت برأسها موافقة... ثم ارتعشت شفيتها بابتسامة: «يا ريتنا ما اتجوزنا!! يا ريت كل دا محصلش من البداية!!»

«الفكر في اللى فات نجسان عجل... خلونا نفكروا باللى چاي يا خيتي... وعلى يدك كله كان مجدر ومكتوب... والمكتوب ما فيش منيه مهروب...»

تصدرت معالي طريقه لتجبره على النظر بوجهها... تجاهلها وهم بالابتعاد... أمسكتة من ذراعه، فتطلع ليدها بقرف، وكأنها حشرة لزجة، ثم ثقبها بنظرته الحادة، فابتعدت فوراً دون أن تفقد شجاعته، وأصرت على أن يسمعها: «سيف احنا لازم نتكلمو»

شمخ بأنفه باستعلاء:

«همليني.. معادش فيه بينا حديث يا معالي... ولا انتي ناسية انتي عملتي إيه؟»
ضربت بقدميها في الأرض منتحبة بدموع الندم:
«وغلطت... كلاتنا بنغلط يا سيف... شاور لي على بني آدم مبيغلطش»
التفت يرمقها بحدة، وأمسك مرفقها يهزها بعنف:
«مش كل الغلط نجدروا نسامحوا عليه يا بت الرحامة... مش كل الغلط! لما
تجتلي ابني في حشاي جاصدة متجصدة؛ عشان يخلالك الچو مع حبيب
الجلب... ما يوبجاش غلط وبس يا معالي، توبجى جريمة ومش أي جريمة!!!
البسة في الشارع بتحايي على عيالها، بتاكلهم لما تحس عليهم بخطر، وانتي
مهمكيش غير إنك تخولصي من ولدي... كنه عار ولد حرام»
شهقت تحاول وضع يدها على فمه ل تمنعه من إطلاق رصاصاته القاتلة... دفع
يدها عنه بضربة موجعة كي يتحاشى لمسها... أطرقت رأسها خجلة تغسل ذنبها
بدموعها السخية.
رمقها هازئاً، وزاغت عيناه في ذكريات الماضي، كما لو كانت الروح قد دبّت فيها،
وعاد يعيش تلك الأيام مرة أخرى بخياله.



«مالك يا سيف يا ولدي؟؟ مشرج ومغرب في إيه؟؟»
«لا... ولا شي يابوي... سلامتك»
غمز بعينه لزوجته وعاد يسأل:
«تكونش بتفكر في مرتك... معالي اللي أخذتها من بچ السبع؟؟»
تأوه رضوان عندما غرزت فاليريا كوعها في معدته، فهب بتساؤل، عندما غمزت له
بعينها باتجاه زينة... فأجلى صوته وخشنه:
«متأخذنيش يا زينة يا بتي... همّ يضحك وهمّ يبكي زي ما بيجولوا»
وقفت بتردد وانسحبت قائلة بنبرة خافتة منكسرة:
«ولا يهملك يا بابا... أنا هطلع أوضتي علشان أنا... تعبانة شوية»

ثم وقفت قبل أن تبتعد، وعادت بنصف التفاتة لتسأله:
«بابا... هو إيه حكاية المنديل دا اللي جاسر مصمم عليه؟؟ أنا مفهمتش ولا كلمة
من اللي كان بيقولها»

اتسعت عينا رضوان، ورمق سيف يطلب منه المساعدة، فوقف سيف وأسرع
بالخروج بارتباك:

«أنا بايني نسيت مشوار مهم.. معايزينيش حاجة من برة؟»
قلبت شفتيها باستغراب وأخوها يتعثر في جلبابه هارباً... عادت تنظر لوالدها
متسائلة بخفوت وقد بدأ الارتياح يتشعب داخلها لرعب:
«بابا... سيف ماله؟؟»

«اطلعي دلوك أوضتك، وأمك هتوبجي تحكيلك»
هبت فاليريا بتعجب:

«بس أنا مش يارف إيه منديل دي كمان... وكنت آوز أسأل»
مسح وجهه بيديه مستغفراً وبحروف مضغوطة غمز لزوجته: «أنا هحكي لك
بيناتنا، وانتي توبجي تحكي لبنك... مش ناجصاي انتي الثانية يا فاليرية هانم»
احمر وجه زينة إحراجاً عندما تأكد حدسها، ركضت لغرفتها وكل الأفكار السوداء
تتلاعب برأسها.

تنهد رضوان وهو ينظر لزوجته... ثم شرع عينيه في السقف: «يا رب صبرني!!
هجومك يا ستي... العوبارة بجى....»



«اهدي يا معالي وبطلي نواح.. الناس يجولوا علينا إيه؟؟»
عقدت طرحة سوداء على عنقها، وجذبت أطرافها تولول:
«خليني أنوح يا مرت عمي... ولو منوحتش دلوك هنوح ميتي يا خلع!! بجى
انت يا رافع يا ولد عمي الي تكون شاهد على كتب كتابي من سيف الزفت!!»

انت الي تسلمني بيدك لراجل غيرك!!؟هنت عليك، في لحظة تبيعني لغيرك ولا
كني كت كلبة ولا تسوى!!؟»

لوح وهدان بيديه صارخًا:

«بكفياكي بجى! انتي إيه وابور زلط واخذ فوشه!!؟ جاعدين نهدوا فيكي
ونطببوا عليك... ما هي أهه فريدة جاعدة ومتحملة نصيبها وساكته... واش
عجب انتي يعني!!؟»

«مش عارف ليه يا عمي!!؟ مش خابر ليه واش عجب آني!!؟»

انتفض واقفًا لترتعد فصائلهم:

«جُلت خلاص... الي حوصل حوصل ومافيناش نرجعوا لورا... عاوزين نلجوا
نجهزوكوا جبل ما البداري ياكلوا وشنا لو جهزوا بناتهم جبلينا»
«بس هو دا الي يهمك يا عمي!!؟ بجى دي آخرة الأمانة الي فاتها لك
خوك!!؟حتى چاسر أخوي كنه طفش...»

صاحت ست الدار بصراخ:

«ما تتهدى بجي يا بت يا معالي!! هو مافيش حد مالي عينك ولا إيه!!؟ ما كلاتنا
في الهم منجوعين... رافع وفريدة وحتى چاسر... لولا إن نچلا هي الي اختارت
بيدها كت جولت إنه ملعوب من هباب البرك زيدان»
شهقت معالي منتحبة:

«هو ملعوب يا مرت عمي صوح... واشمعنى إحنا!!؟ أنا وأخوي، ورافع، وولا حد
تاني من ديار الرحاية!!؟ زي ما يكون مجصود... هي فين المزغودة الي اسمها
نچلا دي!!؟»

أوقفها رافع قبل أن تنطلق في إثر أخته:

«كلاتنا كنا واجفين مش هتطلعي من نچلا بحاجة... روجي فشي غلك في حد
كدك»

«كده يا رافع!!؟ كنه الي حوصل النهاردة چه على هواك... ما انت والمحروس أخوي كانت عينيكم هتطلع على بت الخوجاية، وهي داخلة تتزخنج بين الرچالة، من غير خشا ولا حيا»

«سدي خاشمك يا معالي واتمسي... أياً كان الي حوصل اليوم... انتي بجيتي على ذمة راجل تاني»...

«كنها چاتكم كلاتكم على الطبطاب... مالكم يا رحاية من ميتي دمكم بجي زي المية الساجعة!!؟ خلاص رميتوا لحمكم وجعدتوا تتفرچوا عليه!!؟ الله يرحمك يا رچولة... منعزیش في نخوتكم يا عمي ويا ويلد عمي»....

لم يجد وهدان طريقة أخرى ليخرس لسانها المسموم... فلم تسكت إلا بعد أن طوح ذراعه، وبكل ما يعتمر فيه من غل صفعها، ليسود الهدوء أخيراً.... أعادتها الصفعة للخلف عدة خطوات، ولم تستطع الحفاظ على توازنها، سقطت على الأرض مذهولة تضع يدها مكان الصفعة تحمق فيه مصدومة:

«انت بتضربني يا عمي!!؟ هي حصلت إنك تمّد يدك عليا!!؟ وعشان إيه!!؟ عشان ماچرّيتني كيه الخروف وچوزتني بدون خوطري... ولا أجولها دبحتني؟»
كز على أسنانه صارخاً:

«فريدة!! غوريها من جدامي بت المراكيب دي، جبل ما أودرها وأدفنها هوطرحها!!»

مدت يديها تساعدها على الوقوف، بينما كانت أكثر منها حاجة للمساعدة. جرتها مكسورة العين، بينما عينا معالي لم تنزحزحاً من على الرجلين بنظرة متوعةدة:

«ماشي يا عمي.. ماشي يا رافع.. بس ابجوا افتكروها.. مش معالي الي تتغصب على حاجة مش على كيفها!»

أمسكت ست الدار بذراعه:

«ههدي خلجك يا وهدان... البت معذورة برديكي... اتصبحت في حال واتمست فحال تاني»

«ماهي فريدة كمانى صابها اللي صابها... مصرختش وولولت ليه؟!»
«انت خابر إن فريدة حاجة ثانية غير معالي... وكمان معالي كانت متعشمة في رافع كد إيه.. وإن چيت للحج، اللي له حج يصرخ ويولول هو أنى... اليوم اللي بت الخواچاية هتدخل في الدار هيوبجى يوم اسود مطلعتلوش شمش... بس والله براوة عليه چاسر، واد ابن أبوه صوح... لمن وجف جدامهم كلاتهم، وخلاهم يوافجوا على شورة المنديل... لمن نشوف بت الخواچاية جرعة أمها منين».

التفت وهدان لابنه: «رأيك إيه يا رافع؟»
«مخابرش يابوي... كل حاجة چت فجأة مش عاملين حسابها»...
«مافيش وجت يا ولدي.. لزمان نجهزوا الدوار، ونشتروا ونجهزوا أوض النوم ليك ولچاسر.. هو كمانى هيدخل على عروسته... من طلعة النهار تاخده وتطلعوا على إسنا... أغلاها خشب تشتروه مع فرشہ مع كافة لوازمه... انت خابر يا ولدي، لازم منهملش في أي حاجة ولو صغيرة، الناس هتاكل وشنا»..
بعد تفكير عميق سألتہ ست الدار فجأة:
«إلا جولي يا حاج... هي الخواچاية دي بيتفاهموا معاها كيه؟؟»



«والله انت أمرک عجب يا رشاد يا ولدي... المفروض البت هي اللي تعمل عمایلك دي... مش انت الراجل!!»
«يابوي انت مفهمتنیش... العوبارة إني....»
«بلا عوبارة بلا وچع راس... انت جاعد من عشية تجيب من ورا ومن جدام، وأنا مفاهمش منيك حاجة واصل... كلاتنا واجعين في نفس المطب... ومافيش منيه مهروب... دخلتك على عروستك الليلة الچاية، ولازم نجهزوا حالنا ولّا الناس ياكلوا وشنا»..
ضربت زينات على ركبتيها مولولة:

«كانت چوازة الشوم والندامة... من كل بنات الرحامة... يطلع بختك في فريدة!! وبنتي يطلع بختها في الفاقد بتاع الغوازي!!؟ يا ميلة بختك في خيبة ولادك يا زينات!! يا شماتة العدوين فيكي يا زينات!!»
«بطلي ولولة يا ولية، وجومي نادمي على بتك، وفهميها من الفجر هنطلعوا على إسنا نجهزوا لها شوارها ونشتري عفش رشاد... العروسة مش هتدخل على عفش جديم... وما تنسوش الفرح هيو بجى عشية... الله يعينا على الزنجة دي... كان مستخبي لنا فين دا بس يا ربي!!؟»



وقفت طويلاً بانتظار السماح لها بالدخول.. عادت تطرق مرة أخرى... وبعد أن يئست من الرد غامرت ودخلت مستعدة لكل أنواع التوبيخ... ولكن لدهشتها، لم تتحرك تلك الجالسة القرفصاء على فراشها... اقتربت على أناملها حتى جلست جوارها... أصدر السرير صوتاً أجفل السارحة: «انتي دخلتي إمتى!؟»
«هُو هُو هُوووه... من زمااااان... وخبّطت كتير أوي على فكرة على الباب... خفت تكوني تعبانة»

عادت لتحقق في النقطة الوهمية أمامها:

«عاوزة إيه يا هنا؟؟»

«إحنا جاهزين علشان نروح الفرح، وبابا بعطني علشان...»

التفتت لها بحدة، متسائلة بصوت لاهث وقد تسارعت ضربات قلبها:

«ليه!!؟ هي الساعة كام!!؟»

«صح النوم... إحنا بقينا المغرب... مش شايفة النهار قرب يمشي!!؟ ومش سامعة

ضرب البنادق اللي طرشنا من الصبح!!؟»

رفعت رأسها لتنظر باتجاه النافذة ثم هزت رأسها بشرود: «لأ.. مسمعتش... أنا

مش عاوزة أروح»

«ماينفعش يا زينة»

هبت صارخة:

«هو إيه اللي مينفعش!!؟ إيش فهمك انتي؟! روجي قولي لهم...

أمسكت هنا بيدها مقاطعة:

«لازم تكوني أقوى من كده... لو استخيتي دلوقتي هيفتكروكي ضعيفة... وانتي

مش عاوزه تظهري قدامهم بالشكل دا»

أطرقت زينة رأسها تفكر... وبعد لحظات صمت قمت: «هقوم أغسل وشي...

هنا... أنا آسفة»

متى تم كل هذا الترتيب؟! متى فُرِشت الأرض من دارهم لدار عمها بالرمال؟! متى

عُلِّقت كل هذه الزينات؟! تلفتت حولها مدهوشة بانزعاج.... المقاعد

مرصوفة وقد بدأ المدعوون بالتوافد... وها هي فرقة العجر تعد أدواتها لحفل

الليلة الساحر.

انتبهت على يد أمها تربت عليها لتتقدم... أطاعتها صاغرة لتدخل بيت عمها.

بعد صلاة العشاء كان الحفل على أشده، خاصة بعد أن جاءت العروس بزفة كبيرة

من بيتها، محاطة بالخيول العربية الراقصة، محمولة على الكارثة المزينة بالورود

والشرائط الملونة، وقد جلس جوارها خالها، وأحاط بها رجال الرحامة يطلقون

البنادق بدون توقف... وصلت لتجد رشاد بانتظارها بجلبابه الأبيض الملكي،

واللاسة الذهبية من الحرير... هل لاحظ أحد توتره وهو يحمل عروسه لداره؟؟

كانت مغطاة تمامًا وذراعها ملفوف حول عنقه، لم يتركها إلا في مكانها بين الحريم،

الذين استقبلوهما بالزغاريد... وقف أمامها يحاول التحكم في لهاته... رفع رأسها

المطرق... ثم رفع خمارها الشفاف عن وجهها... لم تتطلع لعينه ولكنها شعرت

بتوتره... لا عجب فهي تكاد تموت في جلدها... ولكنه الرجل!!!

«نورتي دارك يا عروسة»...

وأطلق قدميه للريح، يلحق بالرجال يبدأ معهم الاحتفال كما هي عاداتهم.

جلست العروس في الكوشة المعدة لها في موقف لا تحسد عليه... فلا وجود للصخب المصاحب لمثل هذه الأفراح... فهي المرة الأولى التي تلتقي فيها العائلتان في مناسبة واحدة... وليست أي مناسبة... دخلت الغوازي لتبدد جو البرود السائد، تضفي الفرحة على الوجوه المتجهمة... وجه واحد لم تستطع صاحبه حتى إخفاء دموعها.

همست هنا في أذن صديقتها:

«قولي لمعالي تداري على نفسها شوية... الستات هتاخذ بالها إنها بتعيط»

«شكلنا غلطنا يا هنا... مكناش عملنا اللي عملناه»

«ششششه اسكتي انتي عاوزة تفضحيننا!!!؟ الي حصل حصل... حتى زينة أختي مكتتبة»

احتدت نجلا بعصبية: «ليه إن شاء الله؟! وكانت هتلبجى راجل زي رافع خوي فين؟!؟»

«انت عبيطة صح؟ نجلا.. شكلنا مش هنكمل مع بعض»

مرت ساعات الحفل ببطء قاتل، حتى دخل العريس تصاحبه طلقات البنادق من أصدقائه، وأقاربه يحملونه حتى كوشة العروس، وهو بدوره حملها وصعد بها لغرفته، تشيعهم زغاريد أمه كمن أصابها الفواق.

تنهدت زينة بأم، ثم تلفتت حولها لتجد كل مدعويين الفرح واقفين كأنهم بانتظار شيء ما... مالت على أذن سمحة: «هي الناس دي مستنية إيه؟؟ مش الفرح خلص!؟»

لوت سمحة فمها بكلا الاتجاهين، وهي تتمتم في أذن ابنة عمها:

«مستنيين المنديل يا حبيبتي... شورة سبع الفلا چاسر»

كتمت زينة شهقتها متخيلة الموقف المحرج، ثم ركضت للخارج وكأن كل ذنب أذنبته في أعقابها.

وقفت بالخارج تستند على جذع نخلة عتيقة، تحديق بالفراغ لاهثة، ويدها على صدرها تهدئ من ضربات قلبها النابض بوجع، حتى جاءها صوته زاد من جنون نبضاتها: «متوجّفيش لحالك ادخلي چوة!»

لم تستوعب الأمر المتسلط في البداية... أدارت رأسها لتقع عينها عليه يحدجها بنظرات سرت البرودة في أوصالها، سألته بخفوت:

«انت بتكلمي أنا!؟؟»

تلفت حوله: «مشايفش حد غيرك جدامي... يوبجي أكيد بتحدث معاكي... واجفة لحالك ليه؟! بتفكري في ليلة دخلتك؟ هع! متفكريش كثير يا عروسة... مش هتختلف كثير عن اللي بيحصل الليلة»

صرت على أضرارها حتى آلمتها: «انتم.. شوية... همج!»

زاد من اقترابه المطرد منها حتى كادت تستنشق رائحة أنفاسه الحارة... ثم انحنى ليهمس في أذنها:

«فكرة حديتي؟؟ جلتك ومصدجتيش... لو كت ريمتك في المية، كنا وفرنا على حالنا كل اللي بيحصل ده... وكنت هتوبجي ليلة واحدة بس... ليلة چنازتك»

«زينة... زينة»

اعتدل في وقفته يهز رأسه بإيماء تحية لأمها: «اتشرفت بمعرفتك يا هانم... كنت واقف مع مراقي بونّسها لحد يتعرض لها كده ولا كده... حضرتك عارفة؛ الليل في بلدنا مالوش أمان»

بابتسامة جذابة مدت فاليريا يدها لمصافحته:

«ميرسي بوكو رافه... أنا متأكد إن زينة هتكون في أمان مأك... داكور زينة»

هزت زينة رأسها لتستوعب ما يحدث أمامها... لسان رافع الصعيدي الذي كان السم يتقاطر منه كالحية السوداء من لحظة واحدة، فجأة انقلب ليحدث أمها بلهجة راقية، لا تختلف أبداً عن أهل المدن... والكارثة أن أمها أعجبت به بل ومنحته ابتسامتها! وهذا لا يعني إلا شيئاً واحداً... كانت متأكدة أنها ستسمعه ما

إن تصبحا وحدهما... أوماً رافع باحترام وتركها في عهدة والدتها قائلاً: «هنادي سيف يوصلكم... لو مكانش هيحصل مشاكل إحنا في غنى عنها كنت وصلتكم بنفسى... عن إذنك مدام»

أغمضت عينيها بقوة حتى وصلها ما كانت بانتظاره:
«زينة... رافه دا... ولد چانتي كتير وشكله كمان دونچوان كبير... انت ليه مش يهبه!؟؟»

غمغمت تعض على شفتها السفلى بغيظ...
لحق بهم سيف متسائلاً:

«انتم خرجتم بدري ليه!؟ لسة ال...»
أمسك لسانه عندما حدجته زينة بنظرة مصدومة:
«سيف... خدني من هنا دلوقتي... حالاً!!»



ها هي حياتها قد بدأت... أم أنها انتهت؟؟ لم تكن كما خطت تماماً... ولكنها على الأقل بداية جديدة... بداري أو رحامي... لم تكن هذه المسميات من اهتماماتها؛ فهي لم تهتم أيهم من قبل... لعلها تهتم زوجها الآن... أياً كانت الطريقة التي تزوجته بها...

خلع اللاسة الحريرية ورمائها بأقصى الغرفة، وكأنه يتخلص من قيدها حول عنقه... ثم جلس على أحد المقعدين الوثيرين في الغرفة... انتبه أن عروسه لا تزال واقفة بمكانها مطرقة الرأس... هم بمناداتها عندما سمع طرقات على الباب... أجلى صوته بنحنة قوية واتجه صوب الباب، لتتحرك عروسه بالاتجاه المضاد... أطلت أمه برأسها قائلة بفم متبرم وهي تضع بيده منديلاً أبيض:
«نسيت تاخذ المنديل يا ضنايا... وشهل الناس عاوزين يروحوا»

هل أوماً برأسه؟؟ هل أجابها؟؟ لم يتذكر سوى أنها وضعت المنديل بين يديه وأغلقت الباب... التففت لها باستدارة حادة... كانت ترتكن على طرف الفراش،

وقفت منتبهة عندما شعرت بنظراته الحادة عليها... اقترب منها بخطوات حازمة... أمسك بطرف الخمار وخلعه بخشونة عن رأسها، ليلحق باللاسة في أطراف الحجرة... ثم أمسك بمرفقها يتطلع لوجهها الملطخ بالألوان بدون تنسيق.... ارتعبت من نظراته المتفرسة... ثم أشار للمندبل في يده:
«انتى خابرة إيه ده؟؟»

هزت رأسها بعد أن استوعبت سؤاله... فضحك وتابع:
«طلعت لك من السما الجوازة دي... طبعاً مكيتش عاملة حسابك إني أنا اللي عتچوزك... خصوصي آني... وأنا بس اللي خابر سرك العفش... معرفاش سر إيه؟؟؟ مَن شفتك مع حمادي الدهشان في طريق الديابا، ولا مكانتش أول مرة، وحضرتك متعوذة على المشوار ده؟؟؟».
ضاقت عيناها وبدأت بالاستيعاب البطيء وهي تتمتم بخفوت: «انت بتخترف بتجول إيه!!»

«بجول يا عروستي الغالية... إن عيلتك الليلة هتدبحك دبج بعد ما أطلع لهم بالمندبل من غير ما يكون عليه دمك.... ما هم ما يعرفوش إن المحروسة فرطت في...
قاطعته بشبه صراخ:

«اخرس!! ولا كلمة زيادة!! مكتش عارفة إنك واط....»
وقبل أن تكمل أخرسها بصفعة أطارت صوابها، ذكرتها بصفعة عمها لمعالى... أزاحت شعرها عن عينيها اللتين ازداد اتساعهما بسيلان الكحل حولهما... تطلعت له وصورة ابنة عمها تراقص أمام عينيها... أرادت أن تتلبس جلد معالى، آن الآوان أن تلقى بانكسارها، ارتفع شيئاً فشيئاً من داخلها أصداء كلمة واحدة..
اقترب منها مرة أخرى، بدأت تصرخ بهستيريا:
«كفااااااااا!! حرااااااااا عليكم!! كفاااااااا!!»

سمع طرقات على الباب.. أسرع لفتحه لتدخل أمه ملتاعة:

«خير يا رشاد؟؟ إيه اللي بيحصل؟؟»

مط شفاهه مشيراً لعروسه اللاهثة من شدة الصراخ، ترقبهم بانتظار الإشارة للمزيد:

« مخابرش يمّا... أول ما جربت منيها بدأت تصارخ، ولسة ملمستهاش »
نظرت للمنديل في يده وشهقت:

«والمندیل یا رشاد؟؟»

«بجولك يما ما لحتش ألسها... مخابرش حوصل لها إيه!!؟»

ضربت أمه على صدرها بقوة:

«يا لهوي!! وبعدين دي تبقى فضيحة؟! شوف... انت حاول معاها عقبال ما أروح أسأل في الحكاية دي... لتكون.... رينا يستر على ولايانا»

ثم رمقت العروس بنظرة محتقرة قبل أن تصفق الباب خلفها. اخترقته نظراتها كشظايا الزجاج، سألتها متقطعة الأنفاس: «إيه اللي بتعمله ده؟؟!! وليه؟؟!!؟ حرام عليك!! حرام!!!!!!ام!!»

وبدأت في الصراخ من جديد دون أن يجروا على إيقافها، حتى عادت أمه ومعها صديقة أخرى:

«اتفضلي يا أم سعدون، ادخلي يا ولية شهلي»

لن ينسى أبداً نظرتها الكسيرة المصوبة عليه، كأنها سهام مسمومة موجهة لعنفوانه الكاذب. دخلت الداية وأغلقت الباب خلفها، ولم تنس هي الأخرى أن ترمقها بتلك النظرة، وكأنها على وشك اكتشاف فضيحة ستقلب البلد على من فيها. حاولت الاعتراض بارتجاف واهن، كالطير المتيقن من ميعاد ذبحه، زجرتها أمه:

«بقولك إيه يا بنت الناس... انتي جبتيه لنفسك.. يا تخلي الداية تعمل اللي
مخلتيش راجلك يعمله، يا أما نخلي أهلك يدخلوا يخلصوا عليكي»
هم رشاد بالخروج فأوقفته أمه:

«استنى عندك انت رايح فين!!؟ لازم تكون موجود...»

ازداد شحوباً وتعرقاً. اعترضت نبضات قلبه فأعلنت باحتجاج كاد أن يسلبه روحه،
أشاح بوجهه عنهم، وعاد يجلس على المقعد أمام الفراش منكس الوتين.
لم يظن أنه قد يتأثر؛ اعتاد دائماً مشاركة أقربائه في ذبح العجول، في كل مرة كان
يتبع تلك المناسبات احتفالات وسهرات صباحي، ولكنها المرة الأولى التي يسبق
فيها الاحتفال الذبح، ثم يجلس مشاهداً كالعاجز يراقب ضحيته تُذبح أمامه
بسكينه، بانتهاك للإنساني.

كانت صرختها المدوية الضربة القاضية التي أهالت التراب على رجولته ودفنها في
قبر بدون شاهد... وبدون أن يصلى عليها... أمسكت أمه المنديل الملوث بالدماء،
وأطلقت الزغاريد، شاركتها فيها الداية أم سعدون، وهما تغادران رافعين المنديل
كرايات النصر!

ملمت ثوبها الأبيض المنتهك كأنوثتها، كأحلامها، وأمنياتها... احتضنته بين يديها
ترمق جلادها الجديد من خلاله، بكحلها السائل يتقاطر من عينيها، يلون دموعها
بلون الحداد كحياتها القادمة.





«لا تمشي في طريق من طرق الحياة إلا ومعك سوط
عزيمتك وإرادتك، لتلهب به كل عقبة تعترض
طريقك»

— نيتشة

.....

«الي بيحصل دا مهزلة... انتم إزاي توافقوا على الانتهاك دا!!؟ إحنا في القرن
الواحد وعشرين، ولسة بتحكموا على طهارة البنت بمنديل ملوث بدمها!!؟ إزااااي
يا بابا!!؟ إزاي يا سيف!!؟ فهموني»
بصوته الخشن هدها سيف:

«ضبي خاشمك لحد يسمعك... هي دي كانت عوايدنا من زمان الزمان... إحنا
الي نسيناها... وكتر خيرها چاسر فكرنا بيها مرة تانية»
ساخرة هتفت:

«آه صحيح... كتر ألف خيرها، ما انت بتفكر زيه بالضبط بمخ قذر»
«احترمي نفسك يا زينة!»

«احترم انت نفسك! واوعى تجرح كرامة مراتك وتعمل زيهم!!»
«مالكيش صالح بيا... ويكون في معلومك انتي كمان مش متچوزة أي راجل...
رافع الرحامي على كد ما هو ناعم وسهتان... بس وجت غضبه بيبكون كيه الطور
الهايچ»

بحثت عن أمل بالخلاص، فلم تجد غير أمها. من غيرها يفهمها ويدعمها،
كمجنونة في بلد من العقلاء، أو عاقلة في بلد مجانين!؟
«ماما... سامعة الي بيحصل!!؟؟ أعمل إيه؟؟؟»

ركضت لتلقي نفسها بين أحضانها المرحبة، أحاطتها بذراعيها هامسة:
«يالاً روهي نامي شوي... لازم تهدي زينة.. مش هلو أشان صهتك»
كزت على أسنانها:
«ماما... أنا مش هحضر أي أفراح ثاني... ولا حتى فرح سيف... مش عاوزة أحس
بالإحساس دا كل يوم»
«داكور هبيب ماما... مش لازم تهضر»
زمر سيف: «إيه الختاريف اللي بتخترفوها دي.. انتي لازم تحضري ورچلك
فوج رجبتك!!»
زمرت فاليريا في واحدة من غضباتها القليلة:
«أنا كولت زينة مش هتروه... زينة هيكون في أي مكان هو آوزه... داکور
سيف»



أحكمت إغلاق الباب، ولكن أصوات الطبل والزمير تحايلت على كل أقفالها.
وضعت يديها على أذنيها ورغبة ملحة للصراخ تستحوذ عليها بدون توقف؛ حتى
يعود الزمن للواء، وتصحح كل أخطائها التي تسببت في كل ما يحدث. صرخت
بأكية:

«رافع كان صح! كان صح!»
فجأة عم الهدوء... فكرت بصدر منقبض، لأبد أن الفرّح انتهى، والمدعوين
بانّظار دماء العروس لينتشوا... لم تحتمل الفكرة، فدفنت رأسها أسفل الوسادة
تئن بوجع.



أجفلت عندما سمعت صوت إغلاق الباب وبعده المزلاج... استدارت تطرد خوفها
شامخة بأنفها المتعالي، معيدة ذيل ثوبها خلفها، دافعة بخمارها بعيداً عن وجهها

لتزيد من تأثير حدة نظراتها، وتتأكد من توصيل رسالتها له... لن يكون أبداً رجلاً لها... وصلته كل حروف الرسالة، فقهقه متهكماً، متعمداً الاقتراب منها ببطء مستفز وابتسامة تسخر من كل أبجديتها: «مبروك يا عروسة»
بنبرة فشلت أن تكون ثابتة كما أرادت:
«أحسن لك تشوف لك مو طرح ثاني تنام فيه»
ارتفع حاجباه تهكماً:

«بأمارة إيه إن شالله!!! شايفاني جدامك شرابة خورج... ولا...»
اشتد وهج عينيه ببريق خطر كومبيض البرق في ليلة تخلى عنها قمرها، ثم تابع بنبرة أرعشت أطرافها:
«ولا شايفاني مطولش أوبجى في مجام حبيب الجلب... رافع... مش هو اللي كات عينك هتتخرج عليه؟؟»

ضربت يديها الاثنتين فوق بعضهما على صدرها بجرأة تحسد عليها:
«إيوه يا سيف يا بداري... كت هتجوز رافع... وهو الراحل الوحيد اللي مماليش عيني غيره... مهمن طولت ولا جص...»
لم تكمل جملتها عندما قاطعها مهاجماً، ممسكاً بذراعها يفتله خلف ظهرها، وكأنه سيجردها منه... حاولت الفكاك بشراسة، فكان اكتشافها الأول في حياتها القادمة، وأكثرهم رعباً؛ مهما كانت قوتها التي تتغنى بها، فلن تحرك حجراً من هذا الجبل الراسخ الذي كاد أن ينجح في خلع ذراعها... انحنى على أذنها غير مبال بأنينها:

«لو نضرك جصير ومشيفاش رچالة جدامك... أنا هطوْلْهولك... يا بت ال...
رحاچة»

ثم دفعها لتسقط على الفراش، تراجعت زاحفة بصراخ مغمس بمذاق غريب عليها، لأول مرة تجري ملوحته بمذاق الحنظل على شفيتها وتصل لحلقها، ملوحة يبيديها لتمنع غزوه:

«إياك تجرب... لو لمستني بس هكتلك وهكتل روحي!!»



مرة أخرى تتغلب تلك الأصوات على أقفالها، هذه المرة لم تكن أصوات طبل وزمر، كانت طلقات البارود تصرخ في عنان السماء بجنون لا يعني إلا شيئاً واحداً، أن البنادق عمرت بدماء الضحية الجديدة... فتدافعوا ييثون الرعب في صمت الليل الناعس.

نهضت تفتح الباب بعد أن توالى الطرقات عليه بدون يأس: «مون ديو... انت مش بتفتة ليه زينة؟! أنا كنت هايف أليك هبيبي»
بدموع حبيسة سماء عينيها الغائمتين تساءلت بغصة:
«خلاص يا ماما... سيف...؟؟»

أومأت أمها قائلة بنفس عميق: «وي.. هم مشي بعد ما سيف هرج من البلكون، ضرب بارود ودوشة وزأريد... مون ديو.. سوفاج.. سوفاج»
أخذت نفساً عميقاً آخر، وربت على ركبتَي زينة المضمومتين لصدرها ترتعش:
«انت مش يهاف... ولد رافه دا رجل چانتي... مش ممكن يكون زي همج»
«يا ماما انتي بتحلمي.. رافع صعيدي أكثر من سيف.. عاوزه يخالف عوايدهم؟! انتي أكثر واحدة عارفة الناس بتبص للحاجات دي إزاي»
«انت السبب زينة.. بابا كان هيدي فلوس... انت ليه اتسرات؟؟»
«مكنتش عاوزه أحطه في الموقف دا يا ماما.. بابا كبير البداري... مينفعش يحكم على عيلته وهو ما ينفذش على بنته... بابا فهم أنا عملت كده ليه»
بقوة ضمتها لصدرها، تواسيها بدموعه:

«بس انت مهطوب لرجل بتهبه كثير»

«خلاص مش مهم يا ماما»

«وإلا زينة... مش ممكن يهمل دوا»

«هنشوف لها حل، بس مش لازم أي حد يعرف»

«مون ديو... انت مش هتقولي لرافه!؟»

كتمت ضحكة تخللت دموعها:

«اسمه رافع يا ماما.. رافع.. ولأ مش هقوله.. هخليها آخر ورقة ألعب بيها.. أكيد هو مش عاوز زوجة مريضة، وصعب إنها تجيبه ولي العهد... هدف كل رجل صعيدي من الجواز»

«إيه ولي أهد دي؟؟؟»

«وبعدين معاك يا فاليريا؟! انتي جاية توجعي دماغي وهي مش ناقصة!؟»
«لأ... كنت جاي أشان ألبس فستان أبيض.. انت مش ائمل بروفة ولا مرة»
تأثرت من دموع أمها، فضمت رأسها إليها تربت عليها: «تصدقني انتي فعلاً مستفزة يا فال... انتي جاية تواسيني ولا عاوزة حد يواسيكي!؟»
«اسكت بنت.. أنا كلبي هزين ومافيش نفس أضحك»
«ولا أنا...»



«خُطّابك كثير وجالولي... تستاهلي الذهب واللولي... من بين الحبايب واحد... بتشاوري عليه وتجولي... حبيبي أهه... خطيبي أهه.. مافيش غيره ليا... ومافيش غيري له.. حبيبي أهه... چاسر أهه»
شهقة كبيرة أفزعته، لتستدير نحو أمها التي بادرتها:
«يخيبك بت!! بأة أنا مفحومة عليكي، وعلى بخت أخوكي المهيب، وانتي واقفة ترقصي وتغني في المراية!؟»
حاولت مداراة فرحتها مغمغمة:

«ومرجش ومغيش ليه يما!!! مش فرحي ده ولا فرح الجيران!؟ مش كفاية المحزنة اللي انتي عاملها زي ما نكونوا رايجين نتجنزوا مش نتجوزوا!؟»
ولولت أمها بإصبعيها مع حركة متزامنة مع فمها الملتوي يمينا ويساراً:
«كانت جوازة الشوم والندامة يختي»

«لاه يّما.. متجوليش إكده... يوبجي فال عفش»
«ومن امتى كل دا يا بنت بطني!!؟ يخييك بت... تكونيش عاشقة الواد بتاع
الغوازي!»

«بس متجوليش عليه واد! دا جاسر سيد الناس كلاتهم»
«طب بالراحة يا حيلة أمك، لتفرقي من جنبك... قال على رأي المثل.. (خدتك
قوال خدتك عواد خدتك أكيد العوازل، كدت أنا روجي)»
ضربت قدميها بالأرض بعصبية:

«بووووه بجي يّما! بدل ما تاچي وتلبّسيني الفستان بيدك!؟»
«لأ يا نظري، خليت الحكاية دي لمرات أخوكي أم بوز شيرين... تقوليش إحنا قتلنا
لها قتيل! هروح أنادي عليها تلبسك»



أجلى صوته يناديها هذه المرة بنبرة أعلى، وهو يطرق على باب الحمام التابع
لغرفته:

«يا فريدة... يا فريدة أمني بتنادم عليكي انزلي شوفيها عاوزة إيه، مناجصينش نج
على المسالي يسترك يا بت الناس»

فتحت الباب فجأة، فتراجع وكأنه فوجئ بها.. شملته بنظرات باردة، تذكره في كل
نظرة منها، أنها لم تكن امرأة بفضله.. ولن تكون أبداً... أشاح بوجهه المحتقن
ليزيد من حيرتها.

«لو أفهمك يا رشاد... لو تفهمني وتفتح لي صدرك أشيل عنك الحمل التجيل
الي حاني زهرك وكاسر عينك.. مرا غيري مكانتش نضرت في وشك العمر كلاته،
بعد الي عملته وجولته... بس حاجة في عينيك موجّفاني مش جادرة أكرهك...
ومعرفاش أحبك... شكلك جدر ومكتوب لي يزيد من وچيعتي في دنيتي»
أعاد كلماته عندما طال الصمت، لينهي حديث العيون الذي لم يعد يطيقه: «أمني
كانت بت..»

«عارفة... سمعتك من أول مرة... هروح أساعد سمحة تلبس... ويمكن ما أشوفكش، هروح معاها لمن ياچي چاسر وياخدها»
أوما: «طيب... خليكي مع أمي متفارجيهاش، وتعاودوا سوا إن شاء الله»



حمل عروسه مختراً جموع المدعويين بعد انتهاء الفرح، الذي لم يختلف كثيراً عن الأفراح السابقة باستثناء العروسين... نفس الوجوه المترقبة، ونفس الأغاني التي ترددتها نفس الفرقة... ما عدا نظرة الحزن التي لَوّنت عيون نورة وهي تتمايل بدلال ينقصه الحماس... يشك كثيراً أنها حملت نفس النظرة في الليلتين السابقتين. كان رأسه يترنح وأصدقاؤه يحملونه حتى كوشة العروس... خاف ألا يقوى على حملها بهذا الرأس المترنح... لعنهم في سره لإصرارهم على إنهائه زجاجة مشروب الشجاعة، كما تضاحكوا باسمها... وكلما توافى كانوا يصرخون لتشجيعه كي لا يخذلهم في ليلة دخلته.

نظر لرأس عروسه المغطى وتخيل بذهن متبلد، شعرها الأحمر الناري، وزرقة عينيها السماوية، وشفتيها الشهيتين تقدم له الدعوات المغرية ينهل من غديرها، تروي جوعه الأزل، منذ وقعت عيناه عليها، تغادر سيارتها وشعرها الأحمر يتطاير حولها كجنية هبّطت من السماء فقط لتعذيبه. أحكم إغلاق الباب، تقدم نحوها بعد أن خلع عمامته لتلمع رأسه الصلعاء أسفل الإضاءة الخافتة... شهقت بخجل تتراجع عن محيط ذراعيه... حاورته وناورته لدقائق ترفض التسليم، وفي كل مرة يزداد إصراره لإمساكها ووضعها في مكانها بجوار قلبه، الذي اشتاق وتلهف لامتلاكها... وأخيراً نجح!

باستياء شديد أدركت أنه ثمل... حركاته مترنحة وكلماته غير مترابطة... سمحت له أخيراً بالإمساك بها، وإلا طالت الليلة في المناورات... ولم تحسب حساب هجومه الغاشم عليها محاولاً تقبيلها عنوة حتى قبل أن يرفع خمارها عن وجهها... قاومته بحياء، فدفعها بقوة غاشمة لتسقط على الفراش... لحق بها مهدداً:

«أخيراً... أخيراً بجيتي حلالي بلالي... ليا لحالي يا... زينة»
لم تكذ تستسلم ليديه تجردانها من ثوبها، حتى اخترق اسم زينة أذنيها كالطلق
الناري... أشاحت الخمار عن وجهها ودفعته لينظر لها صارخة بجنون:
«اطلع بوشي يا چاسر، وشوف مين جدامك وعلى فرشتك!!»
رمش بعينيه عدة مرات يتفرس في ملامحها، ثم هز رأسه بقوة وأجفل عندما
صرخت بقوة في وجهه قائلة: «أنا سمحة... سمحة يا چاسر.. مرتك... لساك
مشايفنيش!!؟»
ازدرد ريقه بصعوبة وهو يتلفت حوله كأنه يبحث عن شيء:
«لع شايفك... وانتي إيه اللي چابك چاري!!؟ وفينها زينة!!؟»
دفعته لتنهض عن الفراش بدموع نحرت قلبها، الذي عشق اسمه قبل أن يعرف
بوجودها، صرخت بكل عزمها: «طلجني يا چاسر !! طلجني!»
«آه يا بت المجنونة!!»
صرخ شامئاً عندما عضته بقوة في يده وهو يحاول منعها من الابتعاد عن الفراش.
«انت لسة شفت چنان!!؟ لا يا چاسر يا رحايمي.. كل اللي فات كوم وچنان
الليلة دي كوم تاني!»
طرقات على الباب جعلته يفيق من ذهوله، وصوت معالي يأتي مغناجاً، ساخراً من
خلف الباب:
«چدرى إيه يا سبع الريمبة!!؟ الناس عاوزه تروّح... لسة جدامك كتير!!؟ ولا بت
البداري عصيانة عليك!!؟ عاوز مساعدة يا خوي!!؟»
كلمات معالي كانت كسطل من الماء المثلج يسقط على رأسه.. فأفاق مما يحيط
بعقله من طنين، نظر بحدة لعروسه المتمرّدة.. تراجعت عندما رأت الشرار يطق
من عينيه فهتفت بحدة:
«إياكش فاكر إنك هتهنتني ببصتك دي!! لا... فوج لحالك يا ولد الرحامية... أنا
سمحة البداري»

ضاعت نظرة إعجابه بتلك اللبوة الشرسة وهو يقفز نحوها، كاتمًا تهديداتها بيده
التي لثمت فمها، ثم همس بتهديد: «كلمة واحدة ثانية وأهلك هياچوا يعزوا
فيكي بدل ما يباركوك!!»
اتسعت عينها بهلع فأكمل متهكمًا:
«خلصنا لعب يا بت البداري... وجه وجت الچد»



الليلة.... الليلة يا زينة البداري ستصحو النجوم في سماء الليل الحالك على أنين
صرخاتك، عندما تغرد بواريدهم النهمة بدمائك!!
أطلت هنا برأسها من فتحة الباب: «ممکن أدخل؟؟»
«وانتي محتاجة استئذان؟! اتفضلي»
دخلت مطرقة... سألته زينة باستغراب:
«مالك يا هنا؟؟»
رفعت عينها لتطل منها الدموع... ارتاعت زينة وهي تضم أختها بخوف:
«مالك يا هنا؟؟ فيكي إيه؟؟ تعبانة؟؟»
«لأ... بس... بس انتي هتوحشيني أوي»
ضاقت عينا زينة بتساؤل: «بس كده؟؟»
أطرقت هنا رأسها:
«لأ وحاجة ثانية.. حاسة إني السبب.. لو مكنتش...»
طمأنتها زينة:

«يا هنا يا حبيبتي.. لو مكنتيش انتي ونجلا الي اخترتم الورق كان أي حد ثاني
هيختاره... مش ذنبك يا حبيبتي.. اهدي كده وروقي... فرح أختك النهاردة...
ماسمعتيش ماما وهي بتقول على رافع إنه رجل چانتي!؟»
ضحكت هنا من خلال دموعها، وشاركتها زينة... ولم تخبرها هنا أبدًا عن السبب
الحقيقي لبكائها، وظل الشعور بالذنب يوجع ضميرها.



هل سيعتاد الليل أبداً على هذا الإزعاج لهدوئه وسكونه؟! ألن يثور مرة ويعترض على انتهاك حرمة!!؟ لليلة الرابعة على التوالي لا أحد يبالي وهم يخترقون كل العهود بينهم وبينه. ربما سمعه أحد ما يئن بصمته «كان النهار لكم، فلماذا تؤرقوني؟!»، ولم يسمع رداً؛ فقد تراص المدعوون ككل ليلة على مقاعدهم استعداداً لليلة سامرة أخرى من أفراح البداري والراحمة.

وكل يوم تزداد الحكاوي قصة جديدة... يتحاكون عما حدث، وتوقعاتهم لما سيحدث.. خاصة وأن فرح الليلة مختلف عن كل الليالي السابقة.. العريس رافع زينة شباب الراحمة، ومصدر فخرهم وعزتهم؛ والعروس بكريه رضوان البداري، وبنت الخوجاية التي يتغنون بجمالها منذ خمسة وعشرين سنة... باختصار، فرح الليلة هو اندماج مشروع بين الجمال والقوة.

دمعت عينا فاليريا وهي تتطلع لابنتها بثوبها الأبيض الطويل.

«مون ديو... الفستان مكاسك تمام... أنا مش مصدك... مش كنت أصدك إنك توافقك يلبس فستاني كديم زينة»

هزت زينة أكتافها وهي تعيد النظر في المرأة، للثوب العاجي اللون والمرصع بحبات ألماس مقلدة في منطقة الصدر والخصر، الذي أظهر شدة نحولها.. وينزل باتساع كبير بلفاف من الحرير الطبيعي، حتى امتد متران على الأرض، وقد زين بوردات في الذيل من نفس نوع القماش... أشارت زينة لأكتافها الظاهرة، التي خلت من الأكمام؛ فالتصميم بحمالة واحدة رفعت صدر الثوب بلفة حول العنق:

«أعتقد إن رافع هيقتلني لما يشوف المنظر دا... دا لو مقتلنيش سيف الأول»

ثم استدارت ترفع يديها لأمها، التي شهقت مدركة لخطورة الوضع.. ثم هبت بانزعاج:

«انت غلتان... كام مرة أكول كوم زينة كيس فستان؟! دا مشكل كبير... ومافيش وكنت نشترى واهد ثاني!!»

أعادت زينة النظر للمرأة، ثم ارتفع حاجباها ببريق فكرة تختمر في رأسها قائلة:

«بعد تفكير تاني... ممكن ينفع»

«لا زينة انت صح كلام... ردوان مش ممكن يوافك!»

«اصبري بس يا حاجة فاليريا... أنا جات لي فكرة أخلص من الجوازة دي كلها... أو

على رأي قرايبي.. (كلاتها)»

هتفت أمها بتخوف:

«أنا مش مطمئن لكلام دا... بتفكر في إيه زينة؟؟»

«مش مهم ماما... المهم إن محدش يشوفني، خصوصاً بابا، قبل ما أكون في بيت

الراحمة... وقتها محدش هيقدر يعمل حاجة».

بدأت تشعر بالحياة تسري مرة أخرى بأوردتها، بعد أن وصلت لحافة الموت تقريباً.

كانت وحدها تتطلع لنفسها في المرأة، وخطة الليلة تختمر بعقلها، وهي تتساءل عن مدى تأثيرها على الجميع، دخلت سمحة تجيل النظرات عليها بطريقة أثارت ريبتها واستياءها:

«سمحة... أهلاً بيكي.. متوقعتش تيجي.. انتي لسة عروسة»

كشكشت سمحة أنفها وكأنها تأنف من محادثتها:

«وأنا كت أجدر أتأخر عليك يا بت عمي؟! انتي وحديكي؟ الدلالة مچاتش

تشورك؟»

«لأ... أنا مش عاوزة حد.. أنا هعمل مكياچي بنفسي... انتي مالك يا سمحة!؟»

كان عندي إحساس إنك الوحيدة اللي مبسوبة من الجوازة دي.. جت على

هواكي»

بعصبية زادت من شكوك زينة هتفت:

«يعني إيه چت على هواكي دي؟! كُت عاشجاه في الضلمة!؟ ولا مسكوني معاه

سارحين باللنش في المية، وراجة لهم ملفوفة في بطانية!؟»

تهدلت ذراعها تتأمل ابنة عمها، التي لم تعرفها بتلك النبرة والنظرة الحقود:
«بقولك إيه يا سمحة... أنا فيا الي مكفيني... شوفي طريق الباب الي دخلتي
منه ومع السلامة»

ولكنها لم تتزحزح من مكانها... فتجاهلتها زينة وهي تكمل تبرجها... اهتاجت
سمحة من تجاهلها، أسرعت لأدوات زينة وأطاحت بها أرضاً صارخة:
«انتي إيه!!! محدش مالي عينك!!! طول عمرك طلباتك أوامر... بتسافري وبتلفي
الدنيا كلاتها... بتشوفي ناس تانية... وأحلامك بتخطي السحاب، وممكن توصل
للشمس عمرك ما عشتي في الجمجم الي عشت فيه، عمرك ما كان نفسك في
حاجة إلا وكانت في يدك، ومع ده كلاته، مش عاجبك... ماله رافع؟! مش
عاجبك في إيه؟! راجل ملو هدموه... وكان ماله رشاد أخويا!!! انتي إيه، محدش
مالي عينك واصل!!! ولا بتحني لأصل أمك، وكان عينك من الخواجة الي كان
هيمشيكي على حل شعرك!!!»

«لأ دا انتي أكيد شاربة حاجة وعاوزة تتخانقي وخلاص!!!»
لم تتوقع ما حدث ولا في أقصى خيالاتها جموحاً! هجمت عليها سمحة تنشب
أظافرها في جانب وجهها.. وابتعدت تتسارع أنفاسها بنظرة انتصار شامتة، وكأن
رؤية الجرح النازف في وجه ابنة عمها مدها بالراحة المنشودة... بأنين وتوجع
وضعت زينة يدها على وجهها لتُصدم برؤية الدماء تلتطخها... ثم نظرت لسمحة
التي أومأت بنظرة انتصار متوحشة، وعادت أدراجها وكأن مهمتها انتهت...
أعادت النظر في المرأة لا تصدق ما حدث.

«إيه دا؟! يا خبر! مالك يا زينة؟؟»
ضغطت بقوة على وجهها لتمنع الألم وهي تصر بأنين: «اقفلي الباب يا هنا
بسرعة، وهاتيلي فوطة مبلولة... بسرعة قبل ما الدم ينقط على الفستان»
مرت الصدمة الأولى على هنا، وجرت قدميها لتنفذ طلب أختها: «إيه الي
حصل؟؟ وإزاي؟؟»

«صديقني معرفش.... سمحة اتجننت... جرى لمخها حاجة أكيد»
«يا نهار أسود!! هي سمحة الي عملت فيكي كده!!؟ والله جه في بالي مرات أخوي... على اعتبار إنك...»
زغرت زينة لأختها فكتمت باقي جملتها: «طب انتي هتعملي إيه؟؟؟»
«مش عارفة... هو باين أوي؟؟»
هزت هنأ رأسها بعد أن ألقت نظرة تفقدية فزعة على وجه أختها:
«ضوافرها حفرت في وشك... إلهي تتشلي في صوابك يا سمحة يا بنت زينات!»
«هنا متجيبش سيرة لحد... هاتي لي تلج بسرعة وأنا هتصرف»
دمعت عيناها من منظر الجروح الطولية التي تشوه وجهها... حاولت بمستحضرات التجميل إخفاءها.. كانت المهمة غاية في الصعوبة بالإضافة للألم غير المحتمل، خاصة أن الجرح لم يندمل بعد.
جفت دموعها أمام المرأة، ثم أسدلت الخمار الطويل الكثيف.. فكرة أمها المدهشة لتخفي عري ثوبها من أعلى.
دخلت النسوة تسبقهن الزغاريد، يفسحن المجال للرجال... دخل سيف وبصحبه أبوها... وقفت مطرقة أمامه، فطبع قبلة حانية على قمة رأسها... اجلى سيف حلقة وهو يتمنى لها السعادة، بينما يزغز لزوجته كي تفسح الطريق... لوت معالي فمها بازدراء وهي تتنحى عن الطريق. تأبطت العروس ذراع والدها تشيعهم الزغاريد. كانت تشك في قدرتها على الحركة؛ فقد بدأت تشعر بأطرافها تتجمد. وقفت على رأس الدرج مترددة في النزول حيث ينتظرها عريسها بالأسفل بجلبابه الأسود وعمامته البيضاء، وقد أضفت عليه وقاراً وهيبه جعلت أطرافها ترتعش، انحنى والدها على أذنها: «زينة يا بتي، انتي زينة؟؟»
أومات بدون كلام، وأجبرت نفسها على النزول، حتى سلمها والدها لزوجها. ساعدها للجلوس في الكوشة المزينة، ثم انسحب للاحتفال بالخارج مع الرجال.

مزقتها نظرات سمحة المتبجحة، ومعالي الفضولية ولكنها لم تروِ شبقهن، ولم ترفع الخمار... احتملت بصر الساعات جالسة تستمع للأغاني الشعبية والرقص والزغاريد... لا يفصلها عن زوجها إلا بضعة أمتار، حيث يقضي وقته مستمتعاً بين أصدقائه والراقصات الغجريات؛ ولمَ لا والليله تتويج لانتصاره الغاشم، والتي بدأت بنزيف دمائها وستنتهي بالمثل!

انحنت ست الدار على فاليريا بشفاه متبرمة مشيرة للعروس: «إلا هي مرت ابني مش عاوزة تورينا طلعتها البهية ولا إيه!؟؟ ما إحنا حريم في بعضينا، ولا المحروسة ما بتتكشفش إلا على الرجاله وبس!؟»

توترت فاليريا بنظرة خاطفة قلقة لابنتها، ثم ربت على يد ست الدار: «اطمن يا هاج... زينة مكسوف شوية... بس لما يروه الدار أندك هتشوفي وشو.. وهتنبسط كتير»

«آه... انتي بتجولي إيه!؟؟ حد يفهمني يا ولاد الخوجاية دي بتترطن بتجول إيه!» جذبتها نجلا من ذراعها:

«وبعدين وياكي مآ؟! الست أم سيف مجالتش حاجة لكل اللي بتعمله ده... اسكتي وخلينا نسمعوا الغناوي».

أشارت ست الدار لمعالي:

«بت يا معالي... تعالي لما أجولك»

اقتربت منها معالي متبرمة:

«خير يا مرت عمي؟»

«انتي بتعرفي تتحدقي وياها الولية الخوجاية دي؟؟ دي بتترطن باللاوندي دي ولا لغوتها إيه!؟»

«والله إنك فايجة ورايجة... ومين كدك يا أم الغالي!؟ ولدك هيتجوز ست الحسن والجمال... همليني يا مرت عمي في مراري الله يستر عرضك»
عندما حان الموعد، دخل العريس على أكتاف أصدقائه حتى عروسه.

لم يخب أملها؛ بجلبابه الأسود، وحاشيته البيضاء، واللاسة البيضاء الحرير تزين أكتافه، والعمامة ملفوفة حول رأسه بإحكام... وقفت قبل أن ينحني ليحملها كما هي العوايد... ورغم كثافة الخمار ولكنه شعر بعينيها الزرقاوين تكادان تتناطحانه التحدي... ثم همست فلم يسمعها غيره:

«عندي رجلين... وأقدر أمشي وحدي»

أمال رأسه متهكماً... ولدهشتها طاوعها وانتحى ليفسح لها الطريق: «اتفضلي... ناريسا»

تسمرت مكانها متسائلة: «حضرتك نسيت اسمي ولا بتتريق؟!»

«متآخذنيش يا عروسة... العتب على النظر... مشايفكيش مليح..»

«لما نوصل بيتكم تقدر تفتح هديتك وتشوف جواها إيه.. ولا مستعجل؟»

«العجلة من الشيطان يا بت عمي... اتفضلي»

لم تبال بشهقات النسوة وهي تتقدمه بعد أن رفضت أن يحملها، ولم يتركها تفرح بانتصارها الصغير، عندما كمش ذراعها وأجبرها لتتأبطه قائلاً بنبرته المتهكمة:

«مش العرسان عنديكم بيعملوا إكده برديكي؟»

لو كانت النظرات تقتل، لكان ذلك الصعيدي الذي يظن نفسه ذا دم خفيف، صريعاً تحت قدميها، مفصول الرأس ذي الابتسامة المتسعة تصل الأذنين ببعضهما.

فكرت بدهاء: «حالاً هشوف الضحكة اللي بجد»

وصلت إلى الكارثة المزينة بالورود والأنوار، والتي كانت بطلة الليالي السابقة، ولكنها الليلة يجرها جواده الأبيض ذو العرف الأسود المتطير. كان بطل اللقاء الأول أيضاً. حاولت الصعود وانتظرت يده لكي يدها، ولكنه وقف مكانه عاقداً ذراعيه على صدره... التفتت له بدهشة، فصعقها بوجهه ذي الابتسامة الباردة...

هب سيف لمساعدتها بضيق:

«هاقي يدك يا زينة»

ولكن صوت رافع الصارم أوقفه مكانه:

«مرقي ممحتچاش مساعدة يا سيف بيه... لئن تعوزها، چوزها هو أول من يساعدها»

وضع رضوان يده على كتف ابنه يحاول السيطرة على غضبه، ولكن سيف لم يبال، هادراً بنبراته التي يحاول التحكم فيها:

«زينة البداري معمرهاش احتاچت لمخلوج يا رافع يا راحمي... طول عمرها أميرة البداري، واللي بتحتاچه جبل ما تطلبه بيكون حدها، مبتحتاچش حتى ترمش عشان تطلبه»
رفع رافع أحد حاجبيه متهكماً:

«زينة دلوك راحة عببت چوزها، أميرتك كبرت وبجت عروسة وهتشيل مسؤولية بيت وعيال، هتتچلعوا في بيت چوزها، بس چلع من نوع تاني..
وضع يده في صديرية جلبابه غامزاً: « طبعاً أنت واعي يا... سيف بيه؟»
ثم التفت لزينة المتابعة الموقف بصمت:

«لساتك ليكي شوج فحاجة تانية، ولا العركة اللي كتي متشوجة لها لسة محوصلتش؟؟ هه... مسمعتكيش»

كزت على أسنانها، ولعنت هذا الثوب الطويل الذي يعجزها تماماً عن الحركة وحدها... عضت شفتيها تتمتم: «ساعدني لو س...»

كتمت شهقتها عندما انحنى سريعاً يحملها بين ذراعيه قبل أن تكمل جملتها... ثم تطلع لها ضاحكاً:

«ماكان من اللول يا عروسة!»

ثم وضعها بخشونة على مقعد الكارثة، وصعد خلفها يمسك بلجام الجواد ويحثه على الانطلاق.

تطلعت خلفها حيث بيتها يختفي بالتدرج عن الأنظار.

لم يوجه لها أي حديث أو حتى نظرة جانبية مسروقة... بدأ التوتر يجتاح هدوئها الظاهر عندما ظهرت سرايا الرحاية من بعيد... كان مماثلاً لسرايا البداري في

الحجم، وأسرفوا في تعليق الزينات التي حولت الليل من حوله لنهار... ازدردت ريقها بصعوبة. بدأ الاستقبال بالطبل والزممر والراقصات تتلوين بالشمعدانات المشتعلة فوق رؤوسهن.... أوقف الكارثة، والتفت لها، فعرفت أن ساعة الصفر قد حانت عندما سألتها:

«عاوزاني أساعدك، ولا هتنزلي لحالك؟؟»

تمت بصوت ناعم:

«لأ... ساعدني يا رافع... لو سمحت»

هم بالنزول عندما توقف مسمراً... أغمض عينيه مستلداً بسماع اسمه لأول مرة يخرج من بين شفتيها... جمع شتاته التي بعثرتها بجملة واحدة فقط، وقفز من الكارثة يمسك بها من خصرها يساعدها على النزول، ثم انحنى يهمس:

«معلش عارف انك تعبتي الليلة... أبوي عاوز يفرح على طريجه... صمم يعمل لي ليلة على مزاجه»

«آه طبعاً وماله... بس أنا مش شايفة حاجة.. الطرحة ثقيلة أوي... ممكن... ترفعها؟؟»

سرح في نبرات صوتها الناعمة، وشعر بحرارة شديدة تجتاحه...

«رافع... رافع»

«إيوه... حاضر»

مد يده يرفع خمارها الطويل لتسلبه النداهة رزائته ضائعاً في أمواج عينيها الزرقاوين، في نفس اللحظة التي وصل فيها أهلها يتجمعون حولهم.

شتت انتباهه عن رؤيتهم، واستمر يبحث بين مدها وجذرها عن شاطئ يرسو عليه، اخترق سمعه الشهقات التي وصلت لدرجة الصراخ... تلفت حوله، ازداد دهشة من تلك العيون المتسعة، والتي أرسلت أسهمها لترشق عروسه... استدار بحدة وقد أنبأته غريزته بوجود شيء ما خاطئ بالفعل... اصطدمت حواجه بحدود عمامته البيضاء مصدوماً، بينما رفعت رأسها بشموخ ونظرة بريئة تحتل

شواطئها العذرية.. وكأنها لا تعلم سر هذا الصمت الرهيب الذي حل فجأة محل
الطبل والزمر.

بسيل شتائم لم ينقطع، احمر وجهها لاضطرابها لسماع هذه الألفاظ. خلع عباءته
ولفها حول كتفيها مجهضاً أي اعتراض لديها، ثم انحنى ليحملها مخاطباً من حوله:
«العروسة مش عاوزة زفة.. وسعوا لي الطريق»

انشق المدعوون المتراكمون لنصفين كبحر موسى... وحدها عانت من قوة تحكمه
في أعصابه... شكرت حظها أن والده قرر عمل هذا الفرح... ربما لو لم يكن كل
هذا الجمع محتشداً حوله ربما قتلها، وهو على هذه الحالة من الغضب.

دفعها كالجوال المهمل يلقيها على الفراش، ثم أحكم إيصاد الباب بالمفتاح...
التفت لها ليجدها قد ملمت نفسها بسرعة ووقفت تبدأ بالهجوم:

«انت فاكِر نفسك مين علشان تعاملني بالطريقة دي!!؟»

«معتزفيش أنا مين!!؟؟ دجيعة واحدة بس وبعديها هتعرفي!!»

كتفت ذراعيها العاريان تراقبه ببرود يستعد للهجوم، عندما بادرت به بنبذة رقيقة
خنوع:

«أنا عارفة كويس أوي انت مين يا رافع... انت رجل صعيدي شهيم، مش ممكن
تفرض نفسك على واحدة مش عاوزاك... واحدة كانت تفضل الموت على إنها
تبقى مراتك»

«وأنا موجعتش في غرام حضرتك ووجفت أعد النجوم تحت شباكك... أنا وانتي
موروطن نفس الورطة، إحنا والي سبجونا»

«بس انت مختلف»...

«يعني إيه؟؟؟»

«يعني انت مش مضطر تكمل الجوازة للآخر... انت حتى مستحملتش تشوفني
بفستان عريان؛ يبقى هتستحملني إزاي بعد كده!!؟؟»

«تجصدي إن خلجاتك كلاتها بالمنظر ده!!؟؟»

«أمال انت فاكر إيه؟! أنا واحدة عشت في باغي معظم طفولتي، غير آخر سنتين منزلتش البلد فيهم ولا مرة. تتخيل إني هقدر أرجع أعيش هنا ثاني؟!»

«مش بخوطرك يا بت الناس»

«لأ يا رافع... بخاطري وبخاطرك انت كمان...»

«اسمعي يا...»

توقف عندما لاحظ العلامات الحمراء الطويلة على وجهها.. توترت، ولم تستطع إبعاد وجهها عن يده التي تلمست جرحها، لينبض مرة أخرى بألم نسيته في غمرة الأحداث.

«مين الي عمل فيكي إكده؟؟ يوم كتب الكتاب مكانش موجود... ولا يوم فرح رشاد، وانتي مبينتيش من يومها... إيه الي حوصل يا زينة؟؟ مين مد يده على مرقي؟؟»

فشلت في دفع ذراعيه عنها فتنهدت بياس:

«أنا... أنا الي عملت كده في نفسي.. ارتحت!؟»

«وليه؟؟»

«علشان... علشان مش عاوزة أتجوزك..؟»

«تجومي تجطعي خلجتك إكده!؟»

«ولولا هنا دخلت كنت...»

ضاقت عيناه برهبة: «إيه!!؟ كتي جتلي حالك!!؟»

«أيوه يا رافع... كنت موّت نفسي»

«لدرجة دي مش طايجاني!؟»

«لدرجة دي مش عاوزاك تكون جوزي»

جال بعينه على أكتافها نزولاً لثوبها الطويل، ثم عاد لوجهها مرة أخرى... طرقات متعجلة على الباب حوّلت التبرم في شفثيه لابتسامة:

«وهنعملوا إيه في أهلك وأهلي، الي جاعدين منتظرين المنديل!!؟»

صوت أمه وصله من خلال الباب المغلق:

« رافع يا ولدي... الناس عاوزه تروح.. هم أمال»

رفع حاجبيه بانتظار ردها:

«طبعاً حضرتك عارفة الوضع... يا أمتاً أنا مش راجل كفاية، ودي زي ما انتي خابرة عيبة جوي في حجي وحج أبوي وعيلتي... يا أمتاً العروسة معيوبة... ولا مؤاخذه يعني... ودا معناتو إن حضرتك هتجضي ليلة دخلتك في تربة متر في مترين»

سرت قشعريرة في أطرافها، وصلت لقلبها الذي انتفض من قسوة البرودة التي اجتاحت عينيه حالكتي السواد، وتابع حديثه:

«طبعاً دا غير إن الجوازة دي زي الجوازات اللي جبل منيها... أصلها إن السلام يعم البلد... ولو مطلعتش بالمنديل دلوك... انتي خابرة زين إيه اللي ممكن يوحصل»

متهكمة بهرارة:

«يعني هو دمي اللي هينشف بحر الدم بين عيلتي وعيلتك!!! إيه التخلف والجهل دا!!! أنا متوقعتش إنك ممكن تهيني وتهين نفسك بالطريقة دي! انت رجل متعلم، والمفروض...

لوح بإصبعه في وجهها محذراً:

«المفروض منوجفش في طريق واعر... العجل بيحول إكده... إلا إذا كان في حاجة عاوزين نخبوها»

«حاجة يعني إيه!!!؟؟ أنا مش....»

وعندما اشتعل توهج عينيه بسوادهما الحالكة، همهمت بتفهم بكلمات بطيئة:

«أنا مش موضع اتهام علشان أدافع عن نفسي... وآدي المنديل بتاعك»

جذبتة من جيبه وفركته في جرحها المؤلم، وأعادته له بعد أن تلوث بجرحها الذي عاد ينزف:

«اتفضل... مش همّ عاوزين دمي؟؟ ارمي المنديل للسعرانين اللي مشتاقين لسة
لريحة الدم، وكأن دم تلت عرايس قبلي مكفاهمش، وباقي دمي»
تحرك بقلق ناحية وجنتها النازفة، فأشاحت بوجهها:
«ابعد عني!»

قبض الهواء بأصابعه المتشنجة، وتهدل ذراعه الآخر بجانبه. وبخطوات سريعة
فتح باب الشرفة، وأخرج سلاحه ليضرب عدة أعيرة نارية في الهواء، وهو يرفع
المنديل عالياً... ردوا عليه بطلقات مماثلة، وقد عاد الطبل والزمر يغتصب سكون
الليل مرة أخرى.

انتفضت لدى سماعها صوت إغلاقه باب الشرفة بقوة، وعاد يقترب منها... يقاوم
نفسه المريدة بقوة كي لا يطوعها ويكسر أنفها الشامخ، ويثبت لها بالبرهان أنه
رجلها، مهما كانت اعتقاداتها الغبية.

وقف أمامها... يداه معقودتان خلف ظهره، محاولاً التحكم في نبرات صوته كي لا
يعلو:

«وبعدين.. هنعملوا إيه؟؟»

رفعت رأسها لتجيبه، ولكن عينيها زاغت وترنحت. مدت يدها تحاول التمسك بأي
شيء يوقف تأرجح رأسها... فكانت ذراعه الأقرب إليها، وصوته يناديها من بعيد.



«ثمة أوقات في حياة سائر الرجال، حيث يقرر أولئك مستقبلهم، إما بالنجاح أو بالفشل... وليس من حقنا أن نلوم نجومنا أو مقامنا الحقيقير.. بل يجب أن نلوم أنفسنا بالذات.»
- وليام شكسبير

.....

«زينة...»

التفتت تلقي بنفسها بين أحضان والدها في بكاء حارق: «بابا... شفت اللي حصل؟؟ رافع يا بابا... رافع»

«إن شاء الله هيطيب يا بتي... اهدي انتي بس»

«زينة هبيبي... مش كويس بكاء... انت هتوكأ من طولك هبيبي!»

صرخت باسم أمها، قبل أن تلقي بنفسها بين ذراعيها، مستسلمة أخيراً لانهيأر سد الدموع التي اختزنتها في الساعات الماضية.. ثم أبعدتها أمها لتسألها:

«زينة... فين لوسي؟؟»

«مع مسعدة في البيت... كانت نائمة لما حصل اللي حصل... بعث لمسعدة تقعد معاها»

«داكور... أنا هروح أشوفه... هو مش يكاف لما مش يلاقي مامته وباباه؟»
وافقها رضوان بإيماءة:

«وأنا هفضل إهنة مع زينة... خلي سيف يوصلك... هو راح فين!؟»

«راح يجيب لي آكل... قلت له ماليش نفس آكل... بس هو صمم»

«ما يچراش حاجة؛ ما انتي لازم تصلبي طولك يا بتي»

«ماليش نفس يا بابا... كل ما أشوف رافع تايه عن الدنيا، أحس إني عاوزه أموت»

دخل سيف يعاتبها وهو يمد يده لها بالطعام:
«انتى لساتك بتخترفى يا زينة يختي؟! مليح إنك چيت يابوي... اتحدث معا بتك كلمتين.. من عشية محطتش الزاد فى حنكها»
«أنا هوكل زينة، وانت خود أمك وروحها، البنية بت أختك لحالها... إلا أنا اتخايلت زى ما تكون معالى موجوده؟»
زفر سيف بضيق:

« يلا يما جبل ما أبوي يطج له حنك تانى.. أنا مفايجش للحديث ده دلوك»..
هتفت زينة بإعياء:
« متنساش تاخذ معاك البننتين نجلا وهنا... بقالهم زمان مش عاوزين يتحركوا من مكانهم»

«معلوم... لازم ضميرهم واجعهم من عملتهم المهبية!»
«مش وجته الحديث دا يا سيف.. كل واحد فيه الي مكفيه وطافح يا ولدي..
خود البننة وأمك، ومتعاودش إلا لمن تظمن إنهم مش ناجصهم حاجة»
«ماشي يابوي... بس خود بالك... مخفي الاسم چاسر اهنية... ليتناول على زينة بكلمتين ماصخين.. هيكون آخر يوم بعمره»

«يا ولدي الله يهديك، روح واجصر الشر... إحنا فى إيه وانت فى إيه بس؟! روح الله يهديك.. الحاجة الزينة الوحيدة الي عملتها إنك حچزت لأختك أوضة تريخ فيها چتتها... مع السلامة يا فال... ابجي طميني على حفيدتي»
«داكور ردوان... مع السلامة زينة... طميني بالتليفون»

«داكور ماما.... خليني أسمع صوت لوسي لما تروحي»
بعد خروجهما، تهاوت بين أمان أحضان والدها تنتحب مرة أخرى:

«بابا... رافع هيزيع مني!! هيروح وأنا ما صدقت لقيتيه!! أعمل إيه يا بابا؟؟
أعمل إيه؟؟»

ربت على ظهرها:
«ادعيله يا بنتي... ادعيله ربنا ياخذ بيده ويجوم لنا بالسلامة»
«يا رب...»



«صباحية مباركة يا عروسة»
ذلك الصوت المتهكم يخترق كتل الضباب المتراكم في عقلها... كيف دخل لغرفتها؟؟ كيف أصبح جوارها لهذا الحد!!؟ هل تركه سيف يدخل بدون أن يمنعه!!؟ لابد أنها تحلم!
فتحت عينيها تتأوه من الألم الرهيب في وجهها... انكفأت على الوسادة تحاول تجرع موجة جديدة من الألم، كما اعتادت في كل حياتها.
«شكل الجرح مؤلم أوي»

اتسعت عيناها تحديق به مصدومة، وقبل أن تصرخ مدافعة عن شرفها، مرت ذكريات ليلة الأمس سريعاً أمام عينيها لتدرك أنها هنا... في بيته... أوماً مازحاً وكأنه قرأ أفكارها:

«كويس أوي إنك افكرتي... قبل ما تنهوري وتصرخي»
من خلال موجات الألم النابض سألتته السؤال الحائر: «انت بتتكلم عادي امتي؟؟ ولهجتك بتقلب صعيدي امتي؟؟»

«لما بكون متضايق بقلب على الوش الصعيدي... وطبعاً لما بتكلم مع أمي وأبوي... أنا قضيت معظم حياتي بين اليونان وروسيا... يعني ساعات بقلب على روسي أو يوناني... زي ما انتي بتقلبي على فرنسي»
ذكرها بثوبها الفاضح، والذي تسبب في مشكلة الأمس: «مممكن حضرتك تقومي تغيري هدومك، قبل ما أمي تدخل وتشوفك لسة بفستان الفرحة؟؟»

«أيوه... بس مش قبل ما نتفق... جوازنا دا هيستمر لامتي؟؟»
 ضاقت عيناه، وتوتر جانب حاجبه صاحب الندبة:
 «حضرتك عاوزاه لامتي؟ معلش أصلي مقرأنش كتالوج التعليمات اللي عليكي»
 تجاهلت مزاحه السمج وأجابته بجدية:
 «لحد ما نتضمن إن الجوازات الثانية هتتحقق النجاح... بعدها لو اطلقنا مش
 هتكون مشكلة كبيرة»
 «اممممم.. فكرتي بكل حاجة... كويس أنا موافق»
 «بس... فيه مشكلة... أنا لازم أسافر فرنسا... كنت اتفقت مع بابا علشان...
 أخلص التزاماتي من هناك...»
 احتدت ملامحه وتمعن بهدوء مناقض لنظراته المهتاجة:
 «طول ما حضرتك مرتي على ذمتي، مش هتخطي عتبة الدار لوحديكي واصل... يا
 أمتاً معايا أنا چوزك جدام كل الخلع... يا أمتاً مع أمي... ومافيش حل تالت...
 واعية لحديتي يا بت الناس؟»
 مطت شفيتها بامتعاض:
 «على العموم... هنتكلم في الموضوع دا بعدين... وعلى فكرة... القانون دلوقتي
 يسمح للزوجة إنها تسافر في أي مكان برة مصر بدون شرط إذن الزوج»
 هدر بتهديد:
 «أنا متأكد إنك متجصديش تتحديني... صوح؟؟ لأنك يا عروسة مش كدي... ولو
 عملتيها مرة تانية... إنك بس تفكري تتحديني... هكسر خاشمك وأخليكي مرتي
 صوح، وأنزلك الدوار تعچني وتخبي وتزري للبهائم... واعية يا... عروسة؟؟»
 أخيراً خرجت أنفاسها محدقة بالباب الذي صفقه خلفه... لابد أن تتعلم كيف
 تستطيع تدجين تنين الرحامة هذا... ومتى تدخله وجاره وتحبسه داخله... ومتى
 تسمح له بالتجول وقيدته بيدها.



«على فين العزم إن شاء الله؟؟»
«بتسأل ليه؟؟ وانت مش رايح تبارك لأختك!؟»
«أنا رايح... وانت معتروحيش أي موطرح»
«ليه بجى إن شاء الله!؟»
«عشان أنا جولت إكده»
«ومين جالك إني بسمع الكلام يا سي سيف بيه!؟»
«معالي... لمي نفسك، وخلي ليلتك الغبرة تعدي على خير»
«وإن ما لميتش نفسي واللييلة معدتش على خير، هيوحصل إيه يعني!؟؟ تكونشي
فاكرني ماليش رچالة يوجفولي... لااااا.. فوج يا سيف.. دنا ورايا رچالة ياكلوا
الحنش وهو ني»
«أنا خابر انتي رايحة ليه.. عشان تملي عيونك من حبيب الجلب... صوح
الحديث؟؟ بيت عمك دا مش هتخطيه واصل، إلا لمن يحصل الي في بالي»
«وهو إيه دا الي في بالك يا سيف بيه؟؟»
«وجتها هتعرفي... دلوك تلمي تعابينك واحنشتك وتبعدي عن طريجي»
ضربت بقدميها في الأرض:
«والله لأجول لأمي فاليرية»
فوجئت فاليريا بزوجة ابنها تطلب دعمها... ولكنها لم تفهم منها كلمة واحدة...
نظرت لسيف تسأله:
«سيف هبيبي... هي آاوز إيه دي؟؟»
«متريش عليها، ويلا بينا أبوي مستنينا في العربية»
هبت معالي: «يعني إيه متريش عليها دي!!؟؟ كلبة وبتهو هو ولا إيه!!؟؟»
«سيف... هليها تيجي... أشان هاطر ماما... مرة دي بس»
أوما سيف بنفاذ صبر:



«رشاد يابني... مش هتروح مع عمك تبارك لبنت عمك في صباحيتها؟؟ رشاد... مالك يا ضنايا ما بتزدش عليا ليه؟؟»

«ولا حاجة يماً... خدي فريدة وروحوا معاهم... أنا ماليش كيف أروح ولا آجي»

«ليه بس يا حبيبي كفا الله الشر؟! انت على طول كده سرحان وهمدان... تكونش العروسة وشها وحش عليك؟ حكم فيه أعتاب تفتح أبواب الرزق، وأعتاب بعيد عنك وعن السامعين تجيب الفقر»

«يماً... استهدي بالله... هي فريدة كانت عملت لك إيه!!؟ خليها في حالها... دي عروسة مبالهاش يامين بس»

«وهي أمك لو محطتش نجرها من نجر مرتك، هتخطه في مين يعني؟! ما انت خابر الفولة، ولا إيه يا رشاد يا ولدي؟»

«قصدك إيه يا حاج محمود؟؟ إني ولية بتتشاكل مع دبان وشها»
أخذ يعد حبات مسبخته مغمغماً: «لا.. لا سمح الله... أنا راجل مفترى وانتي ملاك نازل من السما»

«الله يمسيكي بالخير يا سمحة يا بنتي... كانت هي الي بتقف في صفى»..
بعد خروجها الصاخب، عم الهدوء المكان إلا من حبات سبحة الحاج محمود الواحدة تلو الأخرى... انحنى الرجل الأكبر سنًا هامسًا لابنه:

«مالك يا رشاد؟؟ معجبنيش حالك اليامين دول... مرتك مكدراك في حاجة؟؟ ولا الجوازة مش على هواك؟؟ انت خابر يا ولدي كلاتنا كنا تحت رحمة مخفي الاسم زيدان»

«لا يابوي.. اطمئن.. فريدة زينة»
«لا يا ولدي... أنا مش مرتاح... الي عملته جبل الزولج، وعنادك الي مشايفش له عازة، مخليين الفار يلعب في عبي»

وقف رشاد متعصباً يخفي ارتبাকে:

«يوه يابوي!! مجلتك، مافيش حاجة... هو انتم عاوزين تكدروني بالعافية؟! آني خارج ويمكن أتوخر»

«هتفوت مرتك يا ولدي وهي لسة مسبعتش؟! كت روح معاهم»

لوح رشاد بيده وتلفع بكوفيته مزمجراً وهو يصفق الباب خلفه:

«يووووه... هي شغلانة معتخلصش»

«لا حول ولا قوة إلا بالله»

خرجت زينات تسأل زوجها بدهشة:

«هو رشاد راح فين؟؟»

مهموماً أجابها وحبات السبحة تتسابق بين أصابعه: «والله مخابرش يا أم رشاد...»

الواد اتبدل بين يوم وليلة»

«لا يا حاج... ابنك معموله عمل.. أيوه والمرسي أبو العباس معمول له عمل

سفلي... هي مافيش غيرها الخوجاية الصفرا الغيارة اللي تندب في عينها رصاصة...»

هي اللي عملتله العمل»

«وهي الخوجاية هتعرف تعمل الأعمال يا زينات؟! يا ولية كبري عجلك»

«دا الخوجات دول يا حاج محمود هم أس البلاوي كلها... تلاقيها عاملة للواد

عمل على ظهر سمكة، وخلت البتاعة بنتها رمتها في بحر البلاد البعيدة دي اللي

كانت فيها، علشان منعرفش نمسكها أبداً ونفك العمل... يا ميلة بختك يا بني يا

حبيبي!»

«لا حول ولا قوة إلا بالله... ربنا يهديكي يا زينات»

لم تسمعه وهي تغلي من التفكير، ثم هتفت:

«مافيش غيرها أم الكرامات... بركاتك يا أم العواجز!»

«مين دي يا ولية يا خرفانة انتي؟!»

«هو في غيرها يا حاج؟! الشيخة سلطنة... ابني بيضيع مني يا حاج محمود ولازم نشوف له حل»

«اتجي الله يا ولية وجومي صلي ركعتين لله يمكن يغفر لك... وإن شاء الله ربنا فرجه جريب... وچهزي حالك، وجولي لفريدة كمان تجهز علشان نروحوا نباركوا لبت أخوي... وبالمرّة نعدوا على سمحة نودوا لها السبوع بتاعها»
لوت فمها يمينا ويساراً وهي تشير لأعلى:

«إلا هي المحروسة أهلها من يوم ما زارونا في الصباحية، محدش جه ونقطها بجنيه!! هم ما صدقوا خلصوا منها ولا إيه؟!»

«يا ولية حرام عليكي اتجي الله، البت منكسرة ويتيمة الأم، وتعتبر يتيمة الأب... خديها تحت جناحك هتكون مداس في رچلك، وبطلبي شغل الحموات ده... هجوم أصلي ركعتين لله ربنا ياخذ بيدك... استغفر الله العظيم... ربنا لا تؤاخذنا بما فعل السفهاء منا».

مكتفية بما سمعت، ركضت عائدة لغرفتها... وقفت خلف الباب تستند عليه، تعتصر عينيها بقوة متوسلة دموعها ألا تخذلها... بأنين ناحب أخذت تكتم شهقاتها، ابتعدت عن الباب بعد أن أوصدته، وركضت لأقصى الغرفة تجلس القرفصاء في الزاوية، تضع رأسها بين ركبتيها كي لا يسمع أحد نشيجها... تجاهلت الطرقات على الباب وصوت حماتها تناديبها... بعد عدة لحظات يئست من ردها، فألقت شتيمة على مسامعها وذهبت.

تعرف ما يقال عن المتصنتون، ولكنها لم تقصد أبداً التصنت، خاصة هذه المرة؛ كانت قد استعدت للخروج معهم عندما أوقفها سماع اسمها يتردد بينهم، وجدت نفسها تتجمد مكانها، وهم يتحدثون عنها وعن يتمها، وأهلها الذين جاءتهم الفرصة ليتخلصوا منها... وكانوا محقين في ظنهم... ماذا لو عرفوا أيضاً أن رشاد لم يلمسها أبداً؟! ولو عرفوا أن الشك يساوره في علاقتها بحمادي؟؟

انهارت تلطم خديها كلما تمعنت في التفكير، لماذا لم يعطها حق البراءة حتى تثبت إدانتها؟! لماذا حكم عليها؟! لماذا كان قدرها أن تتزوجه هو؟! الشاهد الوحيد على لقائها غير المخطط لحمادي... هل هو حظها العاثر فعلاً؟! هل تكرهها الدنيا لهذه الدرجة رغم كل محاولاتها للتصالح معها؟!



«وبعدها معاك يا حمادي؟! مش طريقة شغل دي... بجالك سبوع وانت على دا الحال... بكفياك بجى يابو عمه، إحنا وانا أشغال ورچالة تجرجش الزلط، لو ملاجوش حاجة ياكلوها هياكلونا»
نفخ دخان الجوزة من منخاريه، فانطلقا كعمودين من الدخان الأزرق سرعان ما تفرق فوق رأسه:

«عاوز مني إيه يا چعيدي؟! ما تروح تشتغل ولا متشتغلش خصني أنا إيه؟!»
«إلا خصك دي!! دا خصك ونص، ولا انت ناسي إنك سيد الجبل دا كلاته؟! الشورة شورتك والرأي رأيك... ولا إيه يابو عمه؟»
«أستغفر الله العظيم... يا چعيدي جلت لك بدل امرة مليون خليني في حالي... مش طايح خلجاتي... مش طايح الهوا الي بيدخل خاشمي.. ومش طايحك ولا طايح الجبل ولا الرچالة... هه هتعملوا إيه بجى؟!»
«دا انت حالتك صعبية جوي يا ولداه... جولي يا حمادي وچيب من الآخر... مين الي عاشجها، ومطيرة النوم من حباي عينيك؟! جولي وأنا أجيها لك عشية راکعة على مداسك، وملك إيديك»
«خلاص؟! عملنا كل حاجة عفشة في الدنيا دي.. مابجيش غير خطف الحريم كمان؟! إحنا وصلنا للوساخة دي يا چعيدي؟! للدرجة دي؟!»
«النغمة دي معاجبانيش يا حمادي... تكونش ناوي تتوب يابو عمه؟»

أعاد رأسه ليرى على الجدار الصخري القاسي متأوهاً: «يا ريت كان ينفع! يا ريت! والعجيب إن اللي كت ناوي أعمل إكده عشان خاطرها... اتجوزت وبجت تحت طوع راجل غيري»

ردد جعيدي: «اتجوزت!!؟ مين دي؟؟ تكونش واحدة من البنته اللي اتجوزوا في اليامين اللي فاتو؟؟ كت حاطط عينك على مين؟؟ من الرحامة ولا من البداري؟؟»

«مش مهم... خلاص.. الحلم راح يا جعيدي... راح»

«اسمعي وافهمي يا حمادي... بس عاوزك تفكر بعجل ابن الليل اللي بيوزن بلد بزيتها... بلاش تفكر بعجل العاشج... فاهمني يا خوي؟»

«عاوز تجول إيه خلصني؟»

«اسمعي وطبطج ودانك... وأنا هجولك تعمل إيه»



«أنا مش هنزل»

التفت لها مقطباً حاجبيه ليلتقيان بزاوية حادة في المنتصف: «ليه إن شاء الله!؟»

«مش بالمنظر دا»

أدارت وجهها ليراه متورماً بشكل مقلق... اقترب منها.. لاحظ إجفالتها، تأثير ألمها كان كالحمض الحارق على قلبه.

طرقات على الباب أجفلتهما.. تبادلنا النظرات القلقة... وجاء صوت أمه ليزيد الطين بلة:

«رافع... رافع يا ولدي... صباحية مباركة يا عريس... صحيتوا ولا لسة يا ضايا؟؟ نوم العوافي يا حبيبي... صحصحو يا عرايس، أهل مرتك وصلوا ومنتظرينكم في المُنْدرة»

اتسعت عيناها رعباً:

«لو حد شافني بالمنظر دا هيقولوا إيه!؟ أكيد هيتهموك انت»

«إيه!؟ نعم نعم!!؟ هو انتي مش جاية من داركم بالمنظر ده!؟!!»

«ماهو.... ماهو...»

استعجلها بغیظ: «ماهو.. ماهو إيه؟؟ انطجي!»

«ماهو محدش شافني... غير هنا»

مسح وجهه بيده، وأنفاسه تتردد بصعوبة، يفكر مخرج للورطة.

«ما ينفعش متخرجيش... يمكن يفتكروا إني جتلتك... وإن چيتي للحج هو دا

مرادي دلوك... مرتين يا زينة توجعيني في مطب، وكل مطب ألعن من الي

جبلية.. وفي المرتين مكوئش عملت حاجة... جولي لي لو مكاني تعملي إيه؟؟»

ارتفعت حواجبها وعضت على شفتيها:

«بصراحة مش عارفة»

دار حول نفسه يصفق بيديه هادراً: «يا مثبت العجل والدين!»

أطرق لحظات، ثم عادت الطرقات على الباب فصرخ بحدة: «خلاص يما... عرفنا...

خلاص!!»

رفع رأسه من بين أفكاره، ليتوه في بحر نظراتها الضائعة بين ملامحه... ربما أفلتت

دقة من دقائق قلبه على حين غفلة منه... هل هي بكل هذا الضعف الذي يوحى

به جسدها الرقيق؟؟ أم بتلك القوة التي تشع من تلك النار المتقدة بشعرها؟؟

بلمسة كجناح الفراشة لمس جرحها وسألها برقة لم تتوقعها:

«بتوجعك؟؟»

جف ريقها وهي تومئ بخفة، فhez رأسه:

«خليكي هنا... أنا هنزل لهم... وهبعت أمك وأختك بس... ماشي؟ وعلى فكرة..

فيه مسكن للأم في درج التسريحة... بعد ما تفطري خدي حباية ونامي»

أخذت نفساً عميقاً بعد خروجه... ولكنها ظلت ساهمة في رفته. هزت رأسها

بقوة لتفيق من تأثيره المدمر: «وبعدين معاكي يا زينة!؟؟ ما تنسيش... رافع رجل

صعيدي مش ممكن هتتقابلي معاه في طريق واحد... مهما كان رقيق... ومهما

كان راجل بجد... ومهما كان....

طرقات على الباب أوقفت أفكارها، لتجد نفسها منقطعة الأنفاس، وقد ضبطتها
تفكر بزوجها مرة أخرى... ركضت إلى الباب تفتحه وتلقي بنفسها بين أحضان أمها
منتحبة: «ماما.. خديني من هنا... مش عاوزة أقعد ولا دقيقة واحدة»
دفعتها فاليريا ودخلت مع هُنا، أغلقت الباب لتسألها بقلق: «ليه زينة هبيبي؟؟؟
مون ديو!! إيه جرى لوشك زينة!؟؟ رجل صئدي متوهش دا أمل إيه؟؟؟»
التقت نظراتها بهنا، التي عضت على شفتيها:
«ماما اهدي... مش رافع الي عمل كده... أنا هقولك»
واستمعت فاليريا، لتصبح بانفعال:
«سمهة أمل كده!!؟ ليه مجنونة دي!؟؟»
«مش عارفة»
«أنا هشوف شغلي مآها... طب انت آاوز تروّه ليه؟؟ رافه دايك انت في
هاجة؟؟؟»
«بالعكس... رافع رجل محترم أوي... ورقيق أوي... و...»
صاحت هُنا ضاحكة: «حيلك حيلك... لأخطفه منك وأتجوزه أنا!»





«الحب هو اللعبة الوحيدة التي يشترك فيها
اثنان، ويكسبان فيها معًا أو يخسران معًا»
- بيرون

.....

«زينة... زينة... لوسي بيكلمك وانت مش بترد أليه... البنت هزين كثير»
انتبهت زينة لابنتها المتعلقة بعنقها، وأثار الدموع معلقة بأهدابها الصغيرة...
ضمتها لصدرها بقوة لتجهش هي الأخرى بالبكاء... رفعت الصغيرة يدي أمها عن
وجهها ومسحت دموعها بكفيها الناعمتين:

«ماما... انت أيط ليه؟؟»

مسدت على شعرها الأشقر المتناثر على كتفيها كسنا بل القمح الذهبية، وتماسكت
قائلة بنبرة خافتة:

« ماما تعبان شوية لوسي... روعي العبي مع هنا... وأنا هغسل وشي وأحصلك»
«داكور ماما»..

راقبتها تركض حتى غابت عن عينيها، ثم نهضت بعصبية:
«لازم أرجع المستشفى... مكانش ينفع إني أرجع البيت وهو هناك بين الحيا
وال.....!!»

أجهشت بالبكاء مرة أخرى وهي تكمل بصوت مخنوق: «بين الحيا وال... موت!»
نظرت لأمها الملتاعة على حالها وصرحت:
«ماما... أنا مش هقدر... لو رافع جواله حاجة أنا هموت»
«شر بئيد زينة... بلاش تكولي كلام أبيض...»

«ماما... خدي بالك من لوسي... أنا هروح المستشفى.. مش قادرة أقعد... لازم لما رافع يفتح عينه يلاقيني معاه»..

«استني زينة.. سيف يوصلك.. هو راه يجيب حاجة ولما يرج...»

«لأ مش هقدر أستحمل ماما... لازم أروح حالاً»

دخلت المستشفى بركبتين مترهلتين من الخوف والقلق... اتجهت فوراً لغرفة العناية المركزة... تجاهلت أقرباءه الجالسين مكانهم وكأنهم زرعوا في مقاعدهم ولم يحن أوان حصادهم... عادت تلوم خضوعها لتوسلات لوسي كي تراها.. هي التي لم تفترق عنها يوماً واحداً منذ مولدها... فجأة تجد الصغيرة نفسها وحيدة بدون أمها، التي لم تفارقها لحظة واحدة من يوم مولدها... وقفت أمام النافذة الزجاجية تكاد تعانق رجلها المسجي على فراشه لا حول له ولا قوة، تحيط به أنابيب كثيرة تخرج منه، وتدخل إليه.

«إن شاء الله هيو بجى بخير يا بت عمي»

التفتت بعينيهما المغرورقتين بالدموع، ترى سمحة بلامحها الجميلة الطيبة التي اشتاقت لها كثيراً... أشارت زينة لبطنها المدور الكبير:

«انتى بس إيه الي جابك؟! وجاسر إزاي يوافق!!؟»

اختلست سمحة نظرة محتقرة للرجل المتابع الموقف بجوارهما، ثم ربتت على ذراع ابنة عمها:

«يوافج ولا ميوافجش... وهو كان صالحه بيا إيه!!؟»

شهقة ست الدار في الخلف وصلت لمسامعهم:

«شوفي البت جلييلة الحيا!! صوح الطبع غلاب، وهي هتجييه منين... ماهي بت زينات البحرأوية»

التفتت سمحة تصيح بصوت عال:

«ما تلمي نفسك يا مرا انتي، ولسانك الي عامل زي الفرجلة ده!! وماتجيبيش سيرة أمي على لسانك الزفر، أحسن والي خلع الخلع الي في رجلي و...»

«سمحة.... لمي الدور!!»

التفتت سمحة للصوت الخشن... أنكرت على نفسها شوقها، لكل نبرة ولكل نفس، وهي تمسك بصدر ثوبها وتبصق فيه قائلة بصوت ملاوع:
«تف تف تف... خوفتني يا جاسر! لا سبع بصوح... شوف ركبي بتخلخل من مكانها كيه!؟»

قطع المسافة بينهما بخطوتين فقط، وهو يجذب ذراعها بخشونة ويهزها بقوة:
«جسمًا بالله العظيم، لو ما لميتي نفسك وعادتي لدارك!!»
شهقت تقاطعه وهي تنفض ذراعها منه:

«هتعملي إيه يا جاسر!! هتعملي إيه يا راجلي يا بتاع الغوازي!!؟
وبدون أن يشعر، رفع يده عاليًا يطيح بكلماتها المسمومة عن فمها في صفحة،
أفقدتها توازنها، لتسقط على ظهرها بصرخة أدمت قلبه... ركضت زينة نحوها
تحاول رفعها وهي تشززه بنظراتها، وكان لا يزال ينظر ليده المرفوعة، وكأنه
يستجوبها.. كيف طاوعته!!؟؟ ولم يبق إلا على صوت زينة تصرخ:
«جاسر... سمحة مش بتزدد.... حد ينادي على الدكتوووووور»

مذهولًا أخذ يجيل النظرات بين زينة وزوجته الفاقدة الوعي بين ذراعيها...
ركضت الممرضات يتسابقن في الوصول إليها، ثم أفسحن الطريق للطبيب، ولكن
جاسر اعترض طريقه: «لو سمحت... أنا ما عايزش راجل يكشف على مريتي»
ألقى الطبيب نظرة خاطفة على زوجته على الأرض وحاول دفعه:
«هو لسة فيه حد بيفكر كده!!؟ ابعد عن طريقي يا بني آدم.... انت عاوز
تفقدها!!؟ مراتك واضح إنها حامل في شهورها الأخيرة... ابعد عن طريقي أحسن
أجيئك الأمن»

أجالت زينة النظر محتدة بينهما لا تصدق ما يحدث، وقفت تدفع جاسر من صدره بغل وحقد شديدين حتى أبعدته عن طريق الطبيب، دون أن تترك له الفرصة ليتجاوزها:

«انت إيه!!؟ جنس جبلتك إيه!!؟ الشر اللي جواك دا مالوش نهاية!!؟ انت عاوز إيه!!؟؟ حرام عليك مفيش في قلبك رحمة!!؟ مراتك هتموت، وانت كل اللي بتفكر فيه كلام فارغ مرتبط بعقليتك المريضة، وعنجهيتك الفارغة... لكن حياتها وحياة ابنك اللي في بطنها مش مهم... سلامتها وصحتها... مش مهم... يا أخي ارحم وملكش دعوة برحمة ربنا»

«ما توجّفي المدافع اللي مطلوجة من خاشمك دي بتزوف اللي جدامها!! انتي مالكيش كبير يا بت انتي!!؟»

التفتت زينة لأم زوجها وحدها بنظرة قاسية:

«لو ما كنتيش في مقام أمي، كنت عرفت أرد عليكي.. ولو مكانش اللي مرمي جوة دا ابنك وراجلي... كنت بردو عرفت أرد عليكي»

وأعادت انتباهها لجاسر: «لما تغسل نفسك من توب المسترجل عالفاضي، وتلبس توب الرجالة اللي بحق... توب الراجل فيه مش بشنباته، ولا بصوته اللي يفلق الجبل نصين... الراجل بأفعاله، بحنيتته على مراته... بتفهّمه لضعفها مش استغلاله... يمكن لما يحصل كل دا... يمكن سمحة تقدر تسامحك... ويمكن وقتها تستحق إنك تكون أب بجد... عن إذنك»

بحثت عن الممرضة، التي أشارت لها على غرفة سمحة... اتجهت إليها من فورها تحاول التقاط أنفاسها بعد المواجهة الصعبة مع جاسر.

راقبها جاسر تتهادى بخطواتها الرشيقة، رغم انتفاضها بالغضب.

«يا حيف على الرجالة!! انت هتخليها تنفذ بجلة أدبها!!؟ انتم جرالكم إيه يا رحامة!!؟ خلاص بنات البداري لبستكم طرح!!؟»

«مالهش عازة الحديث دا يا مرت عمي... لكل حادث حديث... بعدين نبجوا
نشوفوا الحكوة دي»
«رايح فين يا چاسر؟؟»
«هطمن على مرقى وابني يا مرت عمي... ولا رجالة الرحامة مبيطمنوش على
حريمهم!؟»
برمت شفتيها وهي تشيح بوجهها ترغي وتزبد بكلمات غير مفهومة.
سألت الطبيب بلهفة:
«طمني يا دكتور.. سمحة عاملة إيه؟؟»
«اطمني يا مدام... الحمد لله هي والجنين بخير»
«الحمد لله... شكرا يا دكتور... وآسفة جدًّا على اللي حصل حضرتك عارف المخ
الصعيدي»
«مفهوم طبعًا... إحنا متعودين على كده في شغلنا في البلد دي... بحبيكي على
موقفك؛ مش كثير يقدرُوا ياخدوا موقف شجاع بالشكل دا»
«سمحة بنت عمي... وأمانة في رقبتي»
بعد خروج الطبيب اقتربت من ابنة عمها النائمة:
«سمحة.. يا سمحة»
بدون أن تفتح عينيها تمتمت بصوت خافت:
«أنا صاحبة يا زينة... وبخير اطمني... ورشاد كمان بخير»
ووضعت يدها على بطنها، ودموعها تسيل بغزارة من بين رموشها.
وضعت زينة يدها عليها:
«خلاص.. أنا هروح أطمن على رافع، وانت اترتاحي... همر عليك بعد شوية»
أوقفها نداء سمحة المختنق بالنشيج:
«زينة... سامحيني... ظلمتك كثير يا خيتي»

ضمت زينة شفتيها وأومأت بهزة خفيفة من رأسها، قبل أن تغادر الغرفة لتصطدم بجاسر... أمسكت بمقبض الباب بقوة رافضة التنحي عن طريقه... وضع يده في صديرية جلبابه: «وسعي من طريجي!»

عقدت ذراعيها على صدرها بتحد مماثل:

«وإن موسعتش هتعمل إيه؟؟»

لف رأسه بحركة دائرية:

«أستغفر الله العظيم... اجصري الشر يا بت الحلال، وخليني أشوف مرقى وابني»

«دلوقتي بس فاكر إن ليك زوجة وابن؟!»

«اسمعي يا زينة... أنا معدخلش واصل في مصالحك مع رافع ولد عمي...

وماعايزش حد يدخل بيني وبين مرقى»

«ودا من امتي!!؟ من يوم ما اتجوزت وانت كل اللي شاغلك تخرب علينا حياتنا..

ليه معرفش! لما حياتك هي اللي خربت»

«خلاص خليني أحاول ألهما.. واجفة في طريجي ليه!!؟»

«مش مصداك... مش شايفاك اتغيرت»

«سمحة جوية وتجدد ترفضني تاني.. معادتش بسمة مغمضة... ولا انتي

مشوفتيش بت عمك، من شويتين بس كانت واجفة كيه اللبوة اللي هتنهش

بسنانها لبي يجرب منيها!!؟»

«طبعا شوفتها لما إيدك طيرت وشها، وكنت هتتسبب في موت ابنك قبل ما

يشوف النور ولا...»

صوت ضعيف متقطع نهها لنداء سمحة، فأعادت فتح الباب واستمعت لابنة

عمها بغيظ:

«خليه يدخل يا زينة... أنا عاوزه.. وخلينا لحالنا لو سمحتي»

رمقها جاسر بنظرة انتصار وهي تتيح له الدخول.

التفت بنفس نظرة الانتصار لسمحة بعد تأكده من إغلاق الباب، لتموت فوراً في مهدها، عندما قذفته بطلبها غير المتوقع: «طلجني يا جاسر»
وقف مذهولاً لا يصدق ما يسمعه... هل هي سمحة التي يعرفها تعشق تراب قدميه!!! هل تطلب منه الانفصال الرسمي بكلمة واحدة، بكل هذه السهولة والجبروت!!!؟ كيف طاوعتها شفتاها!!!؟ كيف طاوعها قلبها العاشق!!!؟ كيف!!!؟
دخل في دوامة الذكريات، يندم على كل لحظة مرت بدون أن يقدر هذا العشق النادر.



«توك اتفكرتنا يا زين الرجال!؟»
«بجولك إيه يا نوار... أنا چاي الخيش ده عشان أنبسط وأفك عن نفسي هبابة... لو لجيت اچو ملبش والريج ناشف... هشوف لي موطرح تاني... وانتي ست العارفين... بدل الموطرح هلاجي ألف»
هتفت مجبورة وهي تغمز بعينها بقوة وتنغزها في خصرها اللعوب:
«خلاص بجى يا نوار.. استهدي بالله يا بتي.. روعي وضبي المجدد لزيانة الرحاية.. يلا همي يا بت»
«حاضر يا خالة... ملن نشوفوا آخرتها إيه؟»
التفتت مجبورة لجاسر، الذي تقدم على المجلس وتوكل على المسند يزغرها بلامبالاة: «متواخذهاش يا سيدي البيه... هي واخدة على خاطرها منيك حبتين»
«ليه إن شاء الله!؟ مكوئش غلطت في حضرة الهانم بت بارم ديله وأنا مخابرش!؟»
همت مجبورة بالحديث، عندما دخلت نوار تلقي بالجوزة المشتعلة جمراتها أمامه، قائلة ويدها تتراقصان مع خصرها بميوعة:
«لا العفو يا سيدي البيه.. هو إحنا كد المجام العالي!؟ وإحنا اش وصلنا للعلاي»

رمى عصا الجوزة الملقاة جواره، وأشار بطرف عينه: «بطلي جلة حيا وناوليني الجوزة»

بصوت مائع بالمواربة مع خصرها الراقص:

«معلش.. متواخذنيش... أصل يدي بتوچعني»

أعطى إشارة لمجبورة ففهمتها.. تسلفت بخفة لا تتناسب وكتلات الدهن التي تهتز مع حركتها.. ثم ربت بيده على المسند جواره:

«اجعدي چاري يا نوار، واستهدي بالله يا بت الناس... مش هيوچی انتي وزيدان الزفت والزمن الأغبر!!»

تابعت بميوعة وهي تجلس حيث أشار:

«لا لا.. معجولة؟! لساك عريس على الزمجة دي... إيه العروسة مچتش على هواك؟! دا حتی بت البداري مزيونة»

تأوه وهو ينفخ الدخان من منخاريه وفمه:

«إيوه يا نوار... وهي مزيونة بعجل؟! الشعر الإحمر والعيون بلون السما والجوام... يا بووووووي!»

«واه!! كنك بتحكي عن واحدة تانية غير مرتك... لاه لاه... معجولة؟! عشجان مرت واد عمك... بت الخوچاية?!»

زغر لها بعينين تطفان شرارًا:

«ضبي ساكتة... وجلبي فحم الجوزة.. بجت باردة كيه اللي عملتها»

ازدادت اقتراباً منه تتنفسه قائلة بصوت مبوح:

«بحبك يا چاسر... ليه محاسنش بيا؟! ليه اتچوزت غيري?! ليه يا چاسر دنا كت هوبچی طوع أمرك... مداس في رجلك... عمري ما كت هكسرلك كلمة واصل... وعمرک ما هتكون زمجان مني»

«انتي بتخترفي بتجولي إيه?! انتي واعية يا بت.. ولا شربانة لك حاجة صفرا من هباب البرک الي بتطفّحوه لمساويل آخر الليل?! فوجي يا نوار... الي زيک يا بت

الغجر أولتها وأخرتها، جعدة حلوة... كلمتين ناعمين... يمكن هزتين وسط مع
تعميرة موكن، وبعدها تتلامي على عرجك ويا دار ما دخلك شر.. الي بيص لفوج
تنكسر رجبته... واعية لحديثي؟؟ معايش أعيده ثاني... وإلا جسمًا بالله
معتشوفيش خلجتي حداكي ثاني.... مسمعتش ردك»
أجابته بانكسار: «أمرك يا سيدي البيه»
«زين... جومي اتهزي حبة، خلونا فمخمخوا الحجرين»
«حاضر... أمرك يا سيدي البيه... على كد ما تدفع هتاخذ»
وبانكسار أخذت تتلوى على دقائق قلبها الحزين.

راقبته بغل، تطحن منديل رأسها الذي سحبته عن خصرها بين يديها، يعتلي
سيارته الفور باي فور، والتي زمجر محركها بخشونة نبأت عن ثقل قدم سائقها،
بعد سهرة مشبعة بالدخان الأزرق.
«استهدي بالله يا نورة يا بتي... أخذان الحج صنعة»
التمعت عينها بشار الغيرة: «مجدراش يا خالة!! النار جايدة في چتتي!! كل
ليلة يهملني ويروح ينام چارها!!»
ربت مجبورة على ظهرها:
«المهم إنه لسة مهملكيش يا مخيلة... موكد بت البداري مش مالية عينه
الفارغة... وهنا ياچي دورك... هملي الغيرة، والهرية، والنكتة دي... معتوكلش
عيش حاف... وفكري في مستجبلك... مش بيجولك العبرة بالخواتيم؟»
«لو تعرفي يا خالة، يا ريت كان المشكل في مرته؛ أهه على جولك مش مستعنيها،
وكل ليلة سهران في حجر نورة... المشكل في الي عاشجها ومطايلاهش، هي دي
الي سارجة عجله صوح»
«ودي تكون مين يا نورة؟؟»
«بعدين يا خالة... بعدين هجولك.. هو فيه سر بيتخبى في الصوالحة؟؟»

«خلاص خيلنا في الي جدامنا... كل ليلة بياجي فيها يسهر حداي، اربطيه بيكي،
كنها فروجة وباضت لك بيضة ذهب يا مخبل»
شردت في كلام خالتها متممة:
«كنه صوح الحديث يا خالة... صبرك علي يا چاسر... إما شعلجتك في هوا نوار
لحد ما تجول حجي برجيتي!! هتروح مني فين؟!»



دخل بيته مترنحاً مدندناً لحن أغنية... وقف فجأة محدقاً بها تقف بمنصف
الغرفة، عاقدة ذراعها على صدرها تحدجه بقرف:
«حمد الله على السلامة.. كنك فوت صلاة الفجر.. ولا صليتها حاضر في
الجامع!?!»

نزع عمامته عن رأسه يحاول التركيز، كأنه لم يتعرف عليها بعد:
«بعدي.. بعدي من طريجي!»
«مش هبعد يا چاسر... والمخروبة الي كت سهران فيها لحد دلوك تجدر ترجع
لها وتنام فيها»

«انتي اتخبلتي يا بت؟! بتطربيني من داري!!»
طاشت يده في الهواء مترنحاً قبل أن تصل لوجهها، ازدادت نظراتها استهزاء:
«لما تعرف تصلب طولك، اوبجى تعالى علمني الأدب»
وابتعدت عن طريقه في آخر لحظة قبل هجومه المتجدد، ليصطدم رأسه بحافة
المقعد الأسيوطي، قبل أن يسقط هامداً على الأرض بدون حراك.
كادت تضحك من منظره المثير للسخرية، عندما لاحظت بقعة الدماء تفتش
الأرض أسفل رأسه.

صرخت مولولة مذعورة، جلست جواره ترفع رأسه الجريح تضمه على صدرها،
تتوسله أن ينطق ولو بحرف.
فوجئت بشفتيه المقوستين تنفرجان عن ابتسامة، متمماً بدون أن يفتح عينيه:

«خديني في حضنك يا زينة.. اتوحشتك جوي جوي»
زمت فمها، ونهضت لتسقط رأسه على الأرض مرة أخرى دون أن تبالي بأنيته...
وقفت فوقه تركله بقدمها بغل شديد: «إن شاء الله تموت انت وهي...
ومهنخدوش فيكم عزا... بس هه!»



«صبرني يا رب! جال أصوم أصوم وأفطر على معالي! أعوذ بالله منك مرا،
مبتطليش نج نج... عمال على بطل.. انتي إيه مولودة نجاجة؟!»
«دي الي هي أنا يا سيف!؟»
«فيه حد غيرك مصدع راسي من طلعة الشمس بالنج والنجيح!؟»
«ليه خير إن شاء الله!؟ كفرت يعني ولا كفرت لما أعوز أزور أهلي!؟»
«تزوري أهلك!؟ ولا حبيب الجلب اتوحشك!؟»
بابتسامة زادت من جنونه:
«رافع ولد عمي... لو دفنتني في جبر، وجفلت عليا هليون جفل، معتجدرش
تطلع من جلبي واصل.... لو كت راجل صوح مكتش اتچوزتني من أصله
وانت خابر إني مخطوبة لولد عمي ورايداه»
لم يستطع السيطرة على غضبه طويلاً، أمسك شعرها يجذبه بقسوة هادراً:
«ولو كان واد عمك راجل صوح مكانش فرط فيكي... بس لما بجيتي بكفة وأرضه
بكفة... أرضه هي الي طبت، ووجعتي انتي في حچري يا معالي... ومن اليوم
ورايح معايزكيش تطري سيرته نوهائي، لا بينا ولا حتى بينك وبين روحك»
حاولت صارخة تخليص شعرها من يده:

«شج جلبي وطالعه منيه... حتى دي متجدرش عليها... مش بجولك انت مش
فالح إلا في مد يدك عليا وبس... هي دي المرچلة صوح... اضرب... اضرب كمان
يا سيف... علشان النار الي كُتم رايدين تطفوها بچوازا الشوم دي، تشعل
وتولع في كل ديار الرحامة والبداري.. أول نار هتجيد عند أختك... رافع أكيد

هيضربها زي ما بتضربني... وچاسر هيمسي سمحة بعلة و يصبحها بعلة،
بعدها نفوضها سيرة وكل واحد يروح لحال سبيله»
تراجع عنها يحدجها بنظرة مستغربة... لاهثة مشعثة تشع عينها بالكره الأعمى:
«نجوم السما أجربلك من اللي بتفكري فيه... انتي دخلتي بيتي ومش هتخرجي
منيه إلا على جبرك... فكري مليح وشوفي عاوزه تجضي أيامك معايا كيه... نكد ولا
زي مخاليج ربنا... وجسمًا بالله لو ما مشيتي عدل، وعلى مزاجي، لأتجوز عليكي
يا معالي، مری واتنين وتلاتة»
شاهقة تضرب على صدرها بقوة:

«انت!!؟ انت تتجوز عليا آني يا سيف يا بداري!!؟»
«عجلك في راسك يا بنت الناس تعرفي خلاصك.. أعاود آخر الليل ألاجي عروسة
مستنياني، مش وش البومة الي بتصبح وبتمسي بيها»
عدل من اللاسة حول عنقه، واشرأب به يرمقها بنظرات فوقية، مستمتعًا بغیظها
وغلها الذي أخذت تذوي في بوتقته... ثم غادر الغرفة صافقًا الباب خلفه.
«طيب يا سيف... إما عرفتك مين هي معالي... ميوبجاش شعري دا على حُرمة!!»



أغلق الباب دونها ووقف يرمقه بنظرة حائرة، وتنهيدة مزقت بعض نياط قلبه
القاسي... سخر من نفسه وتهديداته الجوفاء التي أطلقها اعتباطًا، وكأنه قادر على
تنفيذها فعلًا، وهو الذي لم يستطع نزع شبح ابن عمها من خيالها، ولا حتى
استمالة قلبها.

اعترف لنفسه المكابرة أنه دائمًا كان يتمنى زوجة كأمه... بنظرته العاشقة
لزوجها... كم راودت أحلامه تلك النظرة، وأقسم ألا يتزوج إلا من تحلم بوصاله
وتعشق خياله! ضم أصابعه بقبضة قوية حتى ابيضت مفاصله... وقتم بينه وبين
نفسه: «هتعثشجيني يا فرسة شاجة الريح من غير لجام... هعلمك كيه تاكلي من
يدي، وترفعي عينك في عيني وتتمني رضايا»

حدقت بالباب المغلق.. تهالكت على فراشها لاهثة من المعركة المحتدمة داخلها... معركة لا يهدأ وطيسها... تحرق كل أخضر ويابس بطريقها... كما أحرقوا ينح قلبها الغض في أرضه، رووا مهدها بالأحلام، فرشوه بوعود وصال الحبيب وعشيق الروح... تأوهت تشد شعرها من جذوره، تكاد تصرخ بلسان أخرسوه بعقد زواج.. "آه يا عمري اللي ضاع في غمضة عين!! كيه بين ليلة وضحاها أكون ملك غيرك!!" وهبت لك روحي وجبل منيها عمري، سرجوني منك غصب... آه لو تعرف، انت وحديك في جلبي ساكن، مهمن طال البعاد، ولو سيلوا دمي يروي عطشهم للجسوة، هيلجوا كل نجطة فيه موشومة باسمك".



«حمادي... حمادي...»

«خير؟ خبرك إيه يا چعيدى؟»

«البصاين اللي منطورينهم على طريق الچبل... بعثوا لي مرسال بيجولوا إن... إن...»

«ما تطرش اللي في بطنك يا چعيدى ولا تغور من خلجتي»

«هجوم أهه يابو عمه، مالك زمجان عمال على بطل إكده ليه؟! بيجولوا إن فيه

مرا... نضروها ماشية في طريق الديابا»

«ممكن تايهة ولا غريبة عن البلد»

«إيوه... ماهو ده اللي چه في بالي، بس الوليد عرفوها... وطلعت مش غريبة زي

ما فكرنا»

انتفض حمادي من مجلسه لا يصدق أذنيه، ولا عيني صديقه الملتصقتين بهريق

الاحتفال، أمسك ذراعه يجذبه بحماس ثوري:

«هي يا چعيدى... هي... جلبي مبيكدبش عليا واصل»

«إيوه... فرصتك يا حمادي... لو إني مش بالـع چيتها دي... عروسة مكملتش شهر، چاية تعمل إيه في طريق الديابا لحالها؟»

«بعدين يا جعيدي... بعدين... كني عوجت عليها، أنا نازل لتزهج وتمشي، حاكم روحها دايمًا زمجانة، بس معلش بكرة هتزوج وتحلى... بجولك إيه... خلي رجالتك صاحيين وعيونهم مـفـنـجـلة»

غمغم جعيدي، وصاحبه يركض مسابقًا الريح:

«أمرك ياـبو عمه... ربنا يستر»

مسحورة؟ مجذوبة؟ أم ندهتها النـداهة؟ كيف يحدث هذا في كل مرة تطلق لقدميها حرية التجوال بعيدًا عن قيود عبوديتها... تجد نفسها هنا... في طريق الديابا!! ما تزال كلمات حمادي ترن في أذنيها... تعرف أنها آمنة، ولم تدرِ لم وثقت بكلام رجل هو في الأصل قاطع طريق... ولكن الحقيقة أنها اشتاقت لغزله الجريء... اشتاقت لأن تدفعه عنها كلما ازداد تمسكًا بها... كانت بحاجة للشعور أنها مرغوبة حتى لو كان من رجل مطرود من دنيا البشر ومحسوب على ديابة الجبل.

«اشتجيتيلي يا عمري، كيه ما جلبني اتلوع بفراجك؟؟»

استدارت شاهدة برعب، تدرك من أول لحظة لاهثة فداحة خطئها بقدميها هنا... لثمت نصف وجهها بطرحتها تحاول تجاوزه بدون كلام. اعترض طريقها مقهقها: «على فين مهملاني وأنا ما صدجت جلبني دج من تاني؟؟ هو دخول طريق الديابا زي الخروج منيه!!؟ طب خدي واجب الضيافة لول»

«بعد عن طريجي يا حمادي»

«يا بووووووي! اسمي طالع من خاشمك كيف الكروان ساعة المغربية... اتوحشتك جوي جوي يا فريدة»

«كن أبراج نافوخك طارت يا ويلد الديابا! بعد من طريجي! لهو انت مخابرش إني على ذمة راجل!!؟ بعد عن طريجي خلى ليلتك تعدي»

«أنا مچيتش وراكي يا فريده... انتي الي رميتي حالك بطريج الديابة، كيه ما
تكوني بتصرخي بعلو حسك: (خدي يا حمادي، أنا ملكك لحالك)... إيه؟! رشاد
البداري مش مالي عينيك ولا إيه العوبارة؟»

بصوت هادر لم تصدقه ولم يقتنع به: «رشاد بعشر رچالة من طينتت»
«طبعاً... وش چاب ويلد الأكابر لويلد الديابا؟! هتصدجي لو جلتلك إني اتمنيت
لك الخير؟ شيطاني وزني وكت نويتها أجتله جبل ما ينجفل عليكم باب واحد، بس
خفت عليكي تنكسر فرحتك... لو كتي فرحانة... خفت من الخوف يهوب حداتي
جبل ما أوصلك وأحميكي منيه، واتحملت بجلب اتعمى من ظلمك، وداب في
عشجك، أشوفك تتزفي لراچل غيري»
«لا انت بچد اتخبلت صوح!»

«من زمان يا فريده وأنا مخبول بيكي وعشجك بيسري في دمي كيه النار بيحرج
چوفي، وكان ممكن أجتل كل الي يوجف بطريجي علشان أوصلك... بس انتي
اخترتي... وبعيد عني طرتي ولوفتي على وليف غيري»
«هملني أروح يا حمادي واجصر الشر»

«المرة دي مش بكيفك... انتي برچليكي چيتي لحدي يا فريده... مخابرش ليه...
بس الي أعرفه إني مجدرش أهملك تروحي من يدي مرة ثانية»
«تجصد إيه يعني!؟؟ حمادي بجولك هملني أفوت... انت متعرفنيش أنا ممكن
أعمل إيه»

«انتني الي لساي بتكابري يا جلب وعجل حمادي... انتي چيتي الليلة عشان
جدرك تكوني معايا»

هل ما يحدث الآن حقيقة أم جنح بها خيالها لحدود ما بعد المعقول؟ هل سارت
بقدميها هاربة من واقع أجهض كل أحلامها، لتقع في فخ حمادي!؟
ازداد رعبها وهو يمسك بذراعها ويسحبها معه باتجاه الجبل.

أبعدت يده عنها بانتفاضة قوية وسمرت قدميها في الأرض تحدجه بنظرات
مرعوبة لاهثة:

«هملني يا حمادي، وإواعك تستجري تهد يدك عليا مرة ثانية!»
زفر بهواء ساخن خرج من جوفه الذي يغلي كالبركان: «لح يا فريدة... الدنيا
بتضحك مرة واحدة بس في العمر... وأنا لو هملتك دلوك هندم عمري كلاته...
انتي خلاص يا فريدة بجيتي حلالي... بتاعتي»
صرخت تضرب بقدميها في الأرض:

«انت سامع حالك بتجول إيه؟؟ انت عاوز تفضحني!!؟ حرام عليك يا حمادي...
حرام عليك بكفاية بجى بكفاية، أنا مرا متجوزة!»
اقتنص مرفقها مرة أخرى يطحنه بين أصابعه بينما يهدر بأنين معذب:
«متكرريهاش جدامي!»

لاهثة حد الشعور باحتراق رئتيها، حاولت إبعاد يده عنها، ولكنه لم يفلتها ممعناً
في توصيل رسالته لها بأي طريقة، غادرت الكلمات حلقها الجاف بصعوبة:
«ولو مكررتهاش... هتنسى يا حمادي إني على ذمة راجل تاني، تعملها ما انت
ويلد ليل، ديب سهران... تسرج، وتكتل، وتخطف نسوان من رجالتها كمان»
زمجر يهدر بوحشية: «انتي چيتي لحدي برجليكي يا فريدة!»
هدرت بصوت متهدج: «ندمانة... فكرت إني...»

ضاقت عيناه بسؤال تحرق لسماع إجابته: «فكرتي في إيه؟؟»
قمعت رعشة أرجفت فرائصها وذاتها يزوي خلف قناع من الندم لتهورها:
«خلاص يا حمادي... جلت لك ندمانة... فكرتك غيرهم، لسة فيك حاجة
نضيفة... أتاريك الوساحة لبدت في توبك من زمان»

ظلمت عينيه غمامة سوداء رأت فيها ما جعلها تتيقن أن هذا الرجل عقد العزم
على ما يعدها به، جذبها نحوه محدقاً بعينيها متمماً بنبرة سلطوية: «تاها
ولجيناها... أنا وويلد ليل... وانتي المرى الي عاشجها، وبخاشمك نطجتها... أنا

اتوسخت من زمان ومعادتش النضافة تجيب همها معايا... وچعيدي جالها
حكمة وأنا مصدجتوش... جبل المشنجة مبيفرّجش... النفر منينا هيتشنج مرة
واحدة بس، همليني أعمل اللي نفسي فيه من زمان»
«جصدك إيه يا حمادي!؟؟»

أمسك بكف يدها يعتصره بين أصابعه الخشنة: «تعالى معايا وانتي تعرفي»
صرخت تقاومه باستماتة، تحاول دفعه تارة، ونزع ذراعها من بين أصابعه المطبقة
عليها تارة أخرى... وصلت من الذهول لدرجة أنها ظنت كل ما يحدث حلم، لا
يمكن أن يكون حقيقة... ووبخت نفسها لانسياقها خلف أهواء نفسها المريدة
العاصية، لماذا لم ترض بقدرها، مثل كل فتاة صعيدية خاضعة!؟ لماذا كانت
مطالبها أعلى بكثير من سقف طموحاتها الذي أحنى هامتها وكسر ظهرها!؟ وها
هي على وشك الوأد حية بيد من ظننته يوماً خلاصها.

سالت دموعها تتوسل خاطفها ربما رق قلبه... ولكنه في كل مرة يسمع توسلها،
يزيد من ضغطه على مرفقها، وكأنه يؤكد لها أنه لن يتركها أبداً.
اعترضت الطريق عاصفة من الغبار أثارتها سيارة سريعة وقفت أمامهما مباشرة
أخرج السائق رأسه من النافذة يحدجها بارتياح مع هاجس مزعج أنه قاطع
حدناً هاماً، ثم سأل حمادي بلكنة غريبة:

«بونسوار... ممكن لو سمحت... فين طريق لبيت عائلة بداري؟؟»
حدجها حمادي بنظرة محذرة، ولكنها لم تمهله ليستعد؛ استغلت غفلته عنها للرد
على الرجل، أفلتت ذراعها راكضة نحو السيارة تفتح الباب المجاور تهدر بصوت
بالكاد مسموع، بل كانت على وشك فقدان الوعي لو أبطأ ذلك الغريب في فهم
 حاجتها الماسية للهروب:

«أنا هذلك... أنا ساكنة حداهم... يالا سوج بينا طوالي!»

صرخ حمادي صرخة اهتزت لها الأرض من أسفل قدميه، بعد أن أفاق من صدمته، لحق بها وحاول فتح الباب الذي أوصدته فور دخولها، رمقته بهلع لاهثة وهو يضرب سقف السيارة بقبضتيه بتهديد ووعيد:

«فريدة!! اخرجي!! فريدة!! متهملينش يا حبة الجلب، ما صدجت لجيتك، فريبيبيدة»

بنظرات متوسلة حدجت الغريب بدموع قهر خضع لها قلبه بدون أن يفهم ونبرتها الكسيرة ترجوه: «الله يستر عرضك اطلع بينا... بسرعة»

لم يكن من قبل مؤمناً بصدف القدر، ولكن وجوده في هذه اللحظة ليلتقي بها، كانت علامة أكيدة أنه على الطريق للإيمان به. قبل أن يتمكن حمادي من كسر زجاج النافذة، انطلق بالسيارة مثيراً عاصفة أخرى من التراب، زادت من غضب الديب الأعمى، وهو يتخبط حوله ناقماً على ضياع فرصة عمره.

استرق نظرة قلقة نحوها، عيناها دامعتان، زائغتان، صدرها يعلو ويهبط بأنفاس سريعة، ساوره شك أنها على وشك الإصابة بنوبة قلبية، خاصة وقد ازرققت شفتها لقلة الأكسجين الواصل للمخ: «انت كويس؟؟ مدام... مدام؟»

لم ترد.. كانت تنتحب في صمت، لا تصدق أنها أفلتت بأعجوبة من الفضيحة، والعار الذي كان سيسمها باقي عمرها... بفضل عناية الله ثم هذا الغريب، الذي نزل عليها من السماء لينقذها من براثن الذئب المسعور في اللحظة الأخيرة... لن تنس أبداً عيني حمادي تندلعان بالشرار والسيارة تبتعد... لو كان يحمل بارودته معه لما نجت منه وهذا الغريب... هتفت بصوت مرتعش عندما أدركت أنهم وصلوا مفارق الطريق بين الرحاية والبداري:

«وجفّ عنديك، إهنيه!»

أطاعها على الفور، نزلت وأغلقت الباب، انحنى لتنظر له من النافذة، لم تهتم لرؤيته دموعها، التي ماتزال عالقة بأهدابها الطويلة، وعلى الرغم من احمرارهما،

وكحلهم المملطخ، ولكنه فوراً وقع أسير اتساعهما كبحيرة صافية متفرقة في يوم غائم.

انتبه على صوت زعيق خلفه، ليجد عربة كارو ترتفع فوقها حمولة من القصب، وصاحبها لا يبدو الصبر من شيمه. انطلق في طريقه بعد أن لوح معتذراً لتصدره الطريق بعد اختفاء حسائه السمرء الباكية.

هل سمعها فعلاً وهي تصف له الطريق!؟؟ ربما فعلت!!!... ولكنه لم يتذكر كلمة واحدة... فقط حركة شفتيها المخمليتين... بدون أي حمرة وأصباغ، أطارت ما بقي من عقله، ومذاقهما الرائع يعيث فساداً بخياله.



وقفت تراقبه من بعيد هو وجواده كلوحة متقنة التفاصيل، وقد شكّلتها فرشاة سحرية من وحي الطبيعة. خافت على قلبها العليل من دقاته المجنونة... قاومته كثيراً وتهاب الاستسلام... خياراتها قليلة جداً، وهو كرجل صعيدي لن يفهم مشاعرها، مقدار حاجتها للحب والرومانسية، حلمها وأمنية كل أنثى منذ تفتح برعمها للحياة.

فجأة قفزت صورة ضياء في خيالها... كان باهتاً ذابلاً بالمقارنة باللوحة الحية التي تصرخ بألوانها، هو وجواده كيان واحد خطف الأنفاس برشاقتة... أخرجت تنهيدة بطيها أمنية ساذجة... لو يذوب ضياء ورافع في بعضهما... سيكون الناتج رجلاً خرافياً!

بتنهيده أخرى محبطة عاودتها ذكريات ما حدث بينهما في الفترة الماضية... ثلاثون يوماً عمر زواجها منه... لم تتخيل أبداً أن يتخلى عن حقوقه الزوجية بهذه البساطة لمجرد إعلان رفضها له... كانت تستعد لنشوب معركة تدافع فيها عن حريتها واستقلالها، ولكنه أحبط كل استعداداتها، عندما أعلن إباء وعزة نفس أنه يرفض أن يفرض نفسه حين لا يكون مرغوباً. ازداد إعجابها الأخرس به، عندما

لم يطلع أهله على أي اتفاق بينهما، في حين استمر بلعب دور الزوج الحامي حتى من تحرشات حماتها المستفزة.

في المقابل، طلب منها أن تنتبه لملابسها، وأوضح أنه من الأفضل أن تستبدلها بملابس لائقة أكثر بامرأة متزوجة.

بعناد تذكرت سيف وهو يتشاجر معها لنفس السبب وبجحة مختلفة... مما زاد من إصرارها الرافض للخضوع. تحملت بتكلف نظرات أمه المنتقدة... والتي تعتقد أنها على وشك الانفجار بها في أي وقت... ولكن يبدو أن رافع يتحكم بصمامات أمانها. كانت على استعداد للمواجهة فوق أي أرض تختارها حماتها للمعركة... وكان تحرشها يتزايد في كل مرة تلتقي بها... تشعر بالتحدي البارد غير المنطوق يتصارع مع هدوئها المستقر... وفي إحدى المرات وقفت بطريقها تمنعها من المرور... أعادت زينة شعرها الأحمر المتطاير بأطراف أناملها المطلية وسألتها برقة:

«خير يا طنط... فيه حاجة؟؟»

اندفعت ست الدار:

«طنطا!!؟ طنطة إيه دي!!؟ جوليلي (يا حماقي)... مش آني اوبجي أم چوزك!!؟»

اوبجي حماتك... ولا انتي مستكبرة تجوليها!!؟»

مطت زينة شفتيها بلا مبالاة مع هزة من أكتافها: «داكور... حماقي... كويس كده؟؟»

«وايه داركور دي كمان!!؟ انتي بتتنططي عليا بلغوة أمك اللي مفهمهاش دي ليه!!»

«أقول إيه طيب!!؟ حاضر يا طنط... قصدي يا حماقي.. حاجة تانية!!؟»

مسحتها من قمة شعرها الناري، لبلوزتها الحريري الكاشفة عن ذراعيها، وحتى بنطلونها الجينز الضيق، وأمسكتها من ذراعها:

«فرچيني كده على خلجاتك... يا ماشالله يا ماشالله! هي المحروسة أمك مشورتكيش!؟»

«يعني إيه مشورت... إيه؟؟؟»

«جصدي يعني مجابتش خلجات جديدة؟ كل عروسة حدانا بتدخل بشوار جديد»

«آه فهمت... لبسي كله جديد يا طن... باردون... يا حماقي»

«وهو ده اسمه إيه!!! لا هتعرفي تعچني، ولا تخبزي، ولا تغسلي بخلجاتك دي»
«هو حضرتك قصدك كده؟؟ لا يا حماقي متقلقيش... كل الشغل الي عاوزاني أعمله من عينيا... هكلم بابا بيعت شغالة لحسابي، تيجي وتعمل كل الي انتي عاوزاه... حاجة تانية يا... حماقي؟؟»

وتركتها فاعرة فاها بذهول واكملت طريقها.

كانت ردة فعل رافع في المساء سيئة للغاية... دخل متبرماً شرارات غاضبة تتطاير وتتقافز من عينيه... أدركت من اكفهار ملامحه أن مشكلة ما على الطريق:
«في حاجة حصلت؟»

التفت لها بحدة:

«حوصل إيه مع أمي النهاردة يا زينة؟؟»

«محصلش حاجة... هي طلبت مني أعمل شغل في البيت، وأنا قلت حاضر... هكلم بابا بيعت شغالة تعمله»

«ودا معناتو إنك معملتيش»

«وكننت عاوزني أقول إيه؟؟ أرفض وأقولها أنا في بيت أبويا مش بشيل المنديل من على الأرض!؟ احترمت كلامها وراضيتها»

«يا زينة، أمي تجدر تجيب بدل الشغالة عشرة... بس هي بتحب تخدمنا بنفسها... لنها شايفة إن دا جزء من واجبها كأم وكزوجة»

«بس يا رافع بيه أنا مش أم، ولا زوجة بالمعنى المفهوم الي حضرتك بتقول عليه،
ولّا حضرتك ناسي؟؟»

«لا... مش ناسي... يظهر حضرتك الي نسييتي اتفاجنا، إننا نظهر طبيعيين كأَي زوجين... بس الي حوصل إني أنا بس الي بتنازل يا زينة هانم، وحضرتك زي ما انتي مفكرتيش تنفذي بند واحد في الاتفاج، ولا حتى عشان تراضي ست كبيرة في مجام أمك»

عقدت ذراعيها على صدرها بعناد:

«أنا مش فاهمة لحد دلوقت فين المشكلة!... أنا مش متعودة أعمل الحاجات الي مامتك بتقول عليها دي.... نقطة وخلص الموضوع»

«عنادك دا مش هيودر غيرك يا زينة»

«حضرتك بتهددي يا رافع بيه؟؟!»

«لا العفو... وأنا أطول؟! بس افتكري الدبور الي زن على خراب عشه»

وبخت نفسها لعنادها الأحمق الذي سيقضي على حلم رافع معها... وبعدها ستندم فعلاً لو قرر أن يغير معاملته لها...

مر يومان فقط على هذه المواجهة... خائفة من ردة فعله، وبانتظار هبوب عاصفته في أي وقت. اعتدلت في وقفها عندما أخذ الخدر في أعلى ذراعها يزداد، وقد بدأت تصاحبه نغزة مزعجة في الصدر، مع ضيق في التنفس... كانت بوادر الأزمة تتصاعد، بينما انحصر تفكيرها في العودة بسرعة لغرفتها، قبل أن يلاحظها أحد...

كانت تختلس طريقها للعودة، عندما اعترض جاسر طريقها بنظراته الغريبة:
«سا الخير يا عروسة»

أجابته بترم وحاولت تجاوزه، ولكنه عاد ليقاطع طريقها:
«مستعجلة ليه؟! ما حنا واجفين نتحدثوا!»

كانت تحاول إمداد رثيها بالمزيد من الأكسجين كما تعودت، ربما مرت الأزمة على خير، غير واعية تماماً لحديث جاسر وثرثرته.
اننفخت أوداجه برحيق الحياة، فقد كانت بعينها المشعتين بزرقة بحرية منعشة، كشعاع شمس دافئة في يوم بارد... ذلك الشعور المبهج بالانتعاش مع الدفء والرغبة المتزايدة في احتواء الحبيب.

التهبت عيناه برغبة تأججت في أحشائه، لا تقارن بأي رغبة قد يكون شعر بها نحو أي أنثى، ولم يوقفه إلا فرسته الحمراء العنيدة؛ ما تزال لا تراه رجلاً كفاية ليمسك بزمامها... لقد وافقها على كل طلباتها على أمل أن تشعر مع الوقت بخطأ اعتقادها، ربما عندما تزداد معرفتها به... وتدرك من داخلها أنه فارس خلق ليفوز بها في كل سباق... انتبه لعودتها أدراجها بعد أن اكتفت بعرضه الذي كان حصرياً لها فقط.

لم يدر لم بدأ القلق ينخر أفكاره... حث جواده يقترب منها؛ فإحساسه بها لم يولد من فراغ... ولكن.. ما هذا الإحساس؟! حث جواده على العودة عندما لاحظ بضيق جاسر يعترض طريقها... زم شفتيه بشعور مجهد من الغيرة لم يعرف مذاقه من قبل... ضاقت عيناه بقلق... كانت تترنح أمام ابن عمه اللاهي في التحديق في حمرة الشفق المشعة من شعرها.

زاد من سرعته عندما تهاوت على ركبتها وهي ما تزال تحاول الثبات حتى تمر الأزمة؛ فهي معتادة على مثلها، ولكنها المرة الأولى التي تستمر كل هذا الوقت... تمت بأنين خافت أن يكون رافع قد ذهب بعيداً وجاسر يصيح بقلق منادياً عليها.... خاب فألها عندما سمعت أصوات حوافر الجواد تقترب يصاحبها نداء صاحب باسمها.

حاولت النهوض وهي تكز على أسنانها بإرادة واهنة... قفز رافع على الأرض راکضاً نحوها الخطوات المتبقية، دافعاً ابن عمه بغیظ... لف ذراعه حولها يسألها بجزع: «زينة... زينة... مالك؟؟ جراك إيه؟؟»

حاولت الإمساك بيده لتطمئنه بحروف متقطعة بالأنين لم يفهمها، فحملها يركض بها داخل البيت... استقبلته أمه بتساؤل: «حوصل إيه يا ضنايا؟؟ چرالها إيه مرتك؟؟»

«ما خابرش يماً... فجأة وجعت من طولها!»

«لجحها إهنية يا ولدي في أي مو طرح... هتكسر ضهرک يا حبيبي»

«يووووه يماً ودا وجته!! الحجي وناوليني تليفوني وحصيلني بيه على فوج»
لحقته بصراخها:

«يا رافع.. هتطلع بيها كيه على السلم دي... تجيلة عليك يا ولدي!!؟ نزلها وهي تمشي لحالها كيه الجرود... يا رافع انت مستغني عن صحتك يا ولدي!!؟»
«خير يا حاجة.... بتزعجي ليه؟؟»

«شوفت يا وهدان... البت مسورجة ورافع جال شايها على جلبه وطالع بيها السلم!! يا حبيبي يا نضري كان مستخبي لك فين دا يا حبيبي!!؟»
أسرع وهدان ليصعد السلم متمماً محدجاً زوجته بغضب: «أستغفر الله العظيم!! بدي أعرف الي في راسك ده مخ ولا شوربة كوارع!!؟»
«يووووه وانت رايع فين انت كمان!!؟ هي البت دي عاملة لكم عمل.. عملها اسود ومهبب بت الخوچاية؟؟»
دخل وهدان بعد أن تنحنح: «إحم إحم... خير يا رافع يا ولدي؟؟ مرتك عاملة إيه؟؟»

«شوفة عينك يابوي... أمي اتصلت بالدكتور؟؟؟»

انتبها لصوتها الخافت خلفهم: «لا... مفيش داعي للدكتور... أنا بقيت كويسة»
أسرع رافع نحوها يمس بيدها:

«صوح يا زينة؟؟»

«الحمد لله يا رافع... وألف مبروك يا ولدي»

التفت كلاهما لوهذان بنظرات استغراب:

«خير يابوي؟! تبارك لي على إيه!؟»

ضحك بقهقهة وفخر:

«باينة زي عين الشمس... مرتك حبلى... مبروك يا ولدي... هروح أبشر الحاجة»

«يابوي... يا...»

التفت لزينة التي لم تكن أقل منه ذهولاً:

«خرج!»

شهقت ببحة:

«ومستني إيه!؟ الحقه قبل ما الدنيا كلها تعرف!»

«إيوه عندك حج... بس انتي إيه اللي حوصل لك؟»

«لا... ولا حاجة... يمكن بس تعبت من الشمس»

«طيب... هروح ألحج أبوي»

أسندت رأسها بالوسادة تُخرج تنهيدة طويلة... ثم أغمضت عينيها بقوة تعض

على شفتها... رنين هاتفها بنغمته المميّزة لأُمها جعلتها تمسكه بلهفة وعيون

دامعة.. لا بد أن أمها العزيزة شعرت بأملها: «ألو... ماما... انتي.... إيه!؟»

وفي لحظة، نسيت كل آلامها وهي تنهض مفزوعة من مكانها... والعرق يتصبب

من جبينها:

«داكور ماما... أنا هاجي فوراً»

دخل رافع وهي تضع الهاتف جانباً تحديق في الفضاء بذهول... لم ينتبه لحالها

وهو يهز رأسه بأسف:

«أبوي بلّغ الدنيا كلاتها... الفرحة مش سايعاه... وأمي بتبل الشربات، معرفش

هجومهم إيه.... زينة.... مالك؟؟»

«لا... ولا حاجة... أنا... ضروري أروح لماما دلوقتي... هي تعبانة وعاوزاني»

«لا ألف سلامة عليها... حالاً هناخدوكي ونروح»

صرخت بهلع:

«لأ... لازم أروح لوحدي... معلش يا رافع... ماما عاوزاني في حاجة خاصة و...»

«خلاص براحتك... هجهز لك الكارثة، والغفير هيوصلك وهيرجعك»

«مش لازم... أنا بعرف أسوق الكارثة»

«لع يا زينة، والحديث ده مافيهوش مجادلة... ومتتأخرش... انتي بجيتي زينة

دلوك؟»

ضحكت برقة ذكرته بقلبه الذي ينبض بنغمة مختلفة كلما سمع رنين ضحكتها:

«أنا زينة على طول... مش بغير اسمي»





«الحب لا يقتل العشاق... هو فقط يجعلهم
معلقين بين الحياة والموت»
- جيرالدي

.....

كانت مدركة لصعوبة الوضع في البيت... لا شك أن سيف على آخر درجة من
درجات غضبه، ووالدها يحاول التصرف بتمدن، ولكن الطبع غالب... استقبلتها
أمها والقلق يرسم ملامحها باتقان:

«زينة... حمد لله... أنا مش عارف إزاي ولد دا يبجي بدون إذن... بابا وسيف
هيكتلوه... الحكي بسرعة!»

«داكور ماما... اهدي... هم في المندرة؟؟»

«وي... وي»

أخذت نفساً عميقاً ودخلت إليهم... كما توقعت... الرجال الثلاثة على درجات
متفاوتة من الغضب، وإن وصلت كلها لدرجة الاحمرار... هب سيف يجذبها من
ذراعها:

«اتفضلي يا مدام... شوفي مجاييك!!»

هدأه والده: «همل أختك يا سيف... وخلينا نتفاهموا»

نفضها عنه ودفعها بخشونة:

«اتفضلي... لما نشوفوا... والله لو رافع شم خبر بالوجعة دي لتطير فيها رجاب!»

اتجهت ناحية ضياء الذي ظهر عليه التعاطف الحذر... وبدون أن تمدها
لمصافحته:

«بونسوار ضياء»

لوح بيديه في الهواء:

«بونسوار زينة... أنا مش عارف أقول إيه... يبدو أني أسبب إحراج كبير»

أخرجت زفرة سببت لها ألماً في صدرها فكتمتها:

«انت طلبت إيدي... وأنا قلت هفكر... أنا مش رديت عليك.... أنا...»

ضاقت عيناه وهو يحدها بنظرة الخبير وسألها بقلق:

«زينة... انت كويس؟؟»

وضعت يدها على صدرها تعض على شفتها:

«ضياء... انت لازم تمشي... قبل ما تحصل مصيبة... انت مش عارف إيه ممكن

يحصل لو...»

تقدم نحوها بلهفة فصرخ سيف:

«وجف عنديك!»

نظر لوالدها بتوسل: «زينة تمر بأزمة قلبية... لازم نلحق...»

وقبل أن يكمل، كانت تتهاوى على الأرض، فأسرع نحوها يستقبلها بين ذراعيه،

ثم صرخ بسيف الواقف مصدوم:

«إذهب إلى سيارتي... هات حقيبتتي... بسرعة!!»

صرخ رضوان عندما وجد ابنه مسمراً في الأرض:

«هم يا سيف يا ولدي! أختك هتضيع منينا!!»

دخلت فاليريا جزعة، تصرخ عندما رأت ابنتها ممددة على الأرض، والضيف

الغريب يحاول دفعها للاستجابة لندائه.

وصل سيف بالحقيقية متجاهلاً نداءات معالي، التي لاحظت الحركة الغريبة،

الخارجين والداخلين للمندرة، والجميع صامت، شاخص وكأن على رؤسهم الطير...

أمسكت هنا تسألها:

«بت يا هنا... جوليلي.. هو إيه اللي بيحصل؟؟»

كتفت هنا ذراعيها قائلة ببرود:

«وأنا إيش عرفني؟! ما أنا واقفة زيك أهه!»
«يخرب بيت رخامتك!! طب ما تدخل تشوفي إيه اللي بيحصل!»
«ما تدخل انتي! هو انتي صغيرة?!»
«أعوذ بالله منيكي بت!! انتي چايبة كل التباتة دي منين؟! أمك الخواچاية حلوة وفرفوشة... أكيد من خوكي البو، ما هو العرج دساس!»
«أمسكت فاليريا بيد رضوان تستمد منه القوة:
«ردوان... زينة مش بتفوك... زينة هـ...»
«اذكري الله يا فاليريا... الداكتور بيشفو شغله»
بعد لحظات طويلة مرت كساعات عرجاء العقرب، تنهد ضياء بشبح ابتسامة:
«حمدًا لله على سلامة... ما هذا الاستقبال!!؟... انت عارف إنك اتأخرتي كتير على علاج... كان لازم تعودني من أجل عملية»
تنهدت محاولة التشبث بها يساعدها لترفع نفسها... دفع سيف ضياء بخشونة
يمسك بيد أخته... ساعدها حتى جلست بجوار رضوان... شبح ابتسامة شحيحة
لوّن شفثيها، وملامح القلق لانت لها ملامح سيف الجامدة. تمتمت دون أن تترك
يده:
«أنا بخير يا سيف... اطمئن»
«زينة.. دي مش أول أزمة?!»
زفر بغضب عندما أومأت بهزة بسيطة من رأسها. نظر لوالدها:
«انت مسؤول عن حياتها... هي كان مفروض تنهي علاج، وبعدين لو لم يوجد
تحسن لازم عملية... انتظرت كتير ولم تعد... وهذا سبب وجودي اليوم»
هتف سيف هازنًا:
«وحضرتك بتچري ورا كل مريض، وتعدني له بحور تسأل عليه!!؟»
بحدة صاحت فاليريا:
«سيف!! بدل ما تشكر طبيب...!!»

ربت رضوان على يد ابنته:

«الحمد لله إنك بخير... ويمكن ربنا جدر ولطف، ووجود الداكثور دلوك من تدابير ربنا... أياً كانت أسبابه... هو ضيف، وضيافته واجبة، ياخذها من العين دي زاد، ومن العين دي مية»
أوما ضياء شاكرًا:

«شكرًا عمدة... بس زينة لازم يسافر»

«هو إيه اللي بيحصل إهه!!؟ ومين الراجل ده!!؟ وكيه تسمح لمرتي تجعد وياه يا حاج رضوان!!؟ إيه المساخر اللي بتحصل من ورا ضهري دي يا كبرة البداري!!؟»



اقتحم جاسر بيته يكاد الغضب يعميه، والمشهد يتكرر أمام عينيه بلا انقطاع.. زينة تنهار أمامه... يظهر رافع وكأن الأرض انشقت عنه من العدم... يحملها بين ذراعيه يضمها ل صدره.

ضرب بقبضته على صدره بغل شديد، يود لو استطاع اقتلاعها، ولكنها في كل يوم تزداد توغلًا كالعشبة الشيطانية، حتى وصلت لأنفاسه، يكاد في كل وقت يشم رائحتها... حتى في زوجته.

«جاسر... مالك ياخوي مش على بعضك ليه؟؟»

لوح بيده في وجهها:

«غوري من خلجتي السعادي!»

بحدة وضعت يديها في خصرها: «وإن مغورتش هتعمل إيه!!؟»

«سمحة... اتجي شري في الساعة الغبرة دي!!»

«يووووه! هو كان حوصل إيه يعني!!؟»

تركها ودخل غرفته وأغلق الباب خلفه.

انتظرت بصبر هدوءه، وغريزتها الأنثوية تحثها على التصرف بحيلة؛ فلا شك أن حاله المقلوب بسبب ابنة عمها التي يهواها.

بردت مراجلها المشتعلة، ورسمت وجه الزوجة السعيدة، دخلت الغرفة لتجده واقفاً أمام المرأة يلف عمامته بطريقة احترافية، ثم أخذ يقتل شاربیه متجاهلاً انعكاس صورتها خلفه، وحاجبيها يتراقصان لأعلى وأسفل... كان بهزاج عكر لمشاكستها؛ فهي كل مرة تدهشه بردة فعلها:

«على فين يا سبعي؟؟ لسة بدري!»

تتم من خلال المرأة: «مجنونة!»

«بتجول حاجة؟! يستهيا لي كده إنك بتتحدث معايا»

أجلى صوته بصوت مرتفع استدار نحوها:

«لاه... ولا حاجة... شايفك جاعدة تهري وتنكتي في نفسك... كت بجولك ماتروحي لأملك من زمان ماشافتكيش... إيه متوحشتكيش!؟»

ضربت إحدى يديها بالأخرى كأنها اكتشفت اكتشافاً:

«إيوه جلت لي... عاوز تهجچني من البيت علشان تدور تنصرمح على حل شعرك!»

قهقه ضاحكاً مشيراً لعمامته:

«هو فين شعري دا يا مخبلة اللي هتنصرمح على حله!؟ وأنا مش محتاج أهچچك علشان أعمل اللي بكيفي... انتي خابرة زين يا سمحة، إني بروح وباچي ومحدش يجدر يجولي تلت الثلاثة كام»

«لاه يا چاسر... أنا هجولك تلت الثلاثة كام... ومش كده وبس... انت كمان معتش هتخرچ من البيت، وهتسهر معاي، آني مرتك وأهم عنديك من صحبة الغوازي كل ليلة»

«لع يا سمحة مش هيوحصل... مش على آخر الزمن هتاچي حرمة تمشيني على كيفها... آني چاسر الرحايمي البلد كلانتها تمشي على كيف كيفي»

«إكده يا چاسر؟! طب ورب الكعبة اللي مبحلفش بيه كذب أبداً... لو طلعت الليلة هترجع مهتلاجنيش!»

«هع!! هتروحي فين يعني!!!؟»

«هروح لدار أبوي وخوي يشوفولي صرفة معاك»

بتهكم: «الباب يفوت چمل... بس حطيتها حلجة في ودانك... لو خطيتي عبته الدار ملكيش رجعة واصل»

بنزفرة وعصبية:

«وأنا هبكي على إيه يا حسرة؟! حوش حوش الحنية اللي بتصب منك صب!»

«وانتي حوشي لسانك اللي بينجط عسل!! من يوم فرحنا وانتي لسانك البعيد متبري منيكي... مين مستغني عن عمره يجعد معاكي وانتي وشك يجطع الخميرة من البيت؟! أروح أفرفش حالي... أجعد لي جعدة زينة.. أشرب وأمز وأعدل مزاجي اللي عوچتيه بنجك ونجيجك»

شهقت وعيناها تلمعان بجنون:

«هو ده مربوط الفرس... زينة... حالك مجلوب ومطايجنيش عشان زينة... مش إكده يا چاسر؟؟ والله لو رافع شم خبر ليدفك موطرحك»

«بأااااااه!! بدينا النج!! أروح لنوارة ترجصلي وتفرفشني بعيد عن الهم ده.. أعوذ بالله... أعوذ بالله!»

هل انتهت حكايتها قبل أن تبدأ؟! فتحت عينها على الدنيا فوجدت حبه معشاً في وجدانها... مولود بلا أمل... حب تعرف أن نهايته الموت الحتمي... بين ليلة وضحاها يلعب القدر لعبته، تجد نفسها أصبحت زوجته... وما يزال بلا أمل!! ربما كان أقرب لخيالها عندما كان مجرد أمل مستحيل.... مسحت دموعها بقوة صارخة: «لكن لا... مش آني يا چاسر!! والله ما أسيبك إلا بالدم!! وهنشوف... هنشوف يا چاسر يا رحامي!»



«هي فريدة فين يما؟؟ لسة معاودتش؟؟»

«لا والله يا بني... تأخرت أوي... ما تقوم تشوفها يا ضنايا... مكانش المفروض تخليها تروح لدارها لوحدها... أهلها يقولوا إيه!؟»

«انتني اللي بتجولي إكده يما!؟ إش عجب يعني!؟ من يوم ما اتجوزتها وانتني مطيجهاش!»

«الأصول أصول يا بني... والبنية بأمانة ربنا مشفتش منها حاجة وحشة... أهه الباب بيخبط تلاقيها وصلت»

نهض يفتح الباب... وقف مذهولاً أمام منظر زوجته المزري... بقايا دموع ما تزال معلقة بأهدابها وعينيها المحمرتين، كحلها الملطخ، وملابسها غير المهندمة:

«فريدة!! مالك؟؟ حوصل لك إيه؟؟»

دفعته لتدخل محاولة التماسك:

«ولا حاجة... بس وجعت في الطريح»

ردد كلمتها بدهشة أكبر: «وجعتي!!؟ واللي توجع تبكي ليه!!؟»

صرخت بانتحاب:

«إكده وخلص يا رشاد... حوصل إيه يعني!؟؟ هتحاسبني كمان على البكا!؟ دي بجت عيشة تجصر العمر!»

وقف مذهولاً يراقبها تنتفض من الغضب، ثم دفعته من كتفه لتصعد غرفتها أمام نظرات أمه المصدومة.

لوحث بيديها مع التواء فمها يميناً ويساراً:

«يا فرحة العدوين فيكي يا زينات!! خيبة على الرجالة!»

ثم ربتت على كتف ابنها، يبدو وكأن الدخان يخرج من أذنيه: «هم قالوا يا أهل النساء ولا يا أهل الرجال... يا ميلة بختك في ابنك يا زينات!!»

«بكفياكي ولولة يما... حرام عليكي... مش عيشة دي!!»

«بدل ما تشخط في أمك يا سبعي، اطلع شوف المحروسة مراتك، اشكمها ولا إديها قلمين... مش هي دي اللي بعترت كرامتك قدم أمك؟ ولا انت مش قادر على الحمار هتتشطر على البردعة!؟»

أمسك طرف جلبابه وصعد للدور العلوي يطوي الدرج مثنى ورباع... اقتحم الباب فارتطم بالحائط من قوة اندفاعه... كانت جالسة على فراشها ظهرها للباب... التفتت لتفزع من منظره وهو يدفع الباب بقدمه ويهجم عليها... وقبل أن تدرك نيته كان يسدحها على الفراش وينهال عليها بالصفعات... لم تحاول دفعه... لم تقاوم... كانت تدفع ثمن خطئها الذي لا يعرفه...

توقف أخيراً عندما لاحظ خيوطاً حمراء تسيل من فمها وأنفها... جلس جوارها لاهثاً متجهماً... بينما لم يصدر عنها أي صوت... لا نحيب ولا بكاء ولا أي تأثير عن ضربه الوحشي لها.... صرخ لينتفض جسدها من مكانه بدون أن تتحرك:
«انتي عاوزه مني إيه!؟؟»

سألته بصوت هادئ وكأنها عجزت عن الشعور بكل تلك الأوجاع التي يئن منه جسدها:

«سؤال واحد.... ليه!؟؟»

وبدون أن يسألها، ولا حتى ينظر في عينيها، كان يعرف قصدها... أشاح بوجهه المهزوم:

«لمِّي خلجاتك... هروحك بيت خالك»

اعتدلت جالسة مكانها، تتحرك كالإنسان الآلي، تحمق به والغمامة التي كانت تقف كحائط سد تمنع عنها الرؤية قد انزاحت فجأة! شهقت:

«رشاد... انت.... انت...!!»

بمجرد أن ملح الاتهام بنبرتها، التفت لها بعينين حمراوين، ورفع يده عالياً ينهال عليها صفعاً من جديد. نظرت ليده باستهانة:

«هي دي الطريقة اللي تحس بيها إنك راجل صوح!!؟ اضرب... اضرب يا رشاد
يمكن تشفي غليلك... ويمكن تحس إنك راجل بحج»
توقفت ذراعه في الهواء وتهذلت على جانبه... أطرق رأسه حتى ظنته ينتحب...
لسبب لا تعرفه أشفقت عليه... حاولت مد يدها تلمس عمامته... شعر
بمحاولتها... نفذ عنه رماده ووقف يحدجها بنظرات نارية، وصوت زلزل
الجدران:

«انتي مفكرة نفسك مين!!؟ فوووجي... أنا رشاد البداري... سامعة؟؟ إلا جولي لي،
انتي كتي فين من عشية؟؟ اتاخرتي ليه وداخله كيه وابور الزلط!!؟»
ركبها شيطانها المرید، دفعته ووقفت لتجابهه عاقدة ذراعيها على صدرها بتحدى:
«كت بتمشى... لحالي»
ضاقت عيناه وذكريات الماضي تراوده لتؤجج المزيد من نيران غضبه:

«كتي بتمشي... فين؟؟»
وقبل أن تنطق كان يعرف... رأى إجابتها بين نظراتها المتحدية وهي تجيبه بكل
وقاحة:
«كت في طريق الديابا»

استحقت تلك الصفحة أيضًا، ولكنها تلقته هذه المرة لا لشعورها بالذنب، ولكن
لتدفعه للانحدار أكثر وأكثر... صرخت عندما توقف:
«إيه وجفت ليه!!؟ ما تضرب كمان! ولا انت مش عارف أنا كت هناك ليه!!؟ مش
عارف يا رشاد!!؟ كت رايحة لحماذي... إيوه... بس معارفاش ليه... يمكن عشان
كان نفسي في راجل يعوضني عن كل سنين الشجا والغلب اللي عشت فيهم يتيمة
وأبوي حي... ولأ يمكن كان نفسي أرتاح وأحس بحالي بني آدمة من لحم ودم...
عاوزة تعيش... بس هي دي كل مطالبها... معاواش حاجة تاني... أعيش
ويوبجي لي بيت لحالي... محدش يتحكم فيا... ومحدش يتمنن عليا... جُمت
اتجوزتك يا رشاد... ومن أول ليلة... دبحتني بسكينة تاملة... ودلوك بس عرفت

ليه... عارفة إن كان صعب إنك تصارحني بحالتك... بس كان ممكن تعوضني
بالحنية... كان ممكن تشتريني بالكلمة الحلوة»

تهكم بمرارة:

«ودا اللي روحك عنديه.... الحنية والكلمة الحلوة؟؟»

«حمادي كان رايدني من زمان الزمان»

«إيه اللي رجحك؟؟»

بدون أن تنظر له:

«رغم كل عمايلك... انت متستحجش مني إني أدس راسك في الطين... ولا خالي

يستحجها مني»

جلس منهكاً دافئاً رأسه بين ركبتيه:

«انتي عارفة إني لازم أكتلك دلوك»

«وايه اللي موجفك!!؟ اطمن... مش هعافر... أنا خلاص يا رشاد زهجت من

الدنيا باللي فيها... ومعادتش تهمني واصل... اللي يريحك اعمله يا خوي... اكدة

ولا اكدة أنا ميتة»



❁ ١٢ ❁

«الذي يحب يصدق كل شيء ، أو لا يصدق أي شيء»
- جيرالدي

.....

كانت الحرب تدق الأبواب... يكفي أن تتواجد في تلك الغرفة داخل سرايا
البداري، وتتأمل كل هذه العيون تتبادل النظرات القاتلة، لتدرك أن الليلة لن تمر
دون أن يسفك دمًا.

أعاد رافع سؤاله مرة أخرى عندما لم يقابله سوى الصمت في المرة الأولى:
«أنا سألت... إيه اللي بيحصل ده يا عمي رضوان؟؟ هي دي الأمانة اللي فايتهنا
لك!!؟؟ تجعد مرقي في حضرة راجل غريب!!؟؟»
انتفض ضياء يحاول تدارك الموقف:

«انت فهمت غلط يا سيد... أنا أكون دك....»

قاطعته زينة شاحبة وهي تسرع لتقف جوار زوجها:
«ضياء كان... خطيبي يا رافع... انت عارف إني كنت مخطوبة... بابا سبق وقالكم
كده... لما اتأخرت جه بنفسه يطمئن عليا... ومكانش يعرف بالي حصل»
ضاقت عينا ضياء لا يفهم ما يحدث... كان بإمكانها أن تخفي مسألة خطبتها له
وتخرج من المشكلة بادعاء أنه طبيبها المعالج... هز رأسه بنظرة عتاب مسترقة
تجاهلتها. انتبهت لرافع الذي ازداد احمرار وجهه وهو يغرز أصابعه في مرفقها
ويجذبها بقسوة:

«انتي بتجولي إيه!!؟ خطيبك!!؟ وحضرتك فايثاني في الدار وكذبتني عليا وجولتي
إن أمك عيانة... وچاية تشوفي خطيبك!!؟ انت فاكراني إيه!!؟»

هب سيف يدافع عن أخته عندما رآها بين يدي زوجها، كالورقة في مهب الريح لا
حول لها ولا قوة، رغم رفضه للموقف بأكمله:
«ارفع يدك عنها يا رافع... متنساش إننا واجفين»
التفت له رافع بدون أن يفك قيدها:
«لا راجل يا سيف... راجل صوح واختك جاعدة مع... خطيبها من ورا چوزها،
وانت مركب الجرون وجاعد»
هتف رضوان:
«عيب يا رافع... ما يصحش الكلام دا يا ولدي... افهم اللي حوصل ولو لك حج
هتاخده»
جذبه سيف من تلايبه ليجبره على ترك أخته، ولكنه ظل متمسكاً بها وهو ينظر
ليد سيف التي تمسك به:
«ارفع يدك عني يا سيف أحسن لك»
صرخت فاليريا باكية:
«هرام أليك! زينة تأبان!»
انتبه لزوجته التي يتفصد جبينها بالعرق وقد غربت عيناها... زمجر ضياء:
«انت مش بتفهم... هي عندها أز...»
صرخت زينة مرة أخرى لاهثة بصعوبة:
«لو سمحتوا... اخرجوا برة... أنا هتفاهم مع جوزي لوحدا... أنا آسفة يا بابا،
وماما... أنا هكون كويسة.... سيف أرجوك خد ضياء دلوقتي واطلعوا»
ثم نزعت ذراعها من رافع:
«لو سمحت... ابعد إيدك عني واتفاهم معايا بالعقل»
أومأت لوالدها، طاوعها بدون رضا؛ فقد كان يعي جيداً تطورات الموقف لو لم
تستطع زينة تحجيمه:
«سيف... اعمل اللي أختك جالت لك عليه»

«هتخليها لحالها معاه يابوي!!؟ هيكتلها... مش واعي عيونه بيطج منيها الشر كيه!؟»

دفعه والده:

«متخافش على زينة... واحنا هنكونوا جريبين منيها مش هنروح لبعيد... يلا يا حاجة... اتفضل يا دكتور»

أطاعه ضياء، ولكن ليس قبل أن يرمق رافع باشمئزاز قائلاً قبل أن يغلقوا الباب:
«انتم إزاي تجوزوا زينة لشخص دا!!!؟»

وبالطبع اخترقت الكلمات أذن رافع، الذي حدج زوجته بتهكم:
«خطيبك الـ... دكتور... مش عارف كيه چوزوكي ليا... تحبي ننادوا له ونجولّه مين السبب في الورطة دي؟»

جلست تحاول تهدئة أنفاسها بزفرة أنهكتها:

«خلاص يا رافع... لو سمحت مش عاوزه مشاكل»

«المشاكل هي اللي چت لحدي يا بت الناس!»

«أرجوك... انت فاكّر نفسك جوزي بجد!!؟ ولا نسيت إننا بنمثل قدام أهلك وأهلي علشان فيلم السلام بين الرحاية والبداري»
حك ذقنه غير الحليقة مفكراً:

«دا معناتو... إن حضرتك بعد الطلاج هترچعي لاسمه إيه ده؟؟ وكل فيلم الاتفاج بيناتنا، اللي كتبتيه وأخرجتيه ببراعة لنفس السبب؟؟»

«وانت مالك!؟ بعد ما نفصل أنا حرة»

«آه عندك حج... بس يا مدام يا محترمة، طول ما انتي على ذمتي، المفروض إنك تحترمي الراجل الي انتي شايلة اسمه»

«أنا مش فاهمة انت بتعمل كل دا ليه... انت دخلت لقيتيني مع ماما وبابا وأخويا معاه... مش ظبطتنا لوحدا في أوضة ضلمة!»

تصلبت عروقه لهذا الخاطر، واحمرت أذناه، وهم بقبض أصابعه على عنقها، ولكنه تراجع في آخر لحظة: «أبوكي وأخوكي خابرين زين إن الي حوصل ده لاهو من عوايدنا ولاهو من أخلاجننا... ورغم إكده بعثوا لك عشان تجابليه»
ضغطت على صدرها بيدها تحاول التقاط أنفاسها بهدوء... ثم أدركت فجأة أنها بتدهور حالتها هذه لابد من العودة لاستكمال علاجها... وما حدث اليوم سيتكرر وربما سيعرف رافع بمرضها... لا.. لا مستحيل.

«مالك... فيكي إيه... لسة تعبانة؟؟»

رفعت رأسها بنظرات متحدية وصوت هادر:

«رافع... احنا لازم نتطلق... أو على الأقل ننفصل ونمهد للطلاق»

وقف متجهماً يحدجها بنظرات متوجسة:

«مرة واحدة إكده!!؟ مش كنا اتفجنا...»

«أنا آسفة... بس مش هينفع»

«وعرفتني ميتى إنه مش هينفع؟؟ لما جه المحروس أبو بدلة وكرافته، ولجيتي إني

ماليجش بحضرة چنابك؟؟»

همت بالدفاع عن نفسها... ثم قررت السكوت.

«إيه!!؟ مش لاجية حديث تدافعي بيه... ولا كلامي صوح؟؟»

«مش عارفة أقولك إيه... بس انت أكيد مش هتخليني أعيش معاك غصب

عني»

اعتدل بكبرياء قائلاً بعنفوان:

«لاه... مش آني الراجل الي أجبل إن مرقى تعيش معايا مغصوبة»

«خلاص... نمهد للإنفصال»

«لع... مفيش تمهيد... لحد إهنة وخلصنا... بكرة أبعت لك ورجتك!»

رمقها بنظرات متعالية، وهو يتلفع بعباءته ويغادر كالقاطرة البخارية القديمة

التي تُخرج دخاناً من كل مكان... دخل رضوان وزوجته للاطمئنان عليها:

«زينة... انتي بخير يا بتي؟؟»
«أيوه يا بابا... خلاص... رافع هيطلقني»
«لا حول ولا قوة إلا بالله، ليه بس إكده يا بتي؟؟»
«أنا تعبانة أوي يا بابا... وهو مش راضي إني أسافر أخلص التزاماتي، ولازم أسافر زي ما ضياء قال»
«وليه معايزاش چوزك يعرف؟؟»
اندفعت: «لأ... مش ممكن... ممكن شهامته تخليه يجبر نفسه إنه يعيش معايا... وأنا مش هقبل كده!»
ربتت فاليريا عليها دامعة:
«بس دياء كمان كان عاوز يتجوز انت!»
«ضياء عارف حالتي يا ماما... وموافق... إلّا... هو فين؟؟ مش شايفاه»
أجابها والدها:
«دار عمك اتصلوا عاوزين دكتور... يظهر إن فريدة تعبانة... وطبعاً مفيش جدامنا غيره هو اللي موجود دلوك... بجولك إيه يا بتي... راجعي نفسك... رغم ظروف الجواز بس كنت شايفك مرتاحة لرافع... وهو كمان»
«خلاص يا بابا... اللي قلته لرافع مش هينفع إني أرجع فيه... خلاص حكايتنا خلصت»



بقلب مقبوض وصدر ضائق بأنفاسه، شد لجام جواده لتنطلق الكارثة تسوس الأرض الوعرة بعجلاتها... لم يشعر بنفسه _ وهو الذي لم يقس يوماً على حيوان ضعيف _ وهو يلهب ظهر جواده بسوطة بدون وعي ليزداد سرعة، علّ نسيمات الليل التي تلفحه بلا هواده ترطب ولو قليلاً من النيران التي تغلي مراجلها في جوفه... وصرخة بقوة عشرة ريخت تترجرج داخله مهددة بزلزال، لو استطاع الهروب من أسرهِ... صرخ يستحث جواده وكأنه يحثه على الطيران، لمكان آخر

بعيداً عن مواجهه... عاتب نفسه على ضعفه... منذ متى؟! منذ متى خضع قلبه الصعيدي لعشقها؟! منذ متى لانت عريكته، وهي التي لم تخذعه لحظة واحدة؟! منذ الليلة الأولى حذرته أنه لن يكون أبداً فارسها... أحرقتة دموع أبي كبرياؤه أن يذرفها ولو بينه وبين نفسه... حتى هي لا تستحق فكرة ربما تراوده عنها... وإن كانت مجرد ذكري طيفها لا تستحق إلا كل لعنة منذ بدء الخليقة تلعن كل خائنة.. هتف بداخله صوت العقل: "ولكنها لم تحبك حتى تخونك".

صرخت كرامته الجريحة:

"بل خانت.. عيونها خانت... إحساسها خان.. يداها... قدمها... كل ما فيها خانه... وكيف لا تكون وهي ملكه من أطراف أصابع قدميها، وحتى آخر خصلة في شعرها الناري؟! وليس من حقها أن تخونه".

أوقف جواده بشدة مباغته للجام، ثم ألهب ظهره مجدداً ليستدير على عقبه مصمماً على العودة للأخذ بثأره منها... يلوم نفسه ويوبخها بشدة لتخاذله، وتهاونه وابتعاده بكل سلاسة بدون أن يقتص منها لكرامته.. بدون حتى أن يجعلها تدفع الثمن أضعافاً... و بإصرار زفر أنفاساً حارة عاقداً العزم، عندما أوقفه صوت طلقات البارود تدوي صداها بين الجبال المحيطة، أعقبها صرخة كعواء حيوان جريح... تطلع حوله مدرّكاً رائحة الموت تغزو بلدته الهادئة... وهذه علامة لا تبشر بالخير أبداً.



قفزت صارخة من نومها شاهقة، لاهثة ويدها تضغط على صدرها تنن بوجع:

«أعوذ بالله من الشيطان الرجيم... أعوذ بالله من الشيطان الرجيم»

أفاق من نومه يستدير لها قلقلًا:

«حياتي... خير انتي بخير؟؟ لحظة أجيّب لك مي...»

أمسكت يده لتمنعه، وما تزال يدها الأخرى تضغط على صدرها دون أن تتوقف عن اللهاث:

«فيه حاجة حوصلت... حاجة واعرة جوي... جلبي بيتنفض!!»

ربت على شعرها وضم رأسها ل صدره العاري يطمئنها: «ششش.. اهدي يا قلبي... أكيد مفتقدة أهلك كثير»

سالت دموعها لتغرق صدره دون أن تهدأ:

«لأ... ضروري حوصل حاجة... أنا لازم أروح أشوفهم... لازم أطمئن عليهم»

أوقفها قبل أن تغادر محيط ذراعيه:

«روقي بس... انتي عارفة علشان توصلي عاوزه كام وقت؟»

رفعت رأسها تحدجه بنظرة مستوعبة، وكأن الفكرة لم تخطر ببالها، ثم هتفت:

«اتصل بزينة... ضروري عنديها أخبار»

رفع رأسه ليتطلع لساعة المنبه بحوار الفراش:

«عارفة الساعة كام؟؟»

استدارت وأمسكت الهاتف وناولته له:

«اتصل... أرچوك حبيبي.... لازم أطمئن»..

أسقط بين يديه؛ فهو أبداً لم يستطع رفض طلب لهذه السمراء التي أوقعته في شباكها منذ أول دمعة رآها متعلقة بأهدابها... أمسك الهاتف وتأمل له لحظات ثم ناوله لها: «أعتقد إنك تتصلي أفضل مني... لو ملح رافع اسمي... زينة مش ناقصة مشاكل... صح حياتي؟؟»

أومأت شاردة: «صوح... بس لو الأخبار عفشة... مش راح أتحمل»

مسد على شعرها الأسود الطويل، سارحاً في صفاء بحيرة عينيها المشرقة بحبات دموعها البراقة:

«إن شاء الله خير... وأنا وياكي... مش أسيبك»

عزز كلماته بعناق ضمها له بقوة، ثم أبعداها وأمسك الهاتف يطلب الأرقام...

وعندما سمع صوت زينة أعطاها الهاتف، هتفت قبل أن تخونها شجاعتها:

«زينة ياخيتي... اتوحشتكو كثير... كثير جوي يا زينة... مال صوتك؟؟»

رمقته بنظرة ملتاعة فأوماً لها مشجعاً... فتابعت:

«زينة الله يسترك يا خيتي، جولي متخبيش عني... جلبني متلوع عليكم... بتجولي مين؟؟»

لاحظ دموعها التي أخذت تنسكب من عينيها كالشلال، فأدرك أن حدسها في محله... سقط الهاتف من يدها لتصرخ... احتضن صرخاتها بين أحضانه.



دخل الحاج محمود داره مستغرباً صوت ابنه يكاد يهد البيت على رؤوسهم... وزوجته واقفة على رأس السلم مستمتعة وكأنها تستمع لموسيقى عذبة:

«إيه اللي بيحصل في الدار يا زينات؟؟»

«خير يا حاج محمود... اطمئن... اسم النبي حارسه وصاينه ابنك بيأدب الي متتسماش»

تطلع محمود لأعلى ثم لزوجته باستغراب مزدوج: «تجصدي مين... فريدة!؟؟»
«قطع لسانها قليلة الأدب... ناقصة رباية... وابنك اسم الله حوله وحواليه يربيهها»

انتفض محمود صارخاً مهرولاً لأعلى:

«أستغفر الله العظيم... انتي ولية خرفانة... اتجي الله في بنات الناس يا شيخة حرام عليكي دي بتك حداهم!!»

ضربت بيدها على صدرها، وكأن الفكرة لم تخطر بالها!

اقتحم محمود غرفة نوم ابنه، ليجده قابضاً على عنقها بقبضتيه... والمسكينة جاحظة العينين وتكاد تلفظ آخر أنفاسها... أمسك بيدي ابنه محاولاً تخليصها... ولكن حتى رشاد نفسه لم يستطع تركها، وكأن شيطاناً تلبسه، ولن ينصرف إلا برؤيتها خادمة بين يديه... فلم يجد محمود حلاً لإنقاذ كليهما إلا بدفع ابنه عنها بعد أن تأكد أنه لم يسمع لتوسلاته... أفاق رشاد على نفسه ممدداً على الأرض

لاهثًا، يتسبب العرق من كل جسده، ووالده يحاول إيقاظ فريدة... ثم التفت له: «إيه اللي عملته دا يا ولدي!!؟ البت مبتنطجش!!»
نظر رشاد ليديه بذهول، ثم لفريدة التي يستلقي نصفها على الفراش والنصف الآخر على الأرض، وهدر بكلمات متقاطعة:
«أنا... أنا مخابرش... مش عارف يابوي... كنا بنتحددتوا... وهي جالت... جالت...»

واتسعت عيناه بذهول، وصوتها يعود يدوي في أذنيه...
«كت عاوزه راجل يحميني حتى من نفسي... لكن يا خسارة... الراجل اللي طلع من حدي ونصيبي طمع الديابة فيا... وفكروني لجمة سهلة ياكلوها بدون حتى ما يفكروا في راجلي... المرة دي ربنا سترها... المرة الشجاية مخابراش إيه ممكن يوحصل»

ضاقت عيناه وكلماتها تعيد نفسها مرارًا وتكرارًا، حتى وجد يديه تطبقان على عنقها، وفقد كل الشعور بمن حوله، ولم يفق إلا ووالده أمامه ولا يعرف كيف دخل.

دخلت زينات تولول بالصراخ، فزجرها محمود:
«ضبي خاشمك يا ولية، واتصلي ببنت خوي جولي لسيف ينادم على داكتر... أكدي عليه بلاش داكتر الوحدة»

كانت تضع يدها على فمها لتمنع صراخها، وعيناها لا تفارقان جسد فريدة المتراخي، ووجهها الذي اختفت معالمه خلف الكدمات والدماء المتجلطة. صرخ محمود: «انتي لسة واجفة!!؟ همي يا ولية جبل ما البت تفرفر منينا»
أشارت له بارتعاش: «هي لسة عايشة يا حاج!!؟»

«إيوه... بس لو فضلتني واجفة مكانك روحها هتطلع، وابنك هيروح في ستين داهية... يلا يا وش الخراب... مش كتي فرحانة بابنك الحيلة بيأدب مرته!!؟ أهه

البت هتروح في شربة مية... ولو عرف خالها هنروحوا في داهية كلاتنا وأولهم بتك»

دخل سيف يفتح طريق، فقابلته زوجته عمه، ولم يكن وجهها يبشر بالخير:
«خير يا مرت عمي؟؟ إيه اللي حوصل كفالله الشر!؟»
أشارت له لأعلى، ولم يفهم منها كلمة؛ فقد كانت تبكي وتولول... تنهد سيف وطلب إخلاء الطريق ليدخل الطبيب الغريب.
سمع محمود نحيحات ابن اخيه فخرج مسرعاً:
«خير يا سيف چبت الداكتور؟؟ اوعاك يكون داكتور الوحدة!»
«لا يا عمي... متخافش... بس إيه اللي حوصل؟؟»
«خلي الداكتور يدخل اللول، وبعدين أحكيلك»
التفت سيف ونادى على الطبيب:
«اتفضل يا داكتور.. اتفضل»

وكانت شهقة مزدوجة من الدكتور وسيف، عندما تطلعا لوجه فريدة.... التفت ضياء بحدة لهم فهتف محمود بارتباك: «المسكينة وجعت من على السلم!»
حدج سيف بنظرة غير مصدقة فربت على كتفه:
«شوف شغلك دلوك»

ثم خرج ليحدث عمه:
«رشاد اللي عمل العملة السودا دي؟؟»
ولم يكن بحاجة لإجابة، فعاود سيف السؤال:
«وهو فين دلوك؟؟»

«مخابرش يا ولدي... خد في وشه وهج... الله يرضى عنك يا ولدي تروح تشوفه... أنا خايف عليه انت خابر رشاد ما عمروش عمل مشاكل... مخابرش إيه اللي صابه... چيب العواجب سليمة يا رب»

«طب يا عمي... خلي مرت عمي تدخل مع الداكتر... ميصحش يكون لحاله مع فريدة»

«إيوه طبعا... أنا هنادم عليها»

جلس جوارها... بعد الصدمة الأولى من منظر وجهها المكدوم... بدأ شعور آخر يولد داخله... لم يكن متأكداً إن كان قابليها من قبل؛ فقد اختفت كل معاملها تماماً.... ولكن تلك الأهداب الطويلة ذات الدمعات المتلألئة وكأنهم حقها بالميلاد... لم يصدق وجيب قلبه... هل يعقل أن تكون هي؟؟! ولم يكن بحاجة للمزيد من التأكيد... كانت هي! منذ ساعة واحدة فقط أنقذها من مجرم كان يحاول خطفها... ولكنه لم يكن موجوداً لينقذها ممن حاول قتلها بكل إجرام وحشي... اعتصر قبضته بوجع غريب... وجع يدفعه لتحطيم الجدران والبيت بمن فيه، ومن حاول خنقها... لمس الكدمات على عنقها بألم متزايد... حقنها بمسكن، وحاول نداءها لتفريق... ثم تذكر أنه لا يعرف اسمها... ود لو يناديها: «يا صاحبة الدمعة على الأهداب... افتحي عينيك، وأعطيني الإشارة فقط لأحطم من أجلك كل ما هو موصد بيننا من أبواب»

وكانها سمعت نداءه الصامت... فتحت عينيها المتورمة متأوهة بأنين... وما لبثت أن شهقت عندما وجدته بقربها... لم تستطع فتح فمها إلا بالمزيد من الأنين... طمأنها: «اهدئي... أنا دكتور... سيف معايا... هو طلب آجي عندك... انت كويس؟؟»

أومات بحذر فسألها:

«مين عمل فيكي كده؟؟ جوزك؟؟»

أشاحت بوجهها بحدة كلفتها آلاماً مضاعفة، أسالت المزيد من دموعها، فهتف:
«أرجوك مش ابكي... لو شفت جوز انت أنا ه... ضربه بقوة»

زادت دهشتها... إحساسه كان يغزوها بعنف وقوة.... لاشك أنها تهذي من شدة
الآلام... هذا الحب الذي لم تسمع عنه إلا في الروايات الخيالية، لا يمكن أن يكون
هو نفسه هذا الشعور الذي يجتاحها مع نظراته، ويخفف عنها آلامها.
«هو ليه عمل هذا؟؟»

حاولت مرة تلو الأخرى حتى استطاعت إخراج صوت مبجوح من حنجرتها
المملتهبة:

«أنا... خبرته على... اللي حوصل»

تراجع مدهوشًا... هذه المرة الثانية الليلة التي يواجه فيها موقفًا مشابهًا... منذ
ساعة زينة تصرفت بنفس الطريقة مع زوجها... وضعت نفسها أمام قطار بدون
فرامل... وهاهي صاحبة الدمعة على الأهداب تتصرف بنفس الطريقة... سألها
بحيرة:

«ولماذا!!!؟ كان يمكنك أن تخفي عنه!»

أومأت بحشجة:

«إيوه... كان ممكن... بس..»

سمع أصواتًا تقترب من الغرفة، فأخرج ورقة وقلما وأخذ يكتب بسرعة... ثم دس
الورقة أسفل وسادتها: «هذا رقم تليفون... وعنواني في فرانس... في أي وقت تلاقي
نفسك محتاج أنا... هكون عندك في وقت أقل كثير من متوقع... انت عندك
باسبور؟؟»

هزت رأسها لا تعرف هدف السؤال:

«كت رحت العمرة مع خالي وعمل لي واحد»

«أوك... أنا سوف....»

قطع كلامه دخول زينات تسأله بلهفة:

«أخبارها إيه يا دكتور؟؟ إن شاء الله خير... مش تبقي تاخدي بالك يا فريدة يا
بنتي وانتي بتنزلي السلم... يلا الحمد لله، قدر ولطف»

حدجها بنظرة باسمه رغم شفثيه المطبقتين؛ فقد عرف اسمها وحرك حروفه بين شفثيه يتذوقه: «فريدة»

تمتت غير عابئة بحماتها:

«وانت اسمك إيه؟»

تمت بذات النظرة الباسمة: «ضياء»

تنحنت زينات:

«مشكرين أوي يا دكتور... تعبك معانا»

هز رأسه وهو يكتب ورقة ويعطيها لها:

«هذا دواء لازم يأتي... لو لم يتوافر أخبري طبيب صيدلية أن يحضر البديل... أنا لا أعرف أدوية هنا»

«متأخذنيش يا دكتور... هو انت منين؟؟ سحنتك بتقول إنك مش م. العب بتاعنا»

نظر لفريدة وكأنه يجيبها هي:

«من فرنسا... ممكن كوب ماء من فضلك؟؟»

وقفت زينات لحظات تستوعب كلام الطبيب، حتى أدركت أنه يطلب ماء للشرب، فركضت تلبى طلبه... أسرع ضياء وأمسك بيد فريدة برقة:

«اسمعي فريدة... مش عاوز تخاف من حاجة... أنا لقيت انت ومش هقدر أتخلي... ولكن لو حياتك مع هذا الوحش هي ما تريدين... أنا سأكون معك وسأدعمك... المهم أن تكوني سعيدة... هل ترغين في الهروب منه؟؟»

تمتت بحزن:

«مجدرش... هو جوزي مهما عمل فيا... بس بكفياي إنك حسستني إني بني أدمه... ممكن أكون مهمة لأي حد»

«يااااه يا فريدة... لدرجة دي؟! يا ريت كنت شوف انت من زمان... تليفوني معاي... في أي وقت كلم حتى لو مش عاوز حاجة... معاي تليفون؟»

أومأت: «إيوه.. بس مش هجدر أعطيك فمرته... أنا في حكم راجل»

«زي دا مش قول عليه رجل... دا مخلوق متوحش»

«المية يا دكتور»

حدجها بنظرة محتقرة، وأمسك بحقييته وتجاوزها ليغادر المكان، قبل أن يرتكب جريمة يندم عليها.



«الكلام اللي بتجوليه دا يا بت يا مسعدة صوح... ولا كلام واد عم حديث؟؟»
«والله يا ست معالي اللي جولتلك عليه دا حوصل... إن شالله يا رب أنتص في نواضري ولأ يدهسني جطر سكة حديد سواجه أعمي... أنا سمعتهم بوداني دي اللي هتاكلهم الدود»

«طب سمعيني ثاني كده يا بت... أصلي ممصدجاش»

«سمعت الست زينة بتجول إن الحكاية بينها وبين سيدي رافع خولت خلاص... ومعادلهمش راجعة واصل... وإن سيدي رافع هيبعت لها ورجتها بكرة»

من فرط فرحتها كادت أن تزغرد:

«لو الحديث دا صوح يا مسعدة... ليكي عندي جراط أرض... لا... جراطين حلوان ليكي على الأخبار الزينة دي»

هتفت مسعدة بلهفة: «صوح يا ست معالي؟! إلهي يا رب يسعدك... إلهي وانت چاهي ينوك الي في بالك يا معالي يا بت... هي أمك كان اسمها إيه؟؟»

أجابتها معالي وعيناها تلمعان بالمستقبل السعيد:

«فوزية... إيوه يا مسعدة ادعي لي بذمة يا بت... رافع قطع نص الطريق.... والباقي عليا»



دخل ليجد البيت مظلماً ولا بصيص نور شاحب ينير له طريقه... أخذت يده تتطوح باحثه عن مفتاح النور بدون جدوى... شرارة صغيرة أثارت انتباهه بعدها اشتعلت شمعة صغيرة... كانت عيناه تتسعان وتضيقان يحاول تنقية الصورة المغمشة.... مع دخوله غرفة تنبه أنها غرفة نومه، وجد عشرات الشموع الحمراء موزعة في أنحاء متفرقة من الغرفة... تتبعها تلك الرائحة المميزة لعطر فاخر.... والفراش منثور عليه أوراق الورد الحمراء... وقبل أن يستوعب ما يحدث جاءه الصوت المغمناج خلفه: «سالخير يا سيد الناس»

أخذ يقترب برأسه ويبتعد، الرؤيا لم تكن واضحة أبداً... لم يعرفها... كانت تقف أمامه بقامتها الرشيقة تحددها خطوط من ثوب يلمع بخيوط حمراء براقعة... نظر خلفه ليتأكد أنه دخل بيته كما يعتقد... ثم عاد يحرق بها لتتضح معالم وجهها الذي لم يعرفه من الألوان التي تصبغه بكثافة: «إيه لساك معرفتينيش؟! طب تعا وأنا أجولك...»

استسلم لها تجذبه من اللاسة وتدفعه ليسقط على الفرash... ضغطت على زر تشغيل الكاسيت، وبدأت تتلوى راقصة على دقات الطبلية... زاد دوار رأسه وقد ارتاب في نوعية التعميرة التي حضرتها له نؤارة الليلة. انتهت الرقصة مع آخر دقة من دقات الطبلية، صفق لها بقوة مع تصفير عال وهتف يناديها:

«إيه الحلاوة دي؟! مكتش خابر إنك مولعة إكده يا بت يا نوار!»
بعد أن ظنت أنها وصلت أخيراً لمفتاح قلبه؛ غيرت من نفسها واستقبلته بالشموع والرقص... وبعد كل هذا...!!!

حاولت دفعه، فتمسك بها ووجهه قريباً منها لتلفحها أنفاسه الحارة:
«رايحة على فين يا سنيورة؟! أنا ما صدجت لجيتك»
هتفت باكية:

«وانت مفيش فايدة فيك... برة وجوة فرشتك والطبع فيك غالب... وديل الكلب لم ينعدل ولو علجوا فيه جالب»
اشدت احمرار عينيه وهو يهوي عليها بصفعة مدوية:
«انتي بتشتميني آني يا بت البداري!!؟»
ثم أحكم إمساكها قائلاً بسخرية:
«عملتي كل ده علشان تكسبيني... ودلوك عاوزه تفلتي من يدي!!؟»
«هملني يا چاسر... خلاص معدتش طايجاك»
«فات الأوان يا سنيورة... أنا طايجك وعاوزك... وانتي معتجوليش لچاسر لع....
صوح يا مرقي العاجلة؟»
تخاذلت نبراتھا مستسلمة:
«صوح يا چاسر... صوح»
واكتفت برؤية جسدها يستعمله، ولكن ليس كما كانت تخطط.... مجرد جسد قد يبدله يوماً بغيره، بدون أي وازع من ضميره.



رفع بارودته عاليًا، وأطلق عدة أعيرة نارية في الهواء الطلق، ليتوجع سكون الليل، ويدوي أصداء صرخاته بين الجبال:
«انت فين يا حمادي؟؟ انزلي وريني نفسك... لو راجل من ظهر راجل، انزل ولّا مرچلتك دي بس على الحريم!!؟؟ انزل يا حمادي الكلب!!»
جالسًا بين رفاقه يقهقون بدون سبب، ويتميلون على كركات الجوزة المطعمة بكل أنواع الحشيش... وحده كان شاردًا حزينًا... لم يطاوع صديقه الوحيد لينسى همومه بين ضحكاتهم وأحاديثهم المملة... لقد فقدھا اليوم... ضاع منه حب حياته... لجأت له في ضيقھا وتصرف بكل نذالة... لن تسمح له أبدًا برؤيتها بعد اليوم... لن تطل عليه ولن تسير في طريقه بقصد أو بدونه... لم يلحظ الرجل الذي

دخل وانحنى بجوار صديقه يهمس له... لو الدنيا كلها انتهت اليوم لن يهتم....

تنحنح جعيدي: «حمادي... حمادي...»

تمتم حمادي بدون أن يخرج من شروده:

«لو الدنيا كلاتها بتولع بره، معايشش أسمع ولا أعرف»

«هي بتولع صوح يابو عمه... رشاد ماسك بارودة وجاعد يضرب طلج في الهوا

وبينادم عليك»

الآن فقط انتبه وبدأ يستوعب... ثم تنهد وعينه تشتعلان:

«لازم من عرف بالي حوصل... ويمكن يكون كتلها... أنا هشرب من دمه واكل

ناسه!»

أمسكه جعيدي:

«اهدى يا حمادي... انت متعرفش يمكن مش چاي لحاله... اصبر لمن

الرجالة...»

«ماصبرش يا چعيدي... وماعيش حد منيكم ياچي معايا... دا تاري وأنا الي

هاخده... الي هلمحه منيكم فريحي هطخه»

هم الرجال باللاحاق به، فأوقفهم جعيدي:

«خلوه لحاله... كملوا جعدتكم... غير الحچر يا ويلد»



«فينك يا حمادي يا چبان؟؟ مبتدش عليا ليه؟؟ مش عامل راجل على

الحريم... عاهد حالك من صنف الرجال... وانت ولا حاجة... سامع يا حمادي؟؟

ولا هربان متخبي في ديول ديابتك؟؟»

«انت بتحدث روحك يا رشاد!؟»

التفت له موجهاً البارودة لصدرة:

«چيت لجضاك برچليك يا ندل يا چبان!»

بطرف إصبه حرّ حمادي فوهة البارودة قائلاً ببرود: «أبعد اللعبة دي عن يدك
لتنعور... البارود للرجال وبس»
أعادها رشاد لصدرة:

«أنا چيت نصفوا حسابنا يا حمادي... انت مديت يدك على مرقي... وأنا هكتلك
بموطرحك وهخلي الديابا تنهش لحمك الزفر»
«فريدة متستجهاش يا رشاد... لو كت تستجها كت عوضتها... كانت لجيت
فرحتها المحرومة منيها معاك، ومچاتش طريق الديابا تايهة زي ما كانت جبل ما
تتجوزك»

«وانت شايف نفسك تستجها يا حمادي!!؟»
«لع... لا أنا ولا انت نستجوا فريدة... فريدة أميرة عاوزه راجل مش موجود
في طريق الديابا دلوك... راجل صوح ينچدها مني ومنك»
دفع رشاد فوهة البارودة لتنغز صدر حمادي هادراً:
«وانت مالك!!؟ كت عينتك محامي!!؟ مالك ومالنا!!؟ لزمان تموت يا حمادي!»
أمسك حمادي البارودة لينتزعا منه في غفلة، ويلقي بها بعيداً:
«موت فينا الراجل الناجص يا رشاد!!»

وبقوة غاشمة هوى بقبضته على فكه لتبدأ المعركة الأزلية... تشهد عليها عيون
الذئاب، عيون لم تعرف الندم على طبيعتها المفترسة، وهي إنما تتبع غريزة البقاء،
يراقبون في حيرة وحشية وحوشاً يسمون بين المخلوقات (بني آدم)، كرمه المولى
بالعقل، فغلخته غريزته، لوث فطرته وتبع شيطانه. نسمعه عواء وهو في الأصل
نواح وبكاء، غضوا أبصارهم وبحثوا عن جحور يختبئون فيها بعيداً عن رائحة
الدماء، التي سَفكت تروي الأرض الجذباء العطشى. طار فوق الرؤوس غراب
ينادي بنعيقه:

«لقد تعبت من تعليمكم ولا تتعظون!»

صرخة أخيرة تردد صداها زلزلت حجر الجبل، حسمت رحي المعركة... راکعاً جوار
سوأته، تلفت حوله يبحث عن الغراب يعلمه كيف يوارئها!



١٣

«مأساة الحب تتلخص في أن الرجل يريد أن يكون أول من يدخل قلب المرأة، والمرأة تريد أن تكون آخر من يدخل قلب الرجل»

— بيرون

.....

«سمعتني يا چاسر؟؟ أنا مصممة على الطلاق... ولما رشاد يتولد بالسلامة مش هحرمك منه... هيعرف أبوه وأهل أبوه... أنا مش مرا ناجصة أنا بت أصول وأعرف الواجب»

انتفخت عروقه وظهر الشر في جبينه المجدع:

«مش بكيفك يا بت البداري... أنا هملتك كتير عشان تحطي عجلك في راسك وتعجلي... من يوم الله يرحمه رشاد ما مات مرضيتش أضغط عليكي»
أشارت لبطنها:

«إيوه طبعاً... وأهه ابنك يشهد.. تجدر تجولي حملت فيه كيه لمن انت مهملني أعجل لحالي؟! مش فاكر يا چاسر... تحب أفكر؟؟ لمن هجمت عليا في دار أبوي، وانا غضبانة منك سنتين بحالهم مفكرتش يوم تسأل إن كنت عايشة ولا ميتة، ولا العيب مش عليك.. العيب على الغزية اللي سجتك من ماعونها لحد ما طار عجلك منيك»

زم فمه يركز على أسنانه بقوة:

«خلاص يا سمحة»

وكأنها لم تسمعه:

«حتى شيبة أبوي وحزنه على ولده مشفعش ليك عنديه... وسحبتي على دارك
كيه البهيمة الخرسا... فاكر يا چاسر؟؟»

«خلاااص جولت لك!»

«لع مخلصش... ياميها ماخذتنيش بخوطري... غصبتي وأنا مجردتش أمنعك...
وبعدها محسيتش بنفسك ولا بيا وأنا بهرب منيك على دار أبويا... مطجتش
يطلع عليا النهار وأشوف وشك جدامي... عارف ليه يا چاسر؟؟»

رفع رأسه المحنية يتأمل ملامحها الحبيبة، بشوق ولهفة ترويهها كل دقة في قلبه:
«عارف ليه؟؟ عشان مكتش عاوزه أكرهك... كل الي عملته فيا ده... ومجردتش
أكرهك... لو لسة باجي على حبة المحبة الي لساتها في جلبي ليك... طلجني...
وأنا مسامحك»

ضرب بقبضته على فراشها بقوة وعيناه محتفتان بالدم:
«وأنا مش ههملك يا سمحة... أنا فوجت خلاص... الغشاوة الي كت على عيني
راحت خلاص... معدتش شايف غيرك، معايزش حد غيرك»
«بأمارة إيه؟! بأمارة ما كت سهران في خيش الغجر آخر ليلة جبل ما المصيبة
دي ما تحصول، تشرب منجوع البرك، وتصجف للغازية وهي بترجص لك؟! صبرت
عليك كتير يا چاسر»

«بس آني... آني حبيتك يا سمحة»

اتسعت حدقتها بصدمة: «انت بتجول إيه؟؟»

«إيوه حبيتك... مكتش حاسس بيكي وانتي چاري... وبعد ما هملتيني وهملتني
الدار، بجيت أشم ريحك في كل موطرح... حتى صوتك وضحكتك بترن في وداني
زي ما تكون عشجت صوتك، وكل شوي بتفكرني بيكي... مش هكدب عليك
فكرت أتجوز تاني... ورحت أشوف العروسة ومعرفش إيه الي حوصل... رجليا
اتسمروا في الأرض... مجردتش حتى أدخل بيتها وأشوفها... صورتك كانت جدامي

مفارجتنيش... زي ما تكوني عملتيلي عمل، جدامك حل من تنين، يا أمتاً تفكي العمل... يا أمتاً...»

«يا أمتاً إيه يا چاسر؟! يظهر إن كتر البعاد بيعلم الجلب الجساوة... لو كت سمعت منك حديثك دا من اللول، مكانش حوصل كل اللي حوصل... ولا كت جولت لك اللي هجوله دلوك... انت متستحجنيش يا چاسر»
دخلت زينة لتفاجأ بمشهد لم تتخيل أنها سترى مثله في حياتها... سمحة تهاجم چاسر وبقوة... وهو مطرق مكسور أمامها... دارى عيونه عنها يدفعها ليغادر.
اتجهت لابنة عمها التي تكتم شقيقاتها كي لا يسمعها:
«عملتي كده ليه وانتي لسة بتحبينه!؟»
أشاحت بوجهها بعيداً تبكي بصمت، وكان هذا ردها الوحيد.



حاولت الاقتراب منه للمرة ال... مرات نسيت عددها... وفي كل مرة يتجاهلها بقسوة، نظراته تجلدها بدون رحمة... ولكنه هذه المرة قرر الوقوف في مكانه يحاورها بنظراته... يلومها، يجرّمها، ويحكم عليها بالنفي الأبدي خارج حياته... كان حكمها قبل أن يكون له... عندما قررت سحب صك عبوديتها منه كما كانت تسميها، ولو بخلع الظفر من اللحم... بالدم.
أجابته بنظراتها الخرساء:

«كان غصب عني... كت لساني متغمية كيه البهيمة الدائرة في ساجية... لا هي عارفة بتلف ليه ولا هي بتوجف يوم وتسأل حالها وصلت لفين ولا امتي هتوصل»

وكان يرد عليها بنفس الطريقة:

«بخوطرك جطعتي ما بينا... جتلتيه بدم بارد»

«الساجية لساتها بتلف بيا... من يوم يومها وهي بتلف... من يوم ما طالت ضفايري واتطوحت على ضهري وأنا شايفاه جدامي فوج حصانه، سبع خطف

جلبي ومنضرتش حد غيره... أمي كت تجولي (رافع من نصيبك)... ومرت عمي
عشمتني إنه راجلي وجسمتي وما يحوشنيش عنيه غير الموت... وفي لحظة...
لحظة بس... لجيت نصيبي اتغير... اتجسم لغيره... وأنا... حلمي كله راح...
ولجيتك جدامي... مفروض عليا ومفروضة عليك... وكت خلاص... هسلم
بجدري»

«لحد ما سمعتي إنه طلج مرته»

«إيوه... وجتها لجيت دنيتي الي نسيته بتفتح بتناديني ويتجولي (خلاص...
خلاص يا معالي حلمك جرب منيكي تاني... مدي يدك وخديه... جسمتك بجت من
نصيبك من تاني)»

«بس وجفت في طريقك مشكلة واحدة»

وضعت يدها غريزياً على بطنها تعتصر الفراغ الذي لم يملأه أي شيء غير الندم
والحسرة بعد جريمته الشنعاء... نكست رأسها تتذكر بحسرة جرم لا يغتفر..
شعت عيناه فلم تحتمل قسوتهما وهي تنكسر وتنكسر رأسها بدموع الندم....
راقتهم من مكانها، يتبادلان الحوارت بالعيون... كانت مهمتها تزداد صعوبة...
سيف لن ينس أبداً ما فعلته معالي... ومعالي لن يكفيها الندم....

لاحظت حركة غريبة وارتابك وقلق بين الممرضين.... ازداد رعبها وهي تراهم
يتجهون لغرفة رافع... شهقت صارخة تلحق بهم... كان جاسر وست الدار
ووهدان يقفون أمام الحاجز الزجاجي يشاهدون ما يحدث، وحبات دموعهم
رغم سيلها الراي لم تمح الحزن المسطور عليها.... كان المشهد غنياً عن السؤال....
راقت بدموعها التي جف نبعها، الفريق الطبي يحاول جهده إنعاش قلبه الذي
توقف مرة أخرى.

لم تكن المرة الأولى التي يتوقف فيها قلبه... المرة الأولى كانت عندما سمعها أول
مرة تطلب منه الطلاق... كان لتوه قد تجاوز وجودها مع خطيبها السابق في
مكان واحد.... وكان على استعداد تام ليتفهم مبرراتها وأسبابها... ولكن مع

إصرارها المتعنت، شعر بقلبه يعلن العصيان... ليالٍ طويلة يطالبه بحقه في
العشق... يسأله بأني كيف ستعيش في عالم الأحياء بدون أن تخفق بإحساس
حرمته على نفسك!!!!؟؟ إن كنت ستكتفي بالعيش حياً ميتاً بدونها... سأعلن
عصيانى... بدونها سأحرمك حق الحياة»



«بونچور مونا مور»
« بونچور ضياء.... انت نسييتني ولا إيه!؟؟»
«مين قال كده حبيبي!!؟ انت في قلبي زينة»
«لا يا بكاش... قلبك سكتته حورية غيري... من يوم ما رجعنا من مصر وانت
مش مضبوط... فيك حاجة جديدة... يا ترى إيه؟؟»
«أطرق رأسه وهو يجلس جوار فراشها:»مش عارف أقول إيه»
«أقولك أنا... انت بتحب جديد... كلمني عنها»
«داكور... هي اسمها.... فريدة»
شهقت:«فريدة!!! فريدة مرات رشاد ابن عمي!!!»
«نعم... هي...»
«وشوفتها امتى!!! حتى في الجنازة هي مظهرتش... آه افكرت! انت رحت
تعالجها لما طلبوا دكتور»
«لا زينة الحكاية بدأت من قبل... المشكل إني بحبها كثير فعلاً... توقعت إنها
تكلمني... بس حتى سافرنا أنا وانت... هي مفيش اتصال»
«علشان كده كنت مهموم وزعلان... وأنا اللي كنت فاكدة إنك زعلان على
حالتى»
«زينة انت زعلان؟؟»
«لا حبيبي... أنا مش زعلان منك.... أنا فاهمة ضياء... علاقتنا مكانتش هتنفع؛
لأن مفيش حب بينا... بس يظهر إن الحب بتاعك ضاع قبل ما تلاقيه»

«عندي إحساس متفائل، إنه هيرجع لحضني ثاني»

دمعت عيناها وهي تلمح كل هذا الحب والتفاؤل في عيون طبيبها العاشق... ورغماً عنها تذكرت أوجاع قلبها... وكأنه كان بانتظار أن تطلب فقط ليتخلص منها فوراً... لم ينتظر، لم يحاول مرة أخرى استرضاءها... كانت من أول يوم شوكة في خاصرته.

كم رغبت بالوقوف أمامه للدفاع عن حياتها! نعم لم الدهشة!؟ رغم الفترة الوجيزة التي عاشت فيها معه كزوجة، ولو كانت مع إيقاف التنفيذ، ولكنه تسلل بهارة غازياً تلافيف أعصابها، تلك التي تختص بحالات العشق الميؤوس من شفائه... ربما كان قرارها محض غباء بحت... ولكنها لم تحظ منه بتلك الإشارة التي تومض بجنون بما معناه أن الحب متبادل... لو تخاطر برؤية الشفقة بنظراته قبل أن تتملك عشقها داخل حلقة عينيه... لم تستطع احتمال وجع البعاد... انهارت كل قواها فقرر ضياء السفر فوراً... كانت أمها تمنى لو تسافر معها... حالة الوفاة المفاجأة التي ألمت بالعائلة سببت ارتباكاً في كل الخطط.

عوضتها سيفيل عن عائلتها، احتضنتها بكل حنان أمها.. لم تتركها لحظة واحدة منذ عادت... قصت عليها زينة ما حدث لها من أول يوم عودتها وحتى اللحظة... كانت تستمع وفمها مفتوح لا تصدق كل ما مرت به في أقل من شهرين فقط.

منذ أجرت العملية، لم يسمح لها الطبيب بالحركة إلا في حدود، أن تريض قدميها لعدة دقائق بدون إرهاق... منذ شهر كامل وهي طريحة الفراش، لا تملك غير ذكرياتها تفتات عليها لتعيش، وإن كانت حياة خالية من الدافع الأساسي، والذي ما كادت تجده حتى ضاع منها... رغم إدعائها الدائم لنفسها أنها لم تحبه أبداً، قدرته على استعمار عقلها وأفكارها في فترة أقل بكثير مما توقعت لنفسها أثارت اندهاشها حتى من نفسها... ساقتها قدماها لقسم حضانات الأطفال... كانت تعرف أنها تخترق شروط إطلاق سراحها... كانت بحاجة لابتنسامة ناعمة بريئة من تلك الوجوه الصغيرة، التي لم تلوث فطرتها بعد، تلفتت حولها خوفاً أن تضبطها

ممرضتها الصارمة... كان الأطفال نيام لسوء حظها، وقبل أن تعود أدراجها محبطة، أثارت انتباهها هاتان العينان الزرقاوان كعينيهما... هي أبرز ما يظهر من هذا الوجه الملائكي الصغير... بالإضافة ليدنين شديدي الحمرة تلوح بهما في الفراغ... خطفت قلبها ولم تدر السبب... لوحت لها وكأن الرضیعة ستبادلها التلويح... انقعد لسانها ودمعت عينها... لقد كانت الصغيرة تنظر لها فعلاً... تلفت زينة حولها... ثم بادلت الطفلة التحديق مرة أخرى.

«أها... أخيراً وجدت مريضتي الهاربة... وعثرتي على لوسي أيضاً!»

وبدون أن تزیح عينيهما عنها: «اسمها لوسي؟!»

«نعم... أنا سميتها... حلو الاسم؟»

«وليه انت تسميها?!»

تنهد ضياء: «لوسي لا أهل لها... حصل لأمها حادث سيارة وولدتها مكان الحادث... من وقتها لا أحد سأل عليها»

«مسكينة... وهتعملوا فيها إيه?!»

«القانون واضح.. تذهب لمركز رعاية الأطفال»

«مسكينة!»

«انت المسكينة مدام لو عثرت عليكِ الممرضة بيار»

«أوووه عندك حق... يلا ساعدني أرجع قبل ما تكتشف غيابي»



بعد أسبوع....

«زينة... فيم أنت سارحة حبييتي?!»

أجابت خالتها بحزن: «أخبرني ضياء أنني سأغادر المستشفى بالغد»

«أخبار جيدة... لماذا أنت حزينة سكرتي؟»

«لوسي... تعلقْتُ بها كثيراً»

«تلك الطفلة التي لم يعثروا على أهل لها؟»

أومأت زينة فضمتها خالتها بحنان: «لا بأس... ستتزوجين قريباً وسيصبح لديك
طفلة أجمل من لوسي»
«أنت مخطئة خالتي... أنا لن أنزوج أبداً»
وأكملت بسرهما: «مفيش بعد رافع رجل يلا عيني»



«ما أقوى الحب! فهو يجعل الوحش إنساناً،
وحيئاً يجعل الإنسان وحشاً!»
- وليام شكسبير

.....

بعد مرور سنتين:
صرخات صغيرة ناعمة، ودبيب أقدام صغيرة تركض... رفعت رأسها عن الكتاب
المنهمكة في قرائته، فتحت ذراعيها تستقبل صغيرتها بشعرها الأشقر الشمسي
تقفز بين ذراعيها بضحكة أشبه بزقزقة العصافير... تشممت رائحتها الناعمة
بتنهيدة عشق، أخذت تداعب بطنها بأنفها تسألها:

«بتصرخي ليه يا سكرتي؟!»

أشارت للخلف قائلة بحروفها المتعثرة: «ريكا ماما... ريكا»
وحركت إصبعها بحركة دائرية بجوار رأسها... سألتها زينة باستغراب: «مين علمك
الحركة دي؟؟»

«هو ماما... هو..»

«امممم قصدك هي.... لأن هو ميعرفش الحاجات دي... أنا هتصرف معاها
بعدين... بس لسة معرفتش... إريكا بتصرخ ليه؟؟»

هزت الصغيرة أكتافها النحيلة بنظرة وادعة... دخلت إريكا تنظر حولها وكأنها
تبحث عنها، لتجدها مختبئة بين ذراعي أمها:

«لوسي... تعالي هنا فوراً لتنظفي فوضاك!»

نظرت زينة لإريكا مربية لوسي ذات الثمانية عشر عاماً وحاولت أن تكون حازمة:

«اهدئي إريكا... حصل إيه؟! ولو سمحتي بالعربي»

زمت الفتاة شفيتها بحنق... ثم استجمعت أفكارها قبل أن تصيح:
«مدام... بنت لوسي مكار كبير... هي قالت روجي ريكا هاتي لعبة مفضل تأكل
معي... لما رجع أنا... كل أكل على أرض... كله... كله»
رمقت زينة ابنتها بتوبيخ: «لوسي... سكرتي الحلوة... ليه كده؟؟»
رق قلبها تماماً كما حدث في أول مرة وقعت عيناها عليها... بزرقة عينيها
البريتين... استشاطت إريكا غاضبة خاصة والصغيرة تعتصر عينيها بتثاؤب:
«مامي... سوسي نام»
كتمت زينة ضحكتها:
«خلاص إريكا اهدي... خدي سوسي وحمميتها وأنا هنضف الفوضى... وبعدين
هطلع أحكيها حكاية قبل النوم»
باستسلام مدت يدها تحمل الصغيرة قائلة بغيط:
«داكور مدام... بس لازم طفل يعرف...»
قاطعها رنين الباب، اتجهت زينة نحو الباب:
«أنا هفتح.. اطلعي انتي حمميتها»
وراقبتها تصعد بها الدرجات القليلة لشقتها الدوبليكس... تنهدت واتجهت لتفتح
الباب، وقفت أمام المرأة تطمئن على مظهرها... لم يكن مثيراً؛ فقد كان التي-شيرت
الأبيض والجينز الحالك وشعرها الملفوف حول رأسها يكاد يصرخ من الإهمال.
فتحت الباب ترحب بالوجه البشوش:
«حضرة الطبيب العاشق»
حاول تقبيلها على وجنتيها، فابتعدت مكتفية بمصافحته ودعته للدخول ضاحكة:
«أكيد المجنونة بتاعتك مش معاك... اتفضل»
جلس على أحد المقاعد الوثيرة في غرفة المعيشة، ثم سألها بتنهيده من يتوقع
الإجابة:
«وليه انت متأكد يا مريضتي المشاغبة!؟؟»

«علشان مجنونتك مش بتحبك تبوس حد غيرها»
«ولها الحق... هي مجنونة بتاعي وأنا عاشقها، وأنتي بتبعدي ليه، مافيش عندك
مجنون أنتي كمان، ولا مجنونك عايش جواكي»
زفرت بضحكة عصبية متجاهلة الرد على سؤاله:
«وليه مجاتش معاك؟؟»
«لا وقت... جئت أطمئن عليكي انت ولوسي»
«فيه أخبار من المحكمة؟؟ امتى لوسي هتبقى بنتي رسمي؟؟»
مد يده بمجموعة أوراق:
«تفضلي... أوراق كفالة حسب الشريعة الإسلامية... الصغيرة أصبح لها باسبور
خاص بها باسمها، وكنيتها، والمعلومات الإضافية، إنك تكفلها رسمياً»
أمسكت الأوراق تقرأها بلهفة ودموع سخية. نظرت له بامتنان: «ضياء.. بجد أنا
مش عارفة أقولك إيه... بس أكيد لو شكرتك زي ما تستحق مراتك هتحلل دمي»
قهقهه ضاحكاً:
«ذكرتني... لازم أذهب... وإلا...»
«عارفة... هتبلغ عنك إنك من عداد المفقودين»
تبادلوا الضحك حتى ربتت على ركبته بجدية: «متتخيلش أنا سعيدة علشانكم أد
إيه... هي عانت كثير وانت تستحق كل الحب دا... ربنا يسعدكم»
«الأهم الآن... صحتك عامل إيه؟؟»
«انت مش ناوي تريح دماغك مني بآة؟! ولا انت مش لاقى مرضى غيري!»
«زينة انت عارف، عمل عملية مش معناه زوال خطر»
«عارفة يا ضياء.. إيه لزمته الكلام دا؟؟»
«لازم أذكرك دائماً... ممنوع التوتر... ممنوع الانزعاج.. وعلاج دائماً في مواعيد
مضبوط»

«علشان كده أنا لسه مروحتش مصر... انت عارف الغريب في الموضوع... إن سيف نفسه موافق ومشجعي إني أفضل هنا... وبابا كمان، والوضع دا مش مطمئني... بس طالما لوسي بقى عندها باسبور... خلاص ممكن نساfer في أي وقت»

تنهد بقوة: «عرفتي ليه أنا بقول نصايح؟؟ علشان عارف إنك أول ما تستلمي باسبور لوسي هتطيري»

رنين جرس الباب أثار دهشتها:

«غريبة... مين هيزورني النهاردة؟؟»

«خليكي... أنا هروح أفتح وأمشي كمان»

«داكور... سلم لي على مجنونتك»

فتح الباب ليفاجأ بوجه مألوف على نحو مخيف... سأله بالفرنسية: «كيف أستطيع خدمتك؟؟»

أجابه ببرود ونبرة سلطوية ولهجة غريبة على أذنيه: «نادم لي على مرقى... دلوك» وقفت كل شعرة حمراء برأسها وهي تسمع تلك النبوة الحازمة من عمق ذكرياتها تقتحم عقلها، كيائها التواق، هنا في قلب باريس... ركضت لتتأكد أن أذنيها لم تجنا شوقاً لدرجة تخيله... فجأة وجدت نفسها تقف أمام النسخة المتمدنة من رافع.. زوجها السابق... وضعت يدها على فمها ل تمنع شهقة: «رافع!!!؟؟»

تجاوز الرجل الواقف بطريقه يتأملها، ثم حذجه بنظرة محتقرة قائلاً بنبرة اتهام: «إيوه يا مدام... رافع... جوزك... من الواضح إنك اتفاجأت، بس يا ترى مفاجأة عفشه ولا... زينة يا... زينة هانم»

رافع!!!؟؟

هل هو رافع فعلاً؟؟ ذلك الرجل الطويل الأنيق، ببذلته السنييه وشعره الممشط للخلف، ولحيته الخشنة كما لو لم تطأ أدغالها شفرة حلاقة منذ تركته، والتي

أضفت على هذا المزيج المدمر جاذبية مطلقة... سأل ضياء السؤال الذي كان ما يزال يتردد في ردهات عقلها، ما بين تمنيات وأوهام:

«جوزك؟! يعني إيه جوزك زينة؟! مش انتي قلت إن فيه طلاق؟!»
«رافع؟!»

لم يكلف رافع نفسه عناء النظر له، قائلاً وهو ييلي عينيه منها:
«وانت مال اللي چاييبينك؟! شوف طريقك عاوز اتحدث مع المدام كلمتين على انفراد»

أغلق ضياء الباب ووقف خلفه عاقداً ذراعيه على صدره بعناد:
«أي كلام تقول لزينة أنا هسمع... ولا أعتقد زينة عاوز يسمع منك كلام... سي زينة مونا مور»

كانت ما تزال تحت تأثير المفاجأة... وبالكاد بدأت تلتقط أنفاسها لتستوعب الصدمة غير المتوقعة:

«اممممم... ضياء... ممكن تمشي دلوقتي؟! متقلقش أنا هبقى أتصل ببيك واطمنك»

«نووووو زينة... إحنا لسة كنا بنقول إيه؟!»

رفع رافع أحد حاجبيه وهو يلتفت له نصف التفاتة:

«أما انت عليك بچاحة يا أخي.. ما وردتش على حد!! المدام بتجولك بالسلامة، ولو أنت محروج جوي وعامل فيها حامي الحمأ، أحب أطمئنك... أنا مطلجتش المدام ولا ناوي... أرثحت ولا...»

قاطع كلامه ديبب أقدام تنزل يصاحبها صوت بكاء طفل، التفتت الأعناق نحو إريكا التي تتبع الصغيرة الباكية:

«مدام... لوسي مش عاوز ينام قبل حكاية»

ضمت زينة شفيتها وهي تحمل لوسي وتقبلها بقوة:

«حالاً يا سكرتي الحلوة... اطلعي مع ريكا وأنا هحصلك، مش تأخر... داكور»

«داكور ماما...»

ثم التفتت لتتألق عينا الصغيرة البراقتان برؤية ضياء. فقهرت وهي تمد ذراعيها
ليحملها مهللة:

«دادا... دادا»

حملها ضياء متخلياً عن تجهمه للحظات، وهو يقبلها ويطلب منها أن تسمع كلام
الماما... ثم أعادها لإريكا بنظرات فخورة.

الآن فقط شعرت بجرس الإنذار يضرب بقوة، ورائحة احتراق يمكن التقاطها على
بعد أميال، عندما التفتت لرافع لتجد تعابيره تشير لرجل على وشك ارتكاب
جناية قتل.

في البداية لم تفهم سر التحول، حتى انتبهت لنظراته المسمرة على درجات السلم
حيث اختفت إريكا مع لوسي... وبدأ التفهم والاستيعاب يحتلان جزءاً من فهمها
وهي تضع نفسها مكان رافع..

لوسي نادتها ماما... وضياء... بابا!!!

بحركة حادة أدار رأسه نحوها ليسألها مستشيطاً: «إيه اللي بيحصل ده؟!؟»

«رافع اهدا وأنا هفهمك»

صرخ مطيحاً بأقرب طاولة صغيرة في المدخل، لتسقط بدوي مريع هي والفازة
الكريستال التي فوقها:

«هتفهميني إيه بالضبط!!! البت دي بتك من مين!!! ولا هي فوزة وأنا المفروض
أعرفها لحالي!!!»

سألها ضياء حائراً:

«زينة... إيه بيحصل؟!؟»

مدت يدها لتمنعه من الاشتباك مع رافع:

«امشي انت دلوقتي وأنا هفهمك بعدين»

أمسكه رافع من تلايبه يهزه بعنف:

«ميشي يروح فين!!؟ دحنا بيناتنا حساب جديم، وكمان جديد...»

رفع ضياء يديه بعدم فهم:

«من فضلك... أنا مش فاهم... انت عاوز إيه؟؟؟»

صرخت زينة تحاول نزع يديه عن ملابس ضياء:

«يا رافع ضياء مالوش دعوة بأي حاجة... أرجوك اهدا وأنا هفهمك»

ترك غريمه محدقاً فيها كأنه يراها لأول مرة، هادراً بزمجرة مرعبة:

«هتفهميني إيه!!؟ هو بعد اللي شايفه جدامي دا لسة فيه حاجة هتفهميها لي!!؟»

انتي مين!!؟ شيطانة بألف وش وألف لسان!!؟»

هم ضياء بالكلام عندما رن هاتفه بنغمة يعرفها... نظر للموبايل بشرود ثم لزينة فهتفت:

«ضياء... روح دلوقتي من فضلك مش لازم حد يعرف إن.... انت فاهم»

وقف حائرًا: «بس... زينة»

صرخت بالفرنسية: «اذهب الآن من فضلك!»

كان أصعب قرار يتخذه، ولكنه يعرف مجنونته... إن لم يرد عليها ستقع مصيبة

أخرى... اتجه ناحية الباب مزمجرًا: «سأعود مرة أخرى»

قلب شفتيه وهو يحدق بالباب المغلق:

«بالبسطة دي!!؟ هي الرحالة في البلد دي، اللي بيچري في عروجهم دا إيه!!؟»

ميه ساجعة!!؟»

تمالكت نفسها قائلة بنبرة قوية:

«خير يا رافع!!؟ انت بتعمل إيه هنا؟؟؟»

«الراجل لما يدور على مرته ويجلب الدنيا فوجاني تحتاني عليا، ولما يلاجيها يطير

عليها طيران، يوبجى ليه؟؟؟»

هزت رأسها بحيرة:

«مرته إيه وجوزي إيه!!؟ إيه الكلام الفارغ اللي انت بتقوله دا!!؟!!؟»

التقى حاجباه ببعضهما بدهشة:

«هو انتي متعرفيش اني مطلجتكيش!!؟»

وقع عليها الخبر كالصاعقة... تراجعت دائخة حتى جلست على الأريكة... تبعها وجذبها من تلايبيها لتقف أمامه: «التمثيل دا ميخيلش عليا... لازم أبوكي ولا أخوكي جالوك... ولا عشان إكده محدش أعطاني العنوان؟! وبجالي سنتين بدور عليكي لحد ما عترت فيكي»

«إيه اللي انت بتقوله دا؟! يعني إيه مطلقتنيش!!؟»

«المفروض أهلك يبلغوكي... بس يظهر إنه محصولش... جوليلي يا بت البداري... البت بتك دي... كتي حامل فيها لما اتجوزنا؟! ولا كتي عايشة في الحرام مع نهاش الأعراض المتحسوك ده؟! چاوبيني جبل ما أولع في البيت بالي فيه!!»
كل ما يحدث كان أكثر بكثير من قدرتها على الاستيعاب... هي ما تزال زوجة لرافع... وهو يبحث عنها... وأهلها يعرفون ولا أحد تكرم بإبلاغها!!
انتزعت نفسها من يديه بحدة:

«انت هتخرج من هنا دلوقتي حالاً... قبل ما أبلغ البوليس!»

«لا والله جدعة... خاطبة وعينك جوية... انتي مخبراش أنا ممكن أعمل إيه؟!؟»
بزفرة استهانة ومحاولة لادعاء الشجاعة:

«هنا في فرنسا فيه قانون، مش زي عندكم في البلد، كل واحد بيعمل قانون لنفسه لما اتحولتم لوحوش في غابة»
أجابها بثقة أجفلتها:

«لأ... أجدد أشحنك انتي والبتاعة اللي جوة دي في شنطة مجفولة للصعيد طوالي... وهناك دمك النچس حلال بلال لأي راجل عنده نخوة»
«أسلوب الهمج اللي انت متعود عليه مش هيخوفني... كان زمان يا رافع بيه»
جذبها من شعرها دون أن يهتم بصراخها، هاتفاً بصوت هادر ذكرها بقرقعات الرعد قبل وقوع العاصفة:

«سألتك سؤال... كتي حامل لما اتمسخرتي عليا وخليتيني أطلع لهم بمنديل طهارتك المزيفة؟؟ وعلشان إكده عملي غميانة في آخر يوم، وأهلي افتكروكي حبلى... عملي چريمتك الكاملة يا زينة وأنا اللي ساعدتك؟؟ لبستيني العار يا بت البداري؟؟»

اتسعت عيناها برعب تحاول التملص منه، وفي كل مرة يزداد ألمها:

«انت مجنون وكل أفكارك مجنونة زيك!!»

«انتي لسة شوفتي چنان؟؟ أنا هوريكي الجنان الأصلي... بس لما اسمع منك اللول... هو المحروس الهيمان بتاعك متچوزكيش ليه من اللول؟؟»
سأيرته حتى تلتقط أنفاسها:

«ماهو كان خطيبي، وكنا هنتجوز لحد ما حصل الي حصل»

قهقه بدون تفكه: «آه... وطبعاً مجرد تيش تجولي لأهلك إنك حبلى من المحروس عشان تلبسيهالي»

«وأنا كنت أعرف منين إنك هترجعني!!»

«وأهلك مش هيسألوكي... ولا مكتيش هترجعني واصل؟؟»

أغمضت عينيها وفتحتهما بقوة:

«اسمعني يا رافع... أنا هقولك كل حاجة»

وفجأة لم يعد يطيق حتى سماع صوتها... كلما فكر كيف خدعته... كيف ورطته؟؟ كيف يمكن أن يقنع أهله وأهلها بعد كل ما حدث ويقنعهم أنه لم يلمسها، وهو الذي خرج بنفسه مهلاً شاهداً على عفتها؟؟ لم يشعر بنفسه وهو يهوي عليها بكف أودعه كل ما يعتمل داخله... مزيج من أحاسيس الغدر والخيانة والغضب... تهاوت على الأرض تمسح الدماء من طرف شفتها مذهولة... أقدام راكضة لتقف إريكا أمامها تصرخ: «مدام... مدام... أبلغ بوليس؟؟»

رفعت عينيها تنظر إليه... وتعجبت من شعورها... كانت تشفق عليه بالفعل... مدت ذراعها تلوح بالرفض لإريكا، حتى استطاعت النطق:

«مفيش حاجة إريكا... روعي فوق مع لوسي»

«لكن... مدام»

صرخت: «اطلعي فووووق»

تحاملت على نفسها حتى وقفت أمامه... غضبه لم يقل... بل كان يزداد اشتعالًا مع أفكاره المحتدمة... للحظة تمت لو تحتضنه وتضمه بقوة تخبره كم اشتاقت له وكما افتقدته... ولكن نظرة الكره البشعة التي حدجها بها جمدت كل مشاعرها ودفنتها في عمق جبل جليدي.

«رافع... انت ممكن تطلقني بجد وخلص؟»

«هو إيه الي خلاص!!! إيه البساطة الي انتي فيها دي!!!؟ البلد مولعة نار، والعيلتين ماسكين في خناج بعض، وانتي بكل بساطة بتجولي خلاص!!!؟ والله والي خلع الخلع، لو مكانش الي بيحصل في البلد ده، لكت دفتك انتي وبت الخطية دي مو طرح ما انتي واجفة... لكن معلش... حسابك بعدين»

«تقصد إيه؟؟ مش فاهمة»

«لازم هنعادوا البلد الليلة جبل بكرة... لازم نبين للناس إن چوازتنا هي الي هتوجف سيل الدم بين العيلتين... زي ما انتي خابرة چوازة أخوي وچاسر ورشاد الله يرحمه وطفشان فريدة... كل ده خلى العيلتين يتحمرشوا ببعض أكثر من اللول... فكرت إننا لو رجعنا يدي بيدك ممكن نعمل حاجة... آجي ألاجيكي عاملة مصيبة تطير فيها رجاب بلد بزيها!!!؟»

«رافع خليني أفهمك»

«هتفهميني إيه أكثر من الي شايفه!!! المفروض أحمد ربنا إنك متچوزتيش المحروس... كات توبجي المصيبة كملت... مش كفاية إنك وسختي شرفي... لاه وكمان متچوزة عليا»

كان يحتمل أكثر بكثير مما يحتمل رجل مطعون في شرفه... كان اعتقاده... لم تدر كيف ستخبره بالحقيقة... قريحتها لم تسعفها وهي بكل هذا التوتر وهو بكل هذا الغضب.

أطلت إريكا برأسها من أعلى:

«مدام... لوسي يبكي كثير»

وقفت حائرة بين أن تظل مكانها تتلقى موجة غضب جديدة، وأن تسرع لصغيرتها الخائفة... لاشك أن صوته الغاضب سبب لها الرعب... لبت نداء غريزة الأمومة وتجاهلته تسرع الخطى لصغيرتها.

تلقتها بين أحضانها تهمس لها بكلمات هدأتها حتى نامت بين ذراعيها... وضعت رأسها على الوسادة واستلقت جوارها تعب من عبقها، تصفف شعيراتها المتناثرة... أغمضت عينيها على دموعها مستغربة كيف ما يزال نبعها يستفيض، وقد ظنته جف منذ حكمت على نفسها بفراقه!

عندما اطمأنت على نومها الهادئ، غادرت الغرفة لتذهب لغرفتها... أمسكت هاتفها وطلبت مصر... جاء صوت أمها العزيزة... استمعت للديباجة اليومية ومنها طبعاً أسئلتها التي لا تنتهي عن لوسي؛ فهم على عكس توقع رافع يعرفون كل شيء عن لوسي... وما بعد لم تكن الأخبار مطمئنة... أدركت الآن فقط أهمية اقتراحه بعودتهم كأسرة... الوضع بالفعل متفجر والحل بين يديها.

ربما خيبة أمل مريرة اعتصرت مشاعرها... بغض النظر على أنه لم يطلقها فعلاً كما ظنت... ولكنه لم يلحق بها من أجلها هي... ململت أشلاء كبرياتها المجروحة وعادت له... وقفت أمام مرآة الردهة تتأمل علامات قسوته مخطوطة على وجنتها... أخذت نفساً عميقاً وبحث عنه... لم يطل بحثها لتجده واقعاً في الشرفة يدخن... داعب حنين الماضي ذكرياتها التي لم تمت أبداً... لم تره بهذه الحالة من قبل، أو لعل الشهر الذي قضته في بيته لم يتح لها أن تعرفه... ولكنه كان كافياً لتعشقه.

«قررت إيه؟؟»

بدون أن يلتفت لها:

«هنسافروا أول ما نحجزوا الطائرة»

«أنا مقدرش أسيب لوسي لوحدها هنا»

«ومن جال إنك هتهمليها!!؟ هتاجي معانا»

اتسعت عيناها بذهول، التفت لها ببريق عينيه المرعب في ظلام الشرفة:

«بس يكون في معلومك... تاري منك في شرقي الي مرغتيه في الوحل مش

ههمله... قمنه الطاج طاجين»

سألته بارتجاف واضح في نبراتهما:

«وأنا إيه الي يجبرني إني آجي معاك وانت بتهددني!!؟»

بابتسامة هازئة لم تحدّ من بريق الشر بسواد عينيه المظلم: «مش بكيفك... ماهو

انتي يا تاجي معايا يا هروح البلد وأفضحك... وفضيحة بفضيحة... هخلي أهلك

يتمنوا الموت في اليوم ألف مرة بعد ما أهل البلد يعملوهم مسخرتهم... مظنيش

أبوكي هيتحمل كتير... ولّا سمعة أختك... مفيش راجل ملو هدومه هيتجدم

لها... تحبي أكمل ولا سمعتي كفاية؟؟»

حدجته بألم:

«هنا ملهاش دعوة بانتقامك دا... هي ملهاش ذنب!!»

بصلف لا يعرف الرحمة تجاهل توسلها

«جولتي إيه؟؟ هنجزوا التذاكر ولا...؟؟»

مسحت دموعها وهي تخرج شجاعتهما من برائن يأسها:

«داكور يا رافع... اعمل الي تعمله... بس سؤال... انت هتقدر قتل فعلاً

السعادة الي عاوز توهم الناس بيها؟؟ ولما تعمل كده، مش هيكون دا اعتراف

ضمني منك إن لوسي هي بنتك؟؟»

اتسعت عيناه بظلام ليلة سوداء حالكة بدون قمر، وهدر بنبرة غامضة بدون أن يجيب سؤالها:

«هروح أحجز على أول طيارة».

راقبته حتى أغلق الباب خلفه... تهالكت على أريكتها تتنفس بسرعة وكأن بخروجه عاد الهواء في المكان... وضعت يدها على قلبها... لآخر لحظة كانت تظنه سيطلب منها جواز السفر... ثم وبخت نفسها:

«يا غبية!! رافع مش بيعرف فرنسي... وأكد مش هيفهم إيه اللي مكتوب في الباسبور»

وامتلأت رأسها بالمزيد من علامات الاستفهام!

كانت الراحة بادية على وجه إريكا رغم ادعائها الحزن لفراق لوسي الصغيرة... ولكن المبلغ المالي الذي حصلت عليه كتعويض، كان أكثر من كاف لعذابها اليومي على ידי ذلك الملاك الصغير... أخبرها رافع بالتليفون موعد الطائرة وطلب منها أن تتواجد في المطار قبل الموعد بساعة... كان ضياء هو الآخر في شدة الغضب، لذلك أرجأت خبر سفرها لآخر وقت، كي لا يجد الوقت لمواجهة رافع مرة أخرى. وجدته بانتظارها... ألمها إشاحته بوجهه عن لوسي، وطلب منها جواز السفر بدون أن ينظر في وجهها.

سألته: «بتعرف تتكلم فرنسي؟؟»

بزفرة مرهقة: «لأ... بس أكيد هم بيتكلموا إنجليزي»

هزت رأسها بامتعاض واتجهت لتسليم الباسبور بنفسها، قبل أن يجبرها على أن تسلمه له... بعد وضع الأختام سحبتهم بسرعة وأفسحت له الطريق ليكمل الإجراءات... خدمها في نجاح خطتها أنه دائم الإشاحة بوجهه كي لا تقع عيناه على الصغيرة، التي كانت تحاول بشتى الطرق إثارة انتباهه... بلا جدوى.

شعرت بغصة مؤلمة للحزن البادي في عيني صغيرتها، وقررت تجاهله تماماً طوال الرحلة، وتصب كل اهتمامها على لوسي.. التصرف الذي أغاظه تماماً؛ فكلما وقعت عيناه عليها يجدها تلاعبها وتناغيها، حتى أثارت ضحكاتها كل المسافرين وأصبح لها شعبية كبيرة عند الجميع عداه، حيث حافظ على عبوسه المنتقد وزفراته التي كادت تسبب ثقباً في بدن الطائرة... حتى هو نفسه لا يعرف... أي رجل غيره في مكانته وبدمه الحار وعقليته التي تتحكم فيها أصول وتقاليد لا تمحيها المدنية ولا التطور... أي رجل في مكانه كان غسل شرفه بدمها ودم عشيقها... ما الذي أوقفه؟! لماذا هذه الحجج الغريبة لإعادتها؟! لماذا لم يقتلها في اللحظة التي أدرك بها خيانتها، وتلاعبها، وخداعها؟! هل يخدع نفسه أيضاً بحجة أنه يدبر خطة ليروي غليله منها؟! أم أن تلك الشيطانة الحمراء ما تزال تملك صك ملكيته، وما يزال عبداً في محراب عشقها؟! ازدرد ريقه بصعوبة بالغة وقد اشتدت عروقه، وأصابه تتمسك بمقابض مقعده هاتفاً بنفسه بقسم أكثر منه تهديد: «لو كان دمي اللي بيچري في عروقي هو اللي بيغذي جلبي بعشجك وبرائك المزيفة، كنت جتلت نفسي بدل المرة ألف مرة، حتى لو كان بيصرخ بغرامك لآخر دجة يا ناريسا»

أخرج الهواء من صدره ليعب دفعة جديدة باحثاً عن بعض الهدوء.... يكاد يفقد عقله من التفكير، تتنازعه قوتان رهيبتان.. أخيراً استسلم سامحاً لنفسه أن يتأملها... يتأملهما معاً... وقد استسلمتا أخيراً للنوم... شيطانتها الحمراء وعلى صدرها نامت شيطانتها الشقراء، ملاكها كما تسميها، وقد وضعت إبهامها في فمها تمصه باطمئنان... كيف يمكن أن ينبت شيء شرير جداً، ومؤذ من لوحة جميلة معبرة لدرجة الألم؟! لوحة تخطف قلوب أعتى القساة والمجرمين؟! ولكنه لن ينساق لهذا... وسيحصل عن انتقامه من مغويته، ولكن ليس قبل أن تسدد كافة ديونها... خاصة أول دين... (المنديل)!

كانت سيارته بانتظارهم في الموقف الخاص بالمطار... همت بالدخول مع لوسي عندما أشار لها ببرود:

«خليها ورا في كرسيها، وأمنيتها بالحزام»

لم تجادل؛ فقد كان من الأمان للوسي فعلاً أن تكون في الخلف، رغم أنها تشك أن هدفه الحفاظ على سلامتها... أعطت الصغيرة لعبتها، وطمأنتها وعادت تجلس في المقعد الأمامي... وانطلق بسيارته... وكانت المرة الأولى أيضاً التي تراه يقود شيئاً غير حصانه... لم تستطع إزاحة عينيها عنه وهي تتذكر اليوم الأخير، عندما كان يختال بجواده وهي تراقبه بقلب موجوع بالعشق.

«في البلد عارفين إننا عايشين مع بعض من شهور»

أجاب نظرتها المتسائلة قبل أن تفتح فمها:

«أنا فايت البلد من سنة ولا أكثر... كت في اليونان، في مشوار شغل ومعاودتش من ياميهها»

«ومحدث هيسألك انت خبيت لوسي ليه كل الوقت دا؟؟؟»

«أنا أصلاً مبتصلش بحد من يوم ما أسافر لحد ما أعاود... ومحدث ليه عندي

حاجة... هيعرفوا في وجتها وخلاص... في سؤالات تانية يا... مدام؟؟»

أشاحت بوجهها تراقب معالم الطريق التي اشتاقت لها، وإحساس يراودها بذكرى

بعيدة وكأنها سنوات ضوئية، يوم عودتها ولقائها برافع: «لأ... شكراً»

اطمأنت على لوسي بنظرة خاطفة للخلف، وعادت تحديق في الفراغ تفكر في

اقتراب ساعة الحقيقة... ابتسمت متخيلة وجه رافع محمراً من الإحراج، ولا يجد

من الحروف ما يستطيع التكفير به عن خطئه في حقها.

ابتسمت للفكرة وأغمضت عينيها تتخيله في هذا الموقف... بعد وقت طويل

استسلمت فيه للنعاس يغمرها إحساس غريب بالدفاء رغم كل شيء....

لم تدر تماماً ما الذي أرقها... الصوت المعتاد الذي نامت عليه اختفى فجأة...

فتحت عينيها لتجد السيارة متوقفة... التفتت بهلع تطمئن على لوسي... ثم

هدأت على الفور عندما رأتها نائمة بوداعة... كان مقعد السائق فارغاً والرؤية معدومة في الأمام؛ فقد كان غطاء السيارة الأمامي مفتوحاً ورافع يختفي خلفه... نزلت باستغراب ترى ما يحدث... كان رافع غارقاً بنصفه الأعلى داخل السيارة التي على ما يبدو أنها معطلة.... مدت عنقها لترى ما يفعل... غاص رأسها داخل السيارة ثم سألتها فجأة: «هو فيه إيه؟؟»

ولو بعد سنوات... لن يفهم كلاهما كيف حدث ما حدث.... كان غارقاً في أفكاره تماماً للوصول لمكان العطل، عندما فاجأته بصوتها الحاد وشعرها الأحمر، تخترق كل دفاعاته الحصينة برائحة عطرها المثيرة، وبجواره تماماً... بحركة مضادة، عاد للخلف بحدة ليصطدم مرفقه بوجهها بقوة... تراجعت للخلف متأوهة تضع يدها على عينها اليسرى تصرخ من الألم.... اقترب يرغي ويزبد منها محاولاً أن يعرف ما أصابها، ولكنها ظلت متمسكة بعينها تخفيها وهي تدور حول نفسها تصرخ باكية... أمسك بكتفها ليوقيها:

«زينة.... اثبتي مكانك علشان أشوف إيه اللي حصل!»

وقفت تدبب بقدميها في الأرض باكية:

«الي حصل إنك طيرت عيني»

«ابعدي إيدك علشان أشوف»

بحذر أبعدت يدها، لتنهمر الدموع من عينها المحمرة. زمجر بتوبيخ:

«نفسى أعرف انتي كنتي بتعملي إيه جنبي، نفسي أفهم»

رفعت رأسها تحاول رؤيته من خلال عينها السليمة متسائلة: «انت مش بتتكلم

صعيدي! دا معناه إن مزاجك بيروق بس لما أكون موجوعة!»

زمجر بحق:

«يووووه يا زينة... هو دا وجته!؟»

بتأفف هدرت: «رجعنا للصعيدي تاني»

دفعها لتجلس في السيارة:

«لازم نعمل لعينك كمادات.... مفيش فوطه ولا حاجة نظيفة؟»

«في شنطة لوسي فيه فوط نظيفة»

غاب لحظات وعاد بالفوطه المبللة، وضعها على عينها وأمرها أن تبقىها مكانها... ثم غاب مرة أخرى ولكن هذه المرة في مقدمة السيارة.... طالت اللحظات هذه المرة حتى سمعت صوت هدير المحرك يرتفع بقوة... عاد يمسح يديه في فوطه السيارة ثم انطلق من جديد دون أن يكلف نفسه عناء نظرة أخرى نحوها... وعند اقترابهما من مشارف البلدة التفت إليها:

«أخبار عينك إيه دلوقتي؟؟»

رفعت الفوطه ونظرت إليه ليغمغم بوجود:

«ده اللي بيجولوا عليه... قال عفش صوح»

رغم إحساسها غير المبشر، ولكن عندما نظرت في المرأة لم تكن محضرة تمامًا لهذه الهالة حول عينها، المختلطة الألوان بين الأزرق والأرجواني... شهقت: «أنا لو حلفت لهم إنك ضربتني عن غير قصد محدش هيصدقني!»

أوماً بابتسامة هازئة

«عشان إكده... لازم التمثيل يستحق أوسكار... كنت ناوي نروح على بيت الرحاية... بالمنظر دا... لا رحاية ولا بداري.... هنروحوا على بيتنا»

«بيتنا!؟؟ إحنا عندنا بيتنا!؟؟»

«إيوه.... بنيته علشان أعيش فيه لحالي.... هو أحسن مكان دلوك.... نريحووا شوية وبعدين نكلم أهلي وأهلك.... خلي الوجعة توبجى واحدة ونخلص»
ألفت نظرة أخرى في المرأة، ولم تجد فائدة من المعارضة.

وقعت في غرامها من أول نظرة... تلك الفيلا الصغيرة التي تحتضن حديقة الزهور المنسقة.... تلفتت حولها بانبهار وهي تحمل لوسي، التي بدأت بالاستيقاظ

لتشارك أمها الفرحة بالمكان حولها... كادت تسمح لها بالنزول عندما أوقفها
بحدة:

«انتي هتعملي إيه؟؟»

«هنزلها تلعب... البنت محبوسة بقالها ساعات من الطيارة للعربية»
لوح بيديه مشيراً للأعلى: «فوج... فوج... انتي عاوزاها تنزل وتخرّب الجنيّة؟!
وحاجة تانية... البت دي معايش أصادفها في أي مكان... طول ما أنا موجود
هي تتغاي في أي مكان بعيد عني»

أخفت دموعها في شعر صغيرتها، تقبلها باعتذار عما سمعته، شاكرة أنها لم تفهم
كلمة واحدة مما يقال، غير أن عقلها الصغير لم يستوعب حقاً، لم لا تسمح لها
أمها بالنزول للعب في هذا المكان الجميل... غمغمت بصوت مخنوق:
«أي أوامر تانية؟؟»

«ادخلي وارتاحي.. اختاري أي أوضة من الدور الثاني ما عدا جناحي... هتعرفيه
لما تشوفيه»

سلخت نفسها من نظراته المحترقة، لا تعرف لأي مدى ستستطيع الاحتمال.
أطعمت لوسي قبل أن تغفو من جديد، لتدرك أن الرحلة أجهدتها فعلاً، كما
أجهدت صغيرتها، فلم تشعر بنفسها وهي تسلم راياتها.

استيقظت بتركيز ضائع لا تعرف أين هي تماماً... تلمست العرق على جيدها
لتدرك أنها لا يمكن أن تكون في باريس.... ولكن الخبر الأكيد أنها نامت طويلاً؛
فالظلام يكاد يحاصر غرفتها الصغيرة... نهضت تستجدي حماماً منعشاً... وقبل أن
تفكر في كيفية استحضار ملابسها، وجدت حقائبها متراصة بجوار الباب.

نظرت للباب المغلق، ثم لصغيرتها، وارتسمت ابتسامة ناعمة قائلة بهمس:

«دادا كان هنا يا سكرتي... لما نشوف يا رافع... آخرتك إيه معايا»

أخرجت ملابسها من الحقيبة وخرجت تبحث عن الحمام... من شدة غضبها لم
تستمتع بمشاهدة المكان في المرة الأولى، وفتحت أول باب ودخلته متوقعة أن

جناحه الذي يخشى علي نظافته من صغيرتها قد يكون في آخر الردهة... ولكن الآن عليها البحث عن الحمام... كانت أمامها ثلاثة أبواب مغلقة... لابد أن أحدها الحمام والآخر الجناح المحرم... والأخير... ربما غرفة نوم إضافية.... وقفت حائرة لا ترغب أن تفتح الغرفة الخاطئة... بدأت بأول غرفة بعد غرفتها... كانت غرفة أخرى تشبهها ولكنها لا تبدو كجناح رئيسي... دق قلبها بجنون وهي تستعد لفتح الآخر بعد أن استعدت لمواجهة حظها السيء.... ولكن يبدو أن الحظ قرر الابتسام... تجهمت وهي تغلق الباب.. إلى متى؟



غادرت حمامها منتعشة، وشعور جديد يراودها... أنها على استعداد لمواجهة رافع... وقبل أن تستشعر هذا الإحساس لتعتاده، كانت تصطدم به أثناء خروجها من الحمام بدون انتباه.

أما هو، فلم يعلم ما الذي حدث له... فجأة وجد كتلة من الشعر الأحمر تلفحه باندفاع متطاير... كل ما يتذكره أنه ترك لغريزته المشتاقة لهذه الشعلة النارية أن تستغل الفرصة، ليحيطها بذراعيه ويثبتها على الحائط محدقاً بعينيها الزرقاوين المشتعلتين... تساءل مزدرداً لعبه..

«ازاي... السما الزرقا، بسحابها، شمسها، وقمرها في عتمة الليل... ازاي ممكن يكون جواها كل النار دي؟»

تلمس بشرتها الناعمة، متمتماً مغلقاً عينيه مكتفياً براحتيها المنعشة، التي بدأت بالاستيلاء على حصونه تدكها دكاً: «ناريسا!»

بصدر لاهث سألته: «معناها إيه؟؟»

فتح عينيه يلتهم تفاصيلها قائلاً بهمهمة:

«كلمة أصلها فرعوني، معناها النار الحمراء المشتعلة... انتي نار... نار حرقت كل من قرب منها... ولسة بتحرقني»

فجأة ابتعد عنها قائلاً بنبرة باردة، لا تمت بصلة للشغف الذي كان يسيطر عليه منذ لحظات:

«البسي حاجة محترمة... أهلي وأهلك على وصول»
تركها واقفة مكانها وذهب... هكذا بكل بساطة... أشعل فتيل مشاعرها التي طمرتها طويلاً... طويلاً جداً.
«ماما... ماما... ماما»

انتبهت لصوت لوسي.. أسرعت إليها... ولكن لدهشتها كانت ما تزال نائمة... قبلت جبينها متنهدة.... المسكينة تناديهما في نومها!
ارتدت ثيابها التي اختلفت تماماً عما كانت ترتدي سابقاً... وقفت أمام المرأة فخورة بنفسها؛ فقد أصبحت أمّاً... ثوبها الصيفي البسيط بفتحة العنق المعتدلة وطوله لأسفل كعبيها، ناسبها تماماً... إن لم تمتلئ تماماً كأي أم في وضعها.... ولكن... منذ متى كان وضعها طبيعياً؟! تلمست الكدمة الزرقاء حول عينها... لم يتحسن وضعها أبداً.... على رافع أن يبذل مجهوداً كبيراً ليستطيع إقناعهم أن الأمور بيننا بخير فعلاً.

صوت رافع بنغمة غريبة يناديهما من أسفل:
«حبيبتي... انزلي لو سمحتي»
لابد أنهم وصلوا... ألقى نظرة أخيرة على لوسي، وخرجت بعد أن تركت الباب موارباً لتسمعها.

«زينة حبيبتي... أهلك وصلوا.... انتي فين؟؟»
وقفت مسمرة مكانها، تستمتع باستغراب بصوته يناديهما بنغمات التحبب... ثم بدأت بالركض.



«إذا أحب الرجل امرأة سقاها من كأس حنانه،
وإذا أحببت المرأة رجلاً أظمأته دائماً إلى
شفتيها»

— بيرون

.....

كان ينتظرها أسفل الدرج بابتسامته الغريبة تشوه وسامته الطبيعية.... مد يده
لاستقبالها، ترددت قبل أن تضع أناملها في راحة يده الكبيرة، بقشعريرة زادت
حتى الرجفان، وهو ينحني ليقبل وجنتها بنظرة متوعدة.
التفتت لتواجه الشهقات التي توقعتها تماماً، وأمها تمسك يدها وتتأمل الكدمة
الملونة في عينيها. ازداد التوتر ورضوان وسيف يتبادلان النظرات المحتقنة، وأمها
تسألها:

«إيه دا يا زينة!! مين أمل فيك كده؟؟؟»

ولم يحتمل سيف الانتظار حتى سماع الإجابة، كالمعتاد سبقت أفعاله تفكيره،
فهجم على رافع ممسكاً بتلابيبه يكيل له اللكمات، التي أفقدت هذا الأخير
صوابه محاولاً السيطرة على نسيبه؛ وعندما تأكد أنه لا فائدة، اتخذ وضعية
الهجوم وهم يكيله من نفس مكياه، بصعوبة استطاعت زينة احتلال الفراغ
المعدوم بينهما صارخة بكل قوتها:

«إيه اللي بتعمله دا!!! مش تستنى لما أجاب؟! انت مفيش فايدة فيك يا
سيف؟! لسة زي ما انت؟!»
لاهثاً بانفعال:

«عاوزاني أسمع إيه!!؟ بكفاية اللي شايفه بعيني.... ولا عاوزاني أصدج إنه مبيضر بكيش، وإن اللي في وشك دي وحمة طلعت لك على كبر!؟»
زمجر رافع بتحدي:

«أيوه أنا ضربتها انت مالك!؟ مرتي وأنا حر فيها!؟»
أوقف رضوان العراك:

«وجف عندك انت وهو.... مفيش احترام لوچودي!؟»
زفر الرجلان مشيحان بوجهيهما، فتوجه إليها رضوان يمسك بوجهها يتأمله بحب وألم: «أحكيلي يا زينة... چوزك اللي عمل فيكي إكده!؟»
بدون تردد:

«لأ يا بابا.... كانت حادثة... وأكيد رافع مش السبب»
رمق ابنه متنهذاً بغیظ: «سمعت يا سيف!؟ اتأسف لچوز أختك... انت غلطت في حجه»

دفعه رافع بزفرة تأفف:
«معاوزش أسف.... عاوزه يشغل عقله جبل ما يتورط في مصيبة لا سمح الله... ولا إيه يا عمي رضوان!؟»

«عليك نور يا رافع يا ولدي... بس تجول إيه... نجول طور يجول احلبوه»
ضمتها فاليريا بشوق، تنشقت رائحتها بتنهيده، ثم التفتت لهنّ التي ازدادت طوًلاً حتى قاربت لكتفيها... احتضنتها بشوق وهي تداعب شعرها بعيون شاردة.
ربت سيف على ظهرها:

«متآخذنيش يا زينة.... لما شفتك الدم ضرب في نافوخي... انتي خابرة خوي»
«خابرة يا سيف... ربنا يهديك... اتفضلوا واقفين ليه!؟ وحشتووني أوي»
رافقهم رافع للصالون، بينما أوقفها سيف متسائلاً بهمس: «ويلد الرفضي ده لجاي كيه!؟»

أجابت على سؤاله باتهام:

«انت شايف إنك لما تخبي عني إنه مطلقنيش دا تصرف صح!؟؟»
«اسمعي يا زينة... بعد الي حوصل في الجوازات الثانية معادش ينفع إنك
توبجي على ذمته»

«انت شايف كده... بس للأسف أنا ورافع شايفين حاجة مختلفة... ودي حياتي
أنا وهو بس... محدش ليه إنه يتدخل فيها... سامعني يا سيف؟ وكمان هو
هيقول لكل الناس إن لوسي بنته... لو كنت مكانه كنت هتعمل كده؟؟»
هدر باندفاع: «لع طبعاً»
هزت رأسها بأسف:

«ماما بتنادي عليا... عن إذنك»
رمقها رافع بازدياء أخفاه بمهارة، وهو يعود لحديثه مع رضوان... بينما تهايمست
السيدات بخفوت.

«زينة حبييتي»
رفعت رأسها بدهشة... لتدرك مرة أخرى أن رافع ما يزال يمثل دوره باقتدار:
«أيوه.. نعم يا.... حبيبي؟»
«أهلي يظهر وصلوا... ممكن نستقبلهم سوا؟»
«أه طبعاً»

اعتذرت من أهلها، وهي تنهض، لتفاجأ بذراع رافع تحوطها بابتسامته الزائفة
المربكة... فتحت الباب لتهب حماتها تتعلق بعنق ابنها تبكي بشوق وفرحة...
صافحها وهدان باحترام حذر، وبعده نجلاء الوحيدة التي كانت تحيتها صادقة
تماماً، ثم ركضت لتلتقي بصديقتها... وآخر الوجوه كان جاسر... مدت يدها
تصافحه ببرود. وهمت بسحب يدها فوراً، ولكن أصابعه أحكمت الطوق على
أناملها الهشة، مدققاً النظر لملامحها، وكأنه يستعيد ذكرياته معها... شعرت
بخوف مبهم وهو يسألها: «كيفك يا زينة؟؟»
حاولت مرة أخرى جذب يدها فلم يسمح لها:

«أنا كويسة... اتفضل»

صوت نحنة رافع أجبرته على الابتعاد فوراً، وهو يصافحه ويحتضنه... لم ترتج
لردة فعل زوجها وهو يحدها بقسوة، وكأنها تعمدت التمسك بيد ابن عمه بهذا
الشكل... بصوت متشدق هتفت حمائها وهي تعانقها ببرود:
«أهلاً يا مرت ابني... حمد الله على السلامة... اتوحشناي جوي... طولتي
الغيبة»

«الله يسلمك يا طنط... اتفضلي»

شهقت بحركة تمثيلية مشيرة لعينها المكدومة، وبيدها الأخرى تربت على كتف
ابنها بفخر:

«كبيدي يا نضري!! إيه اللي صابك في عينك؟؟»

«ولا حاجة يا طنط.... اتخبطت في الباب»

«اوبجي خدي بالك، لبعد الشر يوحصلك حاجة عفشة»

«اتفضلي يما... جماعة عمي رضوان موجودين»

«والله؟ لا مؤاخدة يا بني... العتب على النظر»

كان اللقاء بارداً كما هو متوقع، كانوا يتبادلون نظرات المجاملة الفاقدة لأي نوع
من الود، حتى سمعوا أنين وصوت باك ينادي أعلى السلم: «ما.. ما... ما... مي...
يا ما... ما... يا ما... مي»

ركضت زينة بلهفة، بينما وقفوا جميعاً، نصفهم تغمرهم فرحة، ولهفة لرؤيتهم
الصغيرة لوسي أخيراً، ونصفهم الآخر مذهول تماماً.

حملتها ونزلت تحملها محيطة جسدها الصغير بحماية، لتجد رافع بانتظارها يشد
على كتفها بقوة، وكأنه يجتاز الامتحان الفعلي لقوة الأعصاب:

«بابا... ماما... أنا آسف إني خبيت عليكم... لما صالحت زينة لقيتها محضراي
أحلى مفاجأة»

هي وحدها أدركت سبب تغير لهجته في هذا الإعلان... التصرف لم يرتق لردة فعل الرجل الصعيدي حار الدماء، لذلك لجأ لجانبه الآخر المتمدن الذي يمكنه ذلك، والذي يعرفه جيداً، تدرك المقدار الهائل الذي يستخدمه من ضبط النفس بمجرد ملاحظة ليل عينيه المظلم، وكأن قمره حُسف منه بلا عودة.

بعد مرور الصدمة كانت هنا ونجلاً أول من اختطف الصغيرة، التي على الفور انخرطت معهم سعيدة بكونها محور اهتمام الجميع... حتى ست الدار ووهدان استبدلت ملامحهم العبوسة لأخرى سعيدة فرحة، خاصة عندما بدأت لوسي بالتنقل بينهم للتعرف على الوجوه الجديدة، وفرضت الصغيرة حبها الفطري في كل القلوب... ما عدا القاسية منها، حيث كان جاسر ورافع الرائدان في رفع رايات العصيان.

أولاً رافع بشعور متأرجح بين الرضا والغضب، متسائلاً إن كانت النتيجة تستحق كل هذه التضحية... ولكن هل سيستمر هذا السلام المتوتر طويلاً؟ خاصة بعد أن يخرج المارد الصعيدي من قمقمه ليغسل شرفه، الذي دنسته شيطاناته الحمراء. لم تكن نظرات رافع وحدها هي التي تسببت بإجهاض فرحتها بقاء أهلها بلوسي، جاسر أيضاً كان يرمق الصغيرة بعداء غريب، وهي بفطرتها تجاهلت وجوده... ظل يرمقها بنظرات مزيج من الألم والحسرة... حتى رافع لم يخف عنه ما يحدث....



هتف رضوان بصوت مرتفع من فوق الضجيج:
«بالمناسبة الحلوة دي، الكل معزومين عندي بكره إن شاء الله نجضوا اليوم كلاته بالچينية؛ علشان البرنسيصة لوسي قمرح وتنبسط»
صاح ووهدان بعصبية وتحدي الرجل الصعيدي الذي لا يفوته واجب:
«والله لا منكن أبداً... العزومة دي عليا أنا... عنك انت يا حاج رضوان»

لوح رضوان بيده معترضًا: «لا والله يا حاج وهدان... هو انت شايفني صغار جدامك؟! ولا إحنا مش هنعرفو نضيفوك، انت والرحامة كلاتهم كمان؟!»

«مش الجصد يا حاج رضوان.. بس العوبارة...
أوقف رافع الجدل قبل أن يتطور:

«خلاص يا جماعة... يوم عند الحاج رضوان لأنه هو اللي بدأ بالعزومة... واليوم الثاني عند الحاج وهدان... إيه رأيكم؟؟»

اهتزت الرؤوس بالرضا، فتنفس رافع الصعداء.

عاد الجميع لتوجيه اهتمامهم لتلك الشعلة الصغيرة من الحركة، ولم يلاحظوا تقطيع رافع العابسة ونظراته المزدرية.

افتقدت لوسي الاهتمام بعد انصراف الجميع، حاولت أن تحظى ببعض منه بتسليط بعض من سحرها ممزوج بابتسامة تعرف تأثيرها جيدًا على الكبار ولم تخطئ هدفها أبدًا إلا مع ذلك الجلف الصعيدي، دفعها عنه في فورة غضب من نفسه، لتسقط الصغيرة باكية على الأرض، وهي تحديق به مصدومة، لا تصدق قسوته غير المبررة لمنطقها الطفولي، بعد فيضان الحنان، الذي تدفق من كل حذب وصوب في الساعات الأخيرة!

ركضت زينة نحوها تحملها صارخة بوجهه كاللبوة المفترسة: «وهي ذنبها إيه علشان تعاملها بالوحشية دي!!؟»

بنظرة هازئة آمال عنقه باستخفاف:

«معلش يا ست الحسن، أصل أنا مش زي چاسر ابن عمي... مبعرفش أسبل ولا أتسهوك»

هتفت بتردد: «قصدك إيه؟؟ مش فاهمة!»

«والله؟! لا انتي فاهمة مليح... يظهر إن چاسر هو اللي باجي متحرجش بنارك»

«انت أكيد مجنون!!»

«اليامين الچاين هنتچمعوا كثير.. اصحك الي حوصل الليلة يوحصل ثاني..

مخابرش هجدر أمسك نفسي لإمتى... اتجي شري يا...»

وترك نظرائه لتبلغها أنه يعاف مجرد ذكر اسمها على لسانه.

حملت ابنتها تختفي بها بعيداً عنه... عن كل ما يضره من أذى وكره... تتمنى

لو تخفيها في أحشاءها التي لم تحملها، ولكن حملها قلبها الموجوع بعشقه.

مر اليوم الأول بدون أي مشاكل. لولا توتر رافع الراقد فوق سطح ابتسامته

الزائفة، لأقسمت أنها لم يمر عليها يومٌ يمثل هذا السلام من يوم ولدت.

وكذلك مر اليوم الثاني... حتى نظرات جاسر الغريبة المستترة تجاهلتها، وقد بدأت

تفهم أخيراً سر عدااء سمحة الغريب والمفاجئ تجاهها... لم تصدق، ولكن

إحساسها لم يكذبها أبداً... حاولت تجنبه بكل الطرق وتجاهله تماماً... وقبل أن

ينتهي اليوم الذي قضوه في حديقة سراي الرحامة، ما بين مداعبات لوسي

الصغيرة، ومحادثات جماعية، تخللتها الضحكات والنكات مثل أي عائلة طبيعية،

حتى فاليريا وست الدار جمعت بينهما محادثات جانبية، وكأنهما صديقتا

العمر.... لم تكذ تصدق أن خطة رافع على وشك أن تنجح فعلاً... رغم أن معظم

فضل نجاحها يعود للوسي الصغيرة، التي أذابت العدااء بين العائلتين بسحر برائتها،

والتي لم تستطع اعنى القلوب القاسية اعتراض طريقها.

اختفى جاسر داخل الدار لبعض الوقت بعد أن فاض به احتماله تجاهلها له طوال

الوقت بينما تستجدي نظرة من رافع الذي لا يعلم سر بروده معها رغم ادعائه

العكس، ليعود معفراً التراب تحت أقدامه، وكأنه عاصفة تكتسح بطريقها الأخضر

واليابس... يسوق أمامه هنا ونجلا شاحبتين بهلع، وملامحه لا تبشر بأي خير...

انتفض الجميع من أماكنهم وقد انقلبت الوجوه الضاحكة لمتهجمة بالكثير من

علامات الاستفهام... بينما وقفت الفتاتان ترتجفان على نحو يوجع القلوب...

هتف جاسر بتهكم: «طبعاً كلاتكم خابرين إن المحروستين هنا ونجلا كان دورهم

إيه في چوازات الشوم الي حوصلت... بس الي ماتعرفهوش... إنهم كانوا مرتبين
كل شي مع المدعوج زيدان»

هتف وهدان بصوت هادر:

«إيه الي انت بتخترفه دا يا چاسر؟! انت شربان منجوع البرك الي بتتعطاه
وچاي ترمي بلاك على البننة!؟»

«لا يا عمي... أنا سمعتهم بوداني لما كت چوة، وهم يتودودوا سوا وبيتحاكوا
عن خطتهم والي عملوه... كانوا داسين الورج في إيديهم ومختارين مين
هيتچوز مين... عرفت يا رافع كيه اسمك وصل للجرعة وانت خاطب بت
عمك؟! عرفتني يا زينة هانم اسمك وصل كيه؟! بدسيصة من الكلبتين دول»

هب سيف مدافعاً عن أخته:

«احفظ أدبك يا چاسر!!»

«روح ربي أختك اللول يا سيف بيه، جبل ما تتحجم جوي إكده!»

صرخ وهدان:

«نچلا! الي بيجوله واد عمك دا صوح!؟!؟»

تبادلت الفتاتان النظرات المرعوبة، ثم أومأتا بصمت.

تدخل رافع أخيراً:

«انتم عاوزين تحملوا البنتين إيه بالضبط!!! أسباب فشلکم في جوازاتکم؟! ولا
يمكن هتحمولهم کمان ذنب موت رشاد وطفشان فريدة!؟»

صرخ چاسر بصوت هادر:

«کل دا حوصل بسبتهم!!!»

«لا يا چاسر... لا يا ولد عمي... أكثر من ده كان بيوحصل من غير الي عملته هنا
ونچلا... يمكن... مش يمكن... أكيد هم عملوا إكده بسلامة نية.... أكيد كانوا

عاوزين الجوازات دي تنچح... صوح يا نچلا؟»

قتمت بصوت باك:

«آه والله يا خوي... خفنا لو الجوازات منفعتش ترجعوا تمسكوا في خناج بعض

تاني وتتعاركوا»

أكملت هنا:

«علشان كده اخترنا أكثر أشخاص بيناسبوا بعض»

صرخ جاسر كالمجنون:

«بعرف مين!!؟ مين جالكُم إن سمحة تناسبني وزينة تناسب رافع!؟»

ضاقت عيون رافع باستهجان، فاستدرك جاسر بسرعة:

« ولأ فريدة الغلبانة تناسب رشاد!؟ ولا معالي الي كان نصيبها مع سيف!؟»

عقد رافع ذراعيه على صدره:

«بس أنا وزينة مناسبين لبعض يا جاسر، وربنا رزجنا ببنت وعاشين بسلام

والحمد لله... يمكن اختلفنا في اللول... بس صلحنا من أحوالنا وعاشين... وعلى ما

سمعت إن مرتك حامل... يعني لو فكرت شوية وخزيت الشيطان هترجع مرتك

وتعيش معاها بما يرضي الله»

«جولك إكده؟ حاضر... حاضر يا رافع بيه... أوامرك... ما انت الكبير وولد الكبير،

ولازمن كلاتنا نطيعوا... حااضر، إش أكون أنا علشان أعترض ولا أفتح خاشمي

بكلمة!؟ حاضر هبلع بولغة جديمة وأرجع سمحة ويا دار ما دخلك شر»

وانصرف تتبعه زوابعه.

وقف رضوان يعلن انصرافهم.... أحاط هنا بذراعه ليحميها من زغرات سيف

بابتسامة مطمئنة... ارتاحت فاليريا وهي تتبعهم متأبطة ذراع ابنها تعطيه جرعة

مهدئة، تنفع مع والده في معظم الأحيان، ولكنها تجد صعوبة في الوصول لسيف.

ركضت نجلا هاربة لغرفتها، حتى أوقفها صوت والدها الصارم المزلزل منادياً

باسمها، تسمرت مكانها مسترقة نظرة لأمها التي تنهدت بتعب وهي تقف بينها

وبين والدها: «بالهداوة يا وهدان»

«بعدي من طريجي يا حاجة، البت دي يظهر إنها عاوزه ربابة كيه ما چاسر جال... بجى انتي يا مسخوطة.. والبت السهانة الثانية دي.. تعملوا كل العمائل دي، وتلعبوا بالبلد كلاتها نسوان ورچالة؟!»
مد يده ليمسكها فصرخت مستنجدة بأمرها:
«أحب على يدك يما!»

زغرتها مرة أخرى بنظرة حارقة متوعدة، ثم التفتت لزوجها:
«خلاص يا حاج الي حوصل خلص، هنعملوا إيه يعني، الفاس وجعت في الراس واللي كان... كان»

«عارف إن مفيش في يدنا حاجة نعملوها... بس كنه خابور طالع من نافوخي... والأكادة بتي... بتي آتي هي أس الملعوب ده... خابرة لو كانت السهانة الثانية وحديها، كت جلبت الدنيا فوجاني تحتاني وخليت الدم بحور ملهاش نهاية... آه يا مجصوفة الرجبة، همليني يا حاجة أجطم رجبتها ف يدي»
أفلتت منه بصعوبة راکضة لغرفتها لاهثة... تاركة أمها تعمل على تهدئته.
نظرت لتليفونها یرن... أغمضت عينيها تعتصر دموعها وهي تجيب بصوت مخنوق:

«إيوه يا هنا...»



ركضت هنا صارخة وسيف يركض خلفها.. اختبأت خلف أمها بينما وقف رضوان بينهما:

«همل خيتك يا سيف»

«أهملها يابوي؟! الي حوصل ده آخرة چلعك ليها... ياما جلتلك لازم توجفها عند حديها، هي والثانية الي دايرة على حل شعرها»
صرخت فاليريا بحرقة:

«إيب سيف!! مش تכול على أهتك كلام وهش!!»

«أنا!!!؟ أنا اللي عيب!!؟ واللي حوصل وبيحوصل ده.. مش عيب!!؟ عاجبكم
چراير عمايلها هي والمزغودة الثانية بت الرحاية!!؟»

استرق رضوان نظرة لابنته الباكية ترتعش في أحضان أمها، ثم نظر لابنه وسأله:
«عَمَلْتِ إيه يعني!!؟ وفجت راسين في الحلال... إكده ولا إكده كت هتتچوز
معالي ولا غيرها... وكله جسمة ونصيب، بمساعدة هنا ونچلا ولا من غيرها... ولا
زي ما رافع چوز خيتك بيجول، عاوز تلج خيبتك على شماعة البنته كيه ما
چاسر عمل!!؟ ولا انت مصدجت بدل ما توجف جدام نفسك وتحكم على نفسك
وتسألها... ليه معالي عملت اللي عملته!!؟»

احمر وجهه وازرد من الغضب:

«بلاش السيرة دي يابوي!»

«وليه!!؟ عشان مش عاوز تسمع الكلمتين اللي انت خابرهم زين!!؟ وأهه چت
الفرصة علشان أجولهم»

هتفت فاليريا: «بلاش ردوان!»

«لع يا فال... لازم يعرف إن اللي عملته مرته مكانش غلطها وحديها»

شهق بارتياح: «جصدك إنها كانت غلطتي آني!!؟»

«لع يا سيف يا ولدي... الغلط كان مشترك بينك وبينها.. لازم تعرف إنك كمان
كت غلطان... من وجت ما عجدت عليها وانت حاطط براسك إنك أخذتها من بُج
السبع... وشوية وخيشت براسك إن عينها من واد عمها، وشعلت النار فيك كنها
كان بيدها إنها تهمله وتتچوزك انت»

«يابوي انت مخابرش»

«لع خابر، والي ميشوفش من الغربال يوبجى أعمى... وانت كت أعمى البصر
والبصيرة.. مفهمتش دماغ مرتك ومحاولتش تعرف... جَسِيت عليها، وبدل ما
تطلع رافع من راسها، خليتها تعاند معاك لحد ما وصلنا للنهاية الغبرة اللي انت
خابرها... طول عمرك مش عاوز تفهم إن الحنية والملاغية مش ضعف... الراجل

الصوح هو الي يلا عين مرته وجلبها وعجلها... الجسوة بتولد العند... والعناد يا ولدي كيه ما انت خابر بيولد والعياد بالله الكفر... كام مرة جعدت مع مرتك ساعة مغربية نادمتها وأخذت بحسها؟! كام مرة اتچلعت عليك وطلبت منك طلب ونفذته فوري، حتى لو كان غلط؟! دي حتى لما كانت بتطلب تروح لأهلها كت بتنشف ريجه وماكنتش بتوافج! دلوك عاوز تعلج خيبتك على خيتك؟! ياخي روح جبل ما تحاسبها حاسب نفسك لول»
ثم التفت لابنته:

«هنا روعي نامي، وبعدي عن طريقه»
نظرت لأمها التي أومات برأسها وهتفت:
«هنا هتروح لأهته هتنام أندها... بعد إذك يا ردوان»
نظر لابنه ذي الوجه المحتقن، ثم أوما برأسه:
«خلي الغفير يوصلها بالكارتة»
انتفضت هنا راکضة لغرفتها:
«هحضر نفسي»
ثم أمسكت بهاتفها الجوال وأجرت اتصالاً سريعاً.



فوجئت زينة بطرقات غريبة على الباب.. عندما فتحت اتسعت عيناها بدهشة تستقبل البنات:
«انتم هريتم ولا إيه؟! طمنوني إيه الي حصل؟؟»
ضمتها بقوة... ثم نظرت بأعينهما المكسورة:
«ارفعوا روسكم... رغم إني زي الكل مذهولة ومستغربة... بس زي ما رافع قال.... أكيد كنتو بتفكروا في حاجة كويسة... مش ذنبكم إن الدنيا حوالیکم هي الي وحشة»
«ممکن نبات هنا يا زينة؟؟ نجلا خايفة من جاسر وأنا خايفة من سيف»

«طبعاً اتفضلوا... فيه أوضة للضيوف في الدور الأرضي... ممكن تساعدكم انتم

الاثنين»

أطرت نجلا:

«مش عارفة أجولك إيه... أنا محروجة منيكي، أكيد انتي كمان زعلانة من اللي

حوصل»

«مقدر ومكتوب... اوعي تفتكري إنك انتي ولا هنا كان ممكن تعملوا حاجة

مكانش مقدر إنها تحصل... ربنا بيسبب الأسباب.. وبكرة جاسر وسيف هيفهموا

لما يهدوا... وانتي في بيت أخوي خدي راحتك ماشي يا نجلا؟»

أومات نجلا، ثم نظرت لهنأ بابتسامة متواطئة.. هزت زينة رأسها:

«مفيش فائدة فيكم... تصبحوا على خير»

صعدت لغرفتها... بتهيدة حزينة تأملت لوسي نائمة كاملاك... دوامة الأفكار

كانت لا تزال تطحن عقلها، أغلقت الباب بهدوء ونزلت مرة أخرى تتسامر مع

الفتيات، ربما تساعدنا ثرثرتهما على استدعاء النوم لعينيها العاصيتين... توقفت

قبل أن تنزل السلم تحدج ذلك الباب المغلق في آخر الردهة، صوت رافع بنبرته

المتعالية يحذرها من الاقتراب من جناحه... داعبت حروف اسمها الذي يدعوها

به في قمة شغفه «ناريسا»... غيرت اتجاهها بتمرد نحو جناحه المحرم... بما أنه

فضّل السهر خارجاً هذه الليلة، فلا بأس أن تلقي نظرة... مجرد نظرة على محرابه.

فتحت الباب برهبة، وخطت أول خطوة، لتقف مذهولة بعد أن أشعلت

الإضاءة... وكأنها مرت من بوابة نقلتها لباريس بكبسة زر... ديكورات الغرفة

شاملة الإضاءة والألوان والسجاد، كلها لم ترَ مثيلها إلا في أفخر الشقق الباريسية...

مسحورة بدأت قدماها بالتوغل لتغوصا في السجاد ذي الوبرة العالية برسومه

الخيالية.... الفراش الملكي الحجم، بغطائه الناري اللون بدرجاته، وفي الحائط

المقابل مرآة دائرية معلقة، أسفلها أدراج الزينة، تراصت عليها أفخر العطور

الرجالية... ازداد تقدمها عندما لمحت شكلاً مألوفاً لزجاجة عطر... وعندما

أمسكتها لم تصدق ما تراه... إنه عطرها!! تركته جانباً وأمسكت بالزجاجة الأخرى، فتحت غطاءها لتغمض عينيها ورائحته تغطالها بكل جبروته، وقسوته، وحنان نظراته التي تفتقدتها.... رشت منها على معصمها ثم تنشقت رائحته التي احتوتها بعمرق... عادت تكمل جولتها لتجد بجانب الحائط الآخر أريكة بلونيه الأبيض والأحمر، تطل من خلفها فروع شجرة تبدو لأول وهلة وكأنها شجرة حقيقية تحمل زهوراً حمراء نارية اللون... كتمت شهقتها وهي تتلفت حولها بجميع الاتجاهات، حتى توقفت أمام الباب المفتوح، وقد تصدره بجسده الفارع يرمقها بنفس النظرة التي تسبب غثيانها:

«كنت بسأل نفسي... إمتى فضولك هيجيبك لحد عندي»

اعتدلت بقامتها وحاولت تجاوزه بسرعة:

«أنا آسفة... مش هكررها ت...»

اقتنص مرفقها قبل أن تتجاوزه تماماً، وبمنظرة تسلية دفع الباب بقدمه، ثم دفعها بخشونة لتسقط على الفراش... تسابقت خفقاتها بهلع مع استمرار تقدمه نحوها باطراد مع تراجعها، حتى وصلت لنهاية الفراش... تراقصت نظرة لعبوب بعينيه: «اوعي تكوني مش عارفة أنا عاوز منك إيه»

ثم أردف ضاحكاً: «خابرة ولا مخبراش؟؟ إلا قوليلي بصراحة... انتي كنتي عارفة عن لعبة هنا ونجلا؟؟ ويمكن تكوني انتي اللي مدبرها كلها، من أولها لحد المشهد السخيف الأخير، لما صممتي على الطلاق»

هزت رأسها بحلق جاف تنفي عن نفسها التهمة، ازداد رعبها وهو يخلع جلبابه الفضفاض، ليقف أمامها ببنتلون أبيض خفيف هو كل ما يستره.... ازداد وجيب قلبها مرة أخرى محاولة الدفاع عن نفسها:

«انت فاهم غلط يا رافع!»

توهجت عيناه بحدية قاسية ذبحت قلبها العاشق بوحشية:

«لأ... أنا فاهم صح... وصح أوي كمان... والي أنا هعمله دلوقتي مش عشان أنا عاوزك... ولا راغب فيكي... لأ... علشان أدفعك تَمَن أول كذبة كذبتها عليا... وأخذ حقي الي اتخليت عنه... حق ليلة الدخلة يا عروسة... الي البلد كلها فاكراني أخذته... وكل الي أنا عملته إني افتكرتك إنسانة نضيصة بجد»
أمسك قدميها قبل أن تفكر في الهروب مرة أخرى، ليجرها لمنتصف الفراش... لم يبال بمقاومتها وهو يكاد يزهق أنفاسها من عناقه الشرس... حاولت جذب شعره لتبعده عنها، فثبّت يديها فوق رأسها يحدق فيها لاهثًا، وعيناه تتقدان برغبة متوحشة غاشمة.

«رافع... أرجوك... أنا هقولك على كل حاجة»

هزها بقوة قائلاً بألم:

«معايش أسمع... غير حاجة واحدة... اترچيني يا زينة... اطلبي مني الغفران»
باكية بانتحاب:

«أنا معملتش حاجة... اسمعني علشان تعرف»

«أسمع!؟ أسمع إيه وأنا شايف كل حاجة بعيوني، ومجادرش أتكلم!؟ كل ما أشوفها جدامي أحس بنار بتخرجني من چوايا... وكل ما أشم ريحتك أحس إن مفيش حاجة هتبرد ناري، إلا دمك محني كفوفي»
صرخت بعذاب:

«وإيه الي موقفك!؟؟ اقتلني وارتاح... لو كنت هترتاح فعلاً»

أمسك بوجهها بين يديه يهزها بقوة:

«فاكراني خايف من الي هيوحصل!؟ توبجي متعريفش رافع... أنا مبخافش... وبتوحصل كتير... وجعت على السلم وانكسرت رجبتها... ويمكن أشيلك بين دراعاتي وأسلمك لأهلك جتة وأجولهم إني غسلت شرفي... هيسألوني سؤال واحد... مدفنتهاش في أوسخ حفرة وهلت عليها الوحل ليه!؟»

«بالبسطة دي روح إنسان معندهاش سعر عندهم!؟»

«بالبسطة دي، اللي تفرط في شرفها ملهاش عندينا إلا الموت... بس انتي لسة وجتك مچاش... لما چاسر يصلح مرته، وسيف يسامح مرته... يمكن وجتها تكون ساعتك جربت»

ابتعد عنها ينفذ نفسه كمن علق به وسخ... وغادر غرفته بعد أن أمسك بجلبابه يرتديه في طريقه:

«عاوز أعاود ألاجي أوضتي نضيفة»

انكفأت على وجهها تكتم شهقاتها، وصوت محرك سيارته يشق سكون الليل بزئيره الغاضب قبل أن ينطلق... نهضت مسرعة للغرفة الفارغة، أغلقت عليها الباب، وألقت بنفسها على الفراش تنتحب بعذاب.

زاد من سرعته، يحاول تبريد مزاجه الناري بنسمات هواء الليل الرطبة... وطال به الوقت متسكعاً بسيارته بدون أي تأثير... يزداد غضباً فوق غضبه كلما تذكرها بين ذراعيه يتنشق عطره بين أنفاسها مما أفقده صوابه... لماذا وضعت عطره!!؟ ماذا تريد منه هذه المرة!!؟ هل ترغب بالموت على يديه، أم بغفرانه الذي لم تتوسله بعد!!؟

توقف أمام خيش الغجر بعد أن أثار انتباهه صخبهم العالي... ترحل مقتحماً المكان يتمنى لو يجد فيه ترياقه من الاحتراق بنيران ناريسته الحمراء. حدق فيه جاسر مهلاً:

«معجولة دي؟! رافع ولد عمي بذات نفسيته إهنة؟! وسع يا واد... وسعي يا بت... بت يا نوار، أجدعها جوزة بأجعصها تعميرة للبيه الكبير جوي.... تعالى يا رافع متختشيش... تعالى اجعد چاري»

تهالك رافع بجواره غير مرتاح للمكان ولا للصحة... ولكنه كان بحاجة ماسة لينسى... وضعت أمامه الجوزة يتوهج فحمها، ووجد مبسمها أمام فمه، فأخذ نفساً عميقاً وأخرجه دخاناً من أنفه وفمه... ولدهشته الشديدة بدأ يساوره شعور غريب بالراحة... فأخذ نفساً آخر وآخر، وجاسر يصفق مهلاً:

«يا حلاوتك يا ويليدي عمي! شد يا خوي... شد.... مع إني مخابرش يابوي... واحد
زيك چاي في المحروجة دي ليه؟! طب آني عاوز أنسي»
سأله رافع بذهن شارد: «تنسي إيه؟»

لوح جاسر بيده:

«يووووه! أنسي حاجات كتيرة جوي... خد عندك... انسي بت اتشعلجت في
هواها وشعلجت جلبي بريحتها... أتاري حبالها دايرة دوبتني معاها... هع...
هع... والله حلوة وتنفع تخنيها البت نواره على الرابة... صوح يا نوار؟»
اشتعلت الغيرة بعيون نوار وهي تومئ موافقة:

«صوح يا سيد الناس»

تنهد جاسر مردفًا بصوته المترنح:

«بس يا خسارة! اتجوزت... خابر يا ولد عمي اتجوزت مين؟؟ اتجوزت ولد
عمي... شوفت الصدف.. هع هع»

ألقى رافع الجوزة من يده لينتبه لحديث جاسر المترنح: «ومين ولد عمك ده؟؟»
قهقه جاسر ثم شرب ما تبقى من كأسه:

«هيكون مين غيره؟! انت يا رافع بيه، يا واكل ناسك»

وقف رافع ممسكًا بتلابيب جاسر:

«هي حصلت تچيب سيرة مرقى يا كلب في جعدة نچسة زي دي!!!»

ركضت نوار خارج الخيش تاركة الرجال يتبادلون الضرب والشتائم، أوقفت
مجبورة تسألها بلهفة: «مشوفتيش الواد فركوك؟؟»

«أيوه كان هناك بيتعاطى المدعوج بتاعه ده... كان في الخيشة اللي في الآخر
دي... بس انتي عاوزاه ليه يا نوار؟؟»

«شغل يا خالة مجبورة... شغل»

«طيب يختي... إلا هو إيه اللي بيحصل في خيشك ده يا نوار؟؟»

«دول الرحامة ماسكين في خناج بعض عشان بت البداري»

شهقت العجوز :

«صوح يا ولاد.... جال اللي يعيش ياما يشوف، عجب والله»



تأخر الوقت ولم يعد بعد... أخذت تفرك ذراعيها لتبعث الدفء فيهما.. قد يكون نهارهم صيفاً دائماً، ولكن ليلهم تصل برودته حد الصقيع أحياناً... طال وقوفها في حديقة الفيلا تنتظره... لم تدْرِ لماذا ولكن حدسها يخبرها أن شيئاً سيئاً سيحدث... لوسي خضعت لإرهاق اليوم ونامت بعد أن استفذت منها ما تعرف من حكايات، والفتاتان تغطان في نوم عميق... وهي أيضاً ستعود للنوم فور أن تلمح أضواء سيارته من بعيد... لن تسمح له أن يشاهد قلقها عليه... لن يصدقها بأي حال من الأحوال.

صوت غريب أثار ارتياها... تلفتت حولها تمعن التحديق في الظلام... حتى ضوء القمر الشاحب كانت تخفيه سحب سوداء... بدأ قلبها يعلن بجنون دقائقه عن توترها... وضعت يدها على صدرها تهدئه.. لا شك أن فأراً أو قطاً يلهو هنا أو هناك... وعندما ازدادت الحركة صخباً، قررت أن تذهب لترى بنفسها كي ترتاح من كل هذا القلق... اقتربت من النباتات المسورة حول الفيلا بدون حذر متعمدة إصدار صوت، لعل صوتها يبعد رهبتها من الظلام، خاصةً وهي تحمل في يدها غصن شجرة تهدد به من يجروء على إخافتها:

«فيه حد هنا؟؟ فيه حد هنا؟؟»

فجأة، انشقت النباتات المتعرشة عن وجه قبيح بابتسامة قميئة تنقصها معظم الأسنان الأمامية، وشعر لم يعرف مقص الحلاق يوماً... وقد هب عليها برائحته النتنة يحرق فيها بطريقة حيوانية... لوح بالغصن تهدد بصوت متحشرج: «انت مين وعاوز إيه؟؟ امشي من هنا قبل ما أنادي صاحب الفيلا، رافع الرحامي!»

لم يبدُ على الرجل أنه سمعها؛ فلم تتقلص ابتسامته البشعة رغم كل تهديداتها، واستمر في تقدمه المطرد... حدثها رغبة رهيبة في البكاء، ثم تذكرت الفتيات ولوسي... لابد أن توقفه قبل أن يفكر في دخول الفيلا... هدرت شاهرة ما تحسبه سلاحاً: «اسمع... أي حاجة عاوزها أنا هجيها لك.... عاوز فلوس... دهب.... أي حاجة... عاوز إيه؟؟»

نطق بالكلمة الوحيدة التي أشعرتها باقتراب الأزمة القلبية التي حذرها منها ضياء:

«عاوزك... انتى»

«انت مجنون!!؟ امشي من هنا قبل ما أصرخ وأنادي جوزي... لو شافك هيقتلك»

ضحكته زادت من بشاعته:

«جوزك يا حلوة بيشر ب منجوع البراطيش في خيشة نوار الغازية... ومزاجه عال العال»

شحبت وأنفاسها تتسرب من صدرها:

«انت بتقول إيه!!؟ انت كداب... رافع مش ممكن يعمل كده.... انت كداب!!»

«لع يا حلوة... أنا فركوك»

قال جملته الأخيرة وهو ينتزع منها غصن الشجرة، ويقبض على حفنة من شعرها ليقربه من أنفه يشمه بقوة:

«جالولي كتير على حالاتك... ومصدجتهمش.... دلوك بس بصمت بالعشرة»



خرج من خيش الغجر بمزاج أسوأ من السابق... نفث قبضته الممهورة برذاذ دماء ابن عمه بعد أن كادت تحطم فكاه، قاد سيارته وداخله بركان وصلت درجات غليانه للانفجار.... أخذ يلوم نفسه ويوبخها... كيف لم يلحظ نظراته لها!!؟ إمساكه بيدها!!؟ ملامحه التي لانت قساوتها عندما رآها!!؟ أخذ يضرب ظهره

بالمقعد يكاد المقود ينخلع في يده... وعندما تشوشت الرؤية أمامه تمامًا، أوقف السيارة على جانب الطريق... انحنى ليفتح درج القفزات يخرج علبة السجائر والولاعة... من فرط توتره سقطت الولاعة في الدواسة الأمامية... انحنى يلتقطها لتضطدم يده بشيء آخر... فتح الضوء الداخلي للسيارة يحرق بدهشة في تلك الحقيبة، غريبة الشكل... اعتصر عقله يتذكر أين رآها من قبل... ثم لعن جاسر ونوار والجوزة وكل من يشربها لتذهب بعقله.... فتحها وأخرج ما فيها... كانت حقيبة أوراق... ما أثار استغرابه وجود جوازين للسفر... فتح أحدهما.. أحدهما كان لشيطانته الحمراء المغوية... أغلقه بسرعة ليفتح الآخر، وكان للوسي... تشكلت علامات استفهام كثيرة، محاولًا التركيز وإجلاء ذهنه مما علق به في ذلك المكان القذر... هز رأسه بتنهيده وهو يغلق صفحاته، ولكنه عاد يفتحه بسرعة عندما التقطت عيناه اسم لوسي الرباعي... ولم يكن الأب هو ضياء كما توهم... التهمت عيناه باقي البيانات، ليجد في خانة الأم اسمًا غريبًا لا يقترب لحروف اسم زينة... زادت علامات الاستفهام بعقله... ما معنى هذا؟؟ فتح الصفحة التالية، كانت صورة زينة بجوارها بيانات كثيرة باللغة الفرنسية لم يفهم منها شيئًا بطبيعة الحال... ولكن اكتشافه في حد ذاته كان مثيرًا للتساؤلات... ومن المؤكد أن كل الإجابات ستكون عندها.

ضم فمه بعزيمة، وهو يرفع الفرامل ويشغل المحرك وينطلق... مرددًا أقسامه الواحد تلو الآخر أن يذيبها من العذاب ألوانًا، لو كان ما يفكر فيه صحيحًا. أوقف السيارة في مكانها، وقفز يفتح الفيلد بخطوات واسعة... صعد لأعلى، تفحص غرفة لوسي، كذلك الحال في الغرف الأخرى... الحمام؟؟ وقف حائرًا أين ذهبت؟؟ لا يمكن أن تبتعد عن لوسي... وقف في شرفة غرفته يحرق في الظلام، إلى أن انتبه لأصوات مكتومة... وميز اسمه بنداء مستغيث من بين نبرات الأنين الخافت... نزل مهرولًا يكاد يفقد اتزانه أن يكون أصابها مكروه... تلفت حوله حتى استطاع تحديد مصدر الصوت والحركة.

وقف مكانه يشاهد بعينه أصعب مشهد قد يتعرض له رجل؛ أن يرى زوجته تناضل بحياتها من أجل شرفها... وتفجرت الحمم المشتعلة من البركان الصعيدي الذي لا تخمد حممه أبداً، وهو يسحب الرجل من فوق زوجته، يكيل له اللكمات الخطافية قبل أن يترك تلايبه ليطيّر عدة أمتار للخلف... التفت نحوها لينطلق عقله من عقاله تماماً وهي تحاول بخجل أن تداري عريها عنه بعد أن تمزقت ملابسها... أمسكها من كتفيها يحاول طمأنتها:

«زينة... متخافيش أنا معاك.. انتي بخير؟؟ كلميني يا زينة.. طمنيني عليكي»
نظراتها الزائغة ترتعش بقوة، فضمها ل صدره ييشها الأمان... كان يهم بحملها عندما سمعته يشهق وعيناه تجحطان بالألم، وخيط من الدماء ينز من فمه.... رفعت رأسها لترى الابتسامة القميئة لهاجمها، بعد أن طعنه من الخلف، ثم لوى السكين في جرحه ليشهق بألم متحشرج، تبعته ارتجافة قوية، ثم سقط بين ذراعيها كورقة خريف أسقطتها نفخة هواء.

اختفى المجرم في ثوان. أخذت تحرق في جسد زوجها الهامد لا تكاد تصدق... حاولت مناداته تارة وهزه تارة ولكنه كان كالجثة الهامدة... كانت صرختها المدوية هي التي أيقظت الليل من سباته.



«زينة.. زينة يا بتي.. جومي ريحي چتتك.. انتي من عشية واجفة على حيلك، والفجر جرب يشجشج»
لم تزح عينيها عنه منذ آخر مرة أعلنت فيها الأجهزة توقف قلبه... تهاب أن يذهب ويتركها قبل أن تخبره.
أمسكت الممرضة متوسلة:

«أبوس إيدك خليني أدخل.. دقيقة واحدة بس»
«يا مدام انتي بتحرجيني، الدكتور لو عرف هيعمل لي مشكلة»
«هي دقيقة واحدة وهخرج قبل ما حد يعرف... أرجوكي»

أطرقت الممرضة تفكر فهتف رضوان: «راعي ظروفها يا بتي ربنا ما يوجعك في ديجة»

«طيب بس هي دقيقة واحدة.. تعالي معايا ألبسك ملابس التعقيم»
مسحت دموعها تكاد تطير من السعادة وهي تتبعها...



أمسكت يده وقبلتها بقوة، ثم تطلعت لملاحمه القوية الحادة... شاحبة هزيلة...
اعتصرت عينيها لتمنع دموعها:

«رافع... حبيبي... أنا آسفة إني مقتلهاش ليك قبل كده... وآسفة إني خبيت عنك حقيقة لوسي... يمكن كنت خايفة أقولك... ويمكن كنت بدّيك فرصة تعرفني أكثر، وتغير فكرتك عني... أنا كنت غبية.. عارفة... كان لازم أقولك على طول... كنت وفرت علينا كثير... بس أنا مكنتش عارفة إنك بتحبني»

«أيوه عارفة... طبعاً هتسألني عرفت منين... من نظرتك ليا وانت بتاخديني في حضنك آخر مرة قبل ما المجرم ي...»

«المرّة دي كمان الدم سبق الحب... بس مش لازم نخليه يكسب... لسة في إيدك تكسب الجولة الأخيرة... رافع لازم كلمتك هي الي تكسب الرهان في الآخر... لازم الحب والسلام هو الي يجمع بين الناس قبل الدم والخراب... رافع أرجوك ارجعلي... اوعى تستسلم»

«مدام... كفاية كده الله يخليكي قبل ما الدكتور ييجي... هو سمعك، وإن شاء الله هيقوم بالسلامة»

أخذها والدها تنتحب في أحضانه تتوسله أن يدعو له... جلس معها عندما رفضت أن تعود غرفتها... رفضت أن تتحرك بعيداً عن زوجها وحبيبها... لف رضوان عباءته عليها لتستكين على صدره، وتغفو بدون أن تشعر.
فتحت عينيها على ضجيج غريب في الصباح، لتجد عائلة الرحامة كلهم مجتمعين، والجميع يحدجون بنظرات كره وافد جديد... أو وافدين.

قفزت تحديق بفريدة وضياء:

«حمد الله على السلامة... انتم جيتوا امتي؟؟»

عانقتها فريدة تحاول تمالك نفسها:

«كتي عاوزاني مجيش بعد اللي عرفته!؟»

جالت زينة بنظرات مرتابة بين الرحامة وفريدة:

«بس انتي عارفة خطورة الوضع»

تحرك جاسر ليمسك بذراعها بقسوة:

«جيتي لجضاي يا فاجر...»

ولم يكده ينهي جملته، حتى أصابته صاعقة من قبضة لم يتوقعها... وقف ضياء ينفض يده قائلاً:

«هتقرب من مراي تاني... هقتلك»

والجميع يرددون بصوت واحد: «مرته!!؟؟»

صاحت فريدة بصوت عال بافتخار:

«إيوه... چوزي... الدكتور ضياء... آمال كنتم فاكرين إيه!!؟ فريدة المسكينة اللي رميتها لرشاد من غير ما تسألوا عنها، وبعد ما مات فكروا تجوزوها أي غفير حداكم عشان تخلصوا من حملها التجيل... مفكروا تجوزوها رافع اللي هيطلع مرته، ولا چاسر اللي طالعين بيه السما... كان يا دوب تستروا اليتيمة الغلبانة مع غفير من حداكم»

اقترب وهدان يحدجها بنظرة نارية، ونبرات كطلق البارود:

«اتچوزتي من ورانا يا فريدة!!؟؟»

جابهته بدون خوف مما أثار دهشته:

«إيوه يا خالي اتچوزت... مدورتش على حل شعري... ومامشيتش في الحرام... اتچوزت على سنة الله ورسوله... راجل كل العوايل يتمنوا لبتهم ضوفره»

«وعرفتيه ميتي ده يا بت چنيدي؟؟»

«عرفته وجت ما عرفته يا خال، تفرج معاك إيه!؟»

شهقت ست الدار تضرب على صدرها:

«شوفوا البت بجت جوية وبچحة إزاي!؟ هي دي الي كانت بتخزي من خيالها!؟»

التفتت لها فريدة:

«إيوه يا مرت خالي... هو آنى... لو كت غلظت مرة واتچوزت من وراكم، فكلاتكم غلظتم فيا بدل المرة ألف مرة... وأنا صابرة وساكته، وعمري ما اشتكيت غير للي خلجني... علشان إكده.. كافاني وچاب لي ضيا من آخر الدنيا وعترني فيه»

أمسكت بيده فرفعها وقبلها يربت عليها بحنان... ثم نظر للمتجمهرين حولهم:
«أنا أمد إيدي علشان نبدأ صفحة جديد... ننسى ماضي... أنا دكتور ضياء العوشي... من أصل مغربي وأعيش في فرانس»

للحظات ظنت زينة أنهم سيفضون معاهدة السلام... ولكن وهدان اقترب ليحتضن كف ضياء الممدودة: «مرحب... مرحب بيبك يا دكتور... عيلة الرحامة نورت واتشرفت بيبك... متواخذناش.. أخذتنا فريدة على مشمننا... وطالما بتنا متصانة، يوبجى خلاص الخيرة فيما اختاره الله»

اشتد حنق جاسر منتفضاً: «بس يا عمي...!»

رفع وهدان يده:

«جلت خلاص يا جاسر... فريدة بخير.. وهي شرفتنا بنسب الدكتور.. خولص الحديث»

أوماً ضياء بارتياح مسترقاً نظرة عاشقة لفريدة:

«الشرف لي خالو»

ضحكت فريدة وغمزته: «جوله يا حاج وهدان»

ارتبك ضياء مردفًا: «أعتذر... يا حاج وهدان»

أمسك وهدان بيد جاسر ودفعه ناحية ضياء:

«سلم على چوز بت عمتك... هم يا چاسر مد يدك لچوز بت عمتك»

صرخة ممرضة بجوارهم أجفلتهم:

«مين هنا مع مدام سمحة؟؟ بسرعة يا جماعة المدام بتولد»

ارتبك جاسر وهمهم بكلمات غير مفهومة:

«بتولد... يعني إيه؟؟»

ربت وهدان على كتفه:

«يعني هتوبجى أب يا چاسر... روح يا ولدي خليك ريح مرتك ومتهملهاش...

إن شاء الله تجوم بالسلامة ويهدي سرکم»

هتف يُجيب الممرضة راکضاً کأى أب بانتظار وليده: «أنا يا ست الممرضة... أنا

چوز سمحة»

أوقفته زينة قبل أن يذهب:

«إن شاء الله خير... أول ما سمحة تولد بوسها في جبينها، وقولها حمداً لله على

السلامة»

«فكرک هتسامحني؟؟»

«بس جرب مش هتخسر حاجة... وأنا هتصل بعمي ومرات عمي أبشرهم إن

رشاد جاي»

أطرق رأسه بخجل:

«أنا غلطت في حجک يا زينة»

«وأنا مسامحاك... يلا قبل ما المجنونة اللي بتولد دي تقلب الدنيا»

«على جولتک.... بالإذن»

أمسكتها فريدة من يدها تسألها بتوجس:

«رافع أخباره إيه؟؟»

«ولا حاجة... منتظرين فرج ربنا»

«إن شاء الله خير... أنا هروح أطمّن على سمحة... مش هتاچي معايا يا مرت خالي؟؟»

كان وهدان يدفعها:

«روحي اطمني على البت... روحي يا حاجة خليكي انتي الكبيرة في الواجب... وخليها تدعي لرافع.. دعوتها مستجابة في ساعة الحزة دي»

«أمري لله رايحة أهه.. خديني معاكي يا بت يا فريدة... ربنا يلطف بيها وبرافع ولدي يا رب»

«زينة... انت كويس؟؟»

«اطمن يا ضياء... أنا فرحانة أوي إنكم جيتو... وأكثر أنك واقف مع فريدة... فريدة تستحق راجل زيك»

«هروح أكلّم دكتور، وأسأله عن حالة رافع»

أجرت اتصالاً بأخيها، وطلبت منه أن يبلغ عمه بدخول سمحة للولادة... ثم لاحظت وهدان يحدثها فاعتذرت من أخيها: «لحظة واحدة يا سيف أشوف الحاج

وهدان عاوز حاجة... خير يا حاج؟؟»

«لافييني التلفون عاوز اتحدث معاه»

مدت له التلفون باستغراب، لتسمعه يطلب من سيف آخر طلب توقعته:

«بجولك إيه يا سيف يا ولدي... وانت چاي على المشتشفى، مُر على معالي هاتها

في طريقك... كلاتنا إهه، وهي ملجياش حد يوصلها، ومرت أخوها بتولد... ضروري تكون موجودة.. ولا إيه؟؟»

تبادلت زينة مع والدها نظرات الاستغراب... ثم أعاد لها الهاتف:

«متشكرين يا مرت الغالي... إيه مستغربة الي عملته!! فريدة جالتها... كلاتنا

غلطنا، ومش غلط إننا نسامح... بكفيانا الي حوصل»

أغلق سيف الهاتف زافراً بغضب... سألته أمه:

«خير سيف حبيبي... في مشكل؟؟»

«لع... بس الحاج وهدان طلب مني أمر على معالي أوصلها المستشفى»

«ودي فيها إيه.... إزاي هي روه وهدها؟! انت تكون رادي!؟»

«لع مّا.. بس...»

«مفيش بس... مآلي هاسس بغلط... مش فيها حاجة لما يكون فيه شوية سماه

في كلب.... أقول... ممكن رجأها وأقّب هو إقَاب شديد... إيه رأيك في فكرة

دي؟؟»

«والله مّا إنك فايجة ورايجة.... لما أروح أشوف»



تهدلت ذراعها بجانبها، وسقط التليفون من بين أصابعها دون أن تشعر. لم تصدق

ما أخبرتها به زينة للتو... هل سيمر سيف عليها فعلاً!؟؟ أسرع تتردي ملابسها

على عجل... وركضت للشرفة تتطلع للطريق بلهفة مشتاق، وظلت واقفة بانتظاره

حتى لمحت سيارته من بعيد... نزلت بسرعة تتسابق قدماها مع بعضهما من

سيصل إليه أولاً. فجأة تعثرت قدمها في آخر درجة وسقطت... سمع صرختها وهو

يتوقف أمام البوابة... ترك سيارته وأسرع إليها، ليجدها مكومة على الأرض تن

بتوجع... وقف على رأسها يسألها بقلق دون أن يقترب:

«معالي... انتي بخير؟؟»

حاولت رفع جسدها، ومهانة فطيعة تكسوها غمرت على شعورها بالأم:

«أنا بخير مصابنيش حاجة... عاود يا سيف معايزاش أروح معاك»

«ليه؟؟»

تحركت بصعوبة لتدرك أنها ربما كسرت قدمها من شدة ما تعانیه من أم، هتفت

وهي تركز على أسنانها:

«مش عاوزه وخلص يا سيف هو تحجيج!؟؟»

ركع على ركبتيه أمامها يسألها بنبرة رقيقة:

« لسانك بتكابر يا بت الرحامة؟! حتى الوجة معاو زاش تنخي لچبروته؟! »
بأنين متأوهة:

« معايزاش تشفج عليا.. آني معالي... وهفضل طول عمري معالي »
بنبرة متجهمة هتف بهمرارة:

« انتي متستحجيش حتى الشفجة خصوصي مني، وانتي خابرة »
هتفت بأنين أشبه بالصراخ:

« إيوه يا سيف خابرة... ونفسي أعتز على الطريجة اللي أكفر بيها عن ذنبي..
ملجياش غير إني أموت حالي »

« أعود بالله... أنا هجولك على طريجة... بس نروح المستشفى الأول... نشوفوا
عملتي إيه في رچلك دي »

نظرت ليده الممدودة بارتياب:

« يعني إيه هتشوف عملت إيه »

« لا هعمل كتبيير جوي... عشان أرضى عليكى لازم نكو ني صاغ سليم... يعني لا
رجل مكسورة ولا لسان طويل ولا... »

انهمرت دموعها كالسيل:

« ولا إيه تاني يا سيف بيه؟؟ »

سألها وهو يمد إصبعه ليتلقى إحدى دمعاتها الحارة:

« دموع دي يا معالي؟! معجولة؟! انتي مبكتيش لما سحّطي ولدي! »

أغمضت عينها بقوة تعصرهما، وصرخت بوجع:

« لو كت جاصد تزود عذايي لما تفكرني... اطمئن أنا منسيتش اللي حوصل.. زي ما
يكون ربنا حرّم عليا الراحة من اليوم الشوم ده... ولا ليلة حطيت راسي أنا
وچاني النوم... بحلم بيه يا سيف بين دراعاتي شايلاه ييكي... وجبل ما ألهمه
صدري يسد چوعه، يوجع مني ومبلحجوش... كل ليلة... بعيش نفس الكابوس... »

انت ابنك ضاع منك مرة واحدة. وأنا بيضيع مني كل ليلة... عارف يعني إيه كل ليلة بتحسر على ولدي وهو بيضيع مني؟!»

أخرج تنهيدة طويلة من بين زفراته، ليجد نفسه يمسك برأسها ويضمه ل صدره يهددها، بعد أن مزق نحيبها تلك الطبقة الواقية التي يحيط بها قلبه القاسي.

«هاتي يدك في يدي يا معالي»

رفعت رأسها بلهفة تتطلع لعينه... ومن بين نشيجها وجدت سلاماً يمر من خلال وميضه إليها ليهدد قلبها الموتور... وضعت يدها بين يديه بحذر خوفاً أن تبدد سحر اللحظة وهو يساعدها في الوقوف... نظر بتسلية لملامحها المتألمة، فلم تتمالك نفسها من نظرة التسلية في عينيه: «إيه اللي بيضحك في شكلي!?!»

«هجو لك بعدين»

لم يدر ما أصابه، ولكن رؤية معالي في هذه الحالة من الضعف، حولت إحساسه نحوها من النقيض للنقيض... لأول مرة يراها كأنثى حقيقية... يمكن أن تتألم أو تبكي... وإحساسها بالذنب يتلوى في جرحها الدامي أنزل صقيعاً برّد بعض غضبه منها.



انتهى الطبيب من تضميد قدمها:

«اطمئنوا مفيش أي كسر... مجرد التواء بسيط... تقدر تاخذ المدام وتروحها...»

الدوا دا في حالة الوجة فقط... حباية واحدة بس... يا عمدة»

أزاح عينيه عن عيني معالي يجلي حلقه بخشونة:

«إيوه... إيوه يا دكتور... يعني مفيش كسر صوح؟؟ طب ولسانها لسانه

بحاله؟؟»



مر أسبوع آخر... سمح لها الطبيب أن تتواجد معه في كل وقت؛ ربما ساعده صوتها للخروج من الغيبوبة، كانت تمسك بيده وتشرد معه تحاول جره لعالمها... حتى مشكلتها الصحية أخبرته عنها... لم تترك شاردة وواردة إلا أخبرته بها... خاصة آخر الأخبار... سمحة أنجبت رشاد، وجاسر يكاد يطير به من الفرحة... واليوم حفل سبوع الطفل ولكنهم قرروا تأجيله حتى يقوم رافع بالسلامة.... سيف رد معالي... لم يسامحها تمامًا... فقد سمع نصيحة أمه أخيرًا، وقرر عقابها بعد أن يردها لعصمته... انتشت معالي بالفرحة العارمة وهو يخبرها بما ينتظرها من عقاب؛ فهذا السيف البتار ليس الرجل العبوس الذي تزوجته... حتى وهو يهددها بالعقاب كانت عيناه تومضان بالحب.

جاء خبر حمل فريدة مقيد الفرحة، لم تستطع أن تعلن عنه إلا لزوجها الحبيب، وزينة لعلها تفرج عنها بعض همها.

وضعت جبينها على يده لتتساقط عليها دموعها: «رافع... كل الجوازات أخذوا فرصة ثانية وكمّلوا حكايتهم... وإحنا لسة... انت وحشتني أوي... أكثر بكثير لما كنت غايب عني ويفرق بينا بحور»

لمسة على شعرها سمرتها في مكانها، ولم تجرؤ حتى على رفع وجهها لتراه... ولكن صوته دفع الدموع لتتفجر من عينيها: «ناريسا»

وضعت يديها على فمها لتمنع ضحكاتهما، دموعها تنهمر لا تصدق أنه يفتح عينيها فعلاً وينظر لها:

«انت... انت بجد... رافع... انت صحيت!!؟؟»

أمسكت يده وأخذت تقبلها، بينما ابتسامة مجعدة ترسم على شفتيه، ثم انتفضت واقفة:

« انت صحيت فعلاً!! أنا لازم أبلغهم كلهم! »

أمسك يدها ليقفها، بصوت متحشرج بالكاد مسموع:

«استني عندك... خليني أملي عينا بيكي... صوتك كان معايا كثير ومكنتش قادر أشوفك»

«يعني إيه صوتي كان معاك!!؟ انت كنت سامعني!؟»
«كان صوتك عالي أوي... صعب إني مسمعوش... بأمانة فريدة الي رجعت،
وسمحة الي ولدت، و....»
تراجعت، ولكنه لم يسمح لها مرة أخرى، وهو يعيدها بقربه متمماً بنبرة عتاب،
وبحر من الشوق يهوج به ليل عينيه: «وقلبك الي بيوجعك»
«رافع أنا....»

قاطعها دخول الطبيب يكشف على مؤشرات الحيوية... سرى الخبر كالنار في
الهشيم، وفي ثوان امتلأت غرفته بكل أهله، تتداخل أحاديثهم في صوت واحد
معبراً عن فرحتهم بعودته، ولكنه لم يسمعهم ولم يرههم... لم تر عيناه سواها،
تقف بآخر زاوية في الغرفة تتيح لهم الترحيب بعودته... ثم تركته وغادرت
بإطراقة كسيرة.

لقد عاد رافع، وعاد كل شيء كما كان... هل سمع منها كل اعترافاتها فعلاً؟
أغمضت عينها أخيراً، وقلبها الموجوع مثقل بالهموم.
طرقت الممرضة على بابها:

«مدام زينة... رافع بيه طلبك أكثر من مرة»

«حاضر... أهله روحوا؟؟»

«أيوه يا مدام... كلهم روحوا... حمدلله على سلامته»
دخلت مطرقة.

«إيه يا زينة معايزاش تشوفيني!؟»

«انت زعلان مني أوي كده!؟ لما بتقلب صعيدي بعرف إنك زعلان»

«جري جاري... وأنا أجولك»

بخطوات بطيئة للغاية حتى وصلت له، أمسك يدها ليقربها أكثر.

«عارفة ليه جلبت صعيدي زي ما بتجولي؟! عشان عاوز أعشجك بالصعيدي...

عشج الصعايدة واعر، وأنا حابب أعشجك بالصعيدي»

شهقت مذهولة: «رافع انت بتقول إيه؟!؟»

تتم بنظرات عاتبة:

«زي ما سمعتي... اللعبة الخيانة اللي لعبتها حسابك معايا عسير عليها... ليكي

حج تخجلي... يا مجنونة فيه واحدة تعمل عملك دي!!؟»

«كنت هقولك يا رافع بس انت سبقت واتهمتني... ونرفزتني»

«أنا صعيدي والصعيدي مبهملش تاره واصل... هتشوفي معايا يا زينة أيام أسود

من جرن الخروب»

ازداد شحوبها، فأطرقت خجلة من مواجهته فتابع: «احكي لي حكاية لوسي من طج

طج لسلامو عليكو»

مصدومة سألته:

«وانت عرفت منين!!؟ أنا مجبتش سيرة لوسي خالص وانت في غيبوبة!«

هز رأسه بأسف:

«كان نفسي أعرف منيكي انتي... بس طلعتي چبانة»

«رافع أنا...»

رفع يده يمنعه:

«معايش أسمع مبررات، انتي كتي هتروحي نفسك، وتروحيني معاك»

أطرقت بخجل:

«أنا آسفة... حاضر هحكلك كل حاجة»

بعد أن قصت عليه قصة لوسي.... لم يظهر على وجهه أي تأثير، وتابع بنبرة باردة:

«نيجي للموضوع الأهم... ليه خبيتي عني؟! كتي بتعملي عملية لحالك...

مكتيش مشتاجة لي أكون چارك!!؟ مكتيش عاوزاني أعرف!؟ فاكدة نفسك ملك

حالك؟! انتي ملكي يا زينة... من أول يوم اتجابلنا فيه... الي حوصل بعدين كان

تحصيل حاصل عشان تكوني حجي... بتاعتي... متوحشتكيش يا زينة؟؟

مشتجائيش ليدي تمسك بيدك؟؟ لعيوني تخرج في سما عيونك؟؟»

سالت دموعها وهي تضع يده على وجنتها:

«أوي... أوي يا رافع»

تنهد بقوة ورفع عينيه للسقف:

«انتى عارفة أنا نفسي أعمل إيه دلوك؟؟ أمسكك وأفضل أضربك أضربك لحد ما

أشفي غليلي منيكي... وبعدين أخبيكي في صدري، محدش يتطلع لك، ولا أمك

وأبوكي لحد ما أموت»

«بعد الشر عنك... بلاش سيرة الموت كفاية اللي حصل لنا!»

«عندك حج... بكفايانا موت ودم»

«فكرك الأمور هتهدى على الوضع دا؟؟»

«طبيعة البني آدم الشر.. هو مجبول عليه... ميجدرش يغير من طبيعته... بس

الشر ميعرفش طريق جلب العاشج... لازم الناس تتعلم تحب بعضها علشان

يجدروا يواچھوا الشر ويوجّفوه عند حده»

«انت حد جميل أوي يا رافع... أنا آسفة لأني بعدت... بس خفت لو عرفت إن

قلبي تعبان، ومش هقدر إني أحقق لك حلمك إنك تكون أب...»

«للدرة دي شايفاني راجل عويل!!»

«انت رجل صعيدي... المجتمع كله بيفكر بطريقة قدماء المصريين... ومكنتش

أعرفك»

«وعرفتيني دلوك؟؟»

«أيوه يا رافع... عرفتك لما جيت فرنسا مش علشاني... علشان تنقذ أهلك وأهلي

من بحور الدم»

«يمكن كانت حجة، ولّا مخطرش في راسك الأنشف من حجر الطاحونة ده؟»

«منظرك اللي دخلت بيه عندي مكانش ممكن أفكر بأي طريقة تانية»

«عاوزاني لما أسافر لمرتي آخر بلاد الخواجات، وألاجي راجل غريب بيفتحلي الباب، أعمل إيه يعني أخده بالأحضان؟! لا وإيه.... وبتها بتناديه بابا!!!»
صححت معلومته ضاحكة: «دادا»
زمجر حانقًا:

«زينة... عاوزه تطلعي عفاريتي مرة ثانية!?!»
«لأ خليههم الله يخليك... اقفل عليهم القمقم اوعى تطلعهم»
«طلباتك أوامر يا زينة جلبي، جوليلي عاوزه تجضي شهر العسل فين؟!?!»
«إيه دا!!?! انتم عندكم في الصعيد بتعرفوا شهر العسل كمان?!?!»
«لأ طبعًا.. دا عرض خاص لناريسا... شيطانتي الحمرا المغوية، بس ميتكرش كثير على فكرة.. ممكن تاخدي العرض أو تتخلي عنه لغيرك»
سألته بتشوش: «مين قصدك?!?!»
«مرتي الثانية طبعًا... مش انتي شايفاني رجل صعيدي من قدماء المصريين?!»
يعني يحج لي مثنى وثلاث ورباع، وما ملكت أيهاني»
زمجرت بغیظ:

«رافع... متطلعش عفاريتي!»
«انتني كمان عندك عفاريت?! ما شاء الله! متوقع عيالنا ه يكونوا مجانيين
بالوراثة»
بهتت: «عيالنا?!?!»

«أمال انتي فاكدة إيه؟! إيوه أنا وعدت إني مهملش تاري واصل... بس أوعدك
إنك لما تدوجي عقايي الزوجي اللذيذ، هتطلبليه كل يوم... لحد ما نجيب اللوسي
أخوها وأختها كمان، طبعًا لما صحتك تسمح»
رددت ببلاهة: «لوسي?!?!»

«أيوه طبعًا.. انتني بعقلك الجميل دا فكرتي إني ممكن هخليكي تستولي على فضل
كفالة يتيم لوحدك?! مخبرش إنك أنانية للدرجة دي»

«بس يا رافع... انت... انت مش ممكن تعمل حاجة زي كده!!»

«ليه إن شاء الله!؟»

«لأنك مش ممكن تكون أروع ولا أجمل مما انت فعلًا... انت كثير عليا وأنا مستحقكش.. أنا السبب في كل اللي حصل و...»

انتحبت بنشيج، فجذبها ليضمها على صدره يمسد شعرها:

«انتي عبيطة وهبله... بس هموت فيكي... چاتني فكرة في أول مكان هنروحه في شهر العسل... بس هي أمك ترضى تاخد لوسي عندها كام يوم؟؟»

«ماما مجنونة بلوسي... أكيد مش هترفض... بس انت بتفكر في إيه؟؟»

«هتعرني في وجته... الدكتور كتبلي على خروج بكرة... وبكرة هيكون أول يوم في حياتنا مع بعض... وفي حياة كل الرحامة والبداري»



معصوبة العينين سارت بخطوات حثيثة، متمسكة بحبل أمانها الوحيد (يده) يجذبها بحذر، ويحوطها بحمايته التي أبعدت الخوف عنها تمامًا؛ فتثقتا به بلا حدود، ولكن التلهف والفضول تسيدا مشاعرها:

«رافع... انت هتوديني على فين؟؟»

«وانتي مستعجلة ليه!؟ اصبري»

حاولت الاعتماد على حاسة الشم.... ولكن من فرط توترها تعطلت الحاسة تمامًا.. فجأة وجدت نفسها تطير في الهواء، لتستقر بين ذراعيه. تشبثت بعنقه: «رافع... انت هتعمل فيا إيه؟؟»

لم يرد عليها حتى وضعها بحرص على أريكة خشبية متأرجحة، وكأنها...

رفعت العصبة عن عينيها محمقة فيما حولها... الماء يحيطها من كل جانب، ورافع أمامها يشمر عن أكمامه ويجدف بمجدافي الفلوكة.

تمسكت بمقعدها برعب:

«رافع، دي الفلوكة اللي غرقت بينا؟؟»

«أيوه»

ازدردت ريقها بصعوبة:

«انت مش خايف لتغرق ثاني؟؟»

«انتي خايقة وأنا معاكي؟؟»

تلفتت حولها بارتياب:

«لأ بس... آخر مرة كانت تجربة...»

أوقف التجديف ليقترّب منها، ويمسك بيديها بين يديه: «ناريسا.... بصي بعيوني...»

ناريسي

أجبرت عينها لتتسلخ عن منظر المياه الزرقاء حولها، وتنزل في عمق عينيه بدون جبل نجا.

«وأنا معاكي إوعك تخافي من أي حاجة واصل»

هزت رأسها بحذر... وقف ليزداد تأرجح المركب، أمسك بيدها ولم يفلتها، يوقفها أمامه، وأحاطها بذراعيه:

«اهدي واطمني... ماشي»

بتردد مختلصة النظر للمياه الزرقاء حولها من جميع الجهات: «أوك رافع...»

بس؟؟»

«زين... فاكدة لما جلتك إني مش ههمل تاري منيكي؟؟»

سألته بارتياب: «وليه بتقول كده دلوقتي!؟؟»

«علشان أقولك إني هبدأ شهر العسل دلوقتي حالاً... بس امسكي فيا زين»

تأملته بارتياب يُخرج تليفونه من جيب جلبابه ويضعه جانباً.

اخترقت صرختها القوية السحاب المتنف في بساط من اللون الأزرق... وهو يحيط

جسدها بذراعيه ويقفز بها في النيل... لم يتركها كما وعدّها... فتحت عينها

بصعوبة تسعل وتبصق الماء، وتحاول إبعاد الشعر عن وجهها لاهثة بصراخ

يقاطعه قهقهاته المتسلية: «انت.... انت مجنون!»

« عمري ما خطر ببالي أني أعشج نار، تخرجني، تكويني، وأنا كامشها بين دراعاتي، كل لحظة عشجي ليها بيزيد، ومش طالب مية تطفي حريجي»
أحاطت عنقه بذراعيها بقوة لاهثة، لا تصدق ما فعله للتو... أخذت تشهق بشهقات متتابة وهو يقهقه ضاحكاً:

«انت مبسوط؟؟»

«وانتي معايا»

«رافع»

«عيون رافع وجلب رافع وعذاب رافع سنين طويلة»

«اوعى أغرق»

«اوعي ما تغرقيش»

احمرت بخجل، وهو يقترب بوجهه حتى كادت شفاهما أن تتلامس. عندما قطع لحظتهما الرومانسية رنين تليفونه... لم يتحرك من مكانه، فسألته:

«مش هنطلع من المية دي؟؟ تليفونك بيرن»

غارقاً بين أمواجها الزرقاء، هتف بدون أن يحيد عنها:

«خليه يرن... الي عاوزني هيفوت رسالة»

«بس يا رافع...»

قاطعها صوت سمحة يصرخ من التليفون:

«رافع انت فين؟؟ وفين زينة؟؟ انتم تاجو دلوك تطلجوني من الراجل ده... إلا

وجسماً عظماً... اكتله وأخلص منيه... ولأ خلاص انتم غرجانين في العسل وفايتين

لي چاسر يبيع ويشترى فيا؟! زينة... رافع... حد يرد عليا!»

التقت أعينهما من جديد، ومياه النيل تحيط بهما من كل جانب... ثم انطلقا

يضحكان... اقتربت منه وهمست: «رافع... أنا بحبك»

شمخ بأنفه بكبرياء: «ما أنا خابر»



تمت بحمد الله

◀ إصدارات دار الفؤاد للنشر والتوزيع ٢٠١٦ ▶

المؤلف	النوعية	الكتاب
عبد الحميد السنبسي	أدب رحلات	دقات على باب الغربية
محمد عبد الغفار	توثيقي	ثورة محظورة النشر - ط ٢
رباب فؤاد	رواية	أزمة ثقة - ط ٢
دعاء سيف	مجموعة قصصية	ولادة متعسرة
محمد سمير رجب	مجموعة قصصية	أقرباذين
كتاب جماعي	كتاب جماعي	حب في زمن الثورة
سناء البريتي	رواية	نقطة.. رجوع إلى السطر
محمد عبد العاطي	رواية	أصل الحكاية
محمود الجوهري	ديوان شعر	ورقة في دوسيه
أدمنز صفحة الضاكتور	كتاب ساخر	شعب مالوش كتالوج - ط ٢
مصطفى محمود	كتاب تحفيزي	انتفاضة العملاق الداخلي
عبد الرحمن سعيد	شبابي	خطوة لربك
رضا ربيع	رواية	التوقعات المرئية للخطوبة المصرية
سلافه الشرقاوي	رواية	زوجة مستقلة
إسلام علي/إلهامي مجدي	رحلة فانتازية	فانتوبيا
آلاء زهير	تلوين للكبار	حياة خفيفة على جناح فراشة
محمود إمام	توثيقي	شمس بين الضباب
عبير جمال الدين	تأملات	مرايا الروح
عبير جمال الدين	مجموعة قصصية	بعض منا
ميرفت البلتاجي	رواية	ناريسا
محمد محسن	رواية	اتفضل في الصالون